

潘美月杜潔祥 主編

第十六編 第二一冊

尚書古注便讀

〔清〕朱駿聲 撰 葉正渤 點校

花木蘭文化出版社 出版



古典文獻研究輯刊

十六編

潘美月·杜潔祥 主編

第21冊

尚書古注便讀

[清]朱駿聲撰 葉正渤 點校



國家圖書館出版品預行編目資料

尚書古注便讀/ 清 朱駿聲 撰 葉正渤 點校 - 初版

一新北市:花木蘭文化出版社,2013 (民 102)

目 4+218 面: 19×26 公分

(古典文獻研究輯刊 十六編: 第21 册)

ISBN: 978-986-322-172-2(精裝)

1. 書經 2. 注釋

011.08

102002360



ISBN: 978-986-322-172-2

古典文獻研究輯刊

十六編 第二一冊

尚書古注便讀

作 者 [清] 朱駿聲 撰 葉正渤 點校

主 編 潘美月 杜潔祥

總 編 輯 杜潔祥

企劃出版 北京大學文化資源研究中心

出 版 花木蘭文化出版社

發 行 所 花木蘭文化出版社

發 行 人 高小娟

聯絡地址 235 新北市中和區中安街七二號十三樓

電話: 02-2923-1455 / 傳真: 02-2923-1452

址 http://www.huamulan.tw 信箱 sut81518@gmail.com

印 刷 普羅文化出版廣告事業

初 版 2013年3月

定 價 十六編 30 冊 (精裝) 新台幣 50,000 元 版權所有・請勿翻印

尚書古注便讀

[清]朱駿聲 撰 葉正渤 點校

點校作者簡介

葉正渤,江蘇省響水縣人(原屬濱海縣),教授,文學碩士。1988年6月陝西師範大學中文系漢語史專業碩士研究生畢業。畢業後赴雲南師範大學中文系任教,講師。1995年2月調入徐州師範學院中文系任教,1997年7月晉升為副教授,2003年8月晉升為徐州師範大學文學院教授。古代漢語優秀課程(群)負責人,漢語言文字學專業、中國古典文獻學專業碩士研究生導師。主要從事古代漢語、古文字學、古漢語詞彙學和先秦兩漢文獻的教學與研究。中國語言學會、中國古文字研究會、中國文字學會、江蘇省語言學會會員。國家哲學社會科學基金項目通訊評審專家、成果鑒定專家。主持國家哲學社會科學規劃項目一項,教育部人文社會科學一般項目一項,江蘇省高校人文社會科學研究基金項目二項,江蘇省高校古籍整理研究項目二項。發表學術論文、譯文90餘篇,參加《中國書院辭典》(1996)的編寫,和李永延先生合著《商周青銅器銘文簡論》(1998,1999年獲江蘇省社科優秀成果評選三等獎),另著《漢字部首學》(2001)、《漢字與中國古代文化》(2003)、《金文月相紀時法研究》(2005,2008年獲江蘇省高校社科成果評選二等獎)、《上古漢語詞彙研究》(2007)、《葉玉森甲骨學論著整理與研究》(2008,2010年獲江蘇省第十一屆哲學社會科學成果評選二等獎)、《金文標準器銘文綜合研究》(2010),點校〔清〕朱駿聲《尚書古注便讀》。

提 要

《尚書古注便讀》是 〔清〕 朱駿聲「欲求原流,明晰繁簡,適當便於學子研讀」,「乃博 采漢訓,間及宋說,鈎玄擷要,溯本竆原,天文徵諸實算,輿地證以今時,偽書不加注釋,考 文詳其出典,於是三十篇之今文,明通可誦,二十五篇之偽書,出處能尋」而寫的(宗孫朱師 轍序)。成都華西大學 1935 年收入《國學叢書》予以刊印。1976 年臺灣廣文書局收入《國學珍 籍彙編》影印出版,白文,未加標點。由於該書具有很強的學術性與研究參考價值,但是至今 尚無標點本出版。為便於今之讀者閱讀與研究,點校者對該書加了新式標點,並對該書中出現 的某些非學術性錯誤進行了校勘,作了校勘記。又將原豎排版改為橫排版,仍用繁體字印刷。 正文用四號字,注釋用五號字單行編排。

本書是 2010 年度江蘇省高校古委會 立項項目最終研究成果之一

尚書古注便讀 跋(一)

余積年來箸書九十餘種,無力盡刊,置之篋衍。此書道光癸巳在濟南脫稿,忽忽二十四年矣。日暮途遠,人間何世,自等敝帚之享,已無選梨之望。今得博雅好古之士友梅宗兄,見許其可傳,爲之參校,毅然梓而行之,非其幸與!余老矣,得一知己,可以不恨。所尤幸者,於流離顚沛之中,乃獲此賞心樂事也。咸豐六年二月石隱朱駿聲識。

師轍謹按:友梅先生名鏡蓉,曾助 先大父刊《說文通訓定聲》,後議刊 斯編,條遭粵匪亂,破產,卒未刊行。

尚書古注便讀 跋(二)

清代治《尚書》者浩蘇,今古文僞書之爭尤盛。自閻百詩《古文尚書疏證》出,而僞書灼然。雖以毛西河之辯,亦不能推翻銕證。繼起彰閻氏者,則有惠棟、江聲、王鳴盛、孫星衍、段玉裁、丁晏、俞樾、王先謙諸家,皆攷覈精密,多有心得。右毛氏者,則有王劼、張崇蘭、洪良品、吳光耀諸家,亦持之有故,言之成理。此攻僞與辨誣兩派之尤箸者。其間知古文之僞而不主廢棄者,則有陽湖莊存與,復以《公羊》義釋諸經,實開清季今文學派之風。繼之者,則其孫述祖、其甥劉逢祿,而龔自珍、魏源、陳喬樅、皮錫瑞,皆承其風而述作,各有發明,然未免求新而穿鑿。《尚書・禹貢》一篇,復多專書,而以胡渭《錐指》爲尤精博。此清代治《尚書》最箸諸家之大略也。

先大父生當嘉、道之際,研小學,兼通群經,見《尚書》家弦戶誦者蔡 沈《集傳》,未能明眞僞之本,通訓詁之原,注疏既尊崇僞孔諸家,多偏重 辨僞,欲求原流明晰,縣簡適當,便於學子研讀者,渺不可得。乃博采漢訓, 間及宋說,鈎玄擷要,溯本竆原,天文徵諸實算,輿地證以今時,僞書不加 注釋,攷文詳其出典,于是三十篇之今文,明通可誦,二十五篇之僞書,出 處能尋。故斯編既具顓門,復便誦習,以視諸家之書縣博難讀,何如也?孔 子曰:「博學而反約之」, 先大父斯編,合于尼山此旨矣。

師轍謹按:書稿成于道光十三年,其後黟朱茂才友梅、常州楊大令佩瑗、銅山徐將軍又錚,暨河南大學,先後擬刊行,皆未果。其間,劉君申叔栞國故于北京大學,坿印未半,劉君歿,中輟。 先君居江楚編譯局時,某以擬刊叚閱,久不歸,幾喪遺稿。 先君嚴辭索之亟,始獲反璧。師轍方侍側, 先

君誠之曰:繼自今,遺稿無副不可以叚人。故後雖婁喪副本,遺稿賴保存,皆 先君之教也。今春師轍應成都華西大學教授之聘,挈副本往,嚴君谷孫欲梓行,華西文學系主任程芝軒先生,道高德劭,雅重讀經,時校中議刊《國學叢書》,先生首以斯編付印,計距 先大父書成百又三年矣。豈惟裔孫私衷欣幸,而 先大父之靈亦將含笑于九京。司馬子長謂「箸述當臧諸名山,傳諸其人。」 先大父斯編,婁遘梗阻,豈亦所謂將待其人而傳之者歟!今幸睹告成,故略識顚末,以診來茲。

民國二十四年七月 孫師轍謹識

凡例

- 一,篇弟仍依今本,不以古目爲敘。
- 一,晚書不注,但著其引用出處。
- 一,注中某,某也,某也,上某爲假借,下某爲本字之訓。如:尚,上 也,高也。言尚字借爲上字,上字之訓則高也。餘仿此。此依《毛 詩傳》「調,朝也,壞,瘣也」之例。
- 一,注中某,某也,猶某也。所云猶者,乃轉注之誼。如「既,汔也, 猶盡也。」汔之本訓爲水涸,其引申之誼,則爲盡也。「稽,計也, 猶考覈也。」計之本訓爲會算,其引申之誼,則爲考覈也。
- 一,地名、山水,必注本朝在何省何縣,以覈其實。
- 一,古注不專從鄭,雖宋人說弗廢,實事求是,頗有折衷。
- 一,逸篇之句,有見于古書所引者,零章斷字,既無全文,或難索解, 亦復略諸。

孫師轍謹校



尚書古注便讀		
尚書古注便讀	跋	(-)
尚書古注便讀	跋	(_)
万 街 山		

ŀ	7)	

尚書古注便讀	卷之一	1
堯 典		1
舜 典		6
汨 作		15
, , , , ,		
大禹謨		15
皋陶謨		19
尚書古注便讀	卷之二	29
夏 書		29
禹 貢		29
甘 誓		51
五子之歌		52
允 征		54
尚書古注便讀	卷之三	57
商 書		57
帝告 釐沃 …		57
湯 征		57
汝鳩 汝方…		57
夏社 疑至	臣扈	57
湯 誓		58
仲虺之誥		59
湯 誥		60
咸有壹德		62
典 寶		63
明 居		63
伊 訓	,	63

	肆	命	65
	徂	后·····	65
	大甲	<u> L</u>	65
	太甲	中	66
	太甲	I F	67
	沃	T	68
	咸	X	68
	伊	陟	68
	原	命	68
	中	Ţ	69
	河亶	[甲	69
	祖	Ζ	69
	盤庚	£L	69
	盤庚	中	74
	盤庚	F	77
	說命	<u> </u>	79
	說命	i 中······	80
	說命	T	81
	高宗	形日	83
	高宗		84
	西伯	戡黎	84
	微	子	86
님	書古	5注便讀 卷之四上	89
	周	<u> </u>	
	泰誓	<u> </u>	89
		· 幹中······	
	and a bound	<u> </u>	
	牧	誓	
	武	成	
	洪	ñ	
	分	器	
	旅	整	
		全命·····	
		縢	
	2454	19717	

大			115
微子	之命		119
歸	禾······		120
嘉	禾	****	121
尚書古	行注便讀 卷之四中		123
康			123
酒	誥		130
梓	材		135
召	誥		
洛	誥		
多	±		151
無	逸		155
君	奭		
	政		
	姑······		
	注便讀 卷之四下		
蔡仲	'之命		
多	方		
立	政		
賄息	慎之命		
亳	姑		
周	官		179
君	陳		182
顧	命 ·····		
康王	之誥		191
畢	命		193
君	牙		194
四	命		
呂	m		
	之命		
費	誓		
秦	-		
图:《3	凊史稿・儒林二》朱駿樫傳		211

尚書古注便讀 卷之一

尚,上也,高也。書,箸于竹帛者也。孔子尊而命之曰《尚書》,重之若 天書然也。

元和朱駿聲豐芑甫集訂

虞書

虞舜氏,後以爲有天下之號也。《堯典》雖紀唐堯之事,因虞史伯夷所作,故曰《虞書》,凡十六篇。

堯 典

堯,唐帝諡,帝嚳之子,帝摯之弟也。典者,冊在丌上,尊閣之也。後 世以其所載之事可爲常法,故又訓典爲常也。孔子《書敘》曰:「昔在帝堯, 聰明文思,光宅天下,將孫于位,讓于虞舜,作《堯典》。」

曰若稽古,帝堯曰放勳,欽明文思,安安允恭克讓,光被四表,格于上 下。

日,發語詞。若,順也,下皆同。稽,計也,猶考覈也。古,十口相傳之前言也。帝,天稱也。聖人王天下者,同于天,故亦稱帝也。放勳,堯名。放,旁也,溥也。勳,能成帝功也。欽,鎮也,低頭致敬也,故威儀悉備曰欽。明,照也,照臨四方曰明。文,於也,戫也,故經緯天地曰文。思,睿也,道德純備曰思。安,竫也。安安,猶晏晏,寬容覆載之意也。允,信。恭,肅也,不懈于位曰恭。克,能也。讓,攘也,推也,推賢上善曰讓。光,明也。被,彼也,往有所加也。四表,四海之外也。格,徦也,至也。于,

詞也。上,天;下,地也。言堯德光耀及四海之外,至于天地,所謂大人, 與天地合其德,與日月合其明也。欽、明、文、思、安安,本其德性而言也。 允恭克讓,以其行實而言也。至于被四表,格上下,則德行之所極也。

克明俊德,以親九族。九族既睦,平章百姓。百姓昭明,協和萬邦。黎民於變時雍。

俊,峻也,高大也。德,悳也,內得于己,外得于人也。堯之大德,上 文所稱是也。以,用也。親,愛也。族,屬也。九族,謂高祖至元孫同屬之 親者,古文家孔安國說也;謂父族四、母族三、妻族二者,今文家歐陽氏說 也。既,汔也,猶盡也。睦,敬和也。平,當作冊,讀若辨,猶別也。下皆 同。章,彰也,明也。百姓,羣臣之父子兄弟也。昭,亦明也,言皆能自明 其德也。協,合也。和,龢也,調也。萬,盈數也。邦,國也。萬邦,統中 夏蠻貉,極言其多也。黎,齊也。黎民,猶眾民也。於,烏也。用爲於虖者, 詞也。變,更也,改惡爲善也。時,是也。雍,當作雖,雖渠脊令也。其音 雝,雖而龢,故以爲和順之義,民協服之象也。此言堯推其德自身而家而國 而天下,所謂光被四表者也。

乃命羲和,欽若昊天,歷象日月星辰,敬授人時。

乃,始詞也。命,猶令也。羲者,顓頊時司天南正重之後;和者,司地 火正黎之後,至堯復使典其職,俾順天以立法也。元氣廣大曰昊天。歷,過 也,謂七政行天,記其所過之書也。象,像也,猶形也,謂璿璣玉衡所以觀 天之器也。日,太陽之精,一日一周天;月,太陰之精,一月一周天。星, 金、木、水、火、土,五緯也。土,填星,二十八歲一周天;木,歲星,十 二歲一周天;火,熒惑,二歲一周天;金,太白;水,辰星,皆一歲一周天。 辰,二十八宿,日所行之黃道,即月與日會之十二次也,二萬五千四百十二 歲一周天。敬,肅也。授,予也。人,當作民,因時以授民事,故曰民時。

分命羲仲, 宅嵎夷, 曰暘谷。寅賓出日, 平秩東作。日中, 星鳥, 以殷仲春。厥民析, 鳥獸孳尾。

此下四節又分職以考驗之、恐推步之或差也。上文所命、蓋羲伯爲稷官、和伯爲司徒、如《周禮》之天官、地官也。此乃分命其仲叔、如《周禮》之春官、夏官、秋官、冬官也。分、別也。仲、中子也。羲仲、秩宗之官、猶

宗伯也。宅,度也,測量也。下皆同。嵎,堣也,即《禹貢》青州之嵎夷,今山東登州府,隔海相對朝鮮地也。暘,日出也。兩山之間,泉出通川爲谷,蓋測候之所也。寅,夤也,敬也。賓,儐也,導也。謂春分朝日而識其初出之景也,後世因之以定里差焉。平,當作冊,辨別也。下皆同。秩,豑也,敘也。作,生也。物生于東故曰東作,謂春月三農生九穀之時也。日中者,古制刻漏,晝夜百刻,春分則晝夜各五十刻,于夏永冬短爲適中也。星鳥,朱鳥之宿也。堯時春分七星,昏中于南方,今時則井中矣,後世因之以定歲差焉。蓋恒星每歲東行五十一秒,大判七十年而不及宗動天一度,故有差耳。殷,檃也,中也,猶正也。言以物之生、晝之日、昏之星,定仲春時也。厥,發語詞,猶言其也。析,分散也。冬時民聚于奧,今農事方興,散布在野也。二足而飛曰鳥,四足而走曰獸。孳,乳化也。尾,交接也。以物之生育,而驗其氣之溫也。

申命羲叔,宅南,曰大交。平秩南訛,敬致。日永,星火,以正仲夏。 厥民因,鳥獸希革。

申,緟也。叔,少也,少子稱叔。羲叔,《周禮》司馬之官也。大交,南方交趾之地,今安南國也。《書·大傳》云:「中祀大交」,與「秋祀柳谷,冬祀幽都」對文,蓋亦山名也。鄭康成曰:「夏不言曰、明、都三字,摩滅」,其說無據。訛,古作譌,讀爲僞。施,治也。謂夏月時物長盛,所當作爲之農事也。致,至也,日至也。以夏至日中立八尺之表,視其晷景,尺有五寸,爲短之極也。永,長也。景短,故晝長,其漏六十刻也。火,謂大火,蒼龍宿也。堯時夏至昏中當爲箕,今則亢中矣。正,猶定也。因,就也,言就高也,即《月令》「仲夏居高明」,遠眺望升山陵處臺榭之誼也。希,稀也,疏也。革,猶皮也,毛疏而皮見也。

分命和仲,宅西,曰昧谷。寅餞納日,平秩西成。宵中,星虚,以殷仲 秋。厥民夷,鳥獸毛毨。

和仲,士官,《周禮》之司寇也。西,隴西兌山,在今甘肅秦州界。昧,當作杯,讀爲申酉之丣。正西爲酉,方日入于酉時,故稱丣谷也。餞,送行之名。納,內也,入也。謂秋分日入後夕月,而兼測月之九行也。西成者,西爲陰中,萬物所成,收穫之時也。宵,夜也;宵中,晝夜各五十刻也。此獨言宵者,承上納日夕月而言也。星虚,元武之宿虚星也。秋分昏中,今時

則斗中矣。夷,**德也**,平也,暑退而氣和平也。**悉**,毛更生也,毛盛可選取 爲用也。

申命和叔,宅朔方,曰幽都,平在朔易。日短,星昴,以正仲冬。厥民 隩,鳥獸氄毛。

和叔,共工之官,《周禮》之司空也。朔,月與日會也。合朔時刻雖無定,而一月一周天。朔與望、弦分四位,則朔必在正北爲定,故朔又爲北也。方,傍也,猶邊也。幽都,《海內經》云:「北海之內有山曰幽都之山」,今直隸順天府密雲縣東北,塞外地也。在,察也。易,傷也,更改也。曰爲改歲,令民謹,蓋藏務積聚也。按:《史記》「朔易」作「伏物」,其誼爲長。日短者,晝四十刻也。星昴,白虎之宿昴星也。冬至昏中,今時則室中矣。隩,奥也,室之西南隅,《詩》所謂入此室處也。氄,當作釋,讀如朕,毛盛溫柔也。堯既命造歷制器,而復分方與、時,使各驗其實。聖人之敬天勤民,其愼如是,是以術不違天,而政不失時也。

帝曰:「咨!汝羲暨和。**朞**三百有六旬有六日,以閏月定四時,成歲。 允釐百工,庶績咸熙。」

咨,謀事也,訪問于善日咨。汝,偁人之詞,猶言爾也。暨,息也,與也。朞,稱也,復其時也,即所謂歲周。十日日旬。閏者,餘分之月也。定,正也。四時,春夏秋多也。成歲者,成一歲之歷,使分至啓閉不失其常,將以授民時,且記時事也。蓋天體至高至圓,繞地西行一日一周,本無度數可紀,以日之麗天亦一日一周而少不及,積三百六十五日四分日之一,而周復其故處,與天會合,故分天度爲三百六十五度四分之一,是一歲日行之數也。今云六日者,舉成數言耳。月麗天西行一日行十三度十九分度之七,積二十七日九百四十分日之三百一十四而與天會,更越二日,凡二十九日九百四十分日之四百九十九而與日會,是爲一月。每歲十二會,通計得全日三百五十四日九百四十分日之三百四十八,是一歲月行之數也。歲有十二月,月有三十日。三百六十者,一歲之常數也,故日與天會而多五日九百四十分日之二百三十五爲氣盈,月與日會而少五日九百四十分日之五百九十二爲朔虛。合氣盈朔虛,而一歲餘十一日弱,未滿二歲已成一月,則置閏焉。故一歲閏率,則十日有奇;三歲一閏率,則三十二日有奇;五歲再閏,則五十四日有奇;十九歲七閏,則氣朔分齊,是爲一章也。夫三年不置閏,則春之一月入于夏,

而時漸不正矣。子之一月入于丑,而歲漸不成矣。積之又久,則名實乖舛, 寒暑反易,農桑庶務皆失其時,故必以此餘日置閏月于其間,然後四時不差, 而歲功有成也。釐,理也。工,讀爲官。庶,眾。績,功也。咸,僉也,皆 也。熙,光明也。言以此信治百官,而眾功皆昭著也。

帝曰:「疇咨若時登庸?」放齊曰:「胤子朱啟明。」帝曰:「吁!嚚訟,可乎?」

堯之末年,羲、和皆以老死,故求賢以代之也。疇,屬也,誰詞也。登, 陟也。庸,用也。放齊,臣名,允嗣也。朱,丹朱也,封于丹川,亦曰丹朱。 啓,启也,開也,言其性開明,可登用也。吁,驚詞也。口不道忠信之言爲 嚚,讙譁而爭爲訟。可乎,言不可也。朱蓋以開明之才用之于不善,故嚚訟 也。此見堯之至公至明,深知其子之不可用,不以一人病天下也。

帝曰:「嚋咨若予采?」驩兜曰:「都!共工方鳩僝功。」帝曰:「吁!靜言庸違,象恭滔天。」

采,猶官也。驩兜,臣名。都,於詞也。共工,水官,其人名氏未聞。 或曰即竆奇也,或又云名康回,非是。方,旁也,溥也。鳩,逑也,歛聚也。 僝,當作孱,讀若翦,具也。功,以勞定國也,言廣聚以具其功也。靜,彰 也;靜言,謂巧言飾說也。違,多也。庸違,謂動作衰辟也。象,像也;象恭, 謂令色也。滔,嫚也。滔天者,不畏天者也。

帝曰:「咨!四岳,湯湯洪水方割,蕩蕩懷山襄陵,浩浩滔天。下民其咨,有能俾乂?」愈曰:「於!鯀哉!」帝曰:「吁!咈哉,方命圮族。」岳曰:「异哉!試可乃已。」帝曰:「往,欽哉!」九載,續用弗成。

四岳,四時之官,主泰山、霍山、華山、恒山之事。羲和、仲叔既殁,別命四人爲四伯以治之者也。湯湯,水盛貌。洪,洚也,水不遵道也。方,旁也,溥也,猶徧也。割,害也,患也。蕩蕩,水潒漾也。懷,襄也,夾也。襄,驤也,駕也。大阜曰陵。浩浩,廣大貌。滔,漫也,勢若滿天也。下民,下土之民。其,語詞也。咨,嗞也,嗟也。俾,使也。乂,嬖也,治理也。愈,皆也。鯀,臣名,封崇伯,禹之父也。咈,韋也。方,放也,棄也。命,帝令也。圮,毀也。族,屬也,類也。《離騷》謂「鯀婞直亡身」,蓋師心自用,與眾不和也。异,舉也,試己皆用也。乃,詞之難也,言試以治水而或

帝曰:「咨!四岳!朕在位七十載,汝能庸命,異朕位?」岳曰:「否德 忝帝位。」曰:「明明揚側陋。」師錫帝曰:「有鰥在下,曰虞舜。」帝 曰:「俞,予聞。如何?」岳曰:「瞽子。父頑,母嚚,象傲,克諧。以 孝烝烝,又不格姦。」帝曰:「我其試哉!女于時,觀厥刑于二女。」 釐降二女于媯汭,嬪于虞。帝曰:「欽哉!」

朕,發聲之詞,古人自稱之通號。言我老耄,汝諸侯之中,有能順用天命,可以踐處我位者乎?巽,踐也,履也。否,啚也,猶恆也。忝,辱也,言無盛德之諸侯也。揚,舉也。側陋,仄恆也,謂隱匿陿隘之地者。明明,察舉貴戚也。揚側陋,超舉疎遠者也。師,猶眾也,四岳同詞以對也。錫,賜也,予也。鰥,悹也,無妻者曰鰥,言不得志如疾病也。虞地,今山西解州安邑縣。舜,名也,《山海經》作「俊」。舜居于虞,因以爲氏也。俞,應詞也。予,余也,亦自稱之詞,言我亦曾聞其人也。如何者,復問其詳也。瞽,目但有朕也。瞽瞍,舜父,爲樂官者。心不則德義之經爲頑。象,舜異母弟。傲,倨也,反悌曰傲。諧,龢也。善至母爲孝。烝烝,厚也。乂,嬖也。格,假也。姦,奻也,爭訟也。言舜能和于父母與弟,孝德深厚,自治以式,化一家不至爭訟也。試,試以爲臣之事也。女,以女妻人也。時,是也。刑,型也,法也。二女,長娥皇,次女英也,以觀其內能型于妻否也。釐,飭理也。降,下也。嬀水,在今山西平陽府蒲州界,水北曰汭,舜所居處也。嬪,婦也,爲婦于虞氏也。

〇帝曰欽哉,將試舜而飭使敬其職也。此四字當連下「愼徽五典」爲一節, 僞書分「欽哉」上爲《堯典》,以下爲《舜典》,非也。

舜典

《書敘》曰:「虞舜側微,堯聞之聰明,將使嗣位,歷試諸難,作《舜典》。」 此篇亡于西晉永嘉之亂。今僞書則分《堯典》「愼徽」以下當之也。

曰若稽古,帝舜曰重華,協于帝。

「日若稽古、帝舜日重華」、《尚書中候・考河命》文也。蕭齊姚方興上

書時,加此十二字以爲《舜典》之首。

濬哲文明, 溫恭允塞, 玄德升聞, 乃命以位。

「濬哲」、「溫恭」,字皆見《商頌》。「文明」,見《易·文言》。「允塞」, 見《周詩》。「舜執元德于心而化馳若神」,見《淮南》書。此十六字,隋劉炫 僞造也。

慎徽五典,五典克從;納于百揆,百揆時敘;賓于四門,四門穆穆;納 于大麓,烈風雷雨弗迷。

順,謹也。徽,媄也,善也。五典,父義、母慈、兄友、弟恭、子孝,即五品也。克從,言無違教也。此試以地官之職也。納,內也,入也。揆,度也。百揆主后土以度百官之事,蓋試以冬官之職而兼領天官也。敘,次第也。時敘,言無廢事也。賓,儐也,出接賓者也。四門,四方之門,謂朝諸侯于明堂,東南西北爲外四門,應庫皋雉爲內四門也。穆穆,和敬也。言諸侯朝者皆肅敬盡禮,無凶人也。此試以春官、夏官之職也。林屬于山爲麓,此山曰巏嵍,在今直隸順德府唐山縣。堯爲壇于國外大麓之野,將命諸侯以舜居攝之事,使舜築之。舜入山林而逢暴風雷雨,眾懼,失常,而舜行不迷也。烈,猛。迷,惑也。此將命之陟位,又試以秋官之職如司儀者也。

帝曰:「格!汝舜!詢事考言,乃言底可績,三載。汝陟帝位。」舜讓于德,弗嗣。

格、假也、來也。詢、當作訊、謀也。事、職也。考、覈也、猶言稽也。乃、猶汝也。底、定也。三載、賓四門之後三年也。蓋堯試舜凡二十年,愼徽五典、至納于百揆、歷時最久。賓門後又已三年、故言總計汝事汝言、定可有功、今又三載、朕信益深、汝宜登帝位也。讓、攘也。德、悳也。嗣、繼也。攘于德、推攘于有德之人也。

正月上日,受終于文祖。

帝王易代,莫不改正建朔,堯正建丑,舜正建子是也。此時未改堯正,故云正月,即位乃改之,故下月正也。上日,上旬之日也。受,相付而承之也。終,成也,受堯之成也。文,彭也。文祖者,感生帝赤熛怒也,火彭明之象,故曰文。凡祀五帝之廟,唐謂之五府,略如周之明堂。堯火德,故感生于赤帝,時舜將攝位,告廟以告天也。

在璿璣玉衡,以齊七政。

在,察也。璿,美玉也。璣,機也,主發謂之機。衡,橫也,謂橫簫也。轉運者爲機,持正者爲衡,略如後世之渾天儀也。齊,平也,推步以驗其平也。政,正也,中也。七政,日月五星也。運行于天,有遲有速,有順有逆,察以齊之,所以正四時也。舜初攝位而首察之,猶堯命歷象也。觀象之器,古必有其法,遭秦而滅。漢宣帝時,始鑄銅而爲之象,其器失傳。劉宋時,所作渾天儀,傳于齊、梁、陳、隋,衡長八尺,孔徑一寸,機徑八尺,圓周二丈五尺強,轉而望之,以知日月星辰之所在。唐宋以來,其法漸密,大約爲儀三重,其在外者曰六合儀,以考上下四方;在中者曰三辰儀,以考日月星辰;最在內者曰四游儀,以爲占候者。旋轉而窺七政,月距地最近,其上水,其上金,其上日,其上火,其上木,其上土也。又其上恒星天,又其上宗動天,無星,所謂九重是也。按《尚書大傳》以旋機爲北極,玉衡爲斗柄,《春秋運斗樞》以旋機爲斗魁弟二弟三星,玉衡爲斗杓弟五星。然古書質實,衡何獨以玉稱?恐非也。《大傳》鄭注以七政爲春、秋、冬、夏、天文、地理、人道。然地理、人道與天文不同實,恐亦非也。

肆類于上帝,禋于六宗,望于山川,偏于墓神。

肆,當作肆,讀爲素,从詞也。類,藏也,以事類祭天也。上帝,太一神,在紫微宮,天之最尊者,即北極耀魄寶,冬至祭于圜丘者也。禋,絜祀也,精意以享曰禋。宗,尊也。六宗,若《周禮》之星、辰、司中、司命、風伯、雨師也。星,五緯,辰,二十八宿也。司中、司命,文昌弟五、弟四星也。風伯,箕也。雨師,畢也。按:二十八星宿之外,又分祭箕、畢也。伏生則以六宗爲天、地、春、夏、秋、冬也。望,遠視也。山川四嶽,岱、霍、華、恒;四瀆,江、淮、河、濟,皆遠望以祭也。徧,周匝也。羣神,若《周禮》邱陵墳衍之屬,以尊卑次秩祭之也。蓋以攝位告天神地祇也。

輯五瑞。既月乃日。覲四岳,羣牧,班瑞于羣后。

輯, 戰也, 歛聚也。瑞, 以玉爲信也。五瑞, 桓圭、信圭、躬圭、穀璧、蒲璧也。古者五等諸侯執所受命圭, 以朝天子; 天子執瑁以冒之, 以爲符驗。 凡諸侯無過者, 歸國時復其圭璧, 有過者留其圭璧, 故來朝時先輯也。既, 汔也, 盡也。既月, 盡正月也。乃日, 擇日也。覲, 見也。四岳, 四方諸侯 也。羣, 猶輩也。牧, 監察也, 十二州之長入天子之國曰牧。班, 分瑞玉也。 后,繼體君也。羣后,即四岳也。堯將禪舜,故先收諸侯之瑞,既乃使舜受 覲返還其瑞,若舜新班然。蓋令羣牧分授之,非舜一一親班之也。

歲二月,東巡守,至于岱宗,柴。望秩于山川,肆覲東后。協時月正日, 同律度量衡,修五禮、五玉、三帛、二生、一死,贄如五器,卒乃復。 五月,南巡守,至于南岳,如岱禮。八月,西巡守,至于西岳,如初。 十有一月朔,巡守,至于北岳,如西禮。歸格于藝祖,用特。

歲二月,正歲建卯之月也。巡,行視也。守,諸侯所守之職也。岱宗, 泰山也,在今山東泰安府泰安縣北。柴,祡也,尞也。凡祭天神,皆積柴, 加牲其上而燔之。秩,豑也,次第也。牲幣粢盛,籩豆爵獻之數,五嶽視三 公,四瀆視諸侯。其餘小者,或視伯、子、男,或視卿、大夫也。東后,東 方諸侯。協、眾之同和也。時者、四時。月者、十二月及閏也。日者、十日、 甲至癸也。「月正」二字,疑傳寫誤到;或曰正者,三正子、丑、寅也。同, 陰聲六,同謂大律、夾鍾、仲呂、林鍾、南呂、應鐘也。律,陽聲,六律謂 黃鍾、太蔟、姑洗、蕤賓、夷則、無射也。度,五度,分、寸、尺、丈、引 也。量,五量,龠、合、升、斗、斛也。衡,横也,稱之平也。五衡,銖、 兩、斤、鈞、石也。度量衡法制,本起于黃鍾之管,故次于同律也。修,飾 也。五禮,公、侯、伯、子、男朝覲之禮。五玉,即五瑞也。三帛,所以薦 玉者。高陽之後用赤繒,高辛之後用黑繒,其餘諸侯用白繒,《周禮》則改之 爲繅,用五采之事也。二生,卿執羔,大夫執雁。一死,士執雉也。贄,當 作墊,相見取執以自致也。如,笯也,籠也,謂授墊之器各異,卿、大夫、 上、中、下士有五也。《周禮》則不用器,但飾之以布,維之以索而已。或曰: 如,與也,猶及也,蒙上「修」字,存參。卒,數也,盡也。復,往來也, 往于南而來于西也。南岳,霍山,即衡山,在今湖南衡州府衡山縣西北。西 岳,華山,在今陝西同州府華陰縣南。北岳,恒山,在今山西大同府渾源縣 南。歸者,巡守畢而歸帝都也,堯都在今山西平陽府。格,徦也。藝,當作 執。藝祖,即文祖也。告至于廟,古者君出與歸,皆必祭告,出不言者,文 不具耳。特,一牛也。

五載一巡守,羣后四朝。敷奏以言,明試以功,車服以庸。

《周禮》巡守以十二年爲期,唐虞則五年爲期也。巡守之年,諸侯各朝于方岳之下,其後四年,諸侯分來朝于京師。東方春朝,南方夏宗,西方秋

觀,北方冬遇,四歲而徧也。敷,溥也,徧也。奏,進也,謂朝時皆進陳治 理其國之言。巡守時,乃明試以功,有功則賞。庸,民功也。能安民者賜車 馬,後世九錫之典,所以首車馬也。

肇十有二州,封十有二山,濬川。

肇,塊也,畔也,定十二州之界也。水中可居曰州。堯遭洚水,民居水中高土,故因以爲州國之名。十有二州者:冀、沇、青、徐、揚、荊、豫、梁、雍、并、幽、營也。禹平水土,始分九州,以衛之并州,燕以北之幽州合于冀,以齊之營州合于青也。《爾雅》殷制,《周禮》周制,故九州沿革亙異,而其名皆當本于舜時也。封,爲壇以祭也。十二山者,《職方氏》霍在冀,岱在沇,沂在青,會稽在揚,衡在荊,華在豫,嶽在雍,昭餘祁在并,醫無閻在幽,此外無聞焉。疑徐有蒙山,梁有岷山,營有嵎山也。濬,深通川也。川者,田間水道,畎澮之水所會也。禹濬畎澮距川之後,尚有未通利者,舜更令濬之也。

象以典刑,流宥五刑,鞭作官刑,扑作教刑,金作贖刑。告災肆赦,怙 終賊刑。欽哉,欽哉!惟刑之恤哉!

象,像也,猶式法也。刑當作荆,罰辠也。典刑,謂常刑。五刑,墨、 剔、剕、宫、大辟也,其法始制于三苗之君。《尚書大傳》云:「唐虞之象刑, 上刑赭衣不純,中刑雜屨,下刑墨幪。」又云:「犯墨者蒙帛,犯劓者赭其衣, 犯臏者以墨蒙臏處而畫之,犯大辟者布衣無領。」荀卿非之,謂古無內刑, 則殺人者不死。然怙終賊刑,則大辟未嘗廢也。流,猶放也。宥,寬也,以 流放之法寬五刑,如《周禮》八議三赦之政,或投諸四裔,或屛之遠方也。 鞭,笞也。官刑,辦治官事者,不如法,則用此刑也。扑,當作支,檟、楚 二物也。教刑,學校之刑,所以撻不率教者。金,赤金,銅也。贖,貿也。 意善功惡,使出金贖辠。坐不戒愼者,此謂公過,非私辠,與《呂刑》所言 異也。眚,過,災害也。事雖有害于人,而實因過誤者,則緩而赦之,不待 流宥金贖也。肆,逮也,緩也。赦,置也。怙,恃也。終,謂終身也。賊, 殺人不忌也。恃其奸衰,終身不改及殺人者,即《康誥》所言「自作不典, 不可不殺」者也。終,一作眾,謂恃眾叛逆,非是。再言欽者,敬之又敬也。 惟,凡思也。恤,而也,猶清淨也。 流共工于幽洲,放驩兜于崇山,竄三苗于三危,殛鯀于羽山,四罪而天 下咸服。

流,行之遠去也。放,逐也。竄,寂也,塞也,杜塞之使不得通中國也。 殛,誅也,責遣之也。共工,竆奇也。驩兜,渾敦也。三苗,饕飻也。鯀, 檮柮也。洲,當作州。幽州,北裔也,今直隸順天府密雲縣東北塞外地。崇山,南裔之山,在今湖南澧州永定縣西。三危,西裔之地,在今甘肅安西州 敦煌縣東南。羽山,東裔之山,在今山東沂州府郯城縣東北,江蘇海州贛榆 縣西南。罪,辠也。四人爲堯大臣諸侯,故不刑之,上文所謂流宥者也。咸, 僉也,皆也。服,及也,治理也。

二十有八載,帝乃殂落。百姓如喪考妣,三載,四海遏密八音。

二十八載者,自釐降至于納麓,舜之徵庸二十載,自受終至天下咸服,舜攝位八載也。堯立七十年而得舜,至是九十八年而殂落也。殂,往,死也;落,如草木之移也。百姓,羣臣也。喪,亡也。不忍言死,故親之終曰喪,子孫持服亦曰喪。考,父也。妣,母也。三載者,方喪三年,如其親也。四海,統九夷、八狄、七戎、六蠻而言也。遏,止也。密,謐也,寂靜也。八音,金石土革絲木匏竹也,言天下之民哀思之甚也。《孟子》引此節爲《堯典》,可見分篇之僞。

月正元日,舜格于文祖,

上文言正月,此言月正者,舜即位乃改建丑爲建子,故變文記之也。元, 猶始也。元日,首善之日也。格,假也,至也。至文祖廟者,即位于明堂也, 故有下文出政布令之事。

詢于四岳,闢四門,明四目,達四聰。

詢,當作訊,謀也,謀政治于四岳也。闢,開也,《說文》引作關。闢四門,言多開取士之科;明四目,謂所見博;達四聰,謂所聽遠。四者,四方也。

咨十有二牧,曰:「食哉惟時!柔遠能邇,惇德允元,而難任人,蠻夷 率服。」

咨,謀也。十二牧,十二州之伯也。食,當作「欽」,字蝕其半而「金」又

誤「食」也。時,《史記》作「帝」,謂堯也。柔,安也。能,怡也,猶和恕也。遠,遐方也。邇,近地也。憞,厚。允,信也。德,有悳者。元,善人也。而,助語詞。難,憚也,猶惡也。任,集也,柔佞之人也。蠻,南蠻。夷,東夷。率,述也,循也。服,艮也,备也。此數語舜述堯之治以爲治,兼爲下文命官發端也。柔遠,即協和之事;能邇,即時雍之事;憞德允元,即疇咨之事;難任人,即吁咈之事也。至于蠻夷率服,則所謂光被四表者也。

咨,讀爲嗞,嗟也。能,態也,姿也,猶賢才也。奮,猶起也。庸,功也。熙,光也。帝,堯也。載,猶行也。宅,居也。言有才可起發其功,光堯之行者乎,將使居百揆之官也。百揆,六卿之長,即周之天官冢宰也。舜以百揆進而居攝,今即位,故首命此官也。亮,當作倞,明也。采,事也,職也。惠,順。疇,猶類也。伯禹,高陽氏才子,其父崇伯鯀也。司空,即多官共工也。禹平水土時,特命爲司空,非常名也。至是,使居百揆,仍舍其名爲共工矣。俞,嘫詞也。時,是也。懋,勉也。拜者,首至手也。稽,皆也;稽首,下首至地也。讓,攘也,推也。稷,官名,其人棄也。按:凡虞夏書稷字,古書皆當作棄。周尊后稷以配天,乃追改之。惟下文帝曰棄,乃君命臣之詞,仍而不改也。契,當作為,或作偰,臣名也。暨,息也,及也。往,之也。勗以之官,不聽其所讓也。

帝曰:「棄!黎民阻饑,汝后稷,播時百穀。」

棄,高辛氏之子,今爲司馬,如周之夏官也。阻,戹也。飢,餓也。后,君也。稷,米最大,爲穀之長,故以名官。播,敷種也。時,蒔也。更,別種也。穀謂之百者,多種之詞,或以稻粱菽各二十,蔬果助穀各二十當之,非也。穀有九:黍、稷、粱、秫、稻、麥、菽、麻、苽也,或云八穀、六穀、五穀、三穀者,略言之耳。堯鴻水時,眾民困戹于飢,棄播穀以救之,故稷爲天官,後復爲夏官司馬。此舜返述其前功也。

帝曰:「契,百姓不親,五品不遜。汝作司徒,敬敷五教,在寬。」 契,禹也,高辛氏之子,今爲司徒,如周之地官也。五品,父、母、兄、 弟、子也。遜,悉也,順也。敷,**攸**也。五教,義、慈、友、恭、孝也。寬,從容不迫也。孟子述放勳之言:「勞之來之,匡之直之,輔之翼之,使自得之,又從而振德之」,即所謂寬也。此亦返述其前功也。

帝曰:「皋陶,蠻夷猾夏,寇賊姦宄。汝作士,五刑有服,五服三就。 五流有宅,五宅三居。惟明克允!」

皋陶,高陽氏才子庭堅也,今爲士,即周之秋官司寇也。猾,當作滑,讀爲淈,濁亂也。夏,華夏也,言撓亂中國也。彊聚爲寇,殺人爲賊,由外爲姦,起內爲宄。士,吏也,治獄訟者也。鄭氏謂主察獄訟,則以司爲訓。服,及也,治理也。就,造也,歸也。三就,大罪陳諸原野,次罪于市朝,同族則適甸師氏也。宅,吒也,懲怂之器也。五吒,謂上罪梏拳而桎,中罪桎梏,下罪梏王之同族,孝有爵者桎也。居,凥也,處也。三居,謂自九州之外至于四海,三分其地,遠近若周之夷服、鎮服、蕃服之地也。皆當明察其罪,能使信服也。以上稷、契、皋陶三官,皆堯在時所命者,舜因禹之讓而述其前功,以申命之也。

帝曰:「嚋若予工?」僉曰:「垂哉!」帝曰:「俞,咨!垂,汝共工。」 垂拜稽首,讓于殳斯暨伯與。帝曰:「俞,往哉!汝諧。」

予,余也,我詞也。工,百工也。《曲禮》六工,有土工、金工、石工、木工、獸工、草工,《周禮》有攻木、攻金、攻皮、設色、搏埴之工,主百工之官,即周之冬官司空也。司空之名,專爲禹立,禹升宅百揆,故問誰能順治百工,勝任此職者,其官則仍名共工也。垂有巧思,字亦作「倕」,高陽氏才子也。共,龔也,具給也。殳、斨,亦作朱、斨,二臣名。伯與,亦作柏譽,一臣名,皆當在八元八凱中。諧,和也,猶耦也。往哉汝諧者,因垂之讓,令率此三人爲佐,同供是職,與汝往哉。往欽哉,不同也。

帝曰:「疇若予上下草木鳥獸?」魚曰:「益哉!」帝曰:「俞,咨!益,汝作朕虞。」益拜稽首,讓于朱虎、熊羆。帝曰:「俞,往哉!汝諧。」

上謂山陵,下謂原隰藪澤,草木鳥獸之所生也。草,當作艸。愈,當作禹。益,讀爲嗌,古作恭,又名柏翳,高陽氏才子,與禹同奏庶鮮食者,故禹舉之。 朕虞,掌山澤之官,《周禮》有山虞、澤虞,省名爲虞,而官分爲二也。朱虎、 熊羆,二臣名,疑即高辛氏之子伯虎、仲熊也。往哉汝諧,亦使爲益之佐也。 帝曰:「咨!四岳,有能典朕三禮?」魚曰:「伯夷!」帝曰:「俞,咨!伯,汝作秩宗。夙夜惟寅,直哉惟清。」伯拜稽首,讓于夔、龍。帝曰:「俞,往。欽哉!」

典,敟也,主也。三禮,天神、地祇、人鬼之禮。典之者,如周之春官 宗伯也。伯夷,姜姓之祖。秩,猶次敘也。宗,尊祖廟也。夙,早也。夜, 莫也。惟,凡思也。寅,敬也。直,正見也。清,瀞絜也。夔、龍,二臣名。

帝曰:「夔!命汝典樂,教胄子,直而溫,寬而栗,剛而無虐,簡而無傲。詩言志,歌永言,聲依永,律和聲。八音克諧,無相奪倫,神人以和。」夔曰:「於!予擊石拊石,百獸率舞。」

五聲八音相比而成樂,先王之所以飾教也。教,上所施下所效也。冑,當作育,養子使作善也。子者,王太子、王子、羣后之世子、卿大夫元士之適子也。教育子弟,即周大司樂之職也。直,正也。溫,溫也,和潤也。寬,宏也。栗,溧也,疎縮也。剛,彊斷也。無,釋也,亡也。虐,暴也。簡,欄也,大也。傲,倨也。在心爲志,發言爲詩。言,心聲也。歌,詠也,長言之也。永,長也。聲者,宮、商、角、徵、羽是也。依,倚也。聲之清濁,又依長言而爲之。律,十二律也。和,龢也,調也,聲中律乃和也。八音,鐘、聲、壎鼓、琴瑟、柷敔、笙、簫也。諧,龤也。樂,龢也。相者,兩耦之詞。奪,失也。倫,類也,猶敘也。神,鬼神也。人,承祭者也。和,相應也。《皋陶謨》言:「祖考來格,羣后德讓,其一隅也。」宋蘇軾曰:「舜方命九官,濟濟相讓,變不當獨自言其功。是《皋陶謨》之文錯簡在此。」其說是也。

帝曰:「龍,朕堲讒說殄行,震驚朕師。命汝作納言,夙夜出納朕命,惟允!」

型,嫉也,惡也。讒,譖也。說,談論也。殄,絕也。殄行,絕君子之行,所謂色取仁而行違也。震,踞也,動也。驚,駭亂也。師,猶眾也,謂眾臣也。 佞人足以惑亂,朝臣所必遠也。納,內也,入也。內言,官名,所謂王之喉舌也,如周之宰夫,待諸臣之復萬民之逆者也。出者,承上言而宣之于下。內者,酌下言而違之于上。允,信也。凡思信實,則佞人無所行其奸矣。

帝曰:「咨!汝二十有二人,欽哉!惟時亮天功。」

二十二人者,十二牧及新命之皋陶、垂、殳、斨、伯與、益、朱虎、熊

羆、夔、龍十人也。四岳皆以他官兼攝,疑即禹、稷、契等爲之,故不在此 數。禹、棄、伯夷皆居官久,有大功,申命之,非特敕之,故亦不在此數也。 觀《呂刑》所敘堯臣伯夷、禹、稷可見,或謂當作三十有二人,存疑。亮, 當作倞,讀爲景,如影之附形合而相助也。功,猶事也。帝王治世,民事即 天事,故曰天功。此以上皆月正元日敕命之言也。

三載考績,三考,黜陟、幽明。庶績咸熙。分北三苗。

考, 覈也, 驗事得實也。績, 功業也。黜, 貶下也。陟, 登用也。幽, 遐隱也。明, 邇所見也, 言遠近之眾功皆興也。北, 當作於, 別也。前所遠 竄之三苗爲西裔諸侯者, 其族類或猶有相聚爲惡, 乃復分析流之他方, 亦所 謂黜也。

舜生三十,征庸三十,在位五十載,陟方乃死。

舜生三十、謂生三十年也。徵,召也。庸,用也。三十當作二十,謂歷 試二十年也。在位五十載,謂攝位至死五十年,舜年一百歲也。陟方,巡守 也。蓋分北之後,三苗有在南越之地者,舜南巡時征之,道死蒼梧,因葬于 九疑山,在今湖南永州府寧遠縣南也。

汩 作

《書敘》曰:「帝釐下土,方設居方,別生分類,作《汩作》、《九共》九篇、《稾飫》。」按:釐,理也。汩,治水也,字從曰,不從曰。

九共九篇

按:共,讀爲貢。《尚書大傳》引《九共》之文有「予辯下土,使民平平, 使民無傲」數語。

槀 飫

其誼未聞。僞孔曰:「犒,勞。飫,賜也。」按:以上十一篇皆亡于西晉 永嘉之亂。

大禹謨

《書敘》無「謨」字。《敘》曰:「皋陶矢厥謨,禹成厥功,帝舜申之。 作《大禹》、《皋陶謨》、《棄稷》。」疑《大禹》、《皋陶謨》本爲一篇,《皋謨》 中禹言亦多,故並敘之,合兩人名謨也。《說文》「謨」篆下但引「咎繇謨」,并無「大禹」字,亦是一證。即曰有之,亦亡于西晉永嘉之亂。今僞書與傳疑出皇甫謐晚年所撰,至東晉枚頤獻之。其餘二十五篇並同。

曰若稽古大禹,曰文命敷于四海,祗承于帝。曰:「后克艱厥后,臣克艱厥臣,政乃乂,黎民敏德。」帝曰:「俞!允若茲,嘉言罔攸伏,野無遺賢,萬邦咸寧。稽于眾,舍己從人,不虐無告,不廢困竆,惟帝時克。」

「文命」本《史記》。「敷四海約」,《禹貢》末數語。「敏德」本《康誥》。 「萬國咸寧」,孔子贊《易》文也。「舍己從人」,孟子偁舜,非偁堯也。「堯 不敖無告,不廢竆民」,《莊子·天道》文也。

益曰:「都,帝德廣運,乃聖乃神,乃武乃文。皇天眷命,奄有四海, 為天下君。」

《夏書》云:「天子之徳廣運,乃神乃武乃文」,《呂氏春秋・諭大》篇文也。「皇乾眷命」,《後漢・黃瓊傳》文也。「奄有四方」,《詩・大雅・皇矣》篇文也。

禹曰:「惠迪吉,從逆凶,惟影响。」

舜云:「從道必吉,反道必凶,如影如响」,《尸子》文也。

益曰:「吁!戒哉!儆戒無虞,罔失法度,罔游于逸,罔淫于樂。任賢勿貳,去邪勿疑。疑謀勿成,百志惟熙。罔違道以干百姓之譽,罔咈百姓以從己之欲。無怠無荒,四夷來王。」

《書》云:「去邪勿疑,任賢勿貳」,《戰國·趙策》文也。「無怠無荒」, 乃《後漢書·崔駰傳》文也。

禹曰:「於!帝念哉!德惟善政,政在養民。水、火、金、木、土、穀,惟修;正德、利用、厚生,惟和。九功惟敘,九敘惟歌。戒之用休,董之用威,勸之以九歌俾勿壞。」

「命在養民」,《左傳》文公六年邾文公言也。《夏書》曰:「戒之用休,董之用威,勸之以九歌,勿使壞」,郤缺釋之曰「九功之德皆可歌也,謂之九歌。六府三事,謂之九功,水火金木土穀謂之六府,正德利用厚生謂之三事」,《左傳》文公七年文也。

帝曰:「俞!地平天成,六府三事允治,萬世永賴,時乃功。」

《夏書》曰:「地平天成」,《左》僖二十四年文也。「時乃功」,見《皋陶 謨》。

帝曰:「格,汝禹!朕宅帝位三十有三載,耄期倦于勤。汝惟不怠,總 朕師。」禹曰:「朕德罔克,民不依。皋陶邁種德,德乃降,黎民懷之。 帝念哉!念茲在茲,釋茲在茲,名言茲在茲,允出茲在茲,惟帝念功。」

《竹書紀年》云:「帝舜三十三年,命夏后總師」,亦皇甫士安、東廣微 輩僞書也。「旄期」,見《禮記·射義》。《夏書》曰:「皋陶邁種德」,魯莊公引之而申其意,曰:「德乃降,姑務修德以待時乎。」降,讀爲奉服之奉,言 郕降于齊,是我不德也。此莊公八年文而誤用者也。「黎民懷之」,《皋陶謨》文也。《夏書》曰:「念茲在茲,釋茲在茲,名言茲在茲,允出茲在茲,惟帝 念功」,《左傳》襄公二十一年文也。

帝曰:「皋陶,惟茲臣庶,罔或干予正。汝作士,明于五刑,以弼五教。期于予治,刑期于無刑,民協于中,時乃功,懋哉!」

「惟茲臣庶,汝其于予治」、《孟子》文也。「汝作士」、《堯典》文也。「聽 獄折中者,皋陶也,故曰『民協于中』」、《韓詩外傳》文也。

皋陶曰:「帝德罔愆,臨下以簡,御眾以寬;罰弗及嗣,賞延于世。宥 過無大,刑故無小;罪疑惟輕,功疑惟重;與其殺不辜,寧失不經;好 生之德,治于民心,茲用不犯于有司。」

「刑故無小,宥過無大」,王充《論衡·答佞》篇文也。《夏書》曰:「與 其殺不辜,寧失不經」,《左傳》襄公二十六年文也。「其政好生而惡殺,所謂 好生之德洽于民心者也」,《荀子·哀公問》篇文也。

帝曰:「**俾予從欲以治**,四方風動,惟乃之休。」 「舜曰惟子從欲而治」,《荀子,大略》篇文也。

帝曰:「來,禹!洚水儆予,成允成功,惟汝賢。克勤于邦,克儉于家,不自滿假,惟汝賢。汝惟不矜,天下莫與汝爭能。汝惟不伐,天下莫與汝爭功。予懋乃德,嘉乃丕績,天之歷數在汝躬,汝終陟元后。

「帝曰來禹」、《皋陶謨》文也。《書》曰:「洚水警予」、《孟子》文也。《夏

書》曰:「成允成功」、《左傳》襄公五年文也。「禹克勤」、本《史記·夏本紀》。 「汝惟不矜,天下莫與汝爭能」、《荀子·君子》篇文也。「堯曰:『咨,爾舜, 天之歷數在爾躬』」,又「舜亦以命禹」、《論語》文也。

人心惟危,道心惟微,惟精惟一,允執厥中。

《道經》曰:「人心之危,道心之微」,上文云「心何以知?曰:『虚一而靜』」;又曰:「不以夫一害此一謂之一」,又曰:「精于物者以物物,精于道者兼物物,故君子一于道而以贊稽物」,皆《荀子·解蔽》篇文也。「允執其中」,《論語》文也。

無稽之言勿聽,弗詢之謀勿庸。可愛非君,可畏非民,眾非元后,何戴? 后非眾,罔與守邦?欽哉!慎乃有位,敬修其可願,四海困竆,天祿永 終。惟口出好興戎,朕言不再。」

「無稽之言,不見之行,不問之謀,君子愼之」,《荀子·正名》篇文也。《夏書》有之曰:「眾非元后,何戴?后非眾,無與守邦」,《國語·周語》內史過言也。「愼乃在位」,《皋陶謨》文也。「四海困窮,天祿永終」,《論語》文也。「先王之書,術令之道,曰:惟口出好興戎」,《墨子·尚同中》篇文也。

禹曰:「枚卜功臣,惟吉之從。」帝曰:「禹!官占惟先蔽志,昆命于元龜。朕志先定,詢謀僉同,鬼神其依,龜筮協從,卜不習吉。」禹拜稽首,固辭。帝曰:「毋!惟汝諧。」

「王與葉公枚卜,子良以爲令尹」、《左傳》哀公十七年文也。但枚卜者,不斥言所卜之謂,非歷卜也。《夏書》曰:「官占唯能蔽志,昆命于元龜」,哀公十八年文也。「習吉」,字見《金縢》。「卜不襲吉」、《左》哀十《傳》趙孟言也。「禹拜稽首」,見《堯典》。「敢固辭」,見《儀禮》。「子曰:毋」,見《論語》。「往哉,汝諧」、《堯典》文也。但諧和者,同寅協恭之謂元后,一人何所諧?若謂諧合龜筮,則上文已言之矣。

正月朔旦,受命于神宗,率百官若帝之初。

《竹書紀年》云:「帝舜三十三年春正月,夏后受命于神宗,遂復九州。」 與偽書固出一手。 帝曰:「咨,禹!惟時有苗弗率,汝徂征。」

禹乃會羣后,誓于師曰:「濟濟有眾,咸聽朕命。蠢茲有苗,昏迷不恭, 侮慢自賢,反道敗德,君子在野,小人在位,民棄不保,天降之咎,肆 予以爾眾士,奉辭伐罪。爾尚一乃心力,其克有勳。」三旬,苗民逆命。 益贊于禹曰:「惟德動天,無遠弗屆。滿招損,謙受益,時乃天道。帝 初於歷山,往于田,日號泣于旻天,于父母,負罪引慝。祗載見瞽叟, 夔夔齊慄,瞽亦允若。至誠感神,矧茲有苗。」禹拜昌言曰:「俞!」 班師振旅。帝乃誕敷文德,舞干羽于兩階,七旬,有苗格。

禹征三苗,誓師,其後退舞干羽,三苗自服一事,《戰國·魏策》及《墨子》、《韓非子》、《荀子》、賈誼《新書》、《淮南鴻烈》、桓寬《鹽鐵論》、劉向《說苑》諸書皆有之。誓辭見《墨子·兼愛》篇,曰:「濟濟有眾,咸聽朕言」;又「蠢茲有苗,用天之罰。小人在位,君子在野」,《詩·隰桑》小序也。「天降之災」,《左》莊十一《傳》文也。「君以成周之眾,奉辭伐罪」,《鄭語》史伯之言也。「舜往于田,號泣于旻天」,又《書》云「祗載見瞽瞍,夔夔齊慄,瞽瞍亦允若」,皆《孟子》文也。「禹拜昌言曰:俞!」,《皋陶謨》文也。「班師振旅」,字皆見《左》襄十《傳》中。

皋陶謨

《書敘》見前。謨,議謀也。伯禹、皋陶相與語于舜前,而虞史伯夷述其言也。

曰若稽古。皋陶曰:「允迪厥德,謨明弼諧。」禹曰:「俞,如何?」皋陶曰:「都!慎厥身,修思永。惇敘九族,庶明勵翼,邇可遠在茲。」禹拜昌言曰:「俞!」

「曰若稽古」爲句,以下述皋陶之言也。允,信。迪,導也。厥,其, 詞也。弼,猶俌也。諧,詥也。言人君信能進導其德,則臣下有所謀議,無 不照見,有所匡正,無不和聽也。如何者,然其言而復問其詳也。都,於, 詞也。愼,謹也。修,馭也。身有不善,謹而除之,而又用思深長,孜孜無 怠也。惇,厚也。敘,次弟也。庶明,眾賢也。勵,當作勱,勸勉也。翼, 猶夾俌也,如堯之九族既睦百姓。昭,明也。邇,近也。茲,柴也,識詞也。 言政之可自近以及遠者,由此道也。昌,美言也。 皋陶曰:「都!在知人,在安民。」禹曰:「吁!咸若時,惟帝其難之。知人則哲,能官人。安民則惠,黎民懷之。能哲而惠,何憂乎驩兜?何遷乎有苗?何畏乎巧言令色孔壬?」

心徹爲知人者,百官也;定竫爲安民者,兆姓也。惟、其,皆助語之詞。帝,謂堯也。難,艱也,不易也。哲,智。惠,仁也。懷,思也。而、何、乎,亦皆助語之詞。憂,惡也,愁也。遷,鹵也,驚也。巧言,利口也,即靜言。令,良也,善也。令色,柔顏也,即象恭。孔,甚也,讀若堪。壬,集也,善柔佞人也,皆謂共工四凶。不及鯀者,鯀婞直自用,故治水無功,公罪非私惡,本不與三凶同,且禹當爲親諱也。

皋陶曰:「都!亦行有九德,亦言其人有德。乃言曰,載采采。」禹曰:「何?」皋陶曰:「寬而栗,柔而立,願而恭,亂而敬,擾而毅,直而溫,簡而廉,剛而塞,強而義。彰厥有常,吉哉!

亦,發語之詞。行,力諸身也。言,宣諸口也。「人」字衍文,當刪。載, 猶爲也。采,事也,謂所爲某事,某事可名言也。《夏書》曰「名言茲在茲」 是也。何者?問其目也。寬綽而能凜溧,和柔而能植立,謹願而能恭正,三 者即《洪範》所云。柔,克也。亂,治也,有治才而能敬事。擾,擾也,馴 也。既馴擾而又果毅直正也,能正直而又溫和,三者即《洪範》所云。正, 直也。簡,約也,簡約而有廉隅。塞,窸也,實也,剛斷而能篤實。義,誼 也,宜也。堅彊而能合宜,三者即《洪範》所云。剛,克也。凡人之性寬者, 不必栗。栗者,不必寬。九德皆然,惟相濟乃成其德也。彰,明也。常,長 也,久遠也。吉,善也。能明其德,所行有常,則成善人矣。

日宣三德, 夙夜浚明有家; 日嚴祗敬六德, 亮采有邦。 翕受敷施, 九德 咸事, 俊乂在官。百僚師師, 百工惟時。撫于五辰, 庶績其凝。

宣,㬎也,明也。三德,謂簡、剛、彊也。浚,陵也,大也。有家,卿 大夫也。言三德,[一則可爲卿大夫。嚴,儼也。儼、祗、敬,皆肅也。六德, 謂亂、擾、直、簡、剛、彊也。亮,當作倞,明也。采,事也。有邦,諸侯 也。言有六德,則可爲諸侯。翕,故也,聚也。受,承也。敷,溥也,徧也。 施,岐也,敷也。翕受者,聚之于身;敷施者,見之于事。言天子九德皆備, 則可以治天下。材過千人曰俊,乂,傑也,才過百人曰傑。官,公卿之位也。 百僚,大夫也。師,塗也,先導也。師師,相師法也。工,官也。百工,士 也。言公卿大夫士皆互相則效,及時輔治也。撫,循也。辰,時也。木王于春,火王于夏,金王于秋,水王于冬,土寄王于四季,故謂四時爲五辰也。 凝,堅定也,猶成也。

校勘記

[一] 「言」下當脫「有」字,爲「言有三德」,由下文「言有六德」可知。

無教逸欲,有邦兢兢業業,一日二日萬幾。無曠庶官,天工,人其代之。

無,毋也,止之之詞。下同。教者,上所施下所效也。逸,佚也,安樂也。欲,貪也。言天子逸欲,則諸侯皆效之,無異于教之也。兢兢,戒也。業業,危也。一日二日,猶言日日也。幾,機也,發動所由也。萬幾,猶萬端也。曠,憲也,空闊也。置非其人,與空曠無異也。天工,天之官也。人,謂天子也,天子代天以官人,不可忽也。

天敘有典, 勑我五典五惇哉!天秩有禮,自我五禮有庸哉!同寅協恭和 衷哉!天命有德,五服五章哉!天討有罪,五刑五用哉!政事懋哉!懋 哉!」

五典,父義、母慈、兄友、弟恭、子孝,自天子至于庶人同也。勑,當作敕,正也。我者,對天而言。惇,厚也。五者,皆命于天而由我正之,使人厚于倫常。常,性也。五禮,天子、諸侯、公卿、大夫、士等級隆殺之禮,如《周官,典命》、《禮記,禮器》所言是也。自,始也。庸,用也。用之由我始也。同,合會也。協,眾之同和也。衷,中也,心也。言君臣皆守此典禮,同敬合恭,上下和協于心也。五服,下文日月星辰至黼黻之十二章,天子備有之,公自山龍以下,侯伯自華蟲以下,子男自藻火以下,卿大夫自粉米以下,凡五等也。章,明也,謂表顯有德之人也。討,治也。罪,犯法也。五刑,墨、劓、剕、宫、大辟也。命德討罪,無非天意,人君治事,不可不勉也。懋,勉也。

「天聰明,自我民聰明。天明畏,自我民明威。達于上下,敬哉有土!」

承上文而言,天之聰明所命者,由民所好之有德;天之明威所討者,由 民所惡之有罪。畏,威也,猶《孟子》引《太誓》云:「天視自我民視,天聽 自我民聽」也。達,通也。上,謂天;下,謂民。有土之君,可不敬懼哉!

皋陶曰:「朕言惠可厎行?」禹曰:「俞!乃言厎可績。」皋陶曰:「予 未有知,思曰贊贊襄哉!」 惠,順也。底,致也。乃,發聲之詞,猶汝也。予,余也,我自謂之詞也。曰,當作曰。贊,進導也。襄,器也,治理也。言我言順而可致之于行乎?禹然其言,謂致可有功也。皋又言我無所知,思日進導帝德,以佐治理而已,謙詞也。此下「帝曰:來,禹」至末,皆《皋陶謨》篇之文,爲書分爲兩篇,非也。

益 稷

《書敘》作「棄稷」。《棄稷》篇已亡于西晉永嘉之亂。僞書割《皋陶謨》「帝曰來禹」以下當之,且改名《益稷》,誕妄已甚。

帝曰:「來,禹!汝亦昌言。」禹拜曰:「都!帝,予何言?予思日孜孜。」 皋陶曰:「吁!如何?」禹曰:「洪水滔天,浩浩懷山襄陵,下民昏墊。 予乘四載,隨山刊木,暨益奏庶鮮食。予決九川,距四海,濬畎澮距川; 暨稷播奏庶艱食。鮮食,懋遷有無化居。烝民乃粒,萬邦作乂。」皋陶曰:「俞!師汝昌言。」

來者,揖而進之使前也。孜孜,汲汲也。禹言:皋陶陳謀已備,我復何 言?惟汲汲自勉而已。昏,殙也,病也。墊,陷也。乘,登也,陞也。截, 亦乘也。四載,水行乘舟,陸行乘車,山行乘欙,澤行乘劃也。隨,從也。 刊,栞也,槎識也。謂循行山路,褒斫其木,以爲表識也。奏,進也。鮮, 鱻也,生也。生食,謂鳥獸魚鱉也。決,行水也。九川,九州之川,江、 淮、河、濩、沇、渭、洛、弱水、黑水也。距,歫也,止也。四海,今山東 登州爲東海,直隸天津爲北海,江蘇揚州爲南海,甘肅塞外爲西海,各因水 道所歸而放而致之也。濬,深通川也。畎澮,田間水道也,包遂與溝洫而 言。廣尺深尺謂之畎,倍畎謂之遂,倍遂謂之溝,倍溝謂之洫;廣二尋深二 仍謂之澮,水自畎注于遂,以至于澮,各小水會而爲大水謂之川。艱,土難 治也。艱食,謂百穀。此鮮食之鮮,讀爲尟,少也,與上文不同。懋,貿 也,易財也。遷,徙也。化,貨也,財也,金玉龜貝泉布布帛之屬皆是。 居,凥也,猶積貯也。言食少之民,使徙他物之積,以易穀,調有餘,補不 足,彼此相濟,即《周禮》之商賈阜通貨賄也。烝,眾也,多也。乃,曳詞 之難也。粒,立也,猶定也。《詩》曰「立我蒸民作始」也。乂,變也,治安 也。言害去利興,厚生利用,天下有以安定而始得治安也。師,鎏也,猶取 法也。

禹曰:「都!帝,慎乃在位。」帝曰:「俞!」禹曰:「安汝止,惟幾惟康。其弼直,惟動丕應。徯志以昭受上帝,天其申命用休。」

順,謹也。位,帝位也。安,定也。止,峙也,猶處也。言毋妄動,動 則擾民也。惟,凡思也。幾,殆也。康,康也,安也。直,讀爲悳。丕,大 也。應,和也。言君能思危圖安,以有悳者爲俌,故不動則已,動則天下大 應。徯,係也,絜束,猶潔清也。志,意也。申,緟也。用,以也。休,喜 也,美也。言潔清其意,以明受天寵,天將重命汝以美應,謂符瑞也。

帝曰:「吁!臣哉鄰哉!鄰哉臣哉!」禹曰:「俞!」

鄰,近也,即下文所言四鄰,謂左輔、右弼、前疑、後丞也。反覆言此, 謂君臣道近相須而成之者也。

帝曰:「臣作朕股肱耳目。予欲左右有民,汝翼。予欲宣力四方,汝為。 予欲觀古人之象,日、月、星辰、山、龍、華蟲、作會;宗彝、藻、火、 粉米、黼、黻,絺繡,以五采彰施于五色,作服,汝明。予欲聞六律五 聲八音,在治忽,以出納五言,汝聽。

此申言臣所以爲隣之義也。作,爲也。手足所以動作,耳目所以視聽,君 資眾臣以爲輔,猶身資五官四體以爲用也。左右,助也。翼,如鳥翅之佐其身 也。治功曰力。四方者,非巡守之年,有事則使于四方,惟臣爲之也。爲,爲 也,作也。觀,諦視也。古人,黃帝時始爲衣裳者也。象,像也,形也,象形 之字如繪畫然。華,榮也。華蟲,五色之蟲如華。五色,謂鷩雉也。羽毛鱗甲 之屬,皆謂之蟲。會和五采而畫之于衣,三辰山龍雉爲六章也。宗彝,宗廟盛 鬱鬯之尊,畫虎蜼其上,故謂虎與禺屬之蜼爲宗彝也。藻,水草有文者。粉米, 白米也,別干未去糠之穀,故曰粉米。黼,白與黑相次文刺爲斧形者也;黻, 黑與青相次文刺爲兩目相背之形者也。絺,黹也,縅縷所紩也。繡,五采僃也, 橊采絲而刺之于裳。帛、藻、火、米、斧、黻,爲六章也。其質曰采,既甩曰 色。衣裳皆謂之服,用以衛體者也。明,明其尊卑等級之禮也。十二章爲五服, 天子備有焉。公自山龍而下,則衣五裳四爲九章;侯伯自華蟲而下,則衣三裳 四爲七章;子男自藻火而下,則衣三裳二爲五章;卿大夫自粉米而下,則衣一 裳二爲三章也。至周而日月星三辰畫于旗,不施于衣,故袞冕九章。自龍而山 而華蟲而火而宗彝,皆繪于衣;自藻而粉米而黼而黻,皆繡于裳。驚冕七草, 無龍、山;毳冕五章,無華蟲與火;希冕三章,無宗彝與藻;而士元冕一章,

衣無文,裳刺黻而已,與虞制不同也。聞,知聲也。六律爲陽,六同爲陰,凡 十有二。但言律者,舉陽以該陰也。以律同龢五聲,施之八音,合而成樂。在, 察也。治,理也。忽,紼也,亂也。聲音之道與政通,故審聲以知音,審音以 知樂,審樂以知政,而治之得失可知也。五言,五聲之言,角爲木爲仁爲民, 商爲金爲義爲臣,徵爲火爲禮爲事,羽爲水爲智爲物,宮爲土爲信爲君也。出 者,作詩以播之于樂。納者,采詩而獻之于朝。汝聽,助君之聰也。

予違,汝弼,汝無面從,退有後言。欽四鄰!

違,愛也,裹僻也。弼,如檄之匡正弓也。從,从也,順以相聽也。後言,謗也,謂我有裹僻之行,汝當匡弼我,無面諛而退有謗言也。四鄰,疑丞輔弼也。伏生《大傳》曰:「天子有問無以對,責之疑,可志而不志,責之丞,可正而不正,責之輔,可揚而不揚,責之弼。其爵視卿,其祿視次國之君。」

庶頑讒說,若不在時,侯以明之,撻以記之,書用識哉,欲並生哉!工以納言,時而颺之,格則承之庸之,否則威之。」

頑,愚鈍也。讒,儳也,尨雜不齊也。在,察。時,是也。侯,疾也,射 疾也。言頑鈍之人,尨雜之言,汝若不察,于是當以大射擇士之禮,明察其善 惡。射,可以觀德也。撻,挟也。記,使之不忘也,即《學記》之夏、楚二物, 收其威也。識,知也,書箸之竹簡以識其過也。生,猶育養也。言撻之書之, 正欲育養之,以並至于善也。工,樂官也。內言,合語也。《周禮·大司樂》「以 樂語教國子興道、諷誦、言語。」《禮記·文王世子》云:「語、說命、乞言皆 大樂正授數。」又曰:「乞言、合語之禮皆小樂正詔之于東序」,即其事也。颺, 謂暢說其義也。格,愙也,敬也,言能敬而改之也。則,曾也,猶乃也。承, 受也。庸,用也。受而用之,即《王制》所云「大樂正論造士之秀者而升之也。」 否則威之,即移郊移遂,或屛之于遠方,終身不齒也。

禹曰:「俞哉!帝。光天之下,至于海隅蒼生,萬邦黎獻,共惟帝臣,惟帝時舉。敷納以言,明庶以功,車服以庸。誰敢不讓,敢不敬應?帝不時敷,同,日奏,罔功。

「俞哉帝」爲句。光天之下,謂日月所照之處。隅,猶傍也。蒼,艸色 也。至于海角,凡草木所生之地,極言其廣遠也。黎,眾也。獻,賢也,有 善行者也。共,俱也。言萬國眾賢皆帝之臣,惟帝是能舉用之,豈獨國子乎? 敷,溥也,徧也。納,內也,入也,言所以觀其志也。庶,當作試,猶考覈 也。功,所以考其事也。庸,用也。車服,謂命爲士大夫,用所以盡其才也。 讓,攘也。應,猶答也。不時,不如是也。罔,亡也,無也。言不如是則天 下賢愚溥同無別,雖日進用人才而無功也。

無若丹朱傲,惟慢遊是好,傲虐是作。罔晝夜額額,罔水行舟。朋淫于家,用殄厥世。予創若時,娶于塗山,辛壬癸甲。啟呱呱而泣,予弗子,惟荒度土功。弼成五服,至于五千。州十有二師,外薄四海,咸建五長,各迪有功,苗頑弗即工,帝其念哉!」帝曰:「迪朕德,時乃功,惟敘。」皋陶方祗厥敘,方施象刑,惟明。

《史記》「無若」上有「帝曰」二字,「予創」上有「禹曰」二字,當從之。 丹朱,堯嗣子,封于丹淵,爲諸侯,今山西澤州府鳳臺縣。傲,奡也,堯庶子 九人之一。《論語》「奡盪舟」、《管子・宙合》篇「若傲之在堯」是也。慢、惰 也。遊,即逕字,遨也。好,說也。傲,倨也。虐,殘也。作,爲也。頟頟, 猶鄂鄂,阢隉之貌。二人見洪水時,人皆乘舟,今水已治,二人猶居舟中,額 頟使人推行之,蓋水淺舟滯故也。朋,即鳳字,讀爲倗,比黨也。謂二子遊蕩 干家,浸浮不止也,引以勗禹無私不肖之子。殄,絕也。言虞賓雖在位,奡則 不得其死,殄絕其世。予,禹自謂也。創,懲懼也。娶,取婦也。塗,當作嵞, 嵞山在今安徽鳳陽府懷遠縣,其國近此山,故爲塗山氏也。始娶三宿,而帝命 治水,其後民俗以辛壬癸甲之日嫁娶,蓋因禹事而遂爲故也。啓,禹子也。呱 呱,小兒啼聲。泣,出涕也。子,慈也,愛也。荒,巟也,猶遠也。度,量也, 猶謀也。言八年于外,三過門而不入,但聞啟呱呱之聲,不遑撫字其子,惟水 退之後,遠度土功也。五服,甸服通王城千里,侯服二千里,綏服三千里,要 服四千里,荒服五千里,以其重疊圍繞,皆所以輔王城,故謂之弼。師,鎏也, 猶伯也。十二師各爲一州之伯,九州一百八師以佐其牧也。外,要服之外也。 薄,迫也,近也。四海,謂荒服之國也。建,立也。五長,一國之中,立五人 以爲之長也。油,導也。即,就也。言師長各導有功,惟苗頑弗受功耳。上「方」, 猶當也,下「方」,旁也,溥也。舜言導吾德于諸侯,是汝之功有次弟,若如苗 之弗率,皋陶方敬以次弟,而溥施象刑。惟明,克允也。古兵刑,一官兵亦刑 也。舜禹此言,蓋在分北三苗之前矣。

夔曰:「戛擊鳴球、搏拊、琴、瑟,以詠。」祖考來格,虞賓在位,羣 后德讓。下管發鼓,合止柷敔,笙鏞以間。鳥獸蹌蹌;簫韶九成,鳳皇 來儀。

戛, 扴也, 刮也。擊, 攴也。鳴球, 玉磬也。石磬在階, 玉磬在堂。搏 拊,以韋爲之,裝之以穅,形如小鼓,所以節樂。琴,五弦。瑟,二十四弦。 四器皆堂上之樂,以詠者工入升堂歌詩也。祖,謂橋牛、句望、敬康與太祖 顓頊;考,謂瞽瞍。格,假也,至也。來格者,五廟之神來至也。虞賓,丹 朱也。羣后,諸侯助祭者。德,登也,升堂揖讓之容也。下,堂下也。管, 如箎,六孔。鼗鼓,小鼓,有柄有耳,持而搖之,則旁耳自擊,令合樂也。 堂上堂下, 眾聲並作。止, 樂終也。合樂之時, 擊柷以始之。柷, 狀如漆筩, 中有椎,其名曰止,投而撞之作聲。止樂之時,櫟敔以節之。敔,狀如伏虎, 背有刻二十七。以長尺之木曰籈者,櫟之三也。笙者,列管,匏中施簧管端, 簧以薄金葉爲之,大者十九管,小者十三管。鏞,大鐘也。鄭康成讀笙爲生, 謂東階生方之鐘磬;讀庸爲功,謂西階成方之鐘磬者。以笙鏞二器細大不倫 耳。以間者,堂上堂下之樂,間代而作也。蹌蹌,飛舞之貌。簫,簡也,竿 舞也。《簫韶》,舜所制樂名,或曰簫之言肅,韶之言紹,言肅敬以繼堯也。 樂備作謂之成,猶終也。每曲一終,則變而更奏,九成,即《周禮》所云九 變也。雄曰鳳,雌曰凰。凰,當作阜,讀爲毣,瑞應之鳥也。儀,儷也,匹 也。來儀,言其止巢而乘匹也。此節猶《周禮》大司樂所言,以致鬼神祇, 以安賓客,以和邦國,以作動物也。

夔曰:「於!予擊石拊石,百獸率舞。」庶尹允諧,

重擊日擊,輕擊日拊。拊,揗也。石,謂大磬、編磬。石聲難和,故舉石以該眾樂,《詩》曰「依我聲聲」是也。率,達也。百獸相導而舞,言感通之機,無不覆燾也。尹,治也。允,信。諧,和也,猶《大司樂》所云「以諧萬民,以說遠人」也。或曰,尹,當作民。

帝庸作歌。曰:「勑天之命,惟時惟幾。」乃歌曰:「股肱喜哉!元首起哉!百工熙哉!」皋陶拜手稽首颺言曰:「念哉!率作興事,慎乃憲,欽哉!屢省乃成,欽哉!」乃賡載歌曰:「元首明哉,股肱良哉,庶事康哉!」又歌曰:「元首叢脞哉,股肱惰哉,萬事墮哉!」帝拜曰:「俞,往欽哉!」

庸,用也。勑,當作敕,誡也。時,猶一日二日也。幾,萬幾也。[一]言君臣皆當誡謹,天之所命無時無事而可怠忽也。歌,詠也,長言之也。股肱,大臣也。喜,樂也,猶和也。元首,君也。起,立也,猶振作也。百工,庶官也。熙,興也,言同力俌治也。魏晉而上,字無四聲之別,故喜、熙通爲一音。颺,揚也,續也。念,常思也。帝歌以戒臣工,皋陶言羣臣當念帝之戒也。率,達也,先導也。作,爲也。興,起也。事,職也。憲,法也。屢,即屢字,讀爲數,亟也。省,察也。乃,詞之難也。賡,續也。載,再也,再歌以戒君也。明,古讀若芒。良,善也。康,康也,安也。又,有繼之詞也,亦當讀爲再,復歌以責難于君也。脞,當作脞,叢睉,雙聲連語,繁碎之意,足以亂大政也。惰,不敬也。墮,毀壞也。此一節君臣交儆,有虞之治,所以冠于百王也。

校勘記

[一] 幾,萬幾也,當作「萬機也」,見前「一日二日萬幾」注。(第21葉)

尚書古注便讀 卷之二

元和朱駿聲豐芑甫集訂

夏書

夏,禹有天下之號也。《書》凡四篇,此篇作于虞時,而繫之夏者,禹之 王以是功也。

禹 貢

《書敘》曰:「禹別九州,隨山濬川,任土作貢。」按:《敘》闕「作禹 貢」三字。貢,獻功也,下之所納于上者,兼田賦言之。凡取于民者,皆民 之所獻。《孟子》曰:「夏后氏五十而貢。」

禹敷土,隨山刊木,奠高山大川。

敷,專也,分也,分別土地以爲九州也。隨,循也。刊,栞也,槎識也。 斫大木爲識,以表其道也。奠,定也,正也。高山大川,五嶽四瀆之屬,方 洪水橫流,不辨區域。此三者乃禹治洪水之大綱也。

冀州:既載,

水中可居曰州。昔遭洪水,民居水中高土,故曰九州。冀州,統舜幽、并二州之地,東西南三面距河。不書其界者,王者無外,尊帝都也。今山西全省,河南之彰德、衛輝、懷慶三府,直隸之順天、順德、廣平、保定、宣化、永平六府,及河間、正定二府之西北境,東北則盛京奉天、錦州二府,北則踰塞直抵陰山下,西起東受降城之北,東訖于大遼水,皆冀州域也。帝都,在今山西平陽府臨汾縣西南。既,發語詞,猶已也。載,才也,猶始也。九州之次,即禹治水之次也。

壺口,治梁及岐。

壺口山,在今山西潞安府壺關縣,河水注其中如壺也。治,理也,汨也。 鯀未施工,禹剏始治之也,急河流之衝也。梁山,在今陝西同州府韓城縣。 岐山,在鳳翔府岐山縣東北十里。二山皆雍州境,而此並言者,治壺口之後, 即東至梁山而甸之,治梁後又東至岐山,而兼治汧、渭、漆、岐、雍諸小水, 蓋功相因而事乘便,與壺口實一役也,故終言于此。

既修太原,至于岳陽;

修,亦治也,因鯀之功而修之也。河道既通,而後汾水可治,故壺口先治,而後太原可修。原,遠也,廣平曰原。太原,原之大者,今山西太原府太原縣地也。岳,太岳,一名霍太山,在山西平陽府霍縣之東。山南曰陽,今岳陽縣地也。此治汾水也。

賈懷底績,至干衡漳。

覃懷, 地名, 泲水出其西, 淇水出其東, 今河南懷慶府武陟縣也。底, 致。績, 功也。衡, 橫也, 其水橫流入河也。漳水有二, 清漳出今山西平定州樂平縣沾嶺, 東南流至河南彰德府涉縣, 而濁漳入之。濁漳出今山西潞安府長子縣發鳩山, 東南流至河南與清漳合, 又東北流至直隸河間府阜城縣而入大河。此治泲水、淇水、漳水也。

厥土惟白壤,

厥、惟,皆語詞。厥,猶其也;惟,猶爲也。壤,柔土也,其質無塊而 性和美,其色多白也。

厥賦惟上上錯,

賦,稅也。賦有九等,上上,第一等也。錯,造也,雜也。雜出,第二等也。鄭氏曰:賦之差,一井,上上出九夫稅,上中出八夫稅,遞而至于下下,出一夫稅,通率九州,一井稅五夫也。按:一夫之稅,五十畝也。《夏小正》曰:「初服于公田,惟井爲有公田。」由此觀之,雖夏亦井也。又《左》襄二十五年《傳》賈逵注云:「山林之地,九夫爲度,九度而當一井;藪澤之地,九夫爲鳩,八鳩而當一井;邱陵之地,九夫爲辨,七辨而當一井;厚鹵之地,九夫爲表,六表而當一井;偃

豬之地,九夫爲規,四規而當一井;原防之地,九夫爲町,三町而當一井; 隰皋之地,九夫爲牧,二牧而當一井;衍沃之地,畝百爲夫,九夫爲井。」 此雖通計山林等九者,與田賦不同。然田有肥磽,統一州言之,其懸殊亦當 如是耳。此州獨不言貢者,天子封內之地至近,惟入穀稅,不以他物當之, 凡所需用,令有司以價市于民,不煩諸侯貢篚也。

厥田惟中中。

地能吐生萬物曰土,據人功作力敶穀而蓺之曰田。地形有高卑,高則水 患輕,卑則水患重。雍州最高,故其田上上。揚州最卑,故其田下下也。田 分九等者,言地之形勢,備水有緩急,非言田之肥瘠、樹穀有厚薄也。

恒、衛既從,大陸既作。

恒水,出今直隸定州曲陽縣西北恒山,至保定府祁州合滋河而入滱水。 衛水,出今正定府靈壽縣良同村,東南流入滹沱河。從,隨行也,順其道而 行也。大陸,澤名,跨今直隸保定府束鹿縣、順德府鉅鹿縣、趙州隆平、寧 晉二縣地。作,爲也,猶言藝也。

鳥夷皮服,

鳥夷,東北之民搏食鳥獸者。服,用也,衣裳所以便用也。鳥夷衣皮,故賈皮服。青之萊夷,徐之淮夷,揚之鳥夷,皆附于厥貢之末。此州無賈篚之文,故記于此。不言貢者,夷民非在州內,不制其貢,來則受之,不來亦不徵。他州之夷,當亦然也。鳥,僞孔作島,非。

夾右碣石入于河。

夾,挾持也。右,又也,人右手也。碣石山,當在今直隸永平府撫寧、 昌黎二縣海傍,非今武定府之碣石,亦非今廣東之碣石鎮也。禹由碣石西北 行,盡冀州之境,而碣石在東爲右,還從山東南行入河,而碣石又在西爲右, 如挾持者然也。治水既畢,而禹復巡行者,周觀地之肥瘠以定賦之高下也。 河,《史記》作海,似亦可從。

濟河惟兗州。

濟, 济也, 四瀆之一, 出今河南懷慶府濟源縣王屋山, 至山東青州府博 興縣入海。若濟水, 則出今直隸趙州臨城縣贊皇山, 別一水也。河, 出今西 域昆侖山,至江蘇淮安府安東縣入海。兗當作沇,即泲水上流,州以沇水得 名也。兗州之界,今山東東昌府及兗州、曹州、濟南、青州四府之西北境, 直隸之大名府及正定、河間二府之東南境,河南之衛輝府東南境,皆是也。 東南據泲,西北距河。

九河既道,

河水至此流盛而地平無岸,故能分爲九,以衰其勢。九河之名,徒駭、大史、馬頰、覆鬴、胡蘇、簡、絜、鉤般、鬲津也。春秋時,齊桓公塞其八枝,春秋佐助期所謂移河爲界。在齊呂填閼八流以自廣也,蓋并歸徒駭河爲一焉。徒駭、胡蘇、簡、絜皆當在今直隸河間府,大史當在天津府,馬頰、覆鬴、鬲津皆當在今山東濟南府,鉤盤當在今武定府,九河大約在三百里間也。道者,疏之而各行其道也。

雷夏既澤,灘、沮會同。

雷夏,在今山東曹州府濮州,舜所漁處也。澤,水艸交造之池也。既, 澤水得所鍾也。灉、沮二水,俱出今濮州西北平地。會同者,合入于雷澤也。

桑土既蠶,

其地宜蠶桑,因名桑土,即《鄘詩》所謂桑中也,在今濮州。桑,蠶所 食葉木也。蠶,任絲蟲也。攤、沮歸澤,而後其地可蠶也。

是降丘宅土。

是,語詞,猶則也。降,下也。丘,土之高處,非人所爲者。宅,尻也。 此州在河、濟之間,洪水爲害尤甚,民皆依高丘避之,今得下尻平地也。

厥土黑墳,厥草惟繇,厥木惟條。

墳, 蚡也, 蚡鼠能穿地起土, 故謂土之滃然而起者爲墳。《周禮》「草人墳壤用麋」是也。馬氏謂有膏肥, 則讀墳爲膹也。草, 艸也。繇, 蘇也, 草盛貌。木曰曲直。樤者, 枝長也。

厥田惟中下,厥賦貞,作。十有三載乃同。

田,第六等賦。不言者,時未定賦也。貞,正也。作,起而耕治也。兗 州當河下流之衝,水激而湍悍,地平而土疏,被害尤劇,今水患雖平,而卑 濕沮洳未必盡去,民剏始耕作,用力正勞,必至十三年乃可定賦,與八州同也。載,才也,年也。同,合會也。其定賦亦當下下,爲第九等也。

厥貢漆絲, 厥篚織文。

九貢,皆謂之貢,其供衣服之用者謂之篚,別其物也。漆,黍也,木汁,可以**蒙**物。絲,蠶所吐也。篚,匪也,篋也,所以盛幣。織文,染絲織之,若錦、綺之屬,以充天子郊廟之服。凡貢篚之物,皆隨時賈以當邦賦,非于賦稅之外更有取于民也。

浮干濟、潔,達干河。

浮,氾也。濟,泲也。潔,當作濕,濕水本出今濟南府禹城縣,至青州 府高苑縣入海。禹治河時,于今河南衛輝府濬縣大伾山分河之一支,東北流 逕山東曹州府朝城縣,至濟南禹城而與漯水合,故禹城以南朝城以北之河亦 皆被以漯名也。因水入水曰達。禹巡行州境,蓋由泲入濕,由濕入河也。

海岱惟青州。

海,東海也。岱,東嶽泰山也,在今山東泰安府青州之界。東北跨海, 西南至岱,今山東之登州、萊州、青州三府及濟南、泰安二府之北境。東北 跨海,即舜時所分之營州,爲今盛京、奉天、錦州等府,及朝鮮國地皆是也。

嵎夷既略,

嵎夷,即《堯典》之嵎夷。略者,經理田土也。巡其邊界而用功不繁日 略。

濰、淄其道。

濰水,出今山東沂州府莒州箕屋山,至萊州府昌邑縣東北入海。淄,當 作蓄。淄水,出今青州府博山縣原山之陰,至青州府博興縣北入泲。其,語 詞,猶既也。

厥土白墳,海濱廣斥。

濱,當作瀕,水厓也。廣,遠博也。斥,當作席,澤也,鹹鹵之地,可 煮爲鹽者也。

厥田惟上下,厥賦中上。

田,第三等。賦,第四等。

厥貢鹽絺,海物惟錯。

鹽,煮海水爲之,古者宿沙初作鹽。絺,葛之細者也。海物,海魚也。 錯,遺也,種類不一也。

岱畎絲、枲、鉛、松、怪石。

畎,猶谷也。枲,麻也。鉛,青金也,錫之下者爲鉛。松,喬木也。怪, 異也。怿石,武夫之類,似玉者也。

萊夷作牧。

萊夷,萊山之夷,古萊子國也,在今山東登州府黃縣。按:登州、萊州 二府,皆古萊夷地也。作,爲也。作牧,畜牧爲業,以《周禮》「任牧以畜事」 例之,是當貢鳥獸也。

厥篚檿絲。

篚,匪也。檿,山桑也,材可作弓及車轅。食檿之蠶,其絲堅韌,中琴 瑟弦。

浮于汶,達于濟。

汶水,出今山東泰安府萊蕪縣原山之陽,至東平州安山鎮入于泲也。

海、岱及淮惟徐州。

徐州之界,東至海,西北至岱,南至淮,今江蘇之徐州、淮安二府。海州,安徽之泗州及鳳陽府北境,山東兗州、沂州二府,濟寧州及泰安府南境,曹州府東南境皆是也。商并青于徐,故《爾雅》「濟東曰徐州」,周并徐于青,故《職方》「正東曰青州」也。

淮、沂其乂,

准水,出河南南陽府桐柏縣胎簪山,東流入海,今于江蘇揚州府江都入 江者。蓋春秋時吳伐齊,于廣陵東南築邗城,城下掘深溝,謂之邗江,東北 通淮安府山陽縣之射陽湖,而北至末口入淮,此溝通江淮之故道也。至晉于 江都縣之歐陽埭引江至廣陵城,而北出白馬湖,合中瀆入淮,謂之山陽瀆。 明初循故瀆開新運河以通漕,即今之運道也。沂水,出山東沂州府沂水縣臨 樂山,至江蘇徐州府宿遷縣匯爲駱馬湖,又南入運河也。乂,雙也,治理也。

蒙、羽其藝,

蒙,東蒙山也,在今山東沂州府蒙陰縣南,費縣北。羽山,在今郯城縣 東北,江蘇海州贛榆縣西南。藝,當作埶,穜也,言可樹藝五穀也。

大野既豬,

東原底平。

厥土赤埴墳,

埴,黏土也,細密而膩也。

草木漸包。

漸,蔪也,艸進長也。包,勹也,裹也,言木豐茂而積密也。

厥田惟上中,厥賦中中。

田,第二等。賦,第五等。

厥貢惟土五色,

徐州亦有五色之土,貢之所以爲大社之封也。《周書·作雒》曰「諸侯受命于周,乃建大社于國中,其壝,東青土,南赤土,西白土,北驪土,中央舋以黄土。將建,諸侯鑿取其方一面之土,包以黃土,苴以白茅,以爲土封。」此制以爲貢者,意亦爲是用也。據《太康地記》,今山東沂州府莒州有五色土。

羽畎夏翟,

羽畎、羽山之谷也。夏、華也、有采色也。翟、山雉長尾者、其屬有六、

素質五采曰翬,青質五采曰搖,按驕也;南方曰壽,按翻也;東方曰甾,按 鶴也;北方曰希,按鷩也;西方曰蹲,按鵔也。車服、器用、旌旄、衣服之 飾及樂舞皆用之。

嶧陽孤桐,

嶧山,亦名葛嶧山,今江蘇徐州府邳州西南,非今山東兗州府鄒縣之山 也。桐,榮木也,如梧而皮白,不實,其材中琴瑟。孤,特也。特生之桐, 本榦高挺而無枝也。

泗濱浮磬,

泗水,出今山東兗州府泗水縣陪尾山西南,流至曹州府鉅野縣,分爲二支,一入菏,一入淮也。濱,當作瀕。磬,樂石也。浮磬者,石浮生水涯土中,不根著也,以爲磬,其聲清越。

淮夷嬪珠暨鱼。

淮夷,今江蘇揚州、淮安二府近海之地也。蠙,蚌也,珠生于蚌者謂之 玭,珠之美者也。暨, 息也, 及也。此魚亦海魚也。

厥篚玄纖縞。

玄,黑而有赤色者。纖,細也。縞,繒也,繒之精者曰纖縞也。朝祭之服,元端用之。或曰黑曰玄,黑經白緯曰纖,白曰縞,三色繒也。存疑。

浮于淮、泗,達于河。

河,當作菏,荷澤,澤名,泲水所鍾也,在今山東曹州府荷澤縣東南,其 支流之水至兗州府魚臺東流入河。禹南浮淮以浮泗,由泗以達菏,徧徐州境也。

淮海惟揚州。

揚州之界,北至淮東至海,今江蘇、安徽、江西、浙江四省及河南之汝 寧府、湖北之黃州府皆是。至福建省見于《周禮》,兩廣地開于漢武,雖禹時 當亦在五服中,而但爲聲教所暨,不在九州之內也。

彭蠡既豬,陽鳥攸居。

彭蠡,澤名,在今江西九江府之湖口、彭澤二縣,南康府之都昌縣地,

周四百五十里,亦曰鄱陽湖。其所豬水有九湖,漢也、豫章也、鄱也、餘也、脩也、盱也、蜀也、南也、廬也。九水總名爲贛水,自南安府流至南昌府入彭蠡。陽鳥,隨陽氣南北避寒就暖,鴻雁之屬。《夏小正》「正月雁北鄉,九月遄鴻雁」是也。攸,語詞,猶所也。居,凥也,處也。此鳥常居于洲渚之間,彭蠡豬而爲湖,則陽鳥得安所居矣。

三江既入,

三江,鄭氏云:「左合漢爲北江,會彭蠡爲南江,岷江居其中則爲中江。」按:合漢,在今湖北漢陽府漢陽縣;會彭蠡,在今江西九江府湖口縣;自此而下,南北合爲中江,即大江也。謂之三者,據上流言之耳。入,內也,從上俱下也,謂東入海。

震澤底定。

震澤,太湖也,在今江蘇蘇州府吳縣,廣袤八百里,亦名五湖,以太湖匯 隔湖、洮湖、射湖、貴湖爲五也。疑具區則別一藪,非此震澤。定,安止也。

蓧簜既敷,厥草惟夭,厥木惟喬。

蓧,箭屬小竹也,可爲矢。簜,大竹,可爲弓榦及符節。敷,敶列也。 夭,少長也。喬,上竦也。

厥土惟塗泥。

塗,當作涂,汙也,淤也。泥,妮也,淖也。塗泥溼而漸洳也。

厥田唯下下,厥賦下上,上錯。

田,第九等;賦,第七等,雜出第六等。六等少,故曰上錯。

厥貢惟金三品,

此金,謂銅也。品,眾也,猶類也。三類,黃、白、赤三色也。他州或 貢鏐鐵、銀,或貢鉛。揚州有銅山,故貢銅。《史記·貨殖傳》云「吳有章山 之銅」是也。疑在今江蘇徐州府銅山縣。漢之丹陽郡,故章郡也。

瑤、琨、篠簜、齒、革、羽、毛、惟木。

瑶,玉之美者;琨,石之美者;齒,象牙,所以飾角弓兩頭;革,犀兕

之皮,所以爲甲冑;羽,鳥羽,所以飾旞旌者;毛,犛牛尾,所以注干首, 所謂旄也;木,僞孔傳爲楩梓,豫章之屬。然「惟木」二字,《史記》、《漢書》 皆無之,疑衍文。

鳥夷卉服。

卉,艸之總名。此州下濕,故衣艸服。貢其服者,以給天子之官,如《郊 特牲》云「大羅氏,天子之掌鳥獸」者也。諸侯貢屬焉,艸笠而至尊,野服 也,所謂黃衣黃冠也。鳥夷,僞孔亦作島夷。

厰館織貝,

貝,錦名,錦如餘泉、餘蚔之貝文者。《詩》曰:「成是貝錦」是也。凡 先染其絲爲數色,間雜織之以成文曰織。惟士不衣織。

厥包橘柚,錫貢。

包, 勺也, 裹也, 以茅蒩之。橘, 樹碧而冬生果, 似橙, 色赤, 味甘。柚, 似橙而大, 皮厚味酢, 甚美。錫, 賜也, 猶降也。橘柚必待錫命而後貢, 口味之細, 非常貢也。此王肅義, 當從之。

沿于江、海,達于淮、泗。

沿,緣水而下也。禹時江淮未通,必沿江入海,由海南行,施功震澤, 而後自海達淮,自淮達泗,歷揚州之境也。自淮達泗,當在今江蘇淮安府清 河縣。

荊及衡陽惟荊州。

荊州之界,北至荊山之南,南跨衡山之南。荊山,在今湖北襄陽府南漳縣。衡山,在今湖南衡州府衡山縣。其地,今湖南全省,湖北之武昌、漢陽、 黃州、安陸、德安、荊州、宜昌、施南八府,及襄陽府之南境,又四川敘州、 重慶、夔州三府之江南地,廣西桂林府,貴州遵義府,皆是也。

江、漢朝宗于海,

江水,出今四川龍安府松潘廳北西番界大分水嶺,流至江蘇通州入海。 漢水,出今陝西漢中府寧羌州北嶓冢山,流至湖北漢陽府漢陽縣合江入海。 朝宗者,諸侯春夏見天子之名。二水合一赴海,猶諸侯同心尊天子而朝事之。 荊楚之域,國有道則後服,國無道則先彊,故記其水之義,以著人臣之禮也。 《詩》曰:「沔彼流水,朝宗于海。」

九江孔殷,

九江,烏白江、蚌江、烏江、嘉靡江、畎江、源江、廩江、提江、箘江 也,皆從山谿所出,始發于今湖北武昌府武昌縣,至黃州府蘄州合爲大江。 孔,空也,竅也。殷,盛也,眾也。言九江其孔眾多,治之甚難而勞也。史 遷以孔、殷爲甚中,于文費解,故從鄭義。

沱、潛既道,

水自江出爲沱,漢別爲潛。沱,疑即夏水也,在今湖北荊州府江陵縣, 首受江水,流至安陸府京山縣入漢。潛水,未詳,疑亦在今安陸府潛江縣上 下也。馬氏曰:「泉出而不流者謂之潛。」當是漢水伏流從平地湧出者。

雲土、夢作乂。

雲、夢、二澤名。雲在江之北,今湖北安陸府之荊門州京山縣,漢陽府 之漢陽縣,沔陽州,荊州府之監利縣,德安府之安陸縣,黃州府之黃岡、麻 城二縣,蘄州地,皆是也。夢在江之南,荊州府之枝江、石首、江陵三縣地 是也。夢小而雲大,合而言之亦曰雲夢也。土者,水退土見也。乂,變也。 作乂,已可耕治也。

厥土惟塗泥,厥田惟下中,厥賦上下。

塗泥與揚同。田,第八等;賦,第三等。

厥貢羽、毛、齒、革,惟金三品,

所出與揚州同。《晉語》「羽、毛、齒、革,則君地生焉。」君,謂楚成 王也。《左傳》「鄭伯始朝于楚,楚子賜之金,既而與之盟,曰:『無以鑄兵』。」 楚子,亦成王也。

杶、榦、栝、柏,

植,木似樗,中車轅。幹謂柘木,弓材之美者。栝,檜也,檜木,柏葉 松身。柏,椈木也。

礪、砥、砮、丹,

礪,當作厲,旱石也;砥,柔石也,皆可以摩利刀刃,礪粗而砥細。砮,石可以爲矢鏃。《魯語》「肅愼氏貢楛矢、石砮。」丹,巴、越之赤石也,丹沙可以爲采。

惟镣簵、楛,三邦底貢厥名。

窗簵,竹名,聆風也,細長無節。楛,木葉似蓍,莖似荊而赤,二物皆 勁,中矢笴。楛,又可篾以爲筥,屈以爲釵也。三邦,未聞。貢厥名者,貢 其有名之善材也。

包匭菁茅,

匭,糾也,猶纏結也,既包裹而又繚繞約束之。菁,精也。茅,菅之不滑,澤有毛者也。菁茅可縮酒,又以爲藉祭祀用焉,故貴之而言精也。管子謂齊桓公曰:「江淮之間一茅三脊,名曰菁茅」是也。

厥篚玄纁璣組,

纁,淺絳色也。凡帛以朱漸丹,秫染之三次則成赤,所謂纁也;四次則 爲朱;至五次入黑而爲纔;六次入黑而爲玄,則黑多赤少矣。染元熏者,當 夏暑熱,則良荊地煖故善也。組,織絲有文,闊者以爲帶綬,謂之璣組者, 組綬上下貫佩玉,而以蠙珠納于其間,珠之不圓者曰璣也。此州所篚貢組, 非貢璣也。或曰組文似璣,猶織之名貝,亦通。

九江納錫大龜。

九江之中產大龜。納,內也,入也。大龜,長尺二寸,天子之守龜所以 卜也,亦必錫命而後入之,非常用之物也。

浮于江、沱、潛、漢,逾于洛,至于南河。

逾,越進也。江漢與洛不通,必遵陸而後達也。洛,雒也。雒水出今陝 西西安府雒南縣冢嶺山,至河南河南府鞏縣東北入河。南河者,豫州之北界, 至于南河,將至豫州也。此禹治水施功之敘也。

荊河惟豫州。

豫州之界,南至荊山之北,北至大河,今河南之河南、開封、陳州、歸

德、南陽、汝寧六府,許、陝、汝、光四州,及直隸大名府,山東曹州府, 安徽潁州府之西境,湖北襄陽府、德安府之北境,鄖陽府之東境皆是也。

伊、洛、瀍、澗既入于河,

伊水,出今河南陝州盧氏縣熊耳山,至河南府偃師縣入洛。洛,雒也, 見荊州。瀍,當作廛。瀍水,出今河南府洛陽縣穀城山,至縣東入洛。澗水, 出今河南府澠池縣白石山,至洛陽縣入洛。三水皆入洛,而洛至鞏縣東北入 河也。

榮波既豬。

祭, 熒也。波,潘也。熒潘,澤名,在今河南開封府榮陽、榮澤二縣地。 《春秋》宣公十二年《左傳》「楚逐晉魏錡及榮澤」,此其地也,東漢時已塞 爲平地。豬,都也。

導菏澤,被孟豬。

導,引也,猶開通也。菏澤,菏水所鍾也,在今山東曹州府菏澤縣。被,彼也,往有所加也。孟豬,即望諸明都也,在今河南歸德府商邱縣。皆禹疏之,以衰泲勢。蓋治陶邱復出之泲也,引此水以加于彼水,消菏澤之盛,而 泲水得所鍾矣。

厥土惟壤,下土墳墟。

壚,黑剛土也,其性疏散不黏。不言色者,其色雜也。

厥田惟中上,厥賦錯上中。

田,第四等;賦,第二等,雜出第一等也。

厥 貢漆、枲,絺、紵,厥篚纖、纊,

紵,檾屬,亦枲也。細者爲絟,粗者爲紵。纖,細也。纊,絮也,綿之 細者。

錫貢磬錯。

錯,厝也,厲石也。《詩》云:「他山之石,可以攻玉。」則磬爲玉,磬 厝所以治之。

浮于洛,達于河。

洛,雒水也。

華陽、黑水惟梁州。

華,奉也。華山在今陝西同州府華陰縣南,即惇物也。黑水,出今西番界,南流入雲南,即金沙江也。又東至四川敘州府,南入大江。梁州之界,東至華山之南,西距黑水,今陝西漢中府之南境及興安府商州,甘肅鞏昌府之南境及階、秦二州,湖北之鄖陽府,四川成都、保寧、順慶、雅州、嘉定、潼川、寧遠、龍安八府,眉、卬、瀘、資、綿、茂、達、忠、酉陽九州,敘川、重慶、夔州三府之江北境,及雲南、貴州北境皆是也。

岷、嶓既藝,

岷,當作酪。皤,當作番。岷山,自今甘肅鞏昌府岷州以西,直至四川 成都府西境,跨雍、梁二州。嶓冢山,自陝西漢中府寧羌州以北,直至甘肅 秦州西南,支脈聯屬,寔一山也,山形如冢,故名。

沱、潛既道。

二水亦謂自江、漢出者。沱水,古以爲在今四川成都府郫縣東,或以爲 在今茂州汶川縣,鄭氏謂在今眉州彭山縣也。潛水,古以爲在陝西興安府安 康縣。鄭氏謂即西漢水伏流復出,在今四川保寧府廣元縣東北,即嘉陵江也。

蔡蒙旅平,

蔡蒙山,在今四川雅州府名山縣。旅,敷也,敶祭也。平,**等也**,辯治也。

和夷底績。

和,桓也。桓水在今四川雅州府榮經縣。和夷,桓傍夷所居之地也。

厥土青黎,

黎之言壚也,色青而質疏。

厥田惟下上,厥賦下中三錯。

田,第七等。賦,第八等,雜出第九等者少,又或雜出第七等、第六等

者爲更少。

厥貢璆、鐵、銀、鏤、砮磬,

璆,鏐也,黃金之美者,所謂紫磨金也。鐵,黑金也。銀,白金也。鏤, 剛鐵可以刻鏤者。

熊、羆、狐、狸、

熊似豕,山居冬蜇。羆,大熊也,黄白文,皆猛獸,其皮以爲射侯。狐, 妖獸也。狸,伏獸似貙,皆縟毛溫煖以爲冬裘。

織皮,西傾因相是來,

織,飾也,猶服也。衣皮之民,西戎國也。西傾,雍州山,在今甘肅鞏 昌府洮州廳與四川龍安府松潘廳接界。因,捆也,猶造也。桓是,桓氏也。 按:桓,亘也,宛轉盤曲之意。氏,邸也,陵阪也。今鞏昌府隴西縣東,至 陝西鳳翔府隴州汧陽縣,一路皆隴阪。來,麥也,双刃而行至也。自古以「來」 字爲行麥,以「麥」字爲來牟,蓋相承互誤也。因桓是而來者,蓋西戎之人, 自今洮州廳歷漳縣、伏羌縣、秦州之禮縣,至鞏昌府之西和縣而達雍州境也。

浮于潛,逾于沔,入于渭,亂于河。

潛,即西漢水也。沔水,亦漢之上流,名沮水,出今陝西漢中府略陽縣 東狼谷,至沔縣與漾水合,故漢亦名沔也。渭水,出今甘肅蘭州府渭源縣首 陽山,至陝西西安府華陰縣入河。禹自嘉陵江泝流而至今四川保寧廣元縣北, 舍舟而陸,越峒山,而至陝西漢中府沔縣,南入沔,又迤邐歷褒、斜二水, 至鳳翔府郿縣東北入渭,沿流而東,遂亂于河。凡正絕流而渡曰亂,亂河則 至雍州矣。

黑水、西河惟雍州。

雍,當作雝。雝州之界,西至黑水,東至冀州西河。此黑水謂在大河之 北,出今甘肅甘州府張掖縣雞山,至安西州敦煌縣者。雍地,今陝西之西安、 同州、鳳翔、延安、榆林、興安六府,乾、邠、酅、綏德四州,漢中一府除 鳳縣,甘肅之蘭州、平涼、鞏昌、慶陽、寧夏、西寧、涼州、甘州、鎮西九 府,肅、迪化、安西三州,秦州除徽縣、兩當縣,皆是也。其在化外者,南 至西傾積石,西踰三危,北抵沙漠,遼闊不可紀極矣。

弱水既西,

弱,溺也。弱水在今甘肅甘州府山丹縣西,即西域所謂流沙河也。出竆 石山,眾水萬折必東,此水獨西流。既西,順其道也。

涇屬渭汭,

徑水,出今甘肅平涼府平涼縣崆峒山,東至陝西西安府高陵縣入渭。屬, 注也,猶灌也。汭,水相入也。水所入曰汭,猶內也。

漆沮既從,

漆水,出陝西西安府同官縣北高山,至耀州合沮水。沮,瀢也,水出今 陝西鄜州中部縣,至西安府富平縣入渭。既從者,從渭而入于河也。

灣水攸同。

灃,當作豐。水出今陝西西安府鄠縣終南山,至咸陽縣入渭。同,會合 也。

荊、岐既旅,終南、惇物,至于鳥鼠。

荊山,在今陝西同州府朝邑縣南。岐山,在今鳳翔府岐山縣。山有兩枝故名旅。陳,祭也。終南山,在今陝西西安府長安縣,東至藍田縣,西至鳳翔府郿縣,亙八百里。惇物山,一名垂山,在今鳳翔府郿縣,寔即終南之北峯也。按: 悉古文作物,物疑物之形誤耳。鳥鼠山,在今甘肅蘭州府渭源縣西。

原隰底績,至于豬野。

原隰,今陝西邠州及三水縣,皆古豳地。《詩·小雅》「畇畇原隰」,《大雅》「度其隰原」是也。豬野,都野也,澤名。在今甘肅涼州府鎮番縣,即休屠澤也。原隰之水皆退,豬野亦得所鍾矣。

三危既宅,三苗丕敘。

三危之地,在今甘肅安西州敦煌縣東南。既宅者,地可託居也。丕,大也。敘,次第也。舜所竄之三苗,安居于三危,亦大有次第,皆順敘也。

厥土惟黃壤,

黃者,土之正色,故美。

厥田惟上上,厥賦中下。

田,第一等;賦,第六等。雍田形視他州最高,水患爲輕,故曰上上。 雍賦定爲中下者,或居民尟少,或田質磽瘠,當時酌定其制,田與賦原不相 蒙也。他州皆然。

厥貢惟球、琳、琅玕。

球、琳,皆美玉也。琅玕,玉之圓似珠者。

浮于積石,至于龍門、西河,會于渭汭。

積石山,在今甘肅西寧府西寧縣西南塞外。龍門山,在今陝西同州府韓城縣東北,有關,其下即禹門也,廣八十步。禹鑿之西河,冀之西河也。會,合也,逆流曰會。渭汭,渭入河處,在今華陰縣也。禹周歷雍州之境,其道如此。

織皮昆侖、析支、渠搜,西戎即敘。

按:此西戎之國,禹時不在州內,故篇末附敘之也。織皮,衣皮之民,居此昆侖、析支、渠搜三山之野者,皆西戎也,因山以爲國號。此昆侖,在 今甘肅肅州西南;析支,在今西寧府西寧縣西南塞外;渠搜,當亦在西寧縣 塞外也。即,就也,猶造也。

導岍及岐,至于荊山,逾于河;壺口、雷首至于太岳; 底柱、析城至于 王屋; 太行、恒山至于碣石,入于海。

導,引也。水多發源於山,治山之脈所以通水。山有首尾,故以導言之。 岍,按:當作幵,平頭山也。《史記》、《漢書》作幵,以水名山也。幵,在今 陝西鳳翔府隴州南,即吳嶽也。岐,在今岐山縣,峯有兩枝。荊,在今同州 府朝邑縣,東麓臨河,河謂冀州西河,今山西蒲州府永濟縣東南也。壺口、 太岳,見冀州。底柱,在大河中流,其形如柱,在今河南陝州東。析城,在 今山西澤州府陽城縣西。王屋,在今絳州垣曲縣西。太行山,起今河南懷慶 府修武縣,縣亘山西、河南、直隸之境。恒山,在今直隸定州曲陽縣西北。 碣石,見冀州,海在碣石之東。入海者,山脈入海也。

西傾、朱圉、鳥鼠至于太華;熊耳、外方、桐柏至于陪尾。

西傾,見梁州。朱圉山,在今甘肅鞏昌府伏羌縣西南。鳥鼠,見雍州。

太華山,在今陝西同州府華陰縣。熊耳山,在今河南陝州盧氏縣,西南接陝西商州境。外方山,在今河南河南府登封縣北,綿亘一百五十里,即中嶽嵩山也。桐柏山,在今河南南陽府桐柏縣,東接湖北襄陽府襄陽縣境,胎簪山,其支峯也。陪尾山,在今山東兗州府泗水縣東。西傾,不言導者,蒙導岍之文也。

導嶓冢,至于荊山;內方,至于大別。

幡冢,見梁州。此荊山,在今湖北襄陽府南漳縣西北。內方山,在今湖 北安陸府鍾祥縣,西接荊門州,周百餘里。大別山,在今湖北漢陽府漢陽縣 東北,即魯山也。

岷山之陽,至于衡山,過九江,至于敷淺原。

岷山,見梁州。衡山,在今湖南衡州府衡山縣西,即南嶽也,亦名岣嶁山。過,猶逾也。九江,見荊州。敷淺原,在今江西九江府德化縣,南至南康府星子縣境,朱文公以爲即廬阜也。不言導者,蒙嶓冢之文也。按:岷山至衡山相距數千里,又衡山在江南,九江在江北,敷淺原又在江南,其山之脈絡不可考,宜從蓋闕。

導弱水,至于合黎,餘波入于流沙。

此下總言導水也。水皆自西北而下,故導之有敘。弱水,見雍州。合黎 山,在今甘肅甘州府張掖縣西。餘波,支流也。流沙,即居延澤也。出鍾山, 形如上弦之月,其沙隨風流行,西南至南海。蓋弱水自甘州府至肅州,其支 流東入塞外之流沙,又西南歸于南海也。

導黑水,至于三危,入于南海。

此黑水,在大河之北者,見雍州。三危山,在今甘肅鞏昌府岷州塞外, 雲南麗江府之北。鄭氏云在鳥鼠之西,岷山之北,積石之南,是也。黑水入 海之原委,則自西番入雲南界,至順寧府雲州,又南流至阿瓦國入南海也。

導河、積石,至于龍門;南至于華陰,東至于底柱,又東至于孟津,東 過洛汭,至于大伾;北過洚水,至于大陸;又北,播為九河,同為逆河, 入于海。

積石、龍門,見雍州。華陰,華山之北也。底柱,見導山。孟津,在今

河南懷慶府孟縣西南。洛汭,洛水之北爲內也,在今河南府鞏縣西南。大任,大坯也,山在今衛輝府濬縣東南。洚水,降水也,出今山西潞安府屯留縣,西南至潞城縣入濁漳。大陸,見冀州。九河,見兗州。逆,迎也。逆河者,海口有潮迎河,故以爲名也。今直隸天津府靜海縣、滄州鹽山縣南,及山東武定府海豐縣、沾化縣北境,當皆爲逆河之地,由是而入渤海也。按:河源,出今西域星宿海東北,流二千二百餘里,至今甘肅西寧府西寧縣西南塞外之積石山,禹導之自此始,又東北流,出長城東流,又南流入長城,西南流至陝西同州府韓城縣東北之龍門,所謂禹門也。由華陰縣東流,經河南陝州、懷慶府、河南府、衛輝府,至山西潞安府,直隸保定、順德二府及趙州,乃北分九河于河間、天津二府,山東濟東、武定二府之間,又合而至江蘇淮安府安東縣入海也。

嶓冢導漾,東流為漢,又東為滄浪之水,過三滋,至于大別,南入于江。 東匯澤為彭蠡,東為北江,入于海。

漾水,出今陝西漢中府寧羌州北嶓冢山,東至南鄭縣南,所謂東漢水也。 滄浪之水,在今湖北襄陽府均州北。三澨,水名,在今安陸府天門縣,有司 馬、馬溪、石家三河,後世謂之三叉水。大別,見導山。入江,在今武昌府 江夏縣北境。匯,回也,轉也。彭蠡,見揚州。北江,在今江蘇常州府北。 入海,在今江蘇通州。蓋漢水隨地得名,自今湖北襄陽府過安陸府,至漢陽 府觸大別山之陂入江而鬥,[一]乃東轉至江西入鄱陽湖,又東歷江蘇常州府, 至通州入海也。

校勘記

[一] 入江而鬥, 意義甚不好理解, 疑「東」字之誤。東, 折向東流也。

岷山導江,東別為沱,又東至于澧;過九江,至于東陵,東迪北,會于 匯;東為中江,入于海。

岷山、沱水,見梁州。別,分也。澧,醴也,水出今湖南澧州永定縣歷山,至安鄉縣會赤沙河入洞庭湖。九江,見荊州。大阜曰陵。東陵在今湖北黄州府黃梅縣西北,即大蘇山也。迤,衰行也。會,合同也。匯,蒙上文言彭蠡也。江自東衰行而北矣。又南會于鄱陽湖爲南江,遂東出而別爲中江也。按:江出今四川龍安府松潘廳北西番界大分水嶺,東至眉州爲沱,又東至湖南澧州,其流自東而北過湖北黃州府,又稍折而南,會于江西之彭蠡,乃東

出而北、經安徽至江蘇蘇州府之北、通州之南而入海也。

導流水,東流為濟,入于河,溢為榮;東出于陶邱北,又東至于菏,又東,北會干汶,又北,東入干海。

流,古文作合,山間陷泥地也。以爲水名,別製流字,以爲州名,又妄作兗字耳。水出今河南懷慶府濟源縣王屋山,既見而伏,至孟縣而出爲濟,濟,防也,至溫縣之東南入河。溢,泆也,水蕩泆也。榮,熒澤也,在今開封府。邱,再成爲陶邱,在今山東曹州府定陶縣西南。菏澤,見豫州。汶,見青州。會汶,在今兗州府壽張縣,至青州府博興縣而入海也。按:流水,三伏而四見,一見于河南懷慶府濟源縣;再見于孟縣而爲濟,伏而入河;三見于開封府榮澤縣;四見于山東曹州府定陶縣,而不復伏。河水濁,泲水清,故伏見皆可辨。

導淮自桐柏,東會于泗、沂,東入于海。

准、泗、沂,見徐州。桐柏,見導山。會泗,在今江蘇淮安府清河縣西南。沂之入泗,在今徐州府邳州西南,入海在淮安府安東縣西也。禹時江淮不通,至春秋時吳伐齊,溝通江淮,晉永和中又改開山陽瀆,隋又廣之,至明初循故瀆開運河以同漕,即今之新河也。按:淮,今自河南南陽府桐柏縣東流,至光州固始縣入安徽潁州府、鳳陽府泗州入洪澤湖,東北出江蘇淮安府清口,東則刷黃河以入海,南則入運河以濟漕,歷揚州府寶應縣、高郵州,抵江都縣而入揚子江也。

導潤自鳥鼠、同穴,東會于澧,又東會于涇,又東過漆沮,入于河。

渭水,出今甘肅蘭州府渭源縣西首陽山南谷,禹自其東南鳥鼠、同穴二山導之。鄭氏云:「鳥鼠之山有鳥焉,與鼠飛行而處之,又有止而同穴之山焉。鳥名爲鶲,似鷚而黃黑色。鼠如家鼠而短尾,穿地共處,鼠內而鳥外。」灃、涇、漆沮,皆見雍州。會灃,即灃水攸同也。會涇,即涇屬渭汭也。過漆沮,即漆沮既從也。按:渭,自甘肅蘭州府東至陝西西安府咸陽縣會灃,高陵縣會涇,富平縣過漆沮,至同州府華陰縣東北而入于河也。

導洛自熊耳,東北會于澗、瀍;又東會于伊,又東北入于河。

水皆見豫州。熊耳,見導山。洛,雒水也,出冢嶺山而東北,來自熊耳之間,故曰熊耳天門也,禹導洛自茲始。會澗瀍,在河南河南府洛陽縣。會

伊,在偃師縣。入河,在鞏縣也。

九州攸同,四隩既宅,九山刊旅,九川滌源,九澤既陂,四海會同。

此總結九州之山、土、川、澤、四海也。九州:冀、兗、青、徐、揚、荊、豫、梁、雍也。同,齊一也,言均治也。隩,墺也,東、西、南、北四方土可居也。九山:冀岳,青岱,荊荊衡,梁華、岷、嶓、蔡、蒙,雍岐也。九川:弱、黑、河、漾、江、沇、淮、渭、洛也。滌,洒也。源,當作原,清其源則流自順也。九澤:雷夏、大野、彭蠡、震澤、雲夢、榮播、菏澤、孟豬、豬野也。陂,隄障也,水皆得所鍾也。四海:冀、青、徐、揚四州之海,即下文東漸于海。四州瀕海,而凡天下之水皆順其道而歸合于海也。中國在大地之東南一隅,故惟見東海、南海,而禹時并不及南海,惟黑水言之,其寔非梁、雍幅員之所及也。

六府孔修,庶土交正,底慎財賦,咸則三壤成賦。

水、火、金、木、土、穀,謂之六府。孔,甚。修,治也。庶,眾。交,俱也。凡墳、壤、墟、塗、泥之美惡,上、中、下九等之高卑,莫不是正也。底,致。慎,謹也。財賦,謂貢篚之物也。咸,皆也。則,科等也。三壤,冀白壤,豫惟壤,雍黃壤也。以此爲則而等畫之,成上、中、下九等之賦也。此總結九州之土田貢賦也。

中邦錫土、姓,祗台德先,不距朕行。

中邦,五服之內萬國也。錫,賜也。天子建德,因生以賜姓,胙之土而命之氏,如姜、姬、姚、嬀是也。凡見于《山海經》者一百十七國,得姓者二十有一。祗,敬也。台,怡也,猶悅也。德,悳也。先,前進也。距,歫也,猶抵抗也。天子之德盛,故九州敬悅之,而我政教號令之所行,皆不抗違也。此起下文弼成五服之事也。

五百里甸服:百里賦納總,二百里納銍,三百里納秸服,四百里粟,五 百里米。

此下言禹弼成五服,至于五千之制。廣三百步,長三百步爲一里。古以 周尺八尺爲步。按:以輿地形勢言之,正北長城外皆非中邦之地,五服除冀 州甸服必不能方平正直,四面相歫如一,爲方五千里,亦設法以便計算也。 且鄭氏以《周禮》之九服說禹之弼成五服,每服一面加五百里,是五服爲方 萬里,恐非經意,當從《史記》以穗、銍、秸、粟、米,即甸服內之五百里也。甸,治田也。服,服事天子之意。王城之外,四面皆五百里也。納,內也,人也。總,聚束也,謂入所刈禾也。銍,短鐮也,謂以鐮斷去藁稈之半者。秸,稭也。上藁又去其皮,留近穗細莖也。服者,三百里內皆服藁役,不計其齎送之費也。粟,穀實也,盡去細莖者也。米,又去糠皮也。物之輕重,以遠近爲差,物之多少,以精粗爲量,必有均匀折算,以符什一之稅者,特以遠近較取攜之難易耳。

五百里侯服:百里采,二百里男邦,三百里諸侯。

甸服外,四面又各五百里爲侯服。謂之侯者,據禹時執玉帛者。萬國,除王畿內四百國,每州當封一千二百國,諸侯較多,故即以爲稱也。采,取也。九州之牧典貢職者,猶周制千里之外曰采也。男之言任,任王事者也。周之男服采服,蓋取之此。諸,眾也。侯之言候,候逆順,監司侯王命也。

五百里綏服:三百里揆文教,二百里奮武衛。

侯服外,四面又各五百里爲綏服。綏,安也。揆,度也。奮,猶振也。 衛,知護也,言屛內以禦外也。在王畿千三百里之外,已近要荒,故重武備 也。周之衛服,蓋取諸此。

五百里要服:三百里夷,二百里蔡。

緩服外,四面又各五百里爲要服。要,約也。夷、蠻、戎、狄,在于約 束之也。夷,九夷,言夷以該三者也。周之夷服,蓋取諸此。蔡,馬注「法 也」,讀爲繋,謂散置辠人于此也。鄭注「蔡之言殺」,「蓋讀爲衰」,謂減殺其 貢賦也。二說皆通。

五百里荒服:三百里蠻,二百里流。

要服外,四面又各五百里爲荒服。荒,蕪薉也。地廣大,荒而不治者,多也。馬注「政教荒忽」,則讀爲怳,爲忘失之。蠻,六蠻,言蠻以該夷、戎、狄也。周之蠻服,蓋取諸此。流者,其人民逐水艸遷徙,無城郭常居處,如水之流移無定也。

東漸于海,西被于流沙,朔南暨聲教,訖于四海。

漸, 漸也, 進也。被, 彼也, 往有所加也。朔, 北也。暨, 鼠也, 與同

也。聲,名。教,化也。訖,止也。東漸者,冀、青、徐、揚極東之境也。 西被者,荊、梁、雍極西之境也。南北不言所至者,冀、梁、雍北境外皆瀚 海沙漠,民人稀少;徐、揚、荊南境外,爲今之閩、浙、兩廣,不隸版圖, 故泛言預于聲教者耳。此四海,亦約略識之,南、西、北三面之海,實非目 之所經,身之所履也。

禹錫元圭,告厥成功。

錫,帝賜也。元,天水之色。圭,公、侯、伯瑞玉也,舜錫禹元圭以酬庸也。以勞定國曰功,至是告成功于天下,爲大禹王業之所基也。又按:《書緯·旋機鈐》曰:「禹開龍門,導積石山,元圭出,刻曰『延喜王受德,天賜佩』。」 漢武梁祠堂石刻《祥瑞圖》云:「元圭,水泉疏通,四海會同,乃至。」則以元 圭爲上帝之錫與,天乃錫禹。《洪範》九疇同此《尚書》今文說。存參。

甘誓

誓,以言約束也,軍旅日誓。《書序》曰:「啓與有扈戰于甘之野,作《甘誓》。」有扈,夏同姓之國。《淮南·齊俗訓》高誘注:「有扈,夏啓之庶兄也。以堯舜舉賢,禹獨與子,故伐啓。啓亡之。」云庶兄,不知何據?《莊子》「禹攻有扈」,《說苑》「禹與有扈氏戰」,《呂覽·先己》篇又以爲夏后相,皆傳聞之異。

大戰于甘,

戰,交鬥也。甘,有扈國之南郊也,在今陝西西安府鄠縣。鄭氏曰:「天子之兵,故曰大。」

乃召六卿。

乃,急辭也。召,評也。六卿,六軍之將。《周禮》云:「軍將皆命卿也。」 蓋六官之長,如冢宰、司徒等。六鄉之大夫,每鄉卿一人等,皆可爲將也。

王曰:「嗟!六事之人,予誓告汝:

嗟,當作壽,嗞也,發聲詞也。六事之人,統六卿以下軍吏及士卒,如下 文左右與御皆是也。

有扈氏威侮五行,怠棄三正,天用剿絕其命,

威,韋也,相背也。悔,輕傷也。五行,四時也,如《禮記》「孟春行夏令」之類是也。怠,慢也。棄,捐也。正,中也。三正,天、地、人之正道,言其政悖常亂德,自絕于天也。勦,劋也。劋、絕,皆斷也。命,天所命生人者也。大凡生于天地之間者,皆曰命。

今予惟恭行天之罰。左不攻于左,汝不恭命;右不攻于右,汝不恭命; 御非其馬之正,汝不恭命。

恭,肅靜也。罰,上報下之辠也。左,分也。右,又也。兵車之法,左 人持弓矢主射,右人持矛主刺殺。攻,擊也。御,使馬也。御者,執轡居中 主馬之馳騁。正,政也,謂磬控縱送之事也。命,誓命也,凡尊者之言曰命。 按:此言士卒之車也。若元帥所乘車,則將居鼓下,在中,御者在左,勇力 之士在右。自非元帥,則皆御中將左也。

用命,賞于祖;弗用命,戮于社,予則孥戮汝。」

賞,賜有功也。戮,殺有辠也。古者天子出征,必先有事于社,及遷廟, 而皆釁其主以行載之齋車,言必有尊也。社主曰軍社,遷主曰祖。賞戮異處, 陰陽之用也。孥,當作奴子女也。戮,僇也,辱也,謂弗用命,不但顯戮其 身,并其子女亦辱及之,如《周禮》「男子入于辠隸,女子入于春槖也。」軍 尙嚴,故法加重。

五子之歌

《書序》曰:「太康失邦,兄弟五人須于洛汭,作《五子之歌》。」按: 五子,啓子太康、仲康、武觀等五人也。武觀,幼子第五,嘗封于觀,故亦稱「五觀」。《左》昭公元年《傳》「夏有觀扈」,《楚語》「啓有五觀」,《墨子·非樂》篇云:「武觀曰:『啓子淫溢康樂,野于飲食,將將銘莧磬以力,湛濁于酒,愉食于野,萬舞弈弈,章聞于天,天用弗式。』」又《周書·嘗麥》篇曰:「其在啓之五子,忘伯禹之命,假國無正用,胥興作亂,遂凶厥國。皇天哀禹,賜以彭壽,思正夏略。」《竹書紀年》云:「啓十一年,放季子武觀于西河。十五年,武觀以西河叛,彭伯壽征西河,武觀來歸。」是武觀嘗叛而後歸順,留于京師者也。王符《潛夫論·五德志》篇云:「太康、仲康更立兄弟五人,皆有昏德,不堪帝事,降須洛汭。」蓋羿之亂,太康自其都今山西解州夏縣避于河南河南府鞏縣,後居于陳州府太康縣,所謂失邦也。羿代夏 政不數年,寒浞殺羿,時夏德雖衰,王號未替。太康立二十九年而崩,弟仲康立,嘗命臣允征浞黨羲和。仲康立十三年而崩,子相立,遷都今山東曹州府濮州。相立二十八年,浞子澆滅之,夏祚乃絕。厥後四十年,夏舊臣伯靡佐相子少康滅浞,誅澆,復禹之績也。此篇《五子之歌》,蓋昆弟五人須于洛汭時,史臣傷時憂世而作者。其書广于西晉永嘉之亂。

太康尸位,以逸豫滅厥德,黎民咸貳,乃盤遊無度,畋于有洛之表,十旬弗反。有窮后羿因民弗忍,距于河,厥弟五人御其母以從,徯于洛之 汭。五子咸怨,述大禹之戒以作歌。

羿冒于原獸,見《左傳》,今移之太康。太康即在五子中,今以爲太康之弟,皆非也。《夏訓》有之曰:「有窮后羿」,《左》襄四《傳》未了之語也。「萬民弗忍,居王于彘」,《左》昭二十六《傳》周王子朝稱厲王之事也。

其一曰:「皇祖有訓,民可近,不可下,民惟邦本,本固邦寧。予視天下愚夫愚婦一能勝予,一人三失,怨豈在明,不見是圖。予臨兆民,懍 乎若朽索之馭六馬,為人上者,奈何不敬?」

「民可近也,而不可上也」《周語》單襄公引《書》之文。今改「上」爲「下」以協音耳。「國主之有民也,猶城之有基,木之有根。根深則本固,基長則土寧」《淮南·泰族訓》之文也。「一人三失,怨豈在明,不見是圖」,《晉語》智伯國引《夏書》之文也。「怨豈」二句亦見《左》成十六年《傳》。「懷乎,如以腐索御奔馬」,《新序·雜事》篇引孔子之言也,又見《說苑·政理》篇。但夏駕麗,殷驂,周駟,經傳無言六馬者。漢世天子駕六,非古制也。「易其奈何不敬」,《召誥》文也。

其二曰:「訓有之,內作色荒,外作禽荒。甘酒嗜音,峻宇雕牆。有一于此,未或不亡。」

「出則禽荒,入則酒荒」、《越語》范蠡之言也。「儀狄作酒,禹飲而甘之」, 見《戰國策》。「彫牆」字見《左》宣元《傳》。「有一于此,足以亡其國」、《戰 國策,魏策》文也。

其三曰:「惟彼陶唐,有此冀方。今失厥道,亂其紀綱,乃底滅亡。」 「惟彼陶唐,帥彼天常,有此冀方。今失其行,亂其紀綱,乃滅而亡」, 《左》氏哀六年《傳》孔子引《夏書》之文也。 其四曰:「明明我祖,萬邦之君。有典有則,貽厥子孫。關石和鈞,王 府則有。荒墜厥緒,覆宗絕祀!」

其五曰:「嗚呼曷歸?予懷之悲。萬姓仇予,予將疇依?鬱陶乎予心, 顏厚有忸怩。弗慎厥德,雖悔可追?」

「鬱陶思君,爾忸怩」,《孟子‧萬章》引古書之言也。《爾雅》「鬱陶, 繇喜也,非哀思之謂」。「顏之厚矣」,見《詩》。「弗敬弗休,悔其可追」,《左》 哀十六《傳》文也。

允 征

《書序》曰:「羲和湎淫,廢時亂日,允往征之,作《允征》。」按:羲和,當爲寒浞之黨,仲康時命臣允征之也。此篇亡于晉永嘉之亂。

惟仲康肇位四海,允侯命掌六師。羲和廢厥職,酒荒于厥邑,允后承王命徂征。

「宮中之樂,無至酒荒」,《越語》范蠡之言也。

告于眾曰:「嗟,予有眾,聖有謨訓,明徵定保,先王克謹天戒,臣人 克有常憲,百官修輔,厥后惟明明,

「聖有謨勳,明徵定保」,《左氏》襄二十一年《傳》晉祁奚引《書》之 語也。

每歲孟春,遒人以木鐸徇于路,官師相規,工執藝事以諫,其或不恭, 邦有常刑。

「每歲」二字,見《左》昭二十九《傳》。「遵人以木鐸徇于路,官師相規,工執藝事以諫,正月孟春,于是乎有之」,《左氏》襄十四年《傳》師曠引《夏書》之文也。「不用法者,國有常刑」,《周禮,小宰職》文也。

惟時羲和顛覆厥德,沈亂于酒,畔官離次,俶擾天紀,遐棄厥司,

「顚覆厥徳,荒湛于酒」、《詩・小雅・仰篇》之詞也。「沈酗于酒」、見

《微子》。

乃季秋月朔,辰弗集于房,瞽奏鼓,嗇夫馳,庶人走,羲和尸厥官,罔聞知,昏迷于天象,以干先王之誅,

「辰弗集于房, 瞽奏鼓, 嗇夫馳, 庶人走」,《左》昭十七年《傳》魯太 史引《書》之文也。然此禮惟建巳之月日食則用之,餘月則否, 不爲災也。

《政典》曰:『先時者殺無赦,不及時者殺無赦。』

「政典」,字見《周禮·太宰》。「先時者殺無赦,不逮時者殺無赦」,《荀子·君道》篇引《書》之語也。《韓詩外傳》引周制曰:「先時者死無赦,不及時者死無赦。」則荀卿所引是《周書》而非《夏書》也。

今予以爾有眾,奉將天罰。爾眾士同力王室,尚弼予欽承天子威命。火 炎崐岡,玉石俱焚。天吏逸德,烈于猛火。殲厥渠魁,脅從罔治,舊染 汗俗,咸與惟新。

「火炎崐岡,玉石俱焚」,取諸《三國志》文也。「崐岡之火,自茲而焚」, 《後漢書,董卓傳論》之文也。此魏晉人常語。

嗚呼!威克厥愛,允濟;愛克厥威,允罔功。其爾眾士懋戒哉!」

「作事威克其愛,雖小必濟」,《左》氏昭二十三年《傳》吳公子光之言 也。

尚書古注便讀 卷之三

元和朱駿聲豐芑甫集訂

商書

帝嚳之子契始封商,在今陝西商州商南縣,湯因以爲有天下之號。書凡 四十篇。

帝告 釐沃

《書序》曰:「自契至于成湯八遷。湯始居亳,從先王居,作《帝告》、《釐 沃》。」《尚書大傳》引《帝告》文有「施章乃服,明上下」之語。八遷者, 自契至湯凡十四世,契封商後自遷蕃,昭明遷砥石,相土遷商邱,至湯遷亳, 餘未聞。蕃,今陝西同州府華州。《僞孔》曰:「釐告來居,治沃土」,以釐訓來,則似一篇矣。

湯征

《書序》曰:「湯征諸侯,葛伯不祀,湯始征之,作《湯征》。」《史記, 殷本紀》引《湯征》之文有「湯曰:予有言」五十七字。

汝鳩 汝方

《書序》曰:「伊尹去亳適夏,既醜有夏,複歸于亳,入自北門,乃遇汝 鳩、汝方,作《汝鳩》、《汝方》。」

夏社 疑至 臣扈

《書序》曰:「湯既勝夏,欲遷其社,不可。作《夏社》、《疑至》、《臣扈》。」按:湯旱七年,欲變置社稷。稷以契代柱而社,則功德無及句龍者,不可易而止。疑至、臣扈,二臣名。扈,見《君奭》,皆議遷社者。以上八篇,皆亡

于秦項之火。

湯誓

《書序》曰:「伊尹相湯,伐桀,升自陑,遂與桀戰于鳴條之野,作《湯誓》。」湯,號也,子姓。履,名,亦曰天乙,諡曰武,始居于薄,即相土所遷邑,今河南歸德府商邱縣也。繼遷西薄,今河南府偃師縣也。此未出師時誓于境內之詞,其時當在秋成稻熟之候。陑,《說文》無此字,《傳》謂在河曲之南,《疏》謂山阜之地,當在今陝西同州府潼關左右也。若鳴條,當在今山西平陽府安邑縣北,鄭氏則曰:「東夷地名」。

王曰:「格爾眾庶,悉聽朕言,非台小子,敢行稱亂!有夏多罪,天命 殛之。

湯,諸侯而稱王者,史臣追述之體。格,假也,來也。爾,介也,偁人之 詞。庶,亦眾也。悉,皆也。台,我也。小子,對天王而言也。敢,進取也。 行,猶逞也。稱,稱也,舉也。亂,鹹也,猶逆也。罪,辠也。殛,誅也。

今爾有眾,汝曰:『我后不恤我眾,舍我稽事而割正夏?』

后,君也。我后,謂湯也。恤,憂也。舍,捨也。穡事,秋獲之事也。 割正,猶裁正也。湯之民戴德服教,皆知順天應人,未必有是言。湯懸揣其 心代言之,亦敬民畏民之意之所流露也。

予惟聞汝眾言,夏氏有罪,予畏上帝,不敢不正。

惟,思也。思所聞之言,非不是也。然天命更可畏,不敢不往正其罪耳。 稱夏氏者,《周語》稱「禹有平水土之功,皇天嘉之,胙以天下,賜姓曰似氏, 曰有夏。」則夏雖爲有天下之號,實即氏也。

今汝其曰:『夏罪其如台?』

如台,言如我何也。夏雖有罪,其虐政不及于亳,事若可緩。亦湯懸揣 其心而代言之也。

夏王率遏眾力,率割夏邑。有眾率怠弗協,曰:『時日曷喪?予及汝皆亡。』夏德若茲,今朕必往。」

率,律也,均也。遏,渴也,盡也,言民之財力竭也。割,剝也,凡在

夏邑朘削已甚。怠者,念之誤字,古文怨也。協,眾之同和也,曰夏眾之言也。時,是也。害,曷也。《書大傳》云:「桀曰:『天之有日,猶吾之有民也,日亡吾亦亡耳。』故民言『日曷不喪,予慭與之皆亡耳。』」茲,此也。桀之暴德若此,湯之所以必往也。

「爾尚輔予一人,致天之罰,予其大賚汝!爾無不信,朕不食言。爾不 從誓言,予則孥戮汝,罔有攸赦。」

尚,庶幾也。輔,俌也,助也。賚,賜也。食言,言已吐而仍茹之也。故《爾雅》訓「食」爲「僞」也。孥,當作奴子女也。戮,僇也,辱也。子 女沒爲奴隸,言罪不止及其身也。罔,亡也,無也。赦,猶宥免也。「常刑有 赦,軍法無赦」,此當時誓師之常言也。

仲虺之誥

《書序》曰:「湯歸自夏,至于大坰,仲虺作《誥》。」此篇亡于秦項之 火。按:大坰,地名。當自今山東曹州府定陶縣,至河南河南府偃師縣之路。 仲虺,奚仲之後,爲湯左相。

成湯放桀于南巢,惟有慙德。曰:「予恐來世以台為口實。」

「桀奔南巢」,見《魯語》。「聖人之宏也,而猶有慙德」,《左》襄二十九年《傳》吳季札之言也。「使無以寡君爲口實」,《楚語》王孫圉之言也。

仲虺乃作誥,曰:「嗚呼!惟天生民有欲,無主乃亂,惟天生聰明時乂,有夏昏德,民墜塗炭,天乃錫王勇智,表正萬邦,續禹舊服。茲率厥典,奉若天命。

「民生而有欲」、《周書·文酌》篇之文也。「桀有昏德」、《左》宣三《傳》 王孫滿之言也。「坐于塗炭」、《孟子》之言也。塗炭、是汙濁、非蹈水火之 謂。

「夏王有罪,矯誣上天,以布命于下。帝用不臧,式商受命,用爽厥 師。

此節見《墨子·非命》上篇、中篇、下篇引《仲虺之告》,大同小異。但 爽,喪亡也。僞書誤解。「后帝不臧」,《左》昭元《傳》文也。「式商受命」, 《立政》篇文也,然亦誤用。 簡賢附勢,實繁有徒。肇我邦于有夏,若苗之有莠,若粟之有秕。小大 戰戰,罔不懼于非辜。矧予之德,言足聽聞。

「惡直醜正,實蕃有徒」、《左》昭二十八年司馬叔游引《鄭書》之文也。

「惟王不**避**聲色,不殖貨利。德懋懋官,功懋懋賞。用人惟己,改過不 吝。克寬克仁,彰信兆民。

「聲色」,見《禮記·月令》。「用人惟由己」,班彪《王命論》之文也。「湯 以寬治民」,《魯語》展禽之言也。

乃葛伯仇餉,初征自葛,東征,西夷怨;南征,北狄怨,曰:『奚獨後 予?』攸徂之民,室家相慶,曰:『徯予后,后來其蘇。』民之戴商, 厥惟舊哉!

此節事三見《孟子》,攝取成文。然此實爲《湯征》篇文也。

佑賢輔德,顯忠遂良,兼弱攻昧,取亂侮亡,推亡固存,邦乃其昌。

「兼弱攻昧」、《左》宣公十二《傳》隨武子之言也。「取亂侮亡」,隨武子引《仲虺》之言也。「亡者侮之,亂者取之」,襄十四《傳》中行獻子引《仲虺》之言也。下「推亡固存,國之道也」二語,中行獻子自言也。襄三十《傳》鄭子皮引《仲虺》之志略同,其實《仲虺》止有「取亂侮亡」一語。

德日新,萬邦惟懷;志自滿,九族乃離。王懋昭大德,建中于民,以義制事,以禮制心,垂裕後昆。予聞曰:『能自得師者王,謂人莫已若者亡。好問則裕,自用則小。』嗚呼!慎厥終,惟其始。殖有禮,覆昏暴。欽崇天道,永保天命。」

「日新之謂盛德」、《易·大傳》文也。「小邦懷其德」、《左傳》文也。「用其中于民」、《禮記·中庸》孔子稱舜之言也。「以義制事」,見《荀子》。「諸侯自爲得師者王,得友者霸,得疑者存,自爲謀而莫己若者亡。」《荀子·堯問》、《吳子·圖國》、《呂覽·恃君》、《新序·雜事》皆同引爲《仲虺》之言也。「愼終如始」、《荀子·議兵》篇文也。「親有禮」、「覆昏亂」、《左》閔元年《傳》齊仲孫湫之言也。

湯 誥

《書序》曰:「湯既黜夏命,復歸于亳,作《湯誥》。」此篇亡于西晉永

嘉之亂,今略見于《史記・殷本紀》。

王歸自克夏,至于亳,誕告萬方。王曰:「嗟!爾萬方有眾,明聽予一 人誥。惟皇上帝,降衷于下民。若有恒性,克綏厥猷惟后。

「今天降衷于吳」,《吳語》夫差之言也。「絜哉,民性有恒」,《韓非子, 說林》引孔子之言也。

夏王滅德作威,以敷虐于爾萬方百姓。爾萬方百姓,罹其凶害,弗忍荼毒,並告無辜于上下神祇。天道福善禍淫,降災于夏,以彰厥罪。肆台小子,將天命明威,不敢赦。敢用玄牡,敢昭告于上天神后,請罪有夏。
聿求元聖,與之戮力,以與爾有眾請命。

「滅德立違」,見《左》桓二《傳》臧哀伯語。「作威」,見《洪範》。「上下神祇」、《晉語》韓宣子言也。「叫天無辜」、《左》哀十六《傳》渾良夫言也。「天道賞善而罰淫」、《周語》單襄公引先王之令也。「神福仁而禍淫」、《左》成五《傳》士貞伯語也。「降災」,見《微子》。「予小子履敢用玄牡,敢昭告于皇皇后,帝有罪,不敢赦」、《論語・堯曰》篇文也、《墨子・兼愛》篇略同。《論語》眞孔注謂《墨子》引作《湯誓》,但《墨子》以爲大旱祈禱之詞。「聿求元聖,與之戮力同心以治天下」、《墨子・尚賢》中篇之文也。「以與百姓請命于皇天」、《淮南・汎論》文也。

上天孚佑下民,罪人黜伏,天命弗僭, 賁若草木,兆民允殖。俾予一人 輯寧爾邦家,茲朕未知獲戾于上下,慄慄危懼,若將隕于深淵。

「天命不僭」、《周書·大誥》文也。「以輯寧爾民」、《左》昭七《傳》文也。「未知得罪于上下」、《墨子·兼愛》篇引湯之言也。「雖隕于深淵,則天命也」、《左》哀十五《傳》芋尹葢之言也。

凡我造邦,無從匪彝,無即慆淫,各守爾典,以承天休。

「凡我造國,無從匪彝,無即慆淫,各守爾典,以承天休。」《周語》單 襄公引先王之令也。

爾有善,朕弗敢蔽;罪當朕躬,弗敢自赦,惟簡在上帝之心。其爾萬方有罪,在予一人;予一人有罪,無以爾萬方。嗚呼!尚克時忱,乃亦有終。」

「帝臣不蔽,簡在帝心,朕躬有罪,無以萬方,萬方有罪,罪在朕躬。」 《論語·堯曰》篇文也。「余一人有罪,無以萬夫,萬夫有罪,在予一人。」 《周語》內史過引《湯誓》之文也。按:《湯誓》,疑「湯誥」或「湯征」之 誤字。

成有壹德

《書序》曰:「伊尹作《咸有一德》。」當在湯朝所作也。此篇亡于西晉 永嘉之亂。按:《禮記·緇衣》所引尹吉,即尹壹也,省「咸有德」三字耳。

伊尹既復政厥辟,將告歸,乃陳戒于德。

太甲復歸之後,伊尹本無告歸之事,此依仿周公復政明辟之意,鑿空撰出者也。

曰:「**嗚呼!天難諶**,命**靡常。常厥徳、保厥位。厥德匪常**,九有以亡。 「天難諶」、《周書・君奭》文也、又《詩・大雅・大明》篇文也。「天命 靡常」、《文王》篇文也。「九有以亡」、《墨子・非樂》篇文也。

夏王弗克庸德,慢神虐民。皇天弗保,監于萬方,啟迪有命,眷求一德,俾作神主。惟尹躬暨湯,咸有一德,克享天心,受天明命,以有九有之師,爰革夏正。

「庸徳」,見《禮記・中庸》。「皇矣,上帝監觀四方。」《詩・大雅》文也。「百神爾主矣」,《詩・卷耳》文也。「惟尹躬及湯,咸有一徳」,《禮記・緇衣》引尹吉之文也。「奄有九有」,《詩・商頌》文也。「革夏」,見《多士》。

非天私我有商,惟天佑于一德;非商求于下民,惟民歸于一德。德惟一, 動罔不吉;德二三,動罔不凶。惟吉凶不僭在人,惟天降災祥在德。

「二三其徳」、《詩・衛風・氓》之篇文也。

今嗣王新服厥命,惟新厥德。終始惟一,時乃日新。

「茲服厥命」,《召誥》文也。「終始惟一」,《荀子,議兵》篇文也。「苟日新」,《禮記》湯盤銘也。

任官惟賢材,左右惟其人。臣為上為德,為下為民。其難其慎,惟和惟

一。德無常師,主善為師。善無常主,協于克一。俾萬姓咸曰:『大哉, 王言!』又曰:『一哉,王心!』克綏先王之祿,永底烝民之生。嗚呼! 七世之廟,可以觀德。萬夫之長,可以觀政。

「而亦何常師之有」,《論語》文也。「大哉,言矣。」《孟子》文也。「五世之廟可以觀怪,萬夫之長可以生謀。」《呂覽·諭大》篇引《商書》文也。七廟始于周,商則六廟,夏則五廟,湯時祗有五廟,湯既歿,後亦祗有六廟也。「怪」,是誤字。

后非民罔使;民非后罔事。無自廣以狹人,匹夫匹婦,不獲自盡,民主罔與成蹶功。」

「民非后無能胥以寧,后非民無以辟四方」,《禮記·表記》引《書·太甲》篇文也。「匹夫匹婦」,見《論語》。

典寶

《書序》曰:「夏師敗績,湯遂從之,遂伐三朡,俘厥寶玉。誼伯、仲 伯作《典寶》。」此篇亡于西晉永嘉之亂。三朡,國名,在今山東曹州府定 陶縣。

明居

《書序》曰:「咎單作《明居》。」此篇亡于秦項之火。咎單,湯司空也。明居,明度地居民之法。

伊訓

《書序》曰:「成湯既歿,太甲元年,伊尹作《伊訓》、《肆命》、《徂后》。」 《伊尹》亡于西晉永嘉之亂,其略見于《漢書,律歷志》。鄭康成引《伊訓》 云「載字在亳」,又曰:「征是三朡」。

惟元祀十有二月乙丑,伊尹祠于先王。奉嗣王祗見厥祖,侯、甸羣后咸在,百官總己以聽冢宰。伊尹乃明言烈祖之成德,以訓于王。

「維太甲元年十有二月乙丑朔,伊尹祀于先王,誕資有牧方明」,《漢書·律歷志》引《伊訓》文也。但太甲繼仲壬,非繼湯嗣位也。「祗見厥祖,侯、甸羣后咸在」,倣《顧命》篇也。「百官總己以聽于冢宰三年」,《論語》文也。

曰:「嗚呼!古有夏先后,方懋厥德,罔有天災。山川鬼神,亦莫不寧, 暨鳥獸魚鳖咸若。

「昔有夏之方有德也」、《左》宣三《傳》王孫滿之言也。「嗚呼,古者有夏,方未有禍,百獸貞蟲,允及飛鳥,莫不比方。矧在人面,胡敢異心。山川鬼神,亦莫敢不寧」、《墨子·明鬼》下篇引《商書》文也。「文王之澤,下被鳥獸,冷于魚鱉,咸若有樂」、賈誼《新書·君德》文也。

于其子孫弗率,皇天降災,假手于我有命,造攻自鳴條,朕哉自毫。

「上天降災」、《左》僖十五《傳》文也。「假手于我寡人」、《左》隱十一《傳》鄭莊公之言也。「天誅造攻自牧宮、朕載自亳」、《孟子》引《伊訓》文也,但改「牧宮」爲「鳴條」,則戰時非始。[一]「攻戰鳴條」,見《湯誓》書序。

校勘記

[一] 戰時非始,疑是「戰事非始」之誤,否則難以理解。

惟我商王,布昭聖武,代虐以寬,兆民允懷。今王嗣厥德,罔不在初, 立愛惟親,立敬惟長,始于家邦,終于四海。

「湯以寬治民而除其虐」,《禮記·祭法》文也。「今王嗣受厥命若生子, 罔不在厥初生」,《周書·召誥》文也。「立愛自親始,立敬自長始」,《禮記· 祭義》文也。

嗚呼!先王肇修人紀,從諫弗咈,先民時若。居上克明,為下克忠,與 人不求備,檢身若不及,以至于有萬邦,茲惟艱哉!

「人綱,人紀」,見揚雄《解嘲》。「昔曰先民」,見《商頌》。「從命而不拂,微諫而不倦,爲上則明,爲下則遜」,《荀子·臣道》篇引《書》之文也, 唐楊倞注竟以爲《伊訓》。「無求備于一人」,《論語》述周公之言也。「君子檢身,常若有過」周庚桑楚《亢倉子·訓道》篇文也。

敷求哲人, 俾輔于爾後嗣,

「敷求」,見《康誥》,又見《詩·抑》篇。「求聖君、哲人,以裨輔而身」,《墨子》引《傳》也。

制官刑,儆于有位。曰:『敢有恆舞于宮,酣歌于室,時謂巫風,敢有

殉于貨色,恒于游畋,時謂淫風。敢有侮聖言,逆忠直,遠耆德,比頑童,時謂亂風。惟茲三風十愆,卿士有一于身,家必喪;邦君有一于身, 國必亡。臣下不匡,其刑墨,具訓于蒙士。

「湯之官刑有之曰:『其恆舞于宮,是謂巫風』」、《墨子·非樂》上篇文也。「侮聖人之言」,見《論語·耆德》篇,[-]見《逸周書》。[二]「近頑童窮固」、《鄭語》史伯之言也。但《左傳》曰:「商有亂政而作《湯刑》」,則雖名《湯刑》,實作于叔季之世,必非作于成湯之時。

校勘記

- [-]「侮聖人之言」,見《論語·耆德》篇,當是《論語·季氏》篇之誤。
- [二] 見《逸周書》,前當有脫文「逆忠直,遠耆德」,見《逸周書》佚文《耆德》篇。

嗚呼!嗣王祗厥身,念哉!聖謨洋洋,嘉言孔彰。惟上帝不常,作善降 之百祥,作不善降之百殃。爾惟德罔小,萬邦惟慶;爾惟不德罔大,墜 厥宗。」

校勘記

[一] 今傳各本《咸有壹德》皆在《太甲下》之後。

肆命

《書序》同《伊訓》,此篇亡于晉永嘉之亂。鄭氏曰「陳政教所當爲也。」

徂 后

《書序》同《伊訓》,此篇亡于秦項之火。鄭氏曰「言湯之法度也。」

太甲上

《書序》曰:「太甲既立,不明,伊尹放諸桐。三年,復歸于亳,思庸。 伊尹作《太甲》三篇。」三篇皆亡于秦項之火。按:思庸,思伊尹之功也。

惟嗣王不惠于阿衡,伊尹作書曰:「先王顧諟天之明命,以承上下神祇。 社稷宗廟,罔不祗肅。天監厥德,用集大命,撫綏萬方。惟尹躬克左右

厥辟,宅師,肆嗣王丕承基緒。

「顧諟天之明命」、《禮記・大學》引《太甲》之文也。「禱爾于上下神祇」、 《論語》文也。「天監在下、有命既集」、《詩・大雅・大明》篇文也。「丕承」、 見《周書・君奭》。

惟尹躬先見于西邑夏,自周有終。相亦惟終;其後嗣王罔克有終,相亦 罔終,嗣王戒哉!祗爾厥辟,辟不辟,忝厥祖。」

「惟尹躬先見于西邑夏,自周有終,相亦惟終。」《禮記·緇衣》引尹吉 之文也。「厥辟不辟,忝厥祖」、《禮記·坊記》引《書》也。

王惟庸罔念聞。伊尹乃言曰:「先王昧爽丕顯,坐以待旦。旁求俊彥, 啟迪後人,無越厥命以自覆。慎乃儉德,惟懷永圖。若虞機張,往省括 于度則釋。欽厥止,率乃祖攸行,惟朕以懌,萬世有辭。」

「昧旦丕顯」,《左》昭三《傳》叔向引讒鼎之銘也。「坐以待旦」,《孟子》稱周公也。「無越厥命以自覆也。若虞機張,往省括于厥度則釋」,《禮記·緇衣》引《太甲》之文也。「則予一人以懌」,《周書·康誥》文也。「汝永有辭」,《周書·洛誥》文也。

王未克變。伊尹曰:「茲乃不義,習與性成。予弗狎于弗順,營于桐宮, 密邇先王其訓,無俾世迷。王徂桐宮居憂,克終允德。」

「不義惟王」、《周書·無逸》文也。「少成若天性習慣之爲常」、《大戴禮·保傳》篇引孔子之言也。「予不狎于不順」、《孟子》引伊尹之言也。「太甲悔過,自怨自艾于桐,處仁遷義。三年,以聽伊尹之訓己也。」《孟子》文也。「孤以不得密邇于天子」、《吳語》董裼之言也。至《孔叢子》與僞書同出,其書稍前,而語亦大同小異。

太甲中

惟三祀十有二月朔,伊尹以冕服奉嗣王歸于亳,

按:湯崩後,外丙立。二年,仲壬立。四年,二君爲太丁之弟,度皆沖幼,伊尹輔政。至太甲繼立,不明,尹必訓誡再三,久之不悛,乃放諸桐。如《史記》所云:「既立三年,不明,暴虐,于是放之。太甲居桐三年,悔過,乃迎歸。」前後六年也。今以太甲爲湯崩後踰月即位,即位而即改元,改元

而即爲尹所放,放而至二十六月,未終喪即冕服以迎,迎還而尹即告歸,四 者皆三代時必無之理也。

作書曰:「民非后,罔克胥匡以生;后非民,罔以辟四方。皇天眷佑有商,俾嗣王克終厥德,實萬世無疆之休。」

「民非后,無能胥以寧;后非民,罔以辟四方。」《禮・表記》引《太甲》 之文也。又《書》曰:「眾非后,無能胥以寧;后非眾,無以辟四方。」三國 《吳書・駱統傳》文也。「不能胥匡以生」,《盤庚》文也。「無疆惟休」,《周 書・召誥》文也。

王拜手稽首曰:「予小子不明于德,自底不類。欲敗度,縱敗禮,以速 戾于厥躬。天作孽,猶可違;自作孽,不可逭。既往背師保之訓,弗克 于厥初,尚賴匡救之德,圖惟厥終。」

「欲敗度,縱敗禮」、《左》昭十《傳》子皮引《書》也。「天作孽猶可違, 自作孽不可活」、《孟子》引《太甲》之文。《禮記·緇衣》「活」引作「逭」 也。「未習師保之教訓」、《左》襄十三《傳》楚共王之言也。「匡救其災」、《左》 僖二十六《傳》展喜之言也。

伊尹拜手稽首曰:「修厥身,允德協于下,惟明后。先王子惠困窮,民服厥命,罔有不悅。並其有邦厥鄰,乃曰:『徯我后,后來無罰。』王懋乃德,視乃烈祖,無時豫怠。奉先思孝,接下思恭。視遠惟明,聽德惟聰。朕承王之休無斁。」

「周公拜手稽首曰」,「王拜手稽首曰」,皆《周書·洛誥》文也。「湯布 德施惠,以振困窮」,《淮南·修務訓》文也。「徯我后,后來無罰」,《孟子》 文也。「致遠以爲明,聽德以爲聰」,《楚語》伍舉之言也。

太甲下

伊尹申誥于王曰:「嗚呼!惟天無親,克敬惟親。民罔常懷,懷于有仁。 鬼神無常享,享于克誠。天位艱哉!德惟治,否德亂。與治同道,罔不 興;與亂同事,罔不亡。終始慎厥與,惟明明后。

「天位」,見《詩·大雅·大明》篇。「與亂同道,難與爲謀」,《淮南· 說林》文也。此節全與《蔡仲之命》相複,何也? 先王惟時懋敬厥德,克配上帝。今王嗣有令緒,尚監茲哉。若升高,必 自下;若陟遐,必自邇。無輕民事,惟難;無安厥位,惟危。慎終于始。 有言逆于汝心,必求諸道;有言遜于汝志,必求諸非道。

「譬如行遠必自邇,譬如登高必自卑」、《禮記·中庸》文也。「聿修厥德」、「克配上帝」、皆《詩·大雅·文王》之篇也。「愼終如始」、《荀子·議兵》篇文也。

嗚呼!弗慮胡獲?弗為胡成?一人元良,萬邦以貞。君罔以辯言亂舊 政,臣罔以寵利居成功,邦其永孚于休。」

「不索何獲」、《左》昭二十七《傳》吳公子光之言也。「事雖小,不爲不成」、《荀子》文也。「一有元良,萬國以貞」、《禮記·文王世子》引古語也。「厥基永孚于休」、《周書·君奭》文也。

沃 丁

《書序》曰:「沃丁既葬伊尹于亳,咎單遂訓伊尹事,作《沃丁》。」沃丁,太甲之子也。

咸 乂

《書序》曰:「伊陟相太戊,亳有祥,桑榖共生于朝。伊陟贊于巫咸,作《咸乂》四篇。」太戊,沃丁弟,太庚之子也。祥,凶祥也。桑、榖,二木名。榖,楮也。共,拱也,兩手搤之曰供。太戊修德,從伊陟之諫而木枯。贊,說也。咸爲巫官,故使禳之。乂,嬖也,治也。〇《史記》:《咸乂》下尚有《太戊》一篇,百篇序無之。

伊陟

《書序》曰:「太戊贊于伊陟,作《伊陟》、《原命》。」〇以上六篇亡于秦項之火。

原命

《書序》同《伊陟》〇此篇亡于晉永嘉之亂。原,臣名。命原以禹、湯 之道,我所修也。江氏聲以《伊陟》、《原命》爲一篇。據《史記》,伊陟讓, 因謂太戊再命之。原,再也。

中丁

《書序》曰:「仲丁遷于囂,作《仲丁》。」仲丁,太戊子也。

河亶甲

《書序》曰:「河亶甲居相,作《河亶甲》。」河亶甲,亦太戊子也。

祖乙

《書序》曰:「祖乙圮于耿,作《祖乙》。」圮,毀也。祖乙,河亶甲子也。又自相遷耿,而圮于耿,耿即邢也。〇以上三篇俱亡于秦項之火。

盤庚上

《書序》曰:「盤庚五遷,將治亳殷,民咨胥怨。作《盤庚》三篇。」盤 庚,祖丁子也。祖乙之曾孫,繼兄陽甲立。此上篇誡羣臣也。

盤庚遷于殷,民不適有居,率籲眾壓出,矢言。

盤庚,湯十世孫。湯至盤庚凡十九王,其間兄弟相及者九王也。遷,徙也,登也。殷在今河南河南府偃師縣,即湯所遷之薄地,其都稍有別耳,蓋自今山西絳州河津縣遷今河南偃師縣也。自盤庚遷後,商始兼稱殷。適,往也,民不欲往居殷也。率,聿也,詞也。籲,評也。戚,屬也,族也。矢,誓也。呼眾族之在朝者,出誓言以曉之。蓋令必自貴近始,民不樂徙者,實由羣臣以及世家大族安土重遷而動以浮言故也。

曰:「我王來,既爱宅于茲,重我民,無盡劉。不能胥匡以生,卜稽, 曰其如台?

我王,祖乙也。爰,引也。宅,居也。茲,此也,謂耿也。重,厚也。劉,即鎦字,殺也。胥,襄也。匡,仁也,正也,安也。卜,灼龜兆也。稽,卟也,卜以問疑也。如台,猶奈何也。言我先王自相都引民而居于此耿者,亦以相有水患,厚愛我民,無使盡阽于危亡耳。今耿又大圮,使民蕩析離居,不能相安以生息,則勢不可不遷,故先卜稽以問當如何也。《周禮》「國大遷則貞龜」,亦其事也。

先王有服,恪謹天命,茲猶不常寧;不常厥邑,于今五邦。

服,事也。恪,敬也。謹,慎也。常,長也,久也。寧,寍也,安也。

邑,都也。邦,國也。五邦,謂商邱、亳、囂、相、耿也。商邱,今河南歸 德府商邱縣。亳,薄也,今河南府偃師縣。囂,今開封府滎陽縣。相,今彰 德府內黃縣。耿,今山西絳州河津縣也。言先王有事,皆敬慎天意,無敢妄 動。然尙不久安,不久于其都者,至于今已五遷也。

今不承于古, 罔知天之斷命, 矧曰其克從先王之烈?

若顛木之有由藥,天其永我命于茲新邑、紹復先王之大業、底綏四方。」

順,槇也,仆也。由,曳也,木生條也。蘖,伐木餘也,仆而復生曰蘖。 永,猶長也。新,鱻也。紹,繼也。復,复也,行故道也。業,猶緒也。底, 至也,致也。綏,安也。言避死而就生,如仆木斬伐之餘更生枝條,是天將 長我民命于殷之新邑,我庶幾繼續先王之大業以安四方也。殷,即薄地,本 湯都,而曰新邑者,邦雖舊,而邑則新也。

盤庚數于民,由乃在位以常舊服,正法度。曰:「無或敢伏小人之攸箴!」 王命眾,悉至于庭。

製,覺悟也。由,自也,猶始也。乃,猶汝也。朝廷之立次曰位,在位, 在朝之臣也。舊,久也。舊服,故事也。法度,猶準則也。伏,猶隱藏也。 小人,小民也。箴,鍼也,猶諫諫也。悉,盡也。庭,廷也,朝臣所立之地 也。盤庚知民之梗命者,皆自羣臣浮言之故,先以故事明其法度曰:「無或敢 隱民之所言」,而命羣臣之眾皆至于庭也。

王若曰:「格汝眾,予告汝訓汝,猷黜乃心,無傲從康。

格,假也,來也。告,誥也,誠也。訓,說教也。猷,即猶字,儀也, 圖謀也。黜,出也,退去也。無,毋也。傲,倨嫚也。康,康也,安也。言 汝當去汝之私心,毋違上之命,而苟且懷安也。

古我先王,亦惟圖任舊人共政。王播告之,修不匿厥指。王用丕欽;罔有逸言,民用丕變。

圖,謀也。任,保也,猶親信也。舊,久也,猶老也。播,譒也,敷也。修,飾也,猶治理也。匿,隱也。指,恉也,意也。丕,大。欽,敬也。逸, 洗也,放縱之意。變,猶化也。言先王謀信老成人與之共理政事,王敷告之 以所當治之事,舊人能不隱其意,奉而行之,大敬先王之命,于時無有放縱 之言以惑民聽,民亦大變而從上之化也。

今汝聒聒,起信險膚,予弗知乃所訟。

聒, 懖也。懖懖, 拒善自用之意。起, 猶動作也。信, 伸也, 猶展也。《禮記·儒行》曰:「起居竟信其志」。險, 險也, 詖也。膚, 猶浮也。訟, 爭辯也, 言汝爲此讙語曉曉自用, 動伸其險皷膚浮之言, 我不知汝所爭訟者謂何也。

非予自荒茲德,惟汝含德,不惕予一人。

荒,忘也,失也。德,悳也。內得于己外得于人,謂之德。含,猶隱匿 也。惕,敬懼也。言予法先王未嘗失德,亦自親信舊人,而汝匿我之恉意爲 此逸言,不敬懼予一人也。

予若觀火,予亦拙謀作,乃逸。

觀火,言明也。拙,詘也,猶曲也。作,猶始也。《周禮·司爟》鄭注讀如「予若觀火」之「觀」,此擬其音。《說文·火部》炪,注引《商書》「予亦 炪謀」,此古文叚借字。或欲以勢火解觀,以火鬱解拙,非也。言我視汝情, 洞如視火,但我不以威脅汝,與汝委曲以計,反使汝縱肆放佚而不從令也。

若網在綱,有條而不紊;若農服田,力穡乃亦有秋。

綱,維网繩也。紊,亂也。條,長也,猶理也。服,艮也,治也。綱喻君,網喻臣。言下從上令,則有常而不亂也。服田,喻勞苦。有秋,喻樂利。 言遷徙,則一勞而永安也。

汝克黜乃心,施實德于民,至于婚友,丕乃敢大言汝有積德。

乃,亦汝也。施, 做也, 敷也。婚友, 親戚、朋友也。丕, 不也。乃, 詞也。丕乃, 猶豈不也。積, 聚也。言汝能去汝傲嫚懷安之私心, 不以虛言 媚民, 而布施德于民及于婚友, 俾之適彼樂土, 豈不可大言曰: 汝有積德乎。

乃不畏戎毒于遠邇,惰農自安,不昬作勞,不服田畝,越其罔有黍稷。

戎,崇也,猶大也。毒,害也。惰,懈怠也。昬,暋也,彊勉也。越, 粵也,詞也。黍,秬與秠也。稷,粢與穄也。言耿之水患,或在遠,或在近, 終必有大害,汝乃不畏之而苟且因循,譬如懶惰之農祗知偷安,不勞力以治 田,終無有利也。

汝不和吉言于百姓,惟汝自生毒,乃敗禍<u>姦</u>宄,以自災于厥身。乃既先 惡于民,乃奉其恫,汝悔身何及!

和,相應也。吉,善也。百姓,百官也。敗,壞。禍,害也。內爲姦, 外爲宄。災,無也,亦害也。先,前進也,猶導也。奉,承也,猶受也。恫, 痛也。言遷都之利,百官中亦有言之善者,汝不與之同聲相應,惟汝固執己 見自生患害,乃敗禍姦宄以自害其身也。蓋汝既以惡導民,汝必受其痛,至 汝獲辠之時,雖悔何及乎。

相時懷民,猶胥顧于箴言,其發有逸口,矧予制乃短長之命!汝曷弗告朕,而胥動以浮言,恐沈于眾?若火之燎于原,不可嚮邇,其猶可撲滅。則惟爾汝眾自作弗靖,非予有咎。

相,視也。時,是也。檢民,被佞之人也。胥,相也。顧,還視也。箴言,諫諫之言也。逸,逃也。恐,當作惡。沈,讀爲冘,行也。「恐沈于眾」,《左》隱六年、莊十四年《傳》皆引作「惡之易也」,借「易」爲「迤」,與「冘」同意。不引「于眾」二字,占人引書往往檃栝大意,非與經文有異也。燎,放火也。原,遵也,廣平之野也。嚮,當作向,猶趨也。作,爲也。靖,安也。咎,殃也。言視此檢利之民,尚安自顧,其刺諫者,不爲吉言,或既發諸口而逃逸,況汝短長之命,惟予能生殺之,不可逃也。汝誠不利于遷,何弗以情告我,而以浮言相動乎?不知惡之行于眾,若火之燎于野,其炎炎之勢,將至不可撲滅也。則惟汝眾臣,自爲不安,即身被刑戮,非予有意降之禍殃也。

遲任有言曰:『人惟求舊,器非求舊,惟新』。

遲任,古之賢史,疑即《論語》所稱周任也。引此言以起下文告世臣之 意。

古我先王暨乃祖乃父胥及逸勤,予敢動用非罰?

暨, 息也, 與也。及, 亦與也。逸, 佚也, 樂也。勤, 勞也。言先王與

汝祖父相與同其勞佚,我豈敢動用非罰以加汝乎?

世選爾勞,予不掩爾善。茲予大享于先王,爾祖其從與享之。作福作災, 予亦不敢動用非德。

選,算也,數也。事功曰勞。掩,弇也,猶蓋蔽也。大享,秋嘗多蒸之大祭也,功臣皆配食于廟。《周禮》「則惟祭于大烝」,言先王以來世世選錄汝祖父之功,故予亦不蔽汝之善。今我大祭之時,爾祖尚從而與享焉。惟辟作福,惟辟作威,爾若有罪,予亦不敢以己之私赦汝,反無以對爾祖爾父也。

予告汝于難,若射之有志。

難,艱也,不易也。志,當作識,猶審也。射者,必審其射之所在,命中然後發之。《禮記》曰:「內志正」,《左傳》曰:「吾志其目」是也。言爲政甚難,我于此重大之舉,籌之至熟,如射者之詳審精密而後發矢,事在必行,不可易也。

汝無侮老成人,無弱孤有幼。各長于厥居。勉出乃力,聽予一人之作猷。

無,毋也。侮,傷也。老,以爲老而忽之也。弱孤,亦輕慢之意。居, 舊居也。作,爲也。猷,謀也。言成人與有幼或亦有以遷爲善者,但老而傳 者已退聽于汝,弱而卑者又稟命于汝,汝慎毋曰「昔之人無聞知」,曰「年尚 少不更事」,令各安其舊居也。當勉出爾力,聽我之謀,爲毋違令耳。

無有遠邇,用罪伐厥死,用德彰厥善。邦之臧,惟汝眾;邦之不臧,惟 予一人有佚罰。

遠邇,猶親疏也。用,行也。伐,猶誅也。彰,明也。臧,善也。佚, 失也。罰,上報下之辠也。言無有遠近親疏,行有罪之事則誅之,行有德之 事則旌之;國俗之善,則惟汝眾之功,國俗之不善,則予有失罰之過耳,猶 言拙謀作乃逸也。

凡爾眾,其惟致告:自今至于後日,各恭爾事,齊乃位,度乃口。罰及爾身,弗可悔。」

致告,致我之告,轉相曉諭也。恭,肅也。齊,敬也。度,殷也,閉也。 悔,恨也。言爾眾當以我告汝之言轉相傳諭,令其自今以後,各肅敬爾職守 之事,居處之位,杜塞爾浮言之口,不然,罰及汝身,雖自恨,亦無及也。

盤庚中

此篇誡眾民也。

盤庚作,惟涉河以民遷。

作,猶造也。涉,渡也。耿在河北,殷在河南,盤庚造作舟楫,將以民 渡河而遷也。

乃話民之弗率,誕告用賣。其有眾咸造,勿褻在王庭,

話,佸也,會也。率,述也,循也。誕,大。亶,誠也。造,至也。褻, 暬也。狎,慢也。凡民之聽浮言而弗率循王命者,不遽加之以辠。先大告知 以誠,命眾皆至于庭,勿許狎慢也。上篇告羣臣,中篇則告眾民也。

盤庚乃登進厥民。曰:「明聽朕言,無荒失朕命!

登進,延之使前也。明, 窮也, 猶勉也。荒, 忘也。失, 猶棄也。

嗚呼!古我前后,罔不惟民之承保。后胥慼鮮,以不浮于天時。

前,歬也,猶先也。承,丞也,猶輔佐也。保,猶安也,和也。胥,相也。感,憂也。鮮,尟也,少也。浮,孚也,猶符合也。言先王無不惟民之佐,民與先王同其憂患,當止則止,當遷則遷,罕有不因天之時,與天心合符者也。

殷降大虐,先王不懷厥攸作,視民利用遷。汝曷弗念我古后之聞? 承汝 俾汝惟喜康共,非汝有咎比干罰。

殷,慇也,痛也。虐,暴也,猶災害也。懷,褱也,猶安也。攸作,前 所造之邑也。俾,使也。喜,樂也。康,康也,安也。共,同也。咎,過也。 比,猶類也。言先王痛天時之降大災,不敢安其舊居,而遷囂遷相遷耿者, 亦視小民之利于遷而遷耳,汝何不念我所聞于先王者,惟樂助汝,使汝共用 安樂,非謂汝有過辠,乃等汝于放流之罰也。

予若籲懷茲新邑,亦惟汝故,以丕從厥志。

從,隨也,猶順也。言我若此評汝,欲以汝安此新邑者,亦惟承汝俾汝 之故,以大順其共相康樂之志也。

今予將試以汝遷,安定厥邦。汝不憂朕心之攸困,乃咸大不宣乃心,欽

念以忱動予一人。爾惟自鞠自苦,若乘舟,汝弗濟,臭厥載。爾忱不屬,惟胥以沈。不其或稽,自怒曷瘳?

試,用也。困,悴也,局促危苦之意。宣,恂也,信心也;或曰愃也,快也。欽,領也,敬也。忱,誠也。動,重也;或曰徸也。相,跡也。鞠,衮也,窮也。濟,渡也。臭,朽也,腐敗也。屬,連也。沈,湛也,沒也。或,有也。稽,計也,猶考也。怒,恚也,恨也。瘳,疾病愈也。言今將遷汝以安定國家,我之心以斯事重大,局促勞悴之已久,而汝不代爲憂之,反皆不信于心,不敬念以誠,而以君命爲重,是爾自取窮苦。譬如乘舟而不以時渡,則朽敗其所載。夫爾不以誠連屬于我,不但敗其所載,且將相與沈溺矣。此時不有深計,後日雖自怨恨,則如病已危死,亦何瘉乎?

汝不謀長以思乃災,汝誕勸憂。今其有今罔後,汝何生在上?

災,無也,害也。勸,歡也。歡憂,猶樂禍也。上,上天也。言汝不爲 長久之計,以思汝害,是汝大樂禍。今雖一時偷安,後將無救,汝安能承生 命于天乎?

今予命汝一,無起穢以自臭,恐人倚乃身,迂乃心。

一者,一心一德也。起,怡也,悅也。穢,當作薉,饖也,猶殠也,喻 浮言也。自,鼻也。臭,齅也,以鼻就氣也,喻聽言也。倚,掎也,偏引也。 迂,紆也,邪曲也。言予命汝一心一德以從我,無喜悅饑惡之物,而以鼻就 之,恐浮言之人偏引汝身,而使汝仆邪曲汝心,而使汝惑也。

予迓續乃命于天,予豈汝威,用奉畜汝眾。予念我先神后之勞爾先,予 丕克羞爾,用懷爾然。

迓,當作訝,迎也。續,繼也。威,畏也。奉,猶助也。畜,養也。神后,謂湯也。羞,亦養也。懷,思念也。言予之以汝遷者,將迎續汝命于天, 豈脅汝以威乎?用助養汝眾民而已。所以然者,我念爾先人之勞,故我亦大 能養爾,思念爾也。

失于政,陳于茲,高后丕乃崇降罪疾,曰『曷虐朕民?』

陳,塵也,猶久也。高后,亦謂湯也。乃,詞也。崇,重也。疾,疾也, 毒害也。虐,殘暴也。言我若失政而不議遷,久于此邑,高后必大重降罪災 干我,責予曰:「何爲殘暴我民,不使有安土乎?」 汝萬民乃不生生,暨予一人猷同心,先后丕降與汝罪疾,曰:『曷不暨 朕幼孫有比?』故有爽德,自上其罰汝,汝罔能迪。

乃,詞也。生生,求生于可生之地也。暨, 鼠也。猷, 謀也。與,与也, 賜予也。幼孫,盤庚自謂也。比,親密也。爽,喪也,差忒也。上,天也。 迪,條也,猶逃走也。言汝萬民不自求生,不與我謀同心,高后亦將降與汝 罪戾,責汝曰:「何不與我孫親比,致有此差忒之意,先后在天之靈,亦必罰 汝,汝無所逃也。」

古我先后既勞乃祖乃父,汝共作我畜民,汝有戕則在乃心!我先后綏乃祖乃父,乃祖乃父乃斷棄汝,不救乃死。

事功曰勞。作,爲也。畜,好也,猶善也。戕,殘賊也。在,察也。綏, 妥也,安也。乃斷之乃,詞也;斷,絕也。棄,捐也。此言不但先后欲降汝 罪疾,汝祖父亦不以汝爲子孫也。我先后既以汝祖父有勞于國,故爲之子孫 者,亦皆爲我良善之民。今汝乃有殘賊爲梗者,則先后已洞察汝心,我先后 與汝祖父相安一心,汝祖父冥冥之中亦棄絕汝,不救汝死也。

茲予有亂政同位,具乃貝玉。乃祖乃父丕乃告我高后曰: 『作丕刑于朕 孫!』迪高后丕乃崇降弗祥。

具,共置也。貝,海介蟲。玉,石之美者。三代皆以貝玉爲貨幣,至秦始廢。刑,荆也。罰,罪也。迪,導也。弗祥,禍也。言汝之梗命,亦由有 亂政之人在位,其心貪婪,安土重遷,故輒爲浮言以惑汝眾也。汝祖父亦必告我高后曰:「此貪婪弗道之臣,害我子孫罹于荆罰」,則將導我高后降殃禍于其身也。

嗚呼! 今予告汝: 不易! 永敬大恤, 無胥絕遠! 汝分猷念以相從, 各設中于乃心。

易,傷也,猶更變也。恤,憂也。絕,猶隔也。分,蔡邕《石經》作比, 當從之。設,施也。中,正道也。言予令出,惟行,不可更改,我長敬念大 憂之將至,不相隔遠,即在旦夕,可危之甚,汝當合謀猷念慮以從我,各施 中正之道于心,毋惑于浮言也。

乃有不吉不迪, 顛越不恭, 暫遇姦宄, 我乃劓殄滅之, 無遺育, 無俾易種于茲新邑。

吉,善。迪,道也。願,與也,跋也。越,蹙也,僵也。暫,儳也,猶 亙也。遇,耦也,猶合也。儳耦,猶朋比也。外曰姦,內曰宄。劓,割。殄, 絕也。遺,貤也,猶延也。育,讀爲冑,允也。易,傷也,猶移也。種,種 也,猶類也。言若有不善無道之人縱橫無忌,不恭順上命,比黨爲奸,我必 絕滅之,無留其種使移于此殷之新邑也。蓋懼之以重法,使無違命也。

往哉!生生!今予將試以汝遷,永建乃家。」

永,長也。建,立也。言汝其往新邑,以求生于可生之地乎?予將遷汝 以長立汝家,爲子孫無窮之福也。

盤庚下

此篇既遷後,誡新舊之臣也。

盤庚既遷,奠厰攸居,乃正厥位,綏爰有眾。

奠,定也,正也。綏,妥也,安也。爰,于也,詞也。盤庚既遷于殷, 先定民之宅里,乃正宗廟朝廷之位,安慰于有眾徒。主于民,故先度地居民, 次及廟朝也。

曰:「無戲怠,懋建大命!

此下告臣之詞。戲,謔也,喜樂兒。怠,慢也。懋,勉也。建,立也。 言予與羣臣遷此新造邦,皆當勵精圖治,無戲豫怠惰,以建立新命。相與共 勉之也。

今予其敷心腹腎腸,歷告爾百姓于朕志。

敷,溥也,大也。心腹二字,乃優字之誤分。優,憂也,澤多也。腎者, 賢字之誤。腸,揚也,舉也。歷,試也,猶用也。百姓,百官族姓也。言我 廣求賢者,而加禮之,而舉用之,明喻爾百官于我之意志。

罔罪爾眾,爾無共怒,協比讒言予一人。

怒,恨也。協,猶同也。比,猶朋也。讒,誕也,好言人惡謂之讒。言 賢者我優禮之,爾眾之浮言者,我今亦不罪之,爾無怨恨互相謗訕我也。

古我先王將多于前功,適于山。用降我凶,德嘉績于朕邦。

古先王,湯也。將,詞也,猶欲也。多,重也,猶大也。適,往也。山,

亳地依山也。降,下也,猶解也。凶,惡也,地穿交陷其中也。德,本字登也。嘉績,美功也。言契始居亳,其後屢遷,至湯欲大于前人之功,復往居亳,以解河圮之患,成美功于我國也。湯從先王契居于亳殷,故今亦從先王 湯居于亳殷也。

今我民用蕩析離居,罔有定極,爾謂朕曷震動萬民以遷?肆上帝將復我 高祖之德,亂越我家。朕及篤敬,恭承民命,用永地于新邑。

蕩,盪也,猶動散也。析,猶破也。離,聲也,分也。定,安。極,至也。 震,起。動,發也。肆,故今也。復,夏也,行故道也。高祖,湯也。德,惠 也。亂,治。越,粵也,詞也。及,急也。篤,笃也,厚也。言耿爲河水圮 壞,民至于蕩析離居,無所安止,將陷于凶,爾謂我何好爲起發萬民以遷乎? 蓋今天將復我成湯之德,以治理我國家,我汲汲敬順天意,恭奉民命以擇長 安之地于茲新邑也。

肆予沖人,非廢厥謀,弔由靈各;非敢違卜,用宏茲賁。

沖,僮也,釋也。沖人,猶小子,謙詞也。弔,選也,至也。由,以也, 用也。霊,良也,善也。各,恪也,敬也。違,章也,背也。宏,大也。賁, 飾也,猶美也。言我小子非棄眾人守舊之謀,乃用謀之至善者。況卜稽龜, 從敬而不敢背之,所以大此美績而承先王之德。

嗚呼!邦伯師長百執事之人,尚皆隱哉!

邦伯,天下諸侯之長,左右二伯也。師長,六卿也。百執事,統言在朝之臣也。隱,爲也,猶安也。言自遷之後,尚皆安于厥居哉。

予其懋簡相爾念敬我眾。

懋,楙也,猶美也。簡,柬也,擇也。相,覈也,助理也。爾,謂舊臣 也。眾,謂民也。言予優賢揚歷,簡擢于位,所以襄助爾政,庶幾各思所以 敬我眾民而安輯之也。此誠舊臣也。

朕不肩好貨,敢恭生生。鞠人謀人之保居,敘欽。

肩,猶任也。貨,財利也。鞠,育也,養也。敘,次第也。言我所以遷 此者,非利其地產富厚,惟敬生民于可生之地,有能養人謀人以安保其居者, 我則次第而敬用之。此誠新用之臣也。 今我既羞告爾于朕志若否,罔有弗欽!無總于貨寶,生生自庸。式敷民 德,永肩一心。」

說命上

《書序》曰:「高宗夢得說,使百工營求諸野,得諸傅巖,作《說命》三篇。」三篇具亡于秦項之火。高宗,武丁也,繼父小乙之位。高宗于傅巖之得說,因命以傅爲氏。營,《說文》作夐,營,求也。尸子曰:「傅巖在北海之外。」按:傳巖在今山西解州平陸縣,濱于河爲通道,河水壞道,使胥靡刑人築之,說代之工作,故《孟子》曰:「版築」也。說,蓋高宗學于甘盤時布衣交,一旦舉而相之,慮人心不愜,故託之于夢,殷人尙鬼然也。《莊子》云:「文王知臧丈人賢,欲以爲相,恐羣臣眾庶之不服也,乃假諸夢,而稱先王之命以臨之。」其事正同。《荀子》曰:「傅說之狀,身如植鰭。」

王宅憂,亮陰三祀。既免喪,其惟弗言,羣臣咸諫于王曰:「嗚呼!知之曰明哲,明哲實作則。天子惟君萬邦,百官承式,王言惟作命,不言臣下罔攸稟令。」

「乃或亮陰,三年不言,其惟不言,言乃雍」,《周書·無逸》篇文也,亦見《禮·坊記·喪服四制》、《論語》,又見《尚書大傳》及《春秋繁露·竹林》篇、《家語·正論解》。所記「聖作則」,《左》昭六《傳》叔向引《書》辭也。「王言以出令也,若不言,是無所稟令也。」《楚語》白公子張述武丁之事也。

王庸作書以誥曰:「以台正于四方,台恐德弗類,茲故弗言。恭默思道, 夢帝賚予良弼,其代予言。」

武丁于是作書曰:「以余正四方,余恐德之不類,茲故不言。」《楚語》 白公子張述武丁之言也,又見《呂覽,重言》。「默以思道」,亦是篇文也。

乃審厥象,俾以形旁求于天下。說築傅巖之野,惟肖。爰立作相。王置 諸其左右。 「乃使以象夢,求四方之賢聖,得傅說以來,升以爲公」,亦《楚語》文也。「天子三公者何,天子之相也」,見《公羊》隱五《傳》。

命之曰:「朝夕納誨,以輔台德。若金,用汝作礪;若濟巨川,用汝作 舟楫;若歲大旱,用汝作霖雨。啟乃心,沃朕心,若藥弗瞑眩,厥疾弗 瘳;若跣弗視地,厥足用傷。

而使朝夕規諫曰:「若金,用汝作礪;若津水,用汝作舟;若天旱,用汝作霖雨,啓乃心,沃朕心;若藥不暝眩,厥疾不瘳;若跣不視地,厥足用傷」,皆《楚語》文也。「若藥」二句亦見《孟子》。

惟暨乃僚,罔不同心,以匡乃辟。俾率先王,迪我高后,以康兆民。嗚呼! 欽予時命,其惟有終。」

「高后」,用《盤庚》文也。

說復于王曰:「惟木從繩則正,后從諫則聖。后克聖,臣不命其承,疇 敢不祗若王之休命?」

「木負縄者正,君受諫者聖」,劉向《說苑・正諫》篇文也。「木受繩則直,人受諫則聖」,《說苑・建本》篇述孔子之言也,亦見王肅《家語》。此篇之文,又見《呂覽・重言》篇、《竹書紀年・商紀》、《史記・殷本紀》、《孟子・滕文公、告子》篇、《楚詞・離騷》篇、《墨子・尚賢中、下》篇、《說苑・善說》篇、《潛夫論・論榮》篇、《五德志》篇也。

說命中

惟說命總百官,乃進于王曰:「嗚呼!明王奉若天道,建邦設都,樹后 王君公,承以大夫師長,不惟逸豫,惟以亂民。惟天聰明,惟聖時憲,惟臣欽若,惟民從乂。

「成王元年,命周文公總百官」,汲郡《紀年》古文亦有之。「相年之道 曰天,建國設都乃作后王君公,否用泰也;輕大夫師長,否用佚也」,此《墨 子,尚同》篇引先王之書也。「天聰明」,《皋陶謨》文也。「欽若昊天」,《堯 典》文也。

惟口啟羞,惟甲胄起戎,惟衣裳在笥,惟干戈省厥躬。王惟戒茲,允茲克明,乃罔不休。

「惟口起羞,惟甲冑起兵,惟衣裳在笥,惟干戈省厥躬」,《禮記·緇衣》 引《兌命》文也。

惟治亂在庶官。官不及私昵,惟其能;爵罔及惡德,惟其賢。 「爵無及惡德」,《禮記·緇衣》引《兌命》文也。

慮善以動,動惟厥時。有其善,喪厥善;矜其能,喪厥功。惟事事,乃 其有備,有備無患。

「居安思危,思則有備,有備無患」,《左》襄十一《傳》晉魏絳引《書》 也。

無啟寵納侮,無恥過作非。惟厥攸居,政事惟醇。

「啓寵納侮,其此之謂矣」,《左》定元《傳》晉士彌牟引古語也。

黷于祭祀,時謂弗欽。禮煩則亂,事神則難。」

「純而祭祀,是謂不敬。事煩則亂,事神則難」,《禮記·緇衣》引《兌命》文也。

王曰:「旨哉!說,乃言惟服。乃不良于言,予罔聞于行。」 「我言惟服」,《詩・大雅・板》之篇也。

說拜稽首曰:「非知之艱,行之惟艱。王忱不艱,允協于先王成德,惟 說不言有厥咎。」

「非知之寔難,將在行之」,《左》昭十《傳》鄭子皮之言也。「非知之難, 行之難」,《司馬法》文也。《周禮疏》引《大傳》:《詩》云「非知之艱,行之惟艱。」

說命下

王曰:「來!汝說。台小子舊學于甘盤,既乃**遯**于荒野,入宅于河。自河徂亳,暨厥罔顯。

「小乙六年,命世子武丁居于河,學于甘盤」,汲郡《紀年》古文亦有之。 「昔殷武丁入于河,自河徂亳」,《楚語》文也。「舊爲小人」,《無逸》篇文也。 「在武丁時,則有若甘盤」,《君奭》篇文也,但據《楚語》「入于河」,即就 學于甘盤也。「自河徂亳」,入即位也。非此節之說。

爾惟訓于朕志,若作酒醴,爾惟麴糵;若作和羹,爾惟鹽梅。爾交修予, 罔予棄,予惟克邁乃訓。」

「若作酒醴」四句,見《國語》。「亦有和羹」、《商頌·那》之篇也。「如和羹焉,水火醯醢,鹽梅以烹魚內」、《左》昭二十《傳》晏嬰之言也。「故使朝夕規誨箴諫曰:『必交修予,無余棄也。』」《楚語》白公子張述武丁之言也。

說曰:「王,人求多聞,時惟建事,學于古訓乃有獲。事不師古,以克 永世,匪說攸聞。

「古人求多聞以監戒」、《逸周書·芮良夫》篇文也。「古訓」、字見《詩》。 「事不師古而能長久者,非所聞也」、《史記·秦始皇本記》淳于越之言也。

惟學,遜志務時敏,厥修乃來。允懷于茲,道積于厥躬。惟數學半,念 終始典于學,厥德修罔覺。監于先王成憲,其永無愆。

「敬孫務時敏,厥修乃來」,又「學學半」,又「念終始典于學」,皆《禮記·學記》引《兌命》文也。

惟說式克欽承,旁招俊乂,列于庶位。」

「式序在位」,《周頌·時邁》之篇也。「俊乂式序」,《後漢書》傅毅迪志 詩也。

王曰:「嗚呼!說,四海之內,咸仰朕德,時乃風。股肱惟人,良臣惟聖。昔先正保衡作我先王,乃曰:『予弗克俾厥后惟堯舜,其心愧恥,若撻于市。』一夫不獲,則曰時予之辜。佑我烈祖,格于皇天。爾尚明保予,罔俾阿衡專美有商。

「亦惟先正」、《周書·文侯之命》文也。「羣公先正」、《大雅·雲漢》之篇也。「昔我有先正」、《禮記·緇衣》引逸詩也。「匹夫匹婦有不與被堯舜之澤者,若己推而納諸溝中」、《孟子·萬章》之文也。「若撻之于市朝」、《孟子》文也。「伊尹恥其君不爲堯舜」、曹植《求通親親表》文也。「烈祖」見《商頌·有若》。「伊尹格于皇天」、《君奭》文也。「公明保予沖子」、《洛誥》文也。「實惟阿衡,實左右商王」、《商頌·長發》之篇也。

惟后非賢不乂,惟賢非后不食。其爾克紹乃辟于先王,永綏民。」說拜 稽首曰:「敢對揚天子之休命。」

「敢再拜稽首,奉揚天子之丕顯休命」,《左》僖二十八《傳》晉重耳之言也。

高宗肜日

《書序》曰:「高宗祭成湯,有飛雉升鼎耳而雊,祖己訓諸王,作《高宗 形日》、《高宗之訓》。」按:此二篇作于武丁子祖庚之世,故書廟號也。《高 宗之訓》一篇,亡于秦項之火。

高宗肜日,越有雊雉。

高宗,武丁也,盤庚弟小乙之子。肜者,融也,續也。祭之明日又祭之名,夏曰:「復胙」,周曰:「釋」。越,粵也,詞也。有者,不宜有也。雊,雄雉鳴也。武丁祭成湯之明日肜祭,有雄雉升鼎耳而鳴,爲異也。按:《尚書大傳》,祖己曰:「雉者,野鳥也。今升鼎者,欲爲用也,無則遠方將有來朝者乎?故武丁內反諸己,以思先王之道,三年,編髮重譯來朝者六國。」《史記》稱祖庚立,祖己嘉武丁之以祥雉爲德,立其廟爲高宗,遂作《高宗肜日》及《訓》。《漢書·五行志》劉向以爲近赤祥,劉歆以爲羽蟲之虄,野鳥自外來,入爲宗廟,器主是繼,嗣將易也。高宗修德弭災,反致重譯來朝之應,故孔子曰:「吾于《高宗肜日》,見德之有報之疾也。」武丁賢王,故爲立廟,祖己述其事而作此篇。

祖己曰:「惟先格王,正厥事。」

祖己,王之宗族也。格,閣也,止也。事,即下文豐于昵之事。此祖己將訓于王,告其同僚之言也。

乃訓于王,曰:「惟天監下民,典厥義。降年有永有不永,非天夭民, 民中絕命。

監,臨視也。典,數也,主也。義,誼也,人所宜也,行而宜之之謂誼。 年,年命也。永,長也。少壯而絕曰夭,如取物中折也。言天臨視下民,皆 主于義,以降修短之命,其有不長者,非天絕民,乃民之自絕也。言下民, 而王可知,言年命,而享國之年命可知。不欲斥言尊者也。

民有不若德,不聽罪。天既孚命正厥德,乃曰:『其如台?』

若,順也。聽,猶服也。孚,付也,猶示也。乃曰者,天如諄諄然命之也。如台,奈何也。言民不知順德,不知服罪,天既付命罰之以正其德,而 曰其奈何?不恐懼修省而改此也。

嗚呼!王司敬民,罔非天胤,典祀無豐于昵。」

司,嗣也,嗣國位也。胤,子孫相承續也。天胤,謂適長嗣位者也。典, 數也,主也。豐,猶厚也。昵,近也,字亦作禰,謂考廟也,當指小乙之廟。 按:商王自湯子外丙、仲壬後,兄子太甲繼之,子沃丁、太庚繼之,子小甲、 雍己、太戊繼之,子仲丁、外壬、河亶甲繼之,子祖乙繼之,子祖辛、沃甲 繼之,兄子祖丁繼之,子陽甲、南庚、小辛、小乙繼之,子武丁繼之,是湯 至武丁爲王二十有二,爲世十有一。《通典》引賀循議曰:「殷之盤庚不存陽 甲之廟,而上繼先君,以弟不繼兄故也。」疑盤庚不爲陽甲立廟,小辛、小 乙値殷衰,未爲修立。武丁繼父之位,仍不立世父廟,因感雉雊之異祖己之 言,而後修建之也。《禮記・喪服四制》云:「武丁者,殷之賢王也,繼世即 位而慈良于喪。當此之時,殷衰而復興,禮廢而復起。」《尚書大傳》云:「武 丁思先王之政,繼絕世」,殆謂此也。又按:商制,六廟始祖契,受命王成湯 及四親廟也。擬四親廟,論世不論及,盤庚時以祖丁、祖辛、祖乙、仲丁爲 四親。武丁時,初以小乙祧仲丁,後乃易以陽甲也。

高宗之訓

《書序》見前。此篇亡于秦項之火。

西伯戡黎

《書序》云:「殷始咎周,周人乘黎。祖伊恐,奔告于受,作《西伯戡黎》。」按:咎,惡也。乘,勝也,克也。受,紂也。紂聞文王斷虞芮之訟,又侵盂、克莒、舉酆,三伐皆勝,而始畏忌之。因崇侯虎之譖,拘之于羑里,散宜生以文馬、白狐、虞獸、大貝及羑女獻紂,紂釋文王。文王釋而伐黎,明年伐崇也。

西伯既戡黎,祖伊恐,奔告于王。

西伯,周文王也。爲雍州諸侯之伯,南兼梁、荊,國在西岐,故曰西伯。

戡、钱也、勝也。黎、**2**0也、國名、封殷畿內、在今山西潞安府長治縣西南。祖伊、王之宗族也。恐、懼也。奔、走也。祖伊知文王德盛力強、天下將歸之、故懼而趨告于王也。

曰:「天子!天既訖我殷命。格人元龜,罔敢知吉。非先王不相我後人,惟王淫戲用自絕。

訖,止也。格,叚也,借也。《曲禮》曰:「假爾泰龜有常。」元龜,天子寶龜也,長尺二寸。相,襄也,猶助也。淫,猶放濫也。戲,謔也,喜樂甚也。言殷天命將終,故今災異繁多,七十卜而皆凶,非先王在天之靈不佑其子孫,惟王淫蕩戲謔,不以天下爲重,自絕于祖宗也。

故天棄我,不有康食。不虞天性,不迪率典。

棄,捐也。康,康也,安也。食,猶年穀也。虞,度也,慮也。天性, 五常之性也。迪,道也,蹈也。率,律也,法也。典,五倫之典也。言王有 惡德,故天捐棄我有殷,而使民不享康年之利,不生仁義之心,不尊朝廷之 法,上下離逷。如下文所云也。

今我民罔弗欲喪,曰:『天曷不降威?大命不摯?』今王其如台?」

喪,亡也。摯,至也,臻也。如台,奈何也。言今我民無不欲殷之亡者, 其言曰:「天何不降威于殷乎?受大命者何不至乎?」夫人心已去,天命已失, 今王其奈何哉?欲王悔悟而儆懼修省也。

王曰:「嗚呼!我生不有命在天?」

言我生獨不有命在天乎?民何能爲也?此遂惡之詞也。

祖伊反,曰:「嗚呼!乃罪多,參在上,乃能責命于天?

反,返也,還也。乃,汝也,詞也。參,當作案,字之誤也。案,增積也。 責,嘖也,大呼也。祖伊以紂不可諫,故退而言曰:「汝罪眾多,聞于上者, 層案不可數計,汝尚能呼天而言命乎?」

殷之即喪,指乃功,不無戮于爾邦!」

即,就也,造也。指,猶示也。功,事也。戮,僇也,辱也。言殷之至于喪亡,指汝所爲之事而可知矣。祖宗基業,一旦棄之,豈不辱爾大殷邦乎?

微子

《書序》云:「殷既錯天命,微子作《誥父師》《少師》。」按:錯,措也, 廢也,所謂自絕于天也。

微子若曰:「父師、少師!殷其弗或亂正四方。我祖底遂陳于上,我用 沈酗于酒,用亂敗厥德于下。

微,畿內采地名,在今山西潞安府潞城縣東北。子,爵也。殷爵,公侯伯三等。畿內謂之子者,異于畿外治國之君也。微子,名啓,與紂同母,帝乙之長子,次仲衍,次受德,即紂也。當生微子時,母爲妾,既得正爲后而生紂,故帝乙始欲立微子,而太史據法爭之,乃立紂也。父師、少師,箕子也,名胥餘。按:胥餘,疊韻連語。鄭云「里落之壁」,或曰壁當爲甓,猶甎瓦也。箕子爲紂諸父,故偁父師。箕,亦畿內采地,在今山西遼州榆社縣東南。少師,王子比干也,亦紂諸父。或,有也,釋之反也。亂正之亂,治也。我祖,謂湯也。底,氐也,猶至也。遂,遂也,成也。陳,陳也,列也。上,上世也。我,我紂也。兄弟手足,故偁我。沈,淫也,湎也。酗當作酌,醉酱也。用亂之亂,敵也,紊也。敗,毀也。下,後世也。言殷今弗有治政以正四方,湯之功德所至成遂陳列于上世者,紂以湎酒而紊毀其德于後世矣。不言嬖妃、妲己者,爲親諱之,且糟邱酒池長夜之飲,亦所以媚婦人,則淫昏在其中矣。○按:《史記》以微子之去,在囚箕子、殺比干之後。此篇所云父師、少師爲抱樂器歸周之大師疵、少師強,非也。

殷罔不小大好草竊姦宄。卿士師師非度。凡有辜罪,乃罔恆獲,小民方 興,相為敵讎。

小,謂小民。大,爲庶臣。好,猶喜愛也。草,鈔也,掠也。竊,私取也,猶盜也。竊寶者爲充,用充之財者爲姦。師,蓬也,先導也。度,猶法也。凡,猶皆也。辜,亦皋也。乃,曳詞之難也。恆,長也。獲,猶得也。方,旁也,猶並也。興,起也。敵,匹也,當也。讎,仇也,怨也。言非但小民庶臣好爲寇略姦盜之事,雖卿士亦轉相師效,不循法度,是以有罪之人任其逋逃無獲,而小民並起,而怨怒于上,如爲國家之仇敵也。

今殷其淪喪,若涉大水,其無津涯。殷遂喪,越至于今!」

淪,當作典,常法也。喪,亡也。涉,徒行砅水也。津,濟渡處。涯,

當作厓,猶滸也。遂,蒙也。越,粵也。言殷之官司濟惡六典已亡,上無道揆, 下無法守,如巟巟大水,不見涯岸,濟渡者幾何而不沉溺乎?國之不可爲, 何以異此?抑岌岌之勢,喪亡亦不遠,至于今日,殆其時矣。○淪喪,若依 今本,則與下文「商其淪喪」同。淪,沒也。未知孰是?

曰:「父師、少師,我其發出狂?吾家耄遜于荒?今爾無指告予,顛隮, 若之何其?」

發,猶起也。狂,往也,去也。《詩》曰:「出往遊衍。」耄,當作耋,八十曰耄,猶老也。遜,遁也。荒,蕪也,猶遠野也。指,恉也,意也。顚, 蹎也,跋也。隮,當作躋,擠也,陷也。何其,詞也。微子又更端而問曰: 吾意欲起而出往,吾乃家之長老,適有不幸,宗祀爲重,似當遁于荒野以存 一綫,但君臣之分誼,與宗祀之存亡孰大?今汝無意訓誨于我,莫能自決, 倘陷于非義,其若之何?蓋知殷之必亡,而身爲紂之親兄,其生死有萬難者, 故傷痛而不能決也。○「旄遜于荒」,《史記》作「保于喪」。依史公之意,則 古本之旄讀爲莫,無也。悉,當作堥,讀爲至,猶及也。荒,讀爲亡,猶滅 也。顚隮者,隕墜吾家之宗祀也。

父師若曰:「王子!天毒降災荒殷邦,方興沈酗于酒,

箕子答而比干不答者,志在必死也。王子,偁微子也。毒,厚也。荒, 亡也。方興,並起也。言天厚降災禍,將亡殷國,故君民皆沈湎于酒也。

乃罔畏畏,咈其耈長舊有位人。

畏畏,畏威也。咈,違也。蕎長,老臣也。舊,久也。久在位之老成人, 今致仕者也。言紂不畏天之威,愎諫自用,違逆忠言也。

今殷民乃攘竊神祇之犧牷牲用,以容將食無災。

攘,穰也,援臂也。有因而盜爲攘。天曰神,地曰祇。犧,毛純也。牷, 體完也。牲,牛羊豕也。用,富也。按:猶自食也。容,猶包涵也。將,將 也,猶持也。無災,不加之罪也。言政亂已極,祭祀天地之物,禮之最重, 且有攘竊而食之者,君臣皆相容隱,不以爲異,故民無畏忌如此也。

降監殷民,用乂讎斂,召敵讎不怠。罪合于一,多瘠罔詔。

降監,下視也。乂,芟艸也,猶言草菅人命也。讎,稠也,多也。斂,

收也,謂賦稅也。敵讎,仇怨也。不怠,猶不已也。瘠,當作膌,骴也,殘骨也。詔,當作誥,告也。言刹殺其民,賦斂無度,召萬民之仇怨而不知止,其罪由于上下相蒙,若合爲一,故國多捐瘠,道殣相望,而民無所控告也。

商今其有災,我興受其敗;商其淪喪,我罔為臣僕。詔王子出迪,我舊 云刻子。王子弗出,我乃顛隮。

此言商不言殷者,將詔微子出,迪以宗祀爲重,故從先祖之偁也。我興,猶我生也。迪,猶行也。舊云,先時立紂之時,箕子曾有言也。刻,克也,猶肩任也。言商今有禍,我生適當敗壞之時,商若滅亡,我宗族不可爲人臣 僕也。我所以爲王子告者,舍出行之外,更無他道。我昔時所云,能肩宗祀 之任者惟子。今不幸而至于斯,王子若弗出,我商家之祀無乃隕墜乎?勸其 定計無疑也。

自靖,人自獻于先王,我不顧行遯。」

靖,立也,猶安也。獻,讞也,議罪也,猶白也,清也。顧,及也,姑 且之詞。遯,逃也。言人當自立,以求乎心之所安,雖各負其罪,而皆可以 自白于先王,所行不必一轍也。若我,則于年爲長,于親爲輕,不可姑且逃 避以求免者,所謂各行其是也。

尚書古注便讀 卷之四上

元和朱駿聲豐芑甫集訂

周書

周,文王國號,武王伐殷,因以爲有天下之號也。周原,在今陝西鳳翔 府岐山縣。書凡四十篇。

泰誓上

《書序》曰:「惟十又一年,武王伐殷。一月戊午,師渡孟津,作《泰誓》 三篇。」皆亡于西晉永嘉之亂,遺文殘句,略見于《尚書大傳》及《史記》 者才十一。○泰,大也。十有一年者,本文王受命而數之,太歲當在屠維大 荒洛,後世所謂己巳年也。史以爲丙子,則太歲已超七辰。一月戊午者,十 三年之子月也。上篇是十一年事,中、下二篇是十三年事。《序》十一年不書 月日,一月戊午不書年者,眞古文經中當自有年月明晰,故《序》不具耳。

惟十有三年春,大會于孟津。王曰:「嗟!我友邦冢君越我御事庶士, 明聽誓。

《春秋》例書時,《尚書》例不書時,言春非也。「嗟我友邦君」,《牧誓》 文也。「越爾御事」,又「越尹氏庶士御事」,皆《大誥》文也。

惟天地萬物父母,惟人萬物之靈。亶聰明,作元后,元后作民父母。

「天地者,萬物之父母也」,《莊子·達生》文也。「人非天地,無以爲生, 天地非人,無以爲靈」,《後漢書》劉陶之言也。「亶不聰」,《小雅·祈父》之 篇也。「聰明睿知,足以有臨也」,《禮記·中庸》文也。「天子作民父母」,《洪 範》文也。 今商王受,弗敬上天,降災下民。沈湎冒色,敢行暴虐,罪人以族,官人以世,惟宮室、臺榭、陂池、侈服,以殘害于爾萬姓。焚炙忠良,刳剔孕婦。

「今商王受」、《牧誓》文也。「以族論罪,以世舉賢」、《荀子·性惡》篇文也。「士無世官」、《孟子》文也。「志專在于宮室、臺榭、陂池、苑囿」、《淮南·主術》篇文也。「刳剔孕婦」、《墨子·明鬼下》篇文也。

皇天震怒,命我文考,肅將天威,大勳未集。

「帝乃震怒」、《洪範》文也。「誕將天威」、《君奭》文也。

肆予小子發,以爾友邦冢君,觀政于商。惟受罔有悛心,乃夷居,弗事上帝神祇,遺厥先宗廟弗祀。犧牲粢盛,既于凶盗。乃曰:『吾有民有命!』罔懲其侮。

「我有敝甲,欲以觀中國之政」,《史記·楚世家》文也。「紂夷居不肯事上帝,棄闕其先神而不祀,曰:『我民有命,毋僇其務』」,《墨子·非命中》篇引《泰誓》文也,上篇及《天志中》篇所引略同。「今殷民乃攘竊神祇之犧牷牲」,《微子》文也。

天佑下民,作之君,作之師,惟其克相上帝,寵綏四方。有罪無罪,予 曷敢有越厥志?

「天降下民,作之君,作之師,惟曰:『其助上帝,寵之四方,有罪無罪,惟我在天下,曷敢有越厥志,一人衡行于天下?』武王恥之」,《孟子》引《書》詞也。今入武王口中,故節去末二句。「底綏四方」,《髂庚》文也。

同力, 度德; 同德, 度義。受有臣億萬, 惟億萬心; 予有臣三千, 惟一心。

「不度德」、《左》隱十一《傳》文也。「同德度義、《太誓》曰:『紂有億 兆夷人,亦有離德,余有亂臣十人,同心同德』」、《左》昭二十四《傳》萇宏 之言也。「紂有臣億萬人,亦有億萬之心。武王有臣三千而一心」、《管子·法 禁》篇引《泰誓》文也。

商罪貫盈,天命誅之。予弗順天,厥罪惟鈞。

「使疾其民以盈其貫」、《左》宣六《傳》中文桓子之言也。「天命殛之,

予畏上帝,不敢不正」,《湯誓》文也。「小人見姦巧,乃聞不言也,發罪鈞」, 《墨子,尚同下》篇引《太誓》文也。

予小子夙夜祗懼,受命文考,類于上帝,宜于冢土,以爾有眾,底天之 罰。

「天子將出,類乎上帝,宜乎社,造乎禰,受命于祖」,《禮記·王制》 文也。「迺立冢土」,《大雅·縣》之篇也。「今爾有眾」,「致天之罰」,皆《湯 誓》文也。

天矜于民,民之所欲,天必從之。

「民之所欲,天必從之」,《左》襄三十一年魯穆叔引《泰誓》文也,昭 元《傳》同。

爾尚弼予一人,永清四海,時哉弗可失!」

「爾尚輔予一人」,《商書·湯誓》文也。「此時也,弗可失也」,《左》昭二十七年《傳》吳公子光之言也。

泰誓中

惟戊午,王次于河朔,羣后以師畢會。王乃徇師而誓曰:「嗚呼!西土 有眾,咸聽朕言。我聞吉人為善,惟日不足。凶人為不善,亦惟日不足。

「悉聽朕言」、《湯誓》文也。「藹藹王多吉人」、《大雅·卷阿》之篇也。 「四門穆穆,無凶人也」、《左》文十八《傳》史克之言也。「惟日不足」、《小雅·天保》之篇也。

今商王受,力行無度,播棄犁老,昵比罪人。淫酗肆虐,臣下化之,朋 家作仇,脅權相滅。無辜籲天,穢德彰聞。

「肆行非度」、《左》昭二十《傳》文。「昔商紂有臣曰:『王子須棄黎老之言而用姑息之謀』」、《尸子》之言也。「今王播棄黎老,而孩童焉比謀」、《吳語》申胥之言也。「殷王紂播棄黎老,賊誅孩子,誓毒無眾」、《墨子・尚鬼》篇文也。「朋淫于家」、《虞書》文也。「小民方興、相爲敵仇」、《微子》文也。

惟天惠民,惟辟奉天。有夏桀弗克若天,流毒下國。天乃佑命成湯,降點夏命。

「成王既黜殷命,微子之命」,《書序》也。

惟受罪浮于桀。剝喪元良,賊虐諫輔。謂己有天命,謂敬不足行,謂祭 無益,謂暴無傷。厥鑒惟不遠,在彼夏王。

「天有顯德,其行甚章,爲鑑不遠,在彼殷王。謂人有命,謂敬不可行,謂祭無益,謂暴無傷,上帝不常,九有以亡,上帝不順,祝降其喪,惟我有周,受之大常」,《墨子·非命下》篇引《太誓》之言也。「殷鑒不遠,在夏后之世」,《詩·蕩蕩》篇也。

天其以予乂民,朕夢協朕卜,襲于休祥,戎商必克。

「朕夢協于朕卜,襲于休祥,戎商必克」,《周語》單襄引太公《太誓》 故文也。「筮襲于夢,武王所用也」,《左》昭七《傳》衛史朝之言也。

受有億兆夷人,離心離德。予有亂臣十人,同心同德。

「商兆民離,周十人同」,《左》成二年《傳》引《太誓》而檃栝其文也。 「予有亂臣十人」,《論語》引武王之言也。

雖有周親,不如仁人。天視自我民視,天聽自我民聽。百姓有過,在予一人,今朕必往。

「雖有周親,不如仁人」,《論語》文也。孔安國注《論語》,以親爲管、蔡,仁人爲微、箕,與《書傳》何大相懸絕乎?二語又見《墨子·兼愛中》篇,則稱《傳》曰,不言《太誓》之詞。「天視自我民視,天聽自我民聽」,《孟子》引《太誓》文也。「百姓有過,在予一人」,《論語》文也。「雖有周親,不若仁人,萬方有罪,維予一人」,《墨子·兼愛中》篇引《傳》也。「百姓有罪,在予一人」,《說苑》文也。「今朕必往」,《湯誓》文也。

我武維揚,侵于之疆,取彼凶殘。我伐用張,于湯有光。

「我武惟揚,侵于之疆,則取于殘,殺伐用張,于湯有光」,《孟子》引 《太誓》文也。

勖哉夫子!罔或無畏,寧執非敵。百姓懍懍,若崩厥角。

「勖哉夫子」,《牧誓》文也。「無畏寧爾也,非敵百姓也,若崩厥角,稽首」,《孟子》引武王之言及史臣敘事之詞也。今以商民作周民,以敘事入口氣。

嗚呼!乃一德一心,立定厥功,惟克永世。」

「立功立事,可以永年」,《漢書·郊祀志下》引《太誓》文也。

泰誓下

時厥明,王乃大巡六師,明誓眾士。王曰:「嗚呼!我西土君子。天有 顯道,厥類惟彰。

「天有顯道,其行甚章」、《墨子・非命下》篇引《太誓》之文也。

今商王受,狎侮五常,荒怠弗敬。自絕于天,結怨于民。斷朝涉之脛, 剖賢人之心,作威殺戮,毒痛四海。崇信姦回,放黜師保,屏棄典刑, 囚奴正士,郊社不修,宗廟不享,作奇技淫巧以悅婦人。

断脛剖心事,見于子史者不一,每以刳、淫、婦連言之,謂之「三淫」。 「是崇、是長、是信、是使」,見《牧誓》。「姦回、昏亂」,見《左》宣四《傳》。 「作淫聲、異服、奇技、奇器」,《禮記・王制》文也。「毋或作爲淫巧,以蕩 上心」,《月令》文也。「乃用其婦人之言自絕于天」,又「乃爲淫聲,用變亂 正聲以悅婦人」,《史記・周本紀》文也。

上帝弗順,祝降時喪。爾其孜孜,奉予一人,恭行天罰。

「上帝不順,祝降其喪」、《墨子·非命下》篇引《太誓》文也。「予思日 孜孜」、《皋陶謨》文也。「爾尚輔予一人,致天之罰」、《湯誓》文也。「今予 發惟恭行天之罰」、《牧誓》文也。

古人有言曰:『撫我則后,虐我則讎。』獨夫受洪惟作威,乃汝世讎。

「古人有言曰」,《牧誓》文也。「民善之則畜也,不善則讎也」,《呂覽· 適威》引《周書》文也。「獨夫紂」,《荀子·議兵》引《太誓》文也。

樹德務滋,除惡務本,肆予小子誕以爾眾士,殄殲乃讎。

「樹德莫如滋,去疾莫如盡」,《左》哀元《傳》伍員述占之言也。《詩》 云:「樹德莫如滋,除害莫如盡」,《戰國策》秦客之言也。

爾眾士其尚迪果毅,以登乃辟。功多有厚賞,不迪有顯戮。嗚呼!惟我文考若日月之照臨,光于四方,顯于西土。惟我有周,誕受多方。

「殺敵爲果,致果爲毅」,《左》宣二《傳》稱君子之言也。「文王若日

若月,乍照光于四方、于西土」、《墨子·兼愛下》篇引《太誓》文也。「斯用顯我西土」、《逸周書·商誓》文也。「惟我有周,受之大帝」、《墨子·非命下》篇引《太誓》文也。「誕受羑若」、《顧命》文也。「尹而多方」、《多方》文也。

予克受,非予武,惟朕文考無罪;受克予,非朕文考有罪,惟予小子無 良。」

此六句、《禮記・坊記》引《太誓》文也。

牧 誓

《書序》曰:「武王戎車三百兩,虎賁三百人,與受戰于牧野,作《牧誓》。」 按:三百人,當作三千人,見《孟子》。《司馬法》曰:「革車一乘,士十人, 徒二十人」,即虎賁之士也。

時甲子昧爽,王朝至于商郊牧野,乃誓。

甲子,當爲紂之三十二年正月,周之十三年。辛未,二月六日也。昧爽, 且明也。《詩》曰:「肆伐大商,會朝清明。」朝,旦也,日出也。牧,坶也, 郊外謂之野。坶野,商之遠郊,在朝歌南七十里。今河南衛輝府汲縣、洪縣 之間,皆其地也。癸亥至遠郊停,止宿夜,士卒皆歡樂歌舞以待旦,因名其 樂爲《武》。宿夜至甲子朝起行,至坶野乃誓也。

王左杖黃鉞,右秉白旄以麾,曰:「逖矣,西土之人!」

左, 少也, 左手也。杖、秉, 皆持也。鉞, 成也, 大斧也。右, 又也, 右手也。旄, 氂也, 犛牛尾注于旗竿之首者也。麾, 當作摩, 指摩也。逖, 遠也。言西土至此, 道路潦遠。慰勞之詞也。

王曰:「嗟!我友邦冢君御事,司徒、司馬、司空,亞旅、師氏,千夫 長、百夫長。

同志為友。冢,長也,大也。此評八百諸侯也。御,治也。司徒、司馬、司空,三卿也。亞,敘也,次也。旅,眾也,再命之大夫也。師氏,中大夫以媺詔王,王舉則從,朝在野外則守內列者也。千夫長,二千五百人之長,所謂師帥也。百夫長,五百人之長,所謂旅帥也。此評羣臣也。

及庸、蜀、羌、髳、微、盧、彭、濮人。

此評戎蠻之人也。凡師出,與謀曰及。八國,皆武王率以來伐紂者也。庸,在今湖北鄖陽府。蜀,在今四川成都府。羌,在今甘肅鞏昌府。髳與微,皆在今四川重慶府。盧,在今湖北襄陽府。彭,在今四川眉州。濮,在今湖北荊州府。八國,皆素臣服于周者,故獨評之也。

稱爾戈,比爾干,立爾矛,予其誓。」

稱,禹也,舉也。戈,平頭戟也,可勾叮擊。比,相次也。干,戰也, 盾也,所以自衛。矛,齒矛也,刺兵,長二丈,建于兵車者。

王曰:「古人有言曰:『牝鷄無晨;牝鷄之晨,惟家之索。』

牝, 畜母也。鷄, 知時畜, 當晨而鳴。牝鷄不鳴, 喻婦人無男事也。索, 素也, 空也, 先稱古賢之言以爲證。昔人立言, 必有依據, 古書皆然也。

今商王受惟婦言是用,督棄厥肆祀弗答,督棄厥遺王父母弟不迪,乃惟 四方之多罪逋逃,是崇是長,是信是使,是以為大夫卿士。俾暴虐于百 姓,以姦宄于商邑。

婦,謂妲己也。妲,字,己姓,有蘇國之女也。紂伐有蘇,因以女獻,有寵。昬,惛也,迷惑也。棄,捐也。肆,鬄也。《周禮,典瑞》「以肆先王」,祭名也。答,當作荅,合也,猶問也。遺,馳也,猶畱也。《左傳》:「遺姑姊妹若而人」是也。王,謂紂也。父母弟,當謂比干、箕子也。迪,以也,用也。逋,亡也。崇,重也。長,養也。俾,使也。暴,暴也,疾也,虐殘也。言紂惟妲己之言是從,不敬祭祀,不用賢臣,惟是飛廉、惡來之輩,尊信以擢在位,使之殘害百姓,爲姦宄于商國,《左傳》所謂「紂爲天下逋逃主也」。

今予發惟恭行天之罰。今日之事,不愆于六步、七步,乃止齊焉。

發,武王名也。對友邦冢君,故稱名。愆,過也。步,行也。《司馬法》: 「六尺爲步。」止齊者,正行列也。言行軍之際,不可亂行。《左傳》變鍼云: 「好以眾整。」又云:「好以暇。」是以六步七步即止,相齊而後行,必疾趨 急迫爲貴也。此言進軍之時也。

夫子勖哉!不愆于四伐、五伐、六伐、七伐,乃止齊焉。

夫子,將土也。勖,勉也。伐,謂擊刺也。擊用戈,刺用矛,一擊 ·刺

爲一伐。《司馬法》云:「軍以舒爲主,雖交兵致刃,徒不趨,車不馳,不踰 列,是以不亂。」此言交兵之時也。

勖哉夫子!尚桓桓如虎、如貔、如熊、如羆,于商郊弗迓克奔,以役西 士。

桓桓,重言形況字,威武之貌。《周頌》「桓桓武王」是也。虎,山獸之君。貔,白豺,猛獸也。熊,蟄獸也,似豕。羆,如熊,皆黄白文,四獸善攫搏者也。于,如也,往也。商郊,謂近郊也。迓,御也,猶止也。克,殺也。奔,走而來降者也。役,使也,猶助也。言將士皆當勇猛精進以往商郊,商郊之民如有奔走來降者,勿止而殺之,是即可以爲西土之兵也。陳師不襲,見其正;行軍不亂,見其整;降兵不殺,見其仁。王者之師如此,血流漂忤,孟子所以不信也。

勖哉夫子!爾所弗勖,其于爾躬有戮!」

所,猶且也。戮,殺也。誓師之常語也。不從殷法言孥戮者,周之仁也。

武 成

《書序》曰:「武王伐殷,往伐歸獸,識其政事,作《武成》。」按:「伐殷」當作「伐紂」,字之誤也。往伐者,孟子所謂滅國者五十;歸獸者,驅虎豹犀象而遠之也。《逸周書·世俘》篇即《武成》之情事,殆猶《春秋》《國語》之與《左傳》耳。雖未可即以當《武成》一篇,然大略如此,不如僞孔所云也。此篇亡于東漢建武之際。

惟一月壬辰,旁死魄。越翼日,癸巳,王朝步自周,于征伐商。

「惟一月壬辰,旁死霸。若翌日,癸巳,武王乃朝步自周,于征伐紂」, 《漢書·律曆志》所引《武成》文也。《逸周書·世俘》篇略同,惟「壬辰」 作「丙辰」,「死霸」作「生魄」,「癸巳」作「丁巳」,爲誤耳。一月,子月也。 旁,傍也,近也。霸,月始生魄然也。凡曰死霸,朔也。曰傍死霸,二日也。 曰載生霸,即朏,謂三日也。曰生魄,望也。曰旁生魄,十有六日也。翌, 昱也,明也。翌日,明日也。周,鎬京也,在今陝西西安府長安縣。

厥四月,哉生明,王來自商,至于豐。

古書未有以「生明」紀日者,蓋魄即明之始生也。孟康以魄爲月質者,

·綫之明,全體皆闇,亦可通,但斷不宜別立 ·明字與魄爲對也。

乃偃武修文,歸馬于華山之陽,放牛于桃林之野,示天下弗服。

「濟河而西,馬散于華山之陽而弗復乘,牛散于桃林之野而弗復服」, 《禮·樂記》賓车賈之言也。又「稅馬于華山,稅牛于桃林,馬弗復乘,牛 弗復服」,《呂覽·愼大》篇文也。

丁未,祀于周廟,邦甸、侯、衛,駿奔走,執豆、邊。越三日,庚戌, 柴、望,大告武成。

丁未之越三日爲己酉,古書之例皆從前至今爲計,今曰庚戌,非也。「庚戌,武王遼于周廟」、《漢書·律曆志》引《武成》文也,非丁未也。「既事而退,柴于上帝。祈于社,設奠于牧室,遂率天下諸侯執豆邊駿奔走」、《禮記》《大傳》文也。

既生魄,庶邦冢君暨百工,受命于周。

丁未已爲是月十九日,追敘十六日事何也?

王若曰:「嗚呼,羣后!惟先王建邦啟土,公劉克篤前烈,至于大王肇基王迹,王季其勤王家。我文考文王克成厥勳,[-]誕膺天命,以撫方夏。 大邦畏其力,小邦懷其德。惟九年,大統未集,

「其勤公家」、《禮記·祭統》衛孔悝鼎銘文也。「大國畏其力,小國懷其德」、《左》襄三十一《傳》北宮文子引《周書》言文王之德也。「文王受命九年而崩」、則本《逸周書·文傳》篇及《漢書·律曆志》也。

校勘記

[-] 我文考文王克成厥勳,原書作「我文考先王」,據他本改。(原書第 122 頁第 2 行下)

予小子其承厥志。底商之罪,告于皇天、后土、所過名山、大川,曰: 『惟有道曾孫周王發,將有大正于商。今商王受無道,暴殄天物,害虐 烝民,為天下逋逃主,萃淵藪。

「善繼人之志」,見《禮記·中庸》。「布令于商,底周之多罪」,《周語》 文也。「皇天后土」,見僖十五《傳》。「武王將事泰山隧,《傳》曰:『泰山有 道,曾孫周王有事。大事』」,《墨子·兼愛中》篇文也。但有道乃偁泰山之神, 非武王自偁也。目紂尚在,武不得偁王,故《大明》之詩曰:「維予侯興」。「田 不以禮,曰暴天物」,《禮記·王制》文也。「昔武王數紂之罪以告諸侯曰:『紂 爲天下逋逃主,萃淵藪』」,《左》昭七《傳》楚芊尹無宇之言也。

予小子既獲仁人,敢祗承上帝,以遏亂略。華夏蠻貊,罔不率俾。恭天 成命。

「既獲仁人,尚作以祗商夏蠻夷醜貉」、《墨子·兼愛中》篇引《傳》文也。「以紂亂略」、《左》襄八《傳》文也。「罔不率俾」、《君奭》文也。「昊天有成命」、《詩·周頌》之篇也。

肆予東征,終厥士女。惟其士女,篚厥玄黃,昭我周王。天休震動,用 附我大邑周。

「有攸不惟臣,東征,綏厥士女,篚厥元黃,紹我周王見休,惟臣附于 大邑周」,《孟子》文也。「釗我周王」,《爾雅》郭注引《逸周書》也。

惟爾有神,尚克相予以濟兆民,無作神羞!

「苟捷有功,無作神羞」,又曰:「惟爾有神裁之」,《左》襄十八《傳》中行獻子濟河之禱也。「平公之靈尚輔相予」,昭二十一《傳》公子城之言也。「以集大事,無作三祖羞,」哀二《傳》衛蒯瞶言也。

既戊午,師逾孟津。癸亥,陳于商郊,俟天休命。甲子昧爽,受率其旅 若林,會于牧野。罔有敵于我師,前徒倒戈,攻于後以北,血流漂杵。 一戎衣,天下大定。

「一月戊午,師渡孟津,至庚申,二月朔日也。四日癸亥至牧野,夜陳,甲子昧爽而合矣」,《漢書·律曆志》序文也。「王朝至于商郊」,《牧誓》文也。「順天休命」,《易·大有·象》傳文也。「時甲子昧爽」,《牧誓》文也。「殷商之旅,其會如林,矢于牧野,維予侯典」,《大雅·大明》之篇也。《荀子·儒效》及《成相》篇皆云:「紂卒易鄉。」《史記·周本紀》云:「紂師皆倒兵以戰。」即前徒倒戈之意也。「而何其血之流杵也」,《孟子》文也。「壹戎衣,而有天下」,《禮記·中庸》文也。

乃反商政,政由舊。釋箕子囚,封比干墓,式商容闆。散鹿臺之財,發 鉅橋之粟,大賚于四海,而萬姓悅服。」

「武王于是復盤庚之政,發鉅橋之粟,賦鹿臺之錢,以示民無私,又封

比干之墓,靖箕子之宫,表商容之閭」,《呂覽·愼大》篇文也。「反商之政」, 見《家語》。「命召公釋箕子之囚,命畢公釋百姓之囚,表商容之閭,命閎夭 封比干之墓,命南宮括散鹿臺之錢,發鉅橋之粟」,《史記·周本紀》文也。「武 王代紂入殷之日,決鉅橋之粟,散鹿臺之錢,殷民大說」,《管子·取法》解 文也。「周有大寶」,《論語·堯曰》篇文也。

列爵惟五,分土惟三。建官惟賢,位事惟能。重民五教,惟食、喪、祭。 惇信明義,崇德報功。垂拱而天下治。

「周爵五等,而土三等」,《漢書·地理志》說也。「所重民食、喪、祭」,《論語》文也。彼處眞孔注謂:「總言二帝三王之治道也。」「垂衣裳而天下治」,《易·繫詞》文也。「垂拱而天下治」,《管子·任法》篇文也。按:晉人所傳《尚書》二十五篇,皆文從字順。此篇「既戊午」以下顚倒錯亂,或自嫌其過于完整,而故乖其前後之節;或「既戊午」至「天下大定」,皆作武王追述前事之語,殆不可知。而後儒乃復取而考定之,其亦可以不必也。

洪 範

《書序》曰:「武王勝殷,殺受,立武庚,以箕子歸。作《洪範》。」按: 武庚,字祿甫,紂子也。立以爲殷後。殷亡時,箕子不忍爲周之釋,走之朝 鮮,後聞武王立殷後,遂來歸,承武王問,武王以箕子之來歸而作此篇。洪, 猶大也。範,笵也,法也。《左傳》《說文》引此經皆云《商書》,或疑箕子自 作焉。

惟十有三祀,王訪于箕子。

殷曰祀,周曰年。武王克殷滅紂,爲文王受命之十三年正月六日甲子,後世所謂辛未歲也。周已代殷,而此篇稱祀者,寵異箕子,示以不臣之義也。訪,汎謀也,或以箕子既受朝鮮之封,不得無臣禮,因而來朝。按:唐虞夏商之朝鮮,世號檀君。箕子封,而檀君隱箕子,傳四十一代而燕人衛滿奪之,其孫爲漢武所滅,置樂浪郡,復置四郡二府,自是三韓瓜分。馬韓統五十四國,辰韓、卞韓各統十二國。厥後新羅、高麗、百濟三國鼎峙,唐高宗滅其地,而不能守,新羅遂並之。及其季世而有裔據銕原,稱後高麗,數傳復統合三韓爲一大國。高麗,今去中國萬里,周以二月五日釋箕子囚,然後走之朝鮮,一萬里;武王在周,確知箕子在朝鮮之信,二萬里;再遣使封之,三萬里;箕子受封而來,

四萬里。雖海道難計,殆未必一年中情事。此稱其舊爵邑者,知未封也。箕, 采地,子爵也。箕子,名胥餘,俱見于《微子》篇也。

王乃言曰:「嗚呼!箕子,惟天陰騭下民,相協厥居,我不知其彝倫攸 敘。」

陰,蔭也,覆也。騭,正也,定也。相,襄也,助也。協,和也。居, 尼也,處也。彝,猶常也,長也。倫,猶理也。攸,猶所也。敘,次弟也。 言天覆定下民,王者助天以和合其所處之性,我不識其常理之所以次弟。蓋 即下文九疇之敘也。

箕子乃言曰:「我聞在昔,鯀陻洪水,汩陳其五行。帝乃震怒,不畀洪 範九疇,彝倫攸斁。鯀則殛死,禹乃嗣興,天乃錫禹洪範九疇,彝倫攸 敘。

古日在昔、昔日先民,古人立言之體也。陻,當作垔,塞也。汨,當作 汨,洄也,亂也。陳,敶也,列也。帝,天也。震,蹑也,動也。畀,與也。 疇,當作曜,猶類也。蓋《洛書》者,龜背所列之文,縱橫錯落,象耕田詰詘之形。俗傳戴九履一,左三右七,二四爲肩,六八爲足,五爲中心,即下文六十五字是也。斁,殬也,敗也。殛,極也,猶窮也。窮極之于遠方,至死未返也。嗣,繼。興,起也。錫,賜也。言鯀治水而障塞之,失其本性,故凡五行之陳列皆亂,天乃震動其威怒,弗予大法九類,此常理之所由敗亂也。舜窮之于羽山,死于其地,至于禹繼起而成其功,天乃賜之大疇,此常之所由次第也。

初一曰五行,次二曰敬用五事,次三曰農用八政,次四曰協用五紀,次 五曰建用皇極,次六曰乂用三德,次七曰明用稽疑,次八曰念用庶徵, 次九曰嚮用五福,威用六極。

播五行于四時,迭相休王,爲天行氣也。故曰「行用卜中,可施行也」。 五事切于人身,故曰:「敬用」。敬,漢人皆作羞,蓋着字之誤。着者,自亟 敕也,即敬字之左傍。訓羞爲進者,非也。農,醲也,厚也。八政所以厚生, 故曰「農用」。協,合也。紀,如絲之細別也。五紀所以合天,故曰:「協用」。 建,立也。皇,大君也。極,猶中也。君所以立民極,故曰「建用」。乂,嬖 也,治理也。三德所以治民,故曰「乂用」。稽,卟也,卜以問疑也。疑,與 也,惑也。蓍龜所以辨或,故曰「明用」。念,常思也。庶,猶眾也。徵,論 也。庶徵所以自省,故曰「念用」。嚮,向也,猶獎也。五福,天所以勸人, 故曰「嚮用」。威,畏也。六極,天所以懼人,故曰「威用」。此節六十五字, 或以「五行」等三十八字爲《洛書》原文;「初一曰」等爲禹所第敘。或以「敬 用」等十八字亦禹所加,原文止二十字。未詳孰是。

一、五行:一曰水,二曰火,三曰木,四曰金,五曰土。水曰潤下,火 曰炎上,木曰曲直,金曰從革,土爰稼穑。潤下作鹹,炎上作苦,曲直 作酸,從革作辛,稼穡作甘。

此節以下皆箕子演說之言也。天一生水,地六成之。地二生火,天七成之。天三生木,地八成之。地四生金,天九成之。天五生土,地十成之。《禮記·月令》春夏秋冬以成數言,中央以生數言者,土以生爲本者。《春秋繁露》以木火土金水爲序,此五行自相生之次。《左》昭二十五《傳》六府以水火金木七爲序,此五行自相克之次。潤下,漬濕而就下;炎上,爛熱而升上;曲直,揉曲而削直;從革,合并而變更;稼穡,春穜而秋斂,皆言其自然之性也。爰,于也。土變曰爲爰者,以其吐生之五穀言,非土質也。鹹苦酸辛甘者,五行之味也。五行有聲色臭味,獨言味者,以其切于民用也。

二、五事:一曰貌,二曰言,三曰視,四曰聽,五曰思。貌曰恭,言曰從,視曰明,聽曰聰,思曰睿。恭作肅,從作乂,明作哲,聰作謀,睿作聖。

《書大傳》:「貌屬木,言屬金,視屬火,聽屬水,思屬土。」宋吳仁傑曰:「貌水、言火、視木、聽金、思上,此則人與人相見之次也。見面而後有言,言而見精神之所屬,彼此相聽以耳,而各有其用心也。」恭,敬也。從,从也,順也。明,古讀爲蒙,照也。聰,察也。睿,當作容,寬大包容也。董仲舒曰:「容者,言無不容。」此五字,韻語也。肅,持事振敬也。乂,雙也,治理也。哲,哲也。昭,明也。謀,謨也。聖,通也。言君貌恭則臣禮肅,君言從則臣職理,君視明則臣照哲,君聽聰則臣進謀,君思容則臣賢智也。《詩·小雅》:「國雖靡止,或聖或否。民雖靡膴,或哲或謀,或肅或艾。」亦此意也。

三、八政:一曰食,二曰貨,三曰祀,四曰司空,五曰司徒,六曰司寇,

七曰賓,八曰師。

此本諸其職,先後之誼也。食,謂長民食之官,若后稷者也。貨,掌金帛之官,若《周禮・天官》四府是也。祀,掌祭祀之官,若宗伯也。司空,掌居民之官。司徒,掌教民之官。司寇,掌詰盜賊之官也。賓,掌諸侯朝覲之官,若《周禮》大行人也。師,掌軍旅之官,若司馬也。食者,民之天,貨利民用,成民而後致力于神,故三者居先。食節事時,民咸安其居,樂事勸功,尊君親上,然後興學。其不帥教者,教之不改,而後誅之,故三者相次。德立刑行,遠方賓服,其有暴虐無道不遵王化者,則六師移之,故二者相次。此八政之序也。

四、五紀:一曰歲,二曰月,三曰日,四曰星辰,五曰厤數。

分至啓閉,八節以紀歲,朔望晦霸,以紀永短,盯昏以紀日。星,五星也。辰,醫也。日月所會,二十八宿也。伏見以紀星,昏中旦中以紀辰,太陰太陽之贏縮,恒星之歲差以紀厤數。歲、月、日、星辰者,所以紀一年之氣候,而厤數者,所以紀千萬年之章蔀也。○吾吳余燾上書,欲以「王省惟歲」至「則以風雨」繫于「五曰厤數」之下。謂九疇皆有闕文,惟四五紀無之。爲給諫所彈,不果施行。見宋襲明之《中吳紀聞》,附參。

五、皇極:皇建其有極。斂時五福,用敷錫厥庶民。惟時厥庶民于汝極。 錫汝保極。

建,立也。斂,聚。時,是也。用,以也。敷,做也。錫,賜也,與也。 保,守也。言大君立中于上,正心以正四方,而諸福之物、可致之祥,莫不 畢至,所謂聚也。聚此壽富康寧好德考終之五福,而即以做與其眾民,故眾 民亦皆歸心以取中,與其大君共守此中也。

凡厥庶民,無有淫朋,人無有比德,惟皇作極。

淫,佚也。朋,佣也,俌也。人,謂臣也。比,阿黨也。德,悳也。維, 詞也。凡眾民無有淫泆爲朋者,臣無有阿黨爲悳者,皆維大君爲中道以示之 則故也。

凡厥庶民,有猷有為有守,汝則念之。不協于極,不罹于咎,皇則受之。 而康而色,曰予攸好德,汝則錫之福。時人斯其惟皇之極。

猷,當作猶,儀也,謀也。爲,僞也,作也。守,法度也。念,常思也。

協、合也。罹、當作羅、猶麗也。咎、惡也。而、爾、詞也。康、康也、安也。色、容貌也。曰、詞氣也。攸、修也。好德、美悳也。福、爵祿也。時人、是人也。惟、維也、猶持也。言眾人中有智謀、有作爲、有操守者、汝當常思之于心,而不忘其行。雖不合于中,而亦不附于惡。是中人可教者、當容受之,而勿拒焉。若容貌顏色間有安和之象、詞氣間皆有德之言,則當予之爵祿、相與圖治。此三等之人,皆能維持大君之中道者也。

無虐榮獨而畏高明,

無,毋也。虐,殘暴也。縈,憐也。孤單無兄弟曰縈,老而無子曰獨。 畏,懼也。高明,顯寵有權勢者也。無虐無畏,所謂柔亦不茹,剛亦不吐, 不侮鰥寡,不畏強禦也。

人之有能有為,使羞其行,而邦其昌。凡厥正人,既富方穀,汝弗能使 有好於而家,時人斯其辜。于其無好德,汝雖錫之福,其作汝用咎。

能,才能。爲,作爲。羞,進也。行,猶用也。正人,正直之人,即上 文所言也。富,祿也。方,始,詞也。穀,猶善也。有好之「好」,畜也,養 也。辜,苦也,勞苦窮極也。言有能有爲者,使進其用,任之以政,則國爲 之昌。凡正直之人,有祿以代其耕,以馭其富,始能自善而心乎爲國,若弗 能使畜養其家,是人斯勞苦困窮矣。彼無好德之人,則雖予之以爵祿而用之, 徒爲汝用惡,所謂侵削眾庶兆民,以爲天子取怨于下也。進賢退不肖,大君 之急務,故再三陳之。

無偏無陂,遵王之義;無有作好,遵王之道;無有作惡,遵王之路。無偏無黨,王道蕩蕩;無黨無偏,王道平平;無反無側,王道正直。會其有極,歸其有極。

無,無也。偏,頗也。陂,古作頗,唐明皇疑頗與義不協,改爲陂。其實,義古讀如莪。頗、陂,亦皆从皮聲也。頗,頭偏也。遵,循也。王者,天下所歸往也。義,誼也,人所宜也。無作好作惡,好所當好,惡所當惡也。黨,攩也,朋羣也。蕩蕩、平平,皆重言形況字。蕩蕩,寬廣之意;平,當作丐,字之誤也,辨治之意。《史記》作「便便」,《詩》「平平左右」,《左傳》作「便蕃」,皆同。反,復也。側,仄也,傾也。正,不反也。直,不傾也。會,合也,謂君當合聚有中之人以爲臣。歸,猶就也,謂臣當就向有中之君

而事之也。此承上文而言。**建極**之王,無偏頗好惡、偏黨反側之行,則臣下皆率由于義,道路之中而成蕩平正直之治。葢君能用中,臣能就中,則庶民之錫汝保極,又不待言矣。

曰:皇極之敷言,是彝是訓,于帝其訓。

曰者,箕子更端之言也。彝,猶常也。上「訓」,說教也;下「訓」,順也,理也。帝,天也。箕子乃復申言之曰:此皇極敷衍之言,勿謂繁多,是常道也,是大訓也,是于天理爲順也。

凡厥庶民,極之敷言,是訓是行,以近天子之光。

近,附也。言凡眾民能以皇極之敷言順而行之,亦所以附合天子之光, 而發其**善**華也。

曰:天子作民父母,以為天下王。

曰,亦箕子更端之言也。言君仁莫不仁,君義莫不義,君正莫不正。天子者,首出庶物,固爲民之父母,而爲天下歸往之王也。箕子獨于五疇之皇極反覆詳盡者,五行、五事、八政、五紀,無非君之修其身,齊其政,先乎天下以建其極者也。三德稽疑,庶徵福極,無非君之敬其事,攷其效,推之天下以用其極者也。故《洛書》雖始于一,終于九,而必以五居中。《洪範》雖本于五行,究于福極,而必以皇極爲主。箕子所以敷陳于武王者,尤深切注明也。

六、三德:一曰正直,二曰剛克,三曰柔克。平康,正直;疆弗友剛克; 燮友柔克。沈潛,剛克;高明,柔克。

此言人臣有三德,惟天子擇而用之,以成治功也。正直之而溫者,中和之德也。克,勝也。剛克,剛而塞者,強毅之德也。柔克,柔而立者,寬仁之德也。安平之民,則使正直之人治之,猶刑平國用中典也。友,順也。強暴之民,則使剛勝之人治之,猶刑亂國用重典也。變,和也。和順之民,則使柔勝之人治之,猶刑新國用輕典也。沈,湛也,深也。潛,猶伏也。南方風氣滯弱,則使剛勝之人振起之。高明,猶亢爽也。北方風氣剽悍,則使柔勝之人涵養之。因地以施其教,因人以盡其才,此天下所用乂安也。

惟辟作福,惟辟作威,惟辟玉食。臣無有作福、作威、玉食。臣之有作

福、作威、玉食,其害于而家,凶于而國。人用側頗僻,民用僭忒。

辟,君也。作福,專爵賞也;作威,擅刑罰也;玉食,備珍異也。《周禮·玉府》:「王齋則供食玉,舉食味之最貴者,以該君之膳飲,尊異于人也。」若臣而上儗于君,則大夫必自害汝之家,諸侯必自殃汝之國。大臣不法,則小臣不廉,而所由以多傾仄偏倚褒僻之人矣。上無道揆,斯下無法守,而所由以多踰節悖常之民矣。此言人君當以德行權,而柄不可下移,人臣當以德副位,而分不可上僭。三代用此疇,所以政令一而有道長,後人失之,而遂爲春秋戰國之世也。

七、稽疑:擇建立卜筮人,

擇,柬選也。建,亦立也,古人自有複語。龜曰卜,蓍曰筮,皆所以紹 天明而前民用者。《周禮·春官·序官》有「卜人、筮人」,皆中士爲之。必 特立者,一以精其術,一所以專其職也。

乃命卜筮。曰雨,曰霽,曰蒙,曰驛,曰克,曰貞,曰悔,凡七。卜五, 佔用。二衍忒。

兆卦各有名以命之。凡卜,灼龜以觀其體色,墨圻之兆,雨,體氣如雨然也。霽,雨止也。其光明如雨止,雲氣在上也。蒙,雾也,色不澤如霧之鬱而冥冥也。按:下文恒風爲雾,則屬土也。驛,圍也,回行也,色澤而光明也。克者,如祲氣之色相犯也。或曰兆配五行,則雨水,霽火,蒙木,驛金,克土也。凡筮,以四十九蓍揲扐,十有八變而成卦。貞,正也,內封爲主也。悔,卧也,猶晦也,外卦爲終也。筮之畫卦,從下起,故下卦爲內,上卦爲外,其名凡七,卜則有五,以爲占之用。筮惟有二,以爲忒之衍,所謂筮短龜長也。衍,猶推廣也;忒,更變也。觀變于陰陽而立卦,故筮以變爲用。若卦有動爻者,必參詳于所變之卦,後世又即以名遇卦爲貞之卦,爲悔矣。

立時人作卜筮,三人占,則從二人之言。

有事卜筮之時,于卜筮官人中擇立三人以作之。《周禮·太卜》:「掌三兆之法:一曰玉兆,二曰瓦兆,三曰原兆。」杜子春注:「玉兆,顓帝之兆;瓦兆,堯之兆;原兆,周之兆。」愚按:原兆,舜之兆也。《太卜》又云:「掌三易之法:一曰《連山》;二曰《歸藏》,三曰《周易》。」杜子春注:「《連山》,伏羲;《歸藏》,黃帝。」愚按:《周易》,顓帝。周者,知之借字;易者,易

之誤字。《連山》首艮,夏人因之。《歸藏》首坤,商人因之。《知易》首乾,周人因之。《知易》者,币六爻皆易也。三人占者,《儀禮》所謂旅占也。從,从也,相聽也。三人同則從,固不待言。有吉有凶,則從其多者,不以私意參也。

汝則有大疑,謀及乃心,謀及卿士,謀及庶人,謀及卜筮。

汝、乃,皆謂君也。疑,妃也,未定也。咨難曰謀。士,事也,六卿掌事者也。《國語》云:「庶人傳語。」《周禮》亦有外朝致民之法,所謂謀及庶人也。凡事精微無端緒,雖聖人亦有所不知,先盡人事,然後及于蓍龜,示不自專也。

汝則從,龜從,筮從,卿士從,庶民從,是之謂大同。身其康彊,子孫 其逢。吉。

從,从也,相聽也。同,合會也。逢,隆也,豐大也。彊、逢古韻叶。 人謀鬼謀,無不配合,此上吉也。

汝則從,龜從,筮從,卿士逆,庶民逆,吉。

逆, 屰也, 不順也。三從二逆, 如盤庚之遷都也。

卿士從,龜從,筮從,汝則逆,庶民逆,吉。

亦三從二逆,如周公之東征也。

庶民從,龜從,筮從,汝則逆,卿士逆,吉。

亦三從二逆。以上三者,皆中吉也。

汝則從,龜從,筮逆,卿士逆,庶民逆,作內吉,作外凶。

此二從三逆,逆者多也。內爲祭祀冠婚,凡境內之事。外爲會盟征伐, 凡境外之事。但筮短龜長,故有吉有凶。古者大事卜,小事筮也。

龜筮共違于人,用靜吉,用作凶。

違,章也,相背也。靜,竫也,亭安也。作,猶動,爲也,此不吉也。 三從二逆而不吉者,稽疑則以龜筮爲重,故不疑何卜。既請命于神,而神示 之,則必有人所不及知者。聽命于神,而偏徇于人可也。按:二從三逆,經 無言人共違于龜筮者。人事皆逆,故無煩卜筮也。

八、庶徵:曰雨,曰暘,曰燠,曰寒,曰風。

鄭氏曰:「雨,木氣也。春始施生,故木氣爲雨。暘,金氣也。秋物成而堅,故金氣爲暘。燠,火氣也。寒,水氣也。風,土氣也。凡氣非風不行,猶金木水火非土不處,故土氣爲風。」宋吳仁傑曰:「雨水暘火燠,木寒金風土也。」

曰時五者來備,各以其敘,庶草蕃廡。一極備,凶;一極無,凶。

曰者,亦箕子詳說之言也。時,是也。來,麥也,至也。備,葡也,具也。草,艸也。蕃,草茂也。廡,橆也,豐也。極,至也。無,無也,亡也。言五者具至,各順其次弟,則眾草繁滋豐殖。草,該百穀而言也。極備,即下文之恒雨。極備則無陽恒燠,極備則無寒,必相因也。

曰休徵:曰肅,時雨若;曰乂,時暘若;曰哲,時燠若;曰謀,時寒若; 曰聖,時風若。

休,喜也,美也。若,順也。古誼兒木言金視火廳水思土,宋人易爲貌 水言火視木聽金思土,亦通。在天爲五行,在人爲五事,感應之機,各以類 從,其理固然。必如《漢書,五行志》枝枝節節以求之,則固也。

曰咎徵:曰狂,恒雨若;曰僭,恒暘若;曰豫,恒燠若;曰急,恒寒若; 曰蒙,恒風若。

答,災也,猶惡也。狂,癡也,倨慢無常之意,不敬也。恒,長久也。 僭,差也,不信則不治也。豫,耔也,緩也,怠緩無識見也。急,褊也,迫 促自用之意,不慎思也。蒙,冢也,冒而前不通明也。五事不得,則咎氣順 應之如此也。

曰王省惟歲,卿士惟月,師尹惟日。

日者,亦箕子申言之也。省,察視也。言休咎之應,不徒雨暘燠寒風而已。王職如歲之兼四時而總其成,卿上職如月之分十二而專其守。師,猶眾也。尹,治事也。眾官治事者,如十日之統于時與歲而效其職,得失之應,又于斯徵之。

歲月日時無易,百穀用成,乂用明,俊民用章,家用平康。

當其可之謂時。易,傷也,猶變也。乂,變也,治也。才過千人曰俊。

章,彰也,濕也。言歲月日不失其時,則君明臣良之世。天時生而地利養,五辰撫而庶績凝,天地交而賢人出,陰陽和而家道昌也。

日月歲時既易,百穀用不成,乂用昏不明,俊民用微,家用不寧。

既,已詞也。昏,惛也,不憭也。微,殼也,猶隱也。寧,寍也,安也。 言日月歲已失其時則反是,休徵起于歲者,見善之所積者厚,咎徵起于日者, 見惡之由來者漸也。

庶民惟星,星有好風,星有好雨。日月之行,則有冬有夏。月之從星, 則以風雨。

星,恒星也。七百八十有三座,大小一千八百七十有八,民之眾似之。好 風謂箕,好雨謂畢,故《周禮・大宗伯》: 「箕爲風師,畢爲雨師。」風,土氣 也,十爲木妃。雨,木氣也,木爲金妃。箕,東方木宿,尚妻之所好,故好風。 畢,西方金宿,尚妻之所好,故好雨也。推此而南方宿好暘,北方宿好燠,中 宫四季好寒,可知日有中道。中道者,黃道,一曰光道也。日冬則南,夏則北。 極南至于牽牛,爲冬至。極北至于冬井,爲夏至。南不極則溫爲害;北不極則 寒爲害。今時冬至日在箕,夏至日在參,蓋恒性(星)之差距周初紀四十二度 矣。月有九行,皆交于黄道。黑道二出黄道北,朱道二出黄道南,白道二出黄 道西,青道二出黄道東,立春、春分行青道,立秋、秋分行白道,立冬、冬至 行黑道,立夏、夏至行朱道,而四季土王之間,皆與日同行黃道也。然月出入 黄道內外二十七日有奇而交道一終,交終不復干原處。如其差一度又幾半度, 每年之差,自東而西土九度奇,古有九道之說,借以攷其差也。按:太陽之差 約二萬四千五百餘年而一終,太陰之差則十九年弱而一終也。若月失節度而妄 行,出陽道則旱風,出陰道則陰雨。故月去中道移而東北入箕,或東南入軫, 則多風;移而西入畢,則多雨。《詩》曰:「月離千畢,俾滂沱矣。」《春秋緯》 曰:「月離于萁,則風揚沙。」不兼言日者,日從星則星不可見也。按:此申言 雨暘燠寒風也。舉星以說風雨,舉日月以說暘,舉冬夏以說寒燠。月亦以日光 爲光,故日月政。言以諭王者,政令四時,各有所宜。政教失中,則不能無亂 也。然日月有常度,星辰無嗜好,而古必以天象爲人君法戒者,天子尊無二, 上當臨以天之尊而已,非天學古疎而今密也。

九、五福:一曰壽,二曰富,三曰康寧,四曰攸好德,五曰考終命。

攸,修也。考,有子爲後之偁也。君子曰終,小人曰死。終命,終天所命,順受其正不強死也。按:五福不言貴者,福統天下而言,自天子達于庶人皆可備之。君賜福,民保極,非占者貴而後富之謂也。

六極:一曰凶、短、折,二曰疾,三曰憂,四曰貧,五曰惡,六曰弱。

七歲以下未齔曰凶,二十以下未冠曰短,三十以下未婚曰折,壽與考,終命之反也。疾,疒也,疴也。憂,惡也,愁也。謂疾病死喪,康寧之反也。 貧,財少,富之反也。剛過者,惡其性暴盭;柔過者,弱其性愚懦,皆不能 進于善,攸好德之反也。《洪範·九疇》皆人君之道,皇極居五爲綱,前後八 者爲紀。五行以法天,五事以修身,八政以治民,五紀以順時,三德以用人, 稽疑以事神,庶徵福極以爲考驗。蓋人君不以一身爲福極,而以天下爲福極, 故究言之。

分器

《書序》曰:「武王既勝殷,邦諸侯,班宗彝,作《分器》。」按:邦, 古封字同。宗彝,宗廟盛鬱鬯之尊也。分封諸侯,箸王之命及所受物也。此 篇亡于秦項之火。

旅獒

《書序》曰:「西旅獻獒,大保作《旅獒》。」按:旅,廬也,覊旅之人也。獒,讀爲豪,西戎無君名,彊大有政者爲酋豪。太保,召公奭也。僞《書》 乃真以犬高四尺之獒當之。此篇亡于西晉永嘉之亂。

惟克商二年,遂通道于九夷八蠻。西旅底貢厥獒,太保乃作《旅獒》, 用訓于王。

「昔武王克商,通道于九夷、百蠻,使各以其方賄來貢也。使無忘職業, 于是肅慎氏貢楛、矢、石砮。」《魯語》孔子之言也。

曰:「嗚呼!明王慎德,西夷咸賓。無有遠邇,畢獻方物,惟服食器用。 王乃昭德之致于異姓之邦,無替厥服;分寶玉于伯叔之國,時庸展親。

「無有遠邇」、《盤庚》文也。「諸侯、官受方物」、《左》僖七《傳》文也。 「先王欲照其令德之致遠也,故銘其栝以示後人。」又「古者分同姓以珍玉, 展親也。分異姓以遠方之職貢,使無忘服也」,亦《魯語》孔子言也。 人不易物,惟德其物!德盛不狎侮。狎侮君子,罔以盡人心;狎侮小人, 罔以盡其力。

「民不易物,惟德緊物」,《左》僖五《傳》宮之奇引《周書》也。「狎侮死焉,而不畏也」,《禮,表記》之文也。

不役耳目,百度惟貞。玩人喪德,玩物喪志。志以道寧,言以道接。不作無益害有益,功乃成;不貴異物賤用物,民乃足。犬馬非其土性不畜,珍禽奇獸不育于國,不寶遠物,則遠人格;所寶惟賢,則邇人安。

「百度」、「喪志」,字皆見《左》昭元《傳》。「不貴難得之物,而器無用之物」,《淮南·精神訓》文也。「古者大事必乘其產,生其水土,而知其人心」,《左》僖十五《傳》慶鄭之言也。

嗚呼!夙夜罔或不勤,不矜細行,終累大德。為山九仞,功虧一簣。允 迪茲,生民保厥居,惟乃世王。

「譬如爲山,未成一簣」,《論語》文也。「掘井九朝」,《孟子》文也。但 七尺曰仞,周尺當今六寸。九仞,不及四丈,何足爲山,且孔子譬語,今用 之竟去「譬」字。

旅巢命

《書序》云:「巢伯來朝,芮伯作《旅巢命》。」鄭注:「巢伯,南方之國。世一見者,以武王即位來朝。」按:旅者,遠人羈旅之偁,與《旅獒》同。此篇亡于秦項之火。

金縢

《書序》曰:「武王有疾,周公作《金滕》。」按:此篇蓋史臣所記,非周公作也。《序》云「作」者,作冊納《金滕》也。

既克商二年,王有疾,弗豫。

武王克商之年,歲星次鶉火,則歲陰紀大荒落,而太歲爲今辛未也,史 以爲戊寅。其後二年,歲次壽星,則歲陰在協治,而太歲爲今之癸酉也。疾, 疒也,疴也。弗者,不之深也。豫,念也,喜也。《曲禮》疏引《白虎通》曰: 「天子病曰不豫」,言不復豫政也,則謂借爲與。存參。

二公曰:「我其為王穆卜。」周公曰:「未可以戚我先王。」

二公,太公、召公也。穆, 廖也, 猶幽隱也。鄭注:欲就文王廟卜,謂昭穆之穆。存參。偽傳本《爾雅》訓敬,不知《釋訓》穆穆是重言形況字, 穆無敬誼也。或曰即《周書·文酌》篇「伐有三穆」之穆,謂絕靈一、筮奇 二、龜從三,亦非。戚,慽也,憂也。傳訓「近」,謂借爲「促」,非是。公 托詞以止二公者,不欲以身代事爲眾知也。

公乃自以為功,為三壇同墠。為壇于南方,北面,周公立焉。植璧秉珪, 乃告太王、王季、文王。

功,工也,猶事也。封土爲壇,除地爲墠。植,置也,置于神前以禮神也。方中圓外曰璧,方下圓上曰圭。秉,執也。公執桓圭告,即下文祝詞也。言公不于廟而爲壇于酆,築三壇以依三祖之神同在一墠,而又自爲壇于南,北面而立,植璧于神前,而自執圭以告也。

史乃冊,祝曰:「惟爾元孫某,遘厲虐疾。若爾三王是有丕子之責于天,

冊,謂簡書,編竹簡爲之。百名以上書于冊,不及百名書于方。此祝詞 凡百二十有八字,故史爲冊書而祝讀之也。祝詞,蓋周公所作,非史爲之。 元,首也,猶長也,如《召誥》之偁元子也。某,武王名也,後成王讀而諱 之。遘,遇也。厲,盭也,時氣不和之疾。虐,猶惡也。丕,不也。子,慈 也。責,謫也,罰也。言若不救是,將有不慈之過,爲天所責,蓋迫欲三王 爲之請命也。丕,《史記》作「負」。《白虎通》曰:「諸侯疾曰『負子』。」《公 羊傳》「屬負茲」是也。或謂負子,有背棄子民之咎而將死,傳則訓「丕」 爲「大」,謂負天以大予之責,故疾不可救。或又謂天責其子來服事左右。 皆非。

以旦代某之身。予仁若考能,多材多藝,能事鬼神。乃元孫不若旦多材 多藝,不能事鬼神。

旦,周公名。非不知死不可代,特出于忠孝之誠不忍默視,計無所出,不得已而爲此也。仁,親也。若,猶而也,詞也。考,巧也,技也。能,態也,姿也。材,猶才德也。藝,當作執,猶材也。言事鬼神之能多于武王,必欲三王之代爲請也。

乃命于帝庭,敷佑四方,用能定爾子孫于下地。四方之民罔不祗畏。嗚呼!無墜天之降寶命,我先王亦永有依歸。

帝,天也。庭,宫中也。敷,做也。佑,當作右,助也。下地,對天帝 言也。祗,敬也。墜,當作隊,猶隕也。降,下也。寶,瑞也,聖人之大寶 曰位。依,亦歸也。言武王受命于天帝之庭,施其道以右助天下,用能定爾 子孫于下地,使四方之民無不敬畏。其任至大,其係至重。新受大命,不可 以死,故又嘆息。言不死則不失天所降之瑞命,得以保守宗廟,斯我先王亦 長有依歸也。

今我即命于元**龜**,爾之許我,我其以璧與珪歸俟爾命;爾不許我,我乃 屏璧與珪。」

即,猶就也。爾,所謂假爾泰龜也。以下皆命龜之詞。許,聽從其言也。 俟,竢也,待也。屛,屏也,藏也。歸待汝命者,言武王當瘉,我當代也。 藏璧與珪者,言武王若喪,周之大業將墜,雖欲事神不可得也。

乃卜三龜,一習吉。啟籥見書,乃并是吉。

龜本三人占之,今各就三王之前而卜也。習,疊也,緟也。啓,启也,開也。籥,闢也,關下牝也,管以開之。書,兆書也。《周禮》:「太卜掌三兆之法,其經兆之體,皆百有二十,其頌皆千有二百。」是兆各有籀詞,略如漢焦氏《易林》之筮詞也。并,猶合也。言三卜皆吉,開兆書之室而合諸籀詞,其吉皆同于是也。

公曰:「體!王其罔害。予小子新命于三王,惟永終是圖;茲攸俟,能 念予一人。」

體,兆象也。《周禮·占人》:「君占體,大夫占色,史占墨,卜人占坼。」按:凡卜,四時灼龜四足,春後左、夏前左、秋前右、冬後右,直上向背者爲木兆,直下向足者爲水兆,邪向背者爲火兆,邪向下者爲金兆,橫者爲土兆,所謂體也。色則兆氣,《洪範》所言「雨霽蒙驛克」是也。墨則兆廣,謂正罅處。坼則兆坼,謂旁罅處也。新,鱻也,猶初也。永、終,皆長也。圖,謀也。茲,此,詞也。攸,安其所也。俟,竢也。一人,天子也。周公喜,言「王疾無害,我新受三王之命,惟長享天祿是謀。」蓋繇詞有永終之言,故云然也。此時安以待之,知三王必能常念我天子而永保其命焉。此節《史

記》以爲入賀武王之詞,亦或然也。

公歸,乃納冊于金縢之匱中。王翼日乃瘳。

納,內也,入也。騰,緘也,以金束匱之外也,如今包銅然。匱,匣也, 《漢書,司馬遷傳》所謂「金鐀之書」也。翼,翌也,明也。瘳,疾瘉也。 占人凡卜既事,則繫帛以比其命。是卜而藏其命龜之書于兆書之篋,常禮固 然。凡秘書所藏,皆金帶其外也。

武王既喪,

按:此下史臣追述後事而繫之于篇也。鄭氏曰:「文王十五生武王,年九十七而終,時武王八十三矣。于文王受命爲七年,後六年伐紂,後二年有疾,疾瘳。」後二年冬十二月崩,時年九十三,成王才十歲。蓋按《文王世子》之文。是年歲星當在大火,歲陰在作噩,而太歲爲今之乙亥也。喪,亡也,猶隱避也。凡死偁喪者,爲小子之心所不忍言,謂如亡人之不可得見也。

管叔及其羣弟乃流言于國,曰:「公將不利于孺子。」

管,國名,在今河南開封府鄭州。管叔,周公兄也,名鮮。武王同母兄弟十人,皆太姒所出。長伯邑考,次武王發,次管叔鮮,次周公旦,次蔡叔度,次曹叔振鐸,次郕叔武,次霍叔處,次康叔封,次聃季載。武王克殷,立王子祿父,俾守商祀,建管叔于東,蔡叔、霍叔于殷,以監之。羊三爲羣,人三爲眾,通言之人亦偁羣也。流言,浮游不根之言,流傳于王都也。孺子,成王時年十三也。禮,君薨,百官總己以聽于冢宰三年,周公爲太宰,攝政固無可議。至終喪後,公不返政,而管叔又習聞商家覆法兄弟相及爲多,意嗣王幼沖,次當及己。今武王時,周公豫使監殷于外,疑公有異志,故爲是流言也。

周公乃告二公曰:「我之弗辟,我無以告我先王。」

辟,避也,避于位也。言流言之起,是欲離間我君臣,傾舊我國家,我 今弗避,則此心不白,無以對我先王,故以攝政諄告二公而已,居東以審察 流言之所自起也。付託之言,文不具耳。《說文》引「辟」作驛,訓治,則當 謂治此流言之事。存參。《史記》云:「我之所以弗避而攝政者,恐天下畔周, 無以告先王,于是卒相成王。」此以居東爲東征,恐非。

周公居東二年,則罪人斯得。

居東,居商奄也。罪,辠也。秦始以罪爲辠字。公居東都以避位,釋朝庭之疑。以近殷,察流言之起。久得其寔,乃知出于三叔,故曰辠人斯得也。按:公以成王終喪之年出居,至己卯歲而察知三叔之恉,乃爲詩詒王。而是時奄君薄姑因公見疑,即勸武庚舉事,故公返國後即興師東征,以平其大難也。

于後,公乃為詩以貽王,名之曰《鴟鴞》。王亦未敢誚公。

于後,既得辠人之後也。貽,當作詒,遺也,饋也。誚,嬈譊也,讓也。 詩在《豳風》。鴟鴞,桃蟲鷦鷯也。按:小鳥喻祿父,小腆我子喻三叔,我室 喻周室,鬻子喻成王。「未陰雨」章,勖成王也。「拮据」二章,公自明也。 未敢誚公者,疑信參半,意未能決也。

秋,大熟,未穫。天大雷電以風,禾盡偃,大木斯拔,邦人大恐。

熟,當作孰。大熟,大有年也。穫,刈穀也。以,與也。偃,仆也。按: 公居東,在成王三年,詒詩當在五年庚辰之夏,郊迎在秋,成王年十五,東 征又在其後也。

王與大夫盡弁以啟金縢之書,乃得周公所自以為功代武王之說。二公及 王乃問諸史與百執事。對曰:「信。噫!公命,我勿敢言。」

弁,爵弁也。天子、諸侯十二而冠,成王時年十五,于禮已冠。必爵弁者,承天變,故降服也。按:以天變將卜,東求兆書,因得周公請命之書。 此事二公及王非所素知,故問諸史、百執事,而皆對「信有其事。」又嘆息, 言公當日誡我,勿敢言,故王與二公不及知也。

王執書以泣,曰:「其勿穆卜!昔公勤勞王家,惟予沖人弗及知。今天動威,以彰周公之德,惟朕小子其新迎,我國家禮亦宜之。」

勿穆卜者,言不必卜也。沖,僮也,年十九以下爲僮。德,惠也。新, 親也。執書以泣者,感周公忠孝如是而不知也。禮亦宜者,褒德、報功、尊 重,禮之所宜然也。

王出郊,天乃雨,反風,禾則盡起。二公命邦人,凡大木所偃,盡起而 築之。歲則大熟。

國外日郊,出郊迎周公也。反風,風還反也,迎禾秒而來,如扶之起也。

築, 叔也, 拾也。其禾爲大木所偃者, 起其木, 拾其下之禾, 無所損失, 而歲仍大熟也。按: 此篇「既克商」以下, 武王代商後二年事也。「武王既喪」以下, 成王三年事也。「于後」以下, 成王五年事也。公返國後仍居攝, 武庚叛, 作《大誥》。東征當即在是年之冬或六年之春, 至成王八年而底定也。

大 誥

《書序》曰:「武王崩,三監及淮夷叛,周公相成王,將黜殷,作《大誥》。」按:「殷」下脫「命」字,當補。三監者,武庚封邶,管叔封鄘,蔡叔封衛也。《周書·作雒》、《商子·刑賞》,以蔡叔爲霍叔,非。鄭氏以三監爲管、蔡、霍,不數武庚,此私說也,亦非。武王崩後,成王嗣位之五年,周公自東返國,居攝如初,管、蔡不自安,乃以武庚叛,並導淮夷、商奄助惡,王將興師征之,而作《大誥》。黜,貶退也。誥,告也。告上曰告,發下曰誥,秦始造「詔」字以當之。

王若曰:「猷大誥爾多邦越爾御事,弗弔天降割于我家,不少延。洪惟 我幼沖人,嗣無疆大歷服。弗造哲,迪民康,矧曰其有能格知天命!

是時周公居攝,《誥》稱王者,征伐自有天子出也。猷,即猶字,繇也、道也,「猷」字當在「大誥」之下,「而多邦」之上。越,粤也,於詞也。御,猶治理也。言《大誥》天道于汝眾國及汝治事之臣也。弔,猶恤也,古讀爲俶,善也。猶《詩》言「不弔昊天」也。割,害也。少,猶微也。延,長也。洪惟者,助語之詞,猶《多方》云「洪惟圖天之命」也。沖人,王自謂也。嗣,繼。疆,竟也。歷,數也。服,及也,九服也。造,遭也。迪,導也。矧,況詞也。有,又也,再也。格,度也,猶計量也。言天降凶害于我家,武王之命不少延長之,而使幼沖人承繼無疆之大業,天下弗逢明智之君導民于安,至有此變亂之事,況又能量度而知天命之何如乎?

已!予惟小子,若涉淵水,予惟往求朕攸濟。敷賁敷前人受命,茲不忘 大功。予不敢閉于天降威用,

已,噫也,嘆詞也。淵,回水也。涉、攸,皆行水也。濟,渡。敷,俌也,《詩》所謂「疏附」也。賁,奔也,《詩》所謂「奔走」也。閉,猶距也。 威用,猶作威也。言予嗣服以來,夙夜祗懼,若臨深潭,求相與共濟者,疏 附奔走之臣,以助先人所受之天命,不敢忘先人之大業,今武庚不靖,殆天 欲黜之,予又何敢拒卻天之威用乎?

寧王遺我大寶龜,紹天明。即命曰:「有大艱于西土,西土人亦不靖, 粵茲蠢。

受命曰寧。王,謂文、武也。大寶龜,國之守龜也。紹,猶導也,傳述 之意。即,就也,造也,造而請命也。蠢,如蟲之動也。言先王畱貽我元龜, 足以昭天之明,意曩嘗造而請命,其兆早明示之曰:將有大難于京師,京師 之民心亦擾動不安。及此而果有東方蠢動之事,是龜之神靈,大可見也。

殷小腆誕敢紀其敘。天降威,知我國有疵,民不康,曰:予復!反。鄙 我周邦。

腆, 敷也, 主也。誕, 欺詐也。紀, 猶理也。敘, 緒也。疵, 病也。予, 殷自予也。復, 夏也, 行故道也。反, 返也, 還也。鄙, 猶邊也。言今殷爲小 主而敢欺妄, 欲理其已絕之緒, 是故天之降威, 將黜其命。然亦知我國有流 言之病, 民心不安, 而言殷當復反其王業, 以鄙我周邦也。周之先, 蓋世爲 殷家西陲荒裔之君,則武庚必有鄙周之言可知。

「今翼」之「翼」,冀也,覬幸也。日,往日也。獻,賢也。夫,丈夫也。 翼,敬也。于,往也。敉,撫。寧,安。武,繼。圖,謀也。大事,戎事也。 休,喜也,美也。并吉,三兆皆吉也。言今既蠢動而覬幸矣,我周則向日有 爲民儀表者十臣,足以戡亂定功。今予敬以之往撫,安國難,繼前勳而謀大 功。我何懼哉!我有戎事,已預知休美,蓋卜三龜皆吉也。

肆予告我友邦君越尹氏、庶士、御事,曰:「予得吉卜,予惟以爾庶邦 于代殷逋播臣。」

肆,故詞也。于,往也。逋,亡也。播,判也、散也。以武庚爲殷逋播 臣者,殷雖于周爲客,既受周之封,不得無臣禮,今乃叛逆,則是叛亡之臣 矣。

爾庶邦君越庶士、御事罔不反曰:「艱大,民不靜,亦惟在王宮邦君室。 越予小子考,翼不可征,王害不違卜?」 罔,釋也。靜,竫也、安也。越,粵也,于詞也。考,父。翼,敬也。害, 曷也,詞也。言汝國君及羣臣無不反我之意,曰:其勢難,其事大,民復不 安,況武庚之叛,亦惟三監是從,三監在王之宮,在邦君之室,于予爲父行, 所常敬禮者,不可征也,則何不違卜乎?

肆予沖人永思艱,曰:嗚呼!允蠢鰥寡,哀哉!予造天役,遺大投艱于 朕身,越予沖人,不卬自恤。義爾邦君,越爾多士、尹氏、御事綏予曰: 「無毖于恤,不可不成乃寧考圖功!」

永,長也。允, 靴也,進也。蠢,動也。哉,語詞也。造,遭也。役, 使也。遺,饋也。投,擿也,猶與也。不,豈不也。卬,我詞也。恤,憂也。 義,宜也,所安也。綏,當爲妥,猶左助也。毖,宓也,安也。寧考,武王 也。言我非不長思其勢之難而嘆息,進動師旅擾及鰥寡,誠爲可哀。然我既 遭天之使令,與以重大艱難之任于我沖人,豈不憂懼乎!爾邦君及羣臣宜助 予,曰:「無偷安,而但憂懼,不可不黽勉自奮以成汝武王圖謀之大功,相與 勠力致討也。」蓋責其不然。

已!予惟小子,不敢替上帝命。天休于寧王,興我小邦周,寧王惟卜用,克綏受茲命。今天其相民,矧亦惟卜用。嗚呼!天明畏,弼我丕丕基!

已,嘆詞。替,廢也。休,美也。綏,安也。相,翳也,助也。弼,猶 俌也。丕,大也。基,猶始業也。言卜征而吉,是天所命,予不敢廢棄也。 昔天降休美于武王,以百里之小邦而有天下,惟卜之用以能安受此命。今天 相助下民,予亦得吉卜,則天意可知。又嘆息,言天之明命可畏,卜不可違, 爾邦君、多士,尚輔予以大此大業也。

王曰:「爾惟舊人,爾丕克遠省,爾知寧王若勤哉!天閟毖我成功所, 予不敢不極卒寧王圖事。肆予大化誘我友邦君,天棐忱辭,其考我民, 予曷其不與前寧人圖功攸終?天亦惟用勤毖我民,若有疾,予曷敢不于 前寧人攸受休畢!」

此邦君御事中有武王之舊臣,又進而申誥之也。舊,久也,猶老也。丕,不也。寧王,武王也。閟,毖也,愼也。毖者,箋之誤字,箋,古文勞也。所,處也。極,亟也。敏,疾也。卒,殚也,終也。肆,故今也。化,猶教也。誘,羑也,猶導也。棐,輔也,猶俌也。忱,誠信也。辭,嗣也,猶新君也。考,

王曰:「若昔朕其逝,朕言艱日思。若考作室,既底法,厥子乃弗肯堂, 矧肯構?厥父菑,厥子乃弗肯播,矧肯穫?厥考翼其肯曰:予有後弗棄 基?肆予曷敢不越卬敉寧王大命?

王曰者,更端之言也。若,順也。昔,夕也,猶前日也。逝,往也。肯,當作肎,可詞也;或曰克也,能也。矧,況詞也。構,蓋也。菑,才耕田也,反艸曰菑,故田一歲爲菑。播,穜也。考,老也,亦父也。古存歿通稱考妣,後世則生曰父母,死曰考妣。翼,敬也。越,粤也,于詞也。卬,我也。敉,安撫也。言順承寧王前日之功,則我其當往征。往征之事我亦言難而日思之,然爲子者,棄父之業,其何以對先人?譬若作室,父既底定其法,其子弗克爲堂之基,況能蓋堂之屋乎?譬若治田,其父既耕其荒,其子弗克播穀之穜,況能歛禾之嗇乎?如此,則父之敬事以啓我後人者,其能曰「予有後,勿棄其始基」乎?故今予不敢不于我之身,撫武王所受之大命而安定之也。

若兄考,乃有友伐厥子,民養其勸弗救?」

此因邦君御事有考翼不可征之言而譬喻之也。管叔于周公爲兄,于成王爲 諸父,兄考譬管叔也。有,以也,用也。同志曰友,與管叔同志,譬武庚也。 管叔啓商惎間王室,是以兄考而伐其子弟也。伐,擊也。養,古文作羧,使也, 讀如事君就養有方之養,謂臣僕也。言兄考當覆翼其子,乃反與不逞之徒相親 友,以自攻殺其子,則于天理人情悖逆已甚。凡爲子之臣僕者,豈尚可以父兄 不可拒之說相爲勸止,遂坐視而不救乎!蓋以家之常情,喻國之變故也。

王曰:「嗚呼!肆哉爾庶邦君越爾御事。爽邦由哲,亦惟十人迪知上帝 命越天棐忱,爾時罔敢易法,矧今天降戾于周邦?惟大艱人誕鄰胥伐于 厥室,爾亦不知天命不易。」 此勖勉邦君御事同心勠力以成大功也。肆,力也,猶勉也。爽,明也。 十人,即寧人,武王亂臣也。迪,進也。越,粵也,于詞也。爾時,彼時也。 易,傷也,變更之意。法,《漢書·翟方進傳》作「定」,蓋「金」之誤字, 金,古文法也。戾,盭也,拂逆也。[一誕,大也。鄰,近。胥,相詞也。言 爾邦君御事尚其勉哉,昔治明我新造邦者,皆由聖哲之士,亦惟亂臣十人, 進而知天命,輔信我周,故彼時無敢變易武王之法,共成大功。況今天降拂 逆,惟茲發大難之人,乃親近如三監,自相攻擊于其室家,不容不討。爾怠 于征伐,爾亦不知天右我有周,其命不變也。

校勘記

[一] 疾,當是「戾」字之誤,此段原文無「疾」字。戾,盭也,拂逆也。

予永念曰:天惟喪殷,若穡夫,予曷敢不終朕畝?

穡夫,田夫也。言我長念曰:天之喪殷,如田夫之務去草焉。絕其本根, 勿使復植,我何敢不順天意以終竟我田畝之事乎。

天亦惟休于前寧人,予曷其極卜?敢弗于從率寧人有指疆土?矧今卜並吉?肆朕誕以爾東征。天命不僭,卜陳惟若茲。」

休,息止也。極,亟也。于,往也。率,循也。指,旨也,美也。僭, 差也。陳,敶也,列也。言前寧人勤勞開國,天亦宜休息之,以與我同安樂。 故變亂之生,我何嘗不卜其當征不當征乎?卜既宜往,敢弗從之而往率循寧 人之前功以美茲疆土乎!況三龜並吉,更無可疑,故今我大以爾東征也。天 命焯然可信,罔有僭差,卜兆之所陳列者,彰彰如此,則往必有功,爾無疑 慮。此篇多以卜言,蓋《周禮》太卜之職,凡國大師則貞龜。古者重卜,是 以反覆明之也。

微子之命

《書序》曰:「成王既黜殷命,殺武庚,命微子啓代殷後,[-]作《微子之命》。」按:武王先徙微子于宋,爲諸侯。今武庚既誅,因命之承湯祀,封爲宋公。《發墨守》云:「六年制禮作樂,封殷之後,稱公于宋」是也。是篇亡于秦項之火。

校勘記

[-] 原文「命微子啓伐殷後」,當是「命微子啓代殷後」之誤,「代」誤作「伐」,排版錯誤。

王若曰:「猷!殷王元子。惟稽古,崇德象賢。統承先王,修其禮物, 作賓于王家,與國咸休,永世無窮。

「王若曰:『猷』」、《大誥》到文也。「微子啓,帝乙之元子也」、《左》哀九《傳》陽虎言也。「謂之崇德」、《左》文二《傳》文也。「繼世以立諸侯象賢也」、《士冠禮》文也。「利用賓于文」、《易·觀卦》爻詞也。「宋于周爲客」、《左》僖二十四《傳》文也。

嗚呼!乃祖成湯克齊聖廣淵,皇天眷佑,誕受厥命。撫民以寬,除其邪虐,功加于時,德垂後裔。

「乃祖、乃父」、《盤庚》文也。「齊聖廣淵」、《左》文十八《傳》文也。「皇天眷佑」及「誕受厥命」、皆《逸周書》文也。「誕受厥命」、《康誥》文也。「湯以寬治民而除其虐」、《禮·祭法》之文也。

爾惟踐修厥猷,舊有令聞,恪慎克孝,肅恭神人。予嘉乃德,曰篤不忘。上帝時歆,下民祗協,庸建爾于上公,尹茲東夏。

「踐修舊好」、《左》文元《傳》文也。「予嘉乃勳,應乃懿德,謂督不忘」、《左》僖十二《傳》文也。「上帝居歆」、《詩·生民》篇文也。「建爾于公」、《漢書·董賢傳》文也。「封爲上公」、《左》昭二十九《傳》蔡墨謂五官之言也。

欽哉,往敷乃訓,慎乃服命,率由典常,以蕃王室。弘乃烈祖,律乃有 民,永綏厥位,毗予一人。[□]世世享德,萬邦作式,俾我有周無斁。嗚 呼!往哉。惟休,無替朕命。」

「往踐乃職,無逆朕命」、《左》僖十二《傳》文也。「明乃服命」、《康誥》文也。「以蕃王室」、《左》襄二十九《傳》文也。「永綏厥位」、《文侯之命》文也。「萬邦作乂」、《皋謨》文也。「無替朕命」、《漢書・王莽傳》文也。又「無廢朕命」、《左》襄十四《傳》王賜齊侯命文也。是篇純以四字爲句,西漢尚無此格調,何況三代。

校勘記

[一] 「毗予一人」,原文作「毗于一人」,據他本改。

歸禾

《書序》曰:「唐叔得禾,異畝同穎,獻諸天子。王命唐叔歸周公于東,

作《歸禾》。」按:成王母弟名虞,封于唐,其得禾瑞,時猶未封。《敘》稱 唐叔,據後言也。穎,禾穗也。《大傳》云:「三苗貫桑葉而生,同爲一穗, 大幾盈車,長及充箱。」歸,饋也。成王以禾瑞歸美于周公,故命唐叔以禾 饋公于東征之所。此篇亡于秦項之火。

嘉 禾

《書序》曰:「周公既得命禾,旅天子之命。作《嘉禾》。」按:旅,入 也。敷陳天子之命,推美成王。此篇亡于秦項之火。《漢書·王莽傳》引《嘉 禾》有曰:「周公奉鬯,立于阼階,延登贊曰:『假王蒞政,勤和天下』。」然 「假王」字必是莽所竄改。

尚書古注便讀 卷之四中

元和朱駿聲豐芑甫集訂

康誥

成王既伐管叔、蔡叔,以殷餘民邦康叔,作《康誥》、《酒誥》、《梓材》。 邦,封也,爵諸侯之土也。康,爲號諡,初封于衛,至子孫而并邶、鄘也。 馬融、王肅皆以康爲畿內國名。按:武王分封時,康叔、聃季皆幼,未得封。 成王嗣王,有流言、東征之事,八年中未遑封國也。當從鄭說爲諡,而史臣 追偁之。

惟三月哉生魄,周公初基作新大邑于東國洛,四方民大和會。侯、甸、男、邦、采、衛,百工播民和,見士于周。周公咸勤,乃洪大誥治。

三月者,成王八年之三月也。哉,才也,始也。魄,霸也。月始生霸然也,承大月二日,承小月三日。二日之月去日未遠,或有時不見,三日則必見,故馬融謂:「月三日始生兆朏,名曰霸。」也。初,猶始也。基,謀也,議也。岐、鎬偏在西垂,四方遠近不均,故周公東行于洛以作新大邑。《周禮·大司徒》:所求地中,「天地之所合,四時之所交,風雨之所會,陰陽之所和」,乃建王國也。洛,在今河南河南府洛陽縣,《左傳》所云「定鼎于郟鄏」也。和,龢,會合也。侯、甸、男、采、衛,九服之五也。不言蠻夷鎮藩四服者,道遠不與役事也。工,官也,五服諸侯之百官也。播,譒也。敷,陳也。見,猶效也。士,事也。勤,勞也。洪,鴻也,代也。是時周公東征既定,議作洛邑以爲東都,先合四方以觀天下之心。于是五服諸侯之百官偕來,且陳告民志之和,願效職事于周,周公皆慰勞之,乃代成王誥康叔,以治道而封之

衛,且以遙馭夫洛也。成王四年觀洛,會諸侯之百官,議建新邑,至五年乃 經營之,而作《召誥》也。

王若曰:「孟侯,朕其弟,小子封。

《左傳》定公四年衛祝佗曰:周公相王室以尹天下,分康叔以殷民七族, 命以《康誥》,而封于殷墟。僖公三十一年衛甯武子曰:「不可以間成王、周 公之命祀。」孔子《書敘》曰:「成王封康叔」,夫甯武、祝佗、孔子之言, 安得有誤?後儒改爲武王所封,誕妄甚矣!王,成王也。誥雖周公所命,而 每節必稱王曰者,明居攝不自王也。下文則皆周公之言,對眾諸侯而封康叔 也。孟,長也。孟侯,諸侯之長也。康叔于王爲叔父,于公爲母弟,其德未 知與曹叔、郕叔何如?意年少則易訓迪,分親則服眾心。呼孟侯者,尊之也。 稱小子者,親之也。封,康叔名。

惟乃丕顯考文王,克明德慎罰;

乃,汝詞也。至,大也。顯,**濕也**,明也。克,能也。德,悳也。罰,上 報下之辠也。辠之小者曰罰,小者尚謹,大者可知。《左傳》成公二年楚申公 巫臣曰:「明德愼罰,文王所以造周也。明德,務崇之之謂也;愼罰,務去之 之謂也。」

不敢侮鰥寡,庸庸,祗祗,威威,顯民,用肇造我區夏,越我一、二邦 以修我西土。惟時怙冒,聞于上帝,帝休,天乃大命文王。殪戎殷,誕 受厥命越厥邦厥民,惟時敘,乃寡兄勖。肆汝小子封在茲東土。

侮,敭也。鰥,悹也,憂也。寡,少也,猶偏也。鰥夫、寡婦,天下之窮民也。庸,用也。祗,敬也。威,畏也。顯,濕也,明著也。肇,始也。區,猶眾域也。夏,中國也。越,粵也,于詞也。時,是也。怙,恃,賴也。冒,明也,低視也。休,嘉也,美也。殪,猶滅也。戎,崇也,大也。敘,猶順也。寡兄,少有之兄,謂武王也。勖,勉也。肆,故今也。言文王視民如傷,不敢輕慢鰥寡,故用所當用,敬所當敬,畏所當畏,其德顯著于民,用始造我區域于中夏。惟我一、二友邦,亦皆修治我西岐之民,惟是恃賴于時,上帝如見聞之而嘉美之,乃大命文王,殪彼大商以受天下,有若諄諄然命之也。故凡爲殷之諸侯,殷之小民,無不順敘來附寡兄,武王亦能懋勉以繼其志,續其緒,故今汝得以分封于東,在此位也。此申言文王之明德慎罰也。

王曰:「嗚呼!封,汝念哉!今民將在祗遹乃文考,紹聞衣德言。往敷求于殷先哲王用保乂民,汝丕遠惟商考成人,宅心知訓。別求聞由古先哲王用康保民。宏于天,若德,裕乃身,不廢在王命!」

將,當也。遹,述也,循也。紹,繼也。衣,猶佩服也。往,謂文王之前也。敷,博也,大通也。殷先哲王,湯、太甲、太戊、祖乙、盤庚、小乙、武丁也。乂,變也、治也。惟,凡思也。耉,老也。宅,度也,揆也。由,以也,用也。古先哲王,夏也。宏,大也。若,順也。裕,猶饒也。在,存察也。言今治殷民當敬循文考,尊其所聞,服其德言,又上而廣求于殷之賢王以保治其民,更大遠思商賢臣之言,度之于心,以焯知其道。且進而上之,別求前聞,用夏王之道以安保其民,斯能大覆于天,順德而寬裕汝身,乃爲不棄今日之王命而常存察也。此勉康叔以明德也。

王曰:「嗚呼!小子封,恫瘝乃身,敬哉!天畏棐忱;民情大可見,小人難保。往盡乃心,無康好逸豫,乃其乂民。我聞曰:『怨不在大,亦不在小;惠不惠,懋不懋。』

個,痛也。壞當作鰥,讀爲悹,猶病也。畏,威也。棐,輔也。忱,誠也。逸,佚;豫,娛,皆樂也。惠,仁也。懋,勉也。言刑罰之在人身,猶痛病之在汝身,痛病汝所苦,可不敬用刑罰哉!天之明威可畏,而惟誠是輔,民之性情可見,而惟志難安。汝之往國,當竭盡汝心,毋媮安好樂,乃其治民之道。我聞古人有言「凡怨之生,不在事之大小,在于傷心,傷心則雖小亦能爲禍也。惟當于不愛之人行其仁愛,于不勉之人用其勸勉。」蓋自殷而言,則刑亂國,似當用重典;而自周而言,則刑新國,先當用輕典。時康叔爲司寇,恐其任法太猛,故將勖以愼罰而先明其事理也。

已!汝惟小子,乃服惟宏王應保殷民,亦惟助王宅天命,作新民。」

已,更端之詞也。服,事也。宏,大也。應,膺也,猶受也。殷民,七 族之民也。作,起也。言汝雖小子,汝之事則在宏大王業,受王命以保此甫 定之殷民。所以然者,亦惟助王圖度天命,撫綏民人,興起舊染之俗,與之 更始而已。或曰「宏王」當作「宏大」,《左傳》引《書》而曰「康叔所以服 宏大也。」可證。存參。

王曰:「嗚呼!封,敬明乃罰。人有小罪,非眚,乃惟終自作不典;式

爾,有厥罪小,乃不可不殺。乃有大罪,非終,乃惟眚災;適爾,既道極厥辜,時乃不可殺。」

典,法。式,用也。爾,如此也。適,啻也,暫詞也。道,導也。言也 恃惡不悛,而皆有心故犯,《堯典》所謂「怙終賊刑」也。偶然誤犯,而又盡 輸其情,《堯典》所謂「眚災肆赦」也。

王曰:「嗚呼!封,有敘時,乃大明服,惟民其勑懋和。若有疾,惟民 其畢棄咎。若保赤子,惟民其康乂。

敘,猶順也。時,是也。服,艮也,治也。勑,當作敕,誠也。懋,勉 也。和,相應也。有,已也,猶治也。疾,疒也,痾也。畢,數也,盡也。 棄,捐也。咎,猶惡也。言能順是殺終赦眚之道以行罰,乃大明治,而民皆 誠勉以應上之教終者,去惡如棄疾,則民皆盡捐其惡矣。眚者,如赤子無知, 匍匐入井,必保而救之,則民皆安治而無愁怨矣。

非汝封刑人殺人,無或刑人殺人。非汝封又曰劓刵人,無或劓刵人。」

刑,到也,殺戮也。無,毋也。或,惑也,亂也。一曰:或,有也,猶 專也,皆可通。劓,割鼻也。則,當作刖,跀也,斷足也,五刑無斷耳之法。 言天討有罪,其有大罪者,非汝封可言刑殺人也,尚毋妄擅刑殺也;其有小 罪者,亦非汝封又可言劓刖人也,尚毋妄行劓刖也。

王曰:「外事,汝陳時臬司師,茲殷罰有倫。」

外事,外朝聽訟之事也。康叔爲司寇,斷獄于外朝也。陳,敶也,列也。時,是也。臬者,射之準的,猶言法也。司,有司也。師,蓬也,猶循也。茲,此,詞也。殷罰,商之刑法也。倫,侖也,理也。言汝聽外朝之事,當陳列是法,使有司循此商刑之有倫理者。

又曰:「要囚,服念五、六日,至于旬時,丕蔽要囚。」

又曰者,周公重言之也。要,猶中也,會也。囚,係辠人也。服念,服 膺思念也。旬,十日也。時,三月也。蔽,擊也,擊斷也。言囚係罪人,其 罪法之要辭既具,當服念再三。小疑者至于十日,大疑者至于三月,然後情 眞罪當,乃可以大斷此要辭之囚也。《周禮》:小司寇「至于旬乃蔽之」,鄉士 「異其死刑之罪而要之,旬而職聽于朝」,遂士「二旬而職聽于朝」,縣士「三 旬而職聽于朝」,皆司寇聽之。方士「三月而上獄訟于國,司寇聽其成于朝」, 亦此意也。

王曰:「汝陳時臬,事罰。蔽殷彝,用其義刑義殺,勿庸以次汝封。乃 汝盡遜曰時敘,惟曰未有遜事。

彝,猶常法也。義,皆讀誼,人所宜也。庸,用也。次,讀爲即,猶就 也。如堲之從即,亦作垐,从次也。或曰:次,恣也,縱也,亦通。遜,悉 也,順也。言汝陳列是法以從事于罰,斷以殷之常制。凡宜刑宜殺者,勿用 以就汝之意見,雖汝以爲盡順于理,亦哀矜勿喜必自疑愼,曰「或有未順于 事者乎。」

已!汝惟小子,未其有若汝封之心。朕心,朕德,惟乃知。

言汝雖小弱弟,然未有似汝之心。我心者,故我之德,惟汝所知。謂所訓言,皆可法也。《左》定六年《傳》:「太姒之子,惟周公、康叔爲相睦也。」

凡民自得罪,寇攘姦宄,殺越人于貨,暋不畏死,罔弗憝。」

自得罪者,不由于人之誘陷,所謂式爾也。寇,暴也。攘,纏也,猶奪也。 在內曰姦,在外曰宄。越,蹙也,猶斃也。于,捕也,取也。貨,財也。暋, 冒也。罔,無,詞也。弗者,不之深也。憝,怨也。言凡民自罹于罪,如寇攘 姦宄殺斃人而取其財者,冒犯國法,不知畏死,此其罪人人得而誅之也。

王曰:「封,元惡大憝,矧惟不孝不友。子弗祗服厥父事,大傷厥考心; 于父不能字厥子,乃疾厥子。于弟弗念天顯,乃弗克恭厥兄;兄亦不念 鞠子哀,大不友于弟。惟弔,茲不于我政人得罪,天惟與我民彝大泯亂, 曰:乃其速由文王作罰,刑茲無赦。

元,首也。善父母爲孝,善兄弟爲友。祗,敬也。服,艮也,治也。字,慈也,愛也。疾,嫉也,猶毒害也。顯,㬎也,明也。鞠,育也,稚也。弔,逸也,至也。與,与也,予也。泯,怋也,怓也。亂,黻也。由,用也。刑,劉也。言兄又有惡之首大可恨者,如不孝不友之人乎?子傷父心,父害子命,弟弗念天倫之著明,兄弗念稚子之可閔,有至于此者,雖非干犯有司之政令而得罪于國,然于天所畀民之五常,大爲紊亂,滅天理,喪天良者也,汝則速用文王所作不孝不弟之罰,殺此勿赦。按:《左》僖三十三年《傳》引《康誥》云:「父不慈,子不祗,兄不友,弟不恭,不相及也。」昭二十年《傳》

引《康誥》云:「父子兄弟,罪不相及。」疑此節下尚有闕文,申言「罪不相及也」之意,今不可考矣。

不率大戛,矧惟外庶子,訓人惟厥正人,越小臣諸節。乃別播敷,造民 大譽,弗念弗庸,瘝厥君,時乃引惡,惟朕憝。已!汝乃其速由茲義率 殺。

此言用法于有位之人也。率,述也,循也。憂,信也,正也。庶子,《周禮》之諸子也。外者,對小臣近君者言也。掌教國子,故曰「訓人」。正,猶長也。正人,官之長,如《周禮》宮正、酒正及黨正之類也。節,卪也,瑞信也。小臣諸節,如《周禮》掌節之上士、中士也。播,譒也,敶也。敷, 做也。造,作也。譽,名美也。庸,用也。瘝,當作鰥,怎也,憂也。時,是也。引,猶長也。已,噫詞也。義,誼也,文王作罰之誼也。率,律也,猶大凡也。言況又不循大法,如在位之臣乎,別施其私恩小惠,釣猶弋譽,而弗念其職,弗用其常,以病其君。是乃長惡不悛之人,惟我所怨惡。若然,汝乃其速用文王所行之誼大率殺之。

亦惟君惟長,不能厥家人越厥小臣、外正;惟威惟虐,大放王命;乃非 德用乂。

君長,謂他國諸侯也。康叔爲牧伯,得征諸侯之有罪者,故亦及之也。能,猶得也;不相能,如不孝不弟之類是也。小臣,即小臣諸節也。外,即外庶子也。正,即正人也。《左》文十六《傳》:「不能其大夫,至于君祖母以及國人」,宋昭公自言其無道,即此之謂也。放,猶棄也。德,惠也,猶恩惠也。乂,變也,治也。言諸侯有作不善于其家,作不善于其臣,惟暴虐自恣,大棄王命者,乃非恩德可以治也。汝爲孟侯,當征討也。

汝亦罔不克敬典,乃由裕民,惟文王之敬忌;乃裕民曰:『我惟有及。』 則予一人以懌。」

此言康叔尤宜自治也。典,常法也。裕,猶寬也。忌,戒也,警也。懌,當作釋,猶悅樂也。言正己乃所以正人,汝亦毋不能敬常法,能敬常法,乃所由以寬裕其民。用法貴果斷,而化導貴優游也。何以敬典,則凡事思文王之所敬而敬之,猶文王之祗祗也;思文王之所戒而戒之,猶文王之威威也,乃所以裕民也。汝言我思有及于文王,則予一人以此怡悅于汝矣。以見不如

是,則逢王之怒,汝亦不能以殷民世享也。此節言慎罰之終也。

王曰:「封,爽惟民迪吉康,我時其惟殷先哲王德,用康乂民作求。矧 今民罔迪,不適;不迪,則罔政在厥邦。」

此申言明德爲本也。言殷民化紂之惡,固當嚴以治之。然罰蔽以殷先王之轉,即宜迪導以殷先王之德也。爽,明也。惟,思也。迪,道。吉,善也。康,康也,安也。我,我周也。求,究也,終也。《詩》曰「世德作求」。適,之也,猶往也。言慎罰當以明德爲本,明思治民之道而導之,以安善我周。是其思殷先智王之德以安治民,殷先王導之于前,我周導之于後,不爲終竟殷先王之德乎?況民雖染于汙俗,亦無導之而不就于善者。特君上不以導之,則正己以正人之政,無所施于其邦,雖齊之以刑,亦免而無恥耳。

王曰:「封,予惟不可不監,告汝德之說于罰之行。今惟民不靜,未戾 厥心,迪屢未同,爽惟天其罰殛我,我其不怨,惟厥罪。無在大,亦無 在多,矧曰其尚顯聞于天。」

惟,思也。監,視也。靜,竫也,亭安也。戾,娥也,猶定也。屢,當 作婁,猶數也。殛,誅也。尚,上也。顯,㬎也。言我思不可不觀法文王及殷 先哲王,故告汝明德之說于行罰之中。今思殷民之所以不安,未定其心,雖 屢導之而未能和同者,我明思之,殆天之誅罰我耳,我何敢怨天與民,但自 思其罪。凡致天之罰者,不在大,亦不在多也。況豈無大與多者,上而明聞 于天乎?此周公代成王自責之言,正己以正康叔也。

王曰:「嗚呼!封,敬哉!無作怨,勿用非謀非彝蔽時忱。丕則敏德, 用康乃心,顧乃德,遠乃猷,裕乃以民寧,不汝瑕殄。

此亦誠康叔以德行罰也。作怨,猶作威也。則,法也。敏,疾也。「敏德」,《周禮》師氏「二曰:敏德以爲行本」,謂行仁如春夏,行義如秋冬也。顧,還視也。猷,當作猶,儀也,猶圖也。以,與也。瑕,瘕也,病也。殄,絕也。言汝其敬用此罰哉!毋作怨于民,勿用非道之謀非常之法擊斷,以誠心大以仁義之德爲則,以安定汝之心。顧省汝之德,遠大汝之圖,惟寬裕以存心,乃與民相安,民不汝疵瑕,不汝棄絕也。

王曰:「嗚呼!肆汝小子封。惟命不干常,汝念哉!無我殄享,明乃服

命,高乃聽,用康乂民。」

肆,故今也。命,天命也。享,獻也,猶祭祀也。諸侯受封,祭其封內之社稷山川,所謂命祀也。殄享,國亡則絕也。明,朚也,字亦作蘉,勉也。服命,侯伯七命,其衣服禮儀,皆以七爲節也。高乃聽者,凡偏聽生姦,當獨觀于昭曠之道也。言故今汝當思天命之靡常,善則得之,不善則失之,可不念哉!毋自我而絕其命祀也。惟在勉汝今日之服命,以高曠之道聽訟,用以安治此殷民而已。

王若曰:「往哉!封,勿替敬,典聽朕告,汝乃以殷民世享。」

往,就封而之國也。替,廢也。典聽,猶常受也。告,誥也,上告下也。 殷民,殷墟之民,即上文應保殷民也。享,享國也。言往即汝邦,當持敬而 勿廢棄,常聽我告汝之言,則汝乃以是殷民世世享國也。

酒 誥

《書序》見前。《史記》云:「周公懼康叔齒少,告以紂之所以亡,以淫于酒。」鄭氏《詩譜》云:「朝歌民化紂嗜酒。」按:劉向云:「《酒誥》有脫簡一」,豈《大傳》所引「王曰:封,唯曰:若圭璧」,即在脫簡中歟。《韓非·說林》引《酒誥》之文偁《康誥》,疑古本有合《酒誥》于《康誥》爲一者。按:揚子《法言·問神》篇云:「昔之說《書》者,序以百,而《酒誥》之篇俄空焉,今亡夫。」[一]

校勘記

[一] 「爲一者」至本節末,原文錯亂,今據《法言·問神》篇改正。

王若曰:「明大命于妹邦。

王,成王也。妹,沫也,水名。沫邦,紂都,當在今河南衛輝府淇縣東北。其初武丁遷居之,即《鄘》詩所云「沬鄉」,在朝歌西南也。《左》定四《傳》:「康叔取于有閻之土」,閻,即鄘之聲近借字也。馬融云:「沬邦,即牧養之地。」按:牧養當作牧野,謂在今汲縣也。紂沈湎于酒,有糟邱酒池之事,有新聲靡樂之歌,民皆化之,故明大命以戒之。

乃穆考文王,肇國在西土。厥誥毖庶邦庶士,越小正、御事,朝夕曰: 『祀茲酒』。惟天降命,肇我民,惟元祀。

此言周之所以興也。周家世次,文王第當穆,故偁穆考。肇,暈也,猶

開也。西土,豐邑也。毖,邲也,宰之也。庶邦者,文王爲雍州牧伯,南兼梁荊,故得告眾國也。庶士,眾朝臣也。小,少也。少正,正人之副貳也。如鄭有少正公孫僑,魯有少正卯是也。御事,凡治事之人也。命,猶名也。元,猶大也。言文王遷豐以來,其告戒以宰治眾國君、眾朝臣及小臣治事之人,朝夕敕之曰:「祭祀則用此酒」,思天所以降酒之名,開導我民者,惟大祭祀以敬神明,人得因祭飲酒而已。

天降威,我民用大亂喪德,亦罔非酒惟行;越小大邦用喪,亦罔非酒惟 辜。

此言殷之所以亡也。昔爲殷民,今爲周民,故偁我民。德,悳也。言酒 固天所降命,酌酒則天所降威,殷民之所以大亂亡其德性者,亦無非以酒肆 其行也。西土而外,小大國至于喪亡者,亦無非以酒取罪也。

文王誥教小子、有正、有事,無彝酒,越庶國,飲惟祀,德將無醉。

此言文王之教民也。正,猶長也。彝,猶常也。將,將也,扶也。醉, 酒潰也。言文王誥教庶民,自小子之血氣未定者,始以其有長上之當服勞, 有職業之當勤事,不可常以酒爲樂也。推而至于眾國之民,亦惟因祭燕私, 而必以德扶持之,毋許溢其度量以至于醉也。《韓非子·說林》篇紹續眜曰: 「常酒者,天子失天下,匹夫失其身。」

惟曰我民迪小子惟土物愛,厥心臧。聰聽祖考之彝訓,越小大德。小子惟一。

迪,導也。土物,土所吐之物,五穀是也。愛,悉也,猶惜也。臧,善也。文王言我民各當訓導其小子,惟黍稷之是惜,無耗于酒,其心乃善。能 明聽祖父之常訓,則大德固不踰閑,小德亦無出入,一謹酒而德皆純一也。

妹土嗣爾股肱,純其藝黍稷,奔走事厥考厥長。肇牽車牛,遠服賈。用 孝養厥父母,厥父母慶,自洗腆,致用酒。

此敕康叔專教妹土之民也。嗣,猶習也。純,專也,嫥也。藝,當作埶, 種也。黍,糜之黏者也。稷,廢也,其黏者曰秫,皆可爲酒。五穀獨言黍稷者, 《周禮·職方》「冀州宜黍稷也。」肇,劭也,敏也。賈,市買也,市于遠而 售于近也。服,及也,猶事也。慶,行賀人也。洗,洒也,滌器也。腆,設 膳多也。致,送詣也,猶媵也。言妹土之民當去惡遷善,習汝手足之勤,專 以稼穡爲事。其奔走以事其父兄者,勤牽車牛遠致物而坐受之,以孝養其父母。其父母有慶賀之喜,則子自滌爵設膳以送,此酒是亦可用也。上言惟祀用酒,此言養父母,下言養老,皆可用酒者。舊染一時難革,寬其教,以善導之,使優游漸漬以遷于善也。

庶事有正越庶伯君子,其爾典聽朕教!爾大克羞養惟君,爾乃飲食醉 飽。丕惟曰爾克永觀省,作稽中德,爾尚克羞饋祀。爾乃自介用逸,茲 乃允王正事之臣。茲亦惟天若元德,永不忘在王家。」

此教妹土之臣也。庶士有正,眾官及長也。庶伯君子,眾長之長也。典,猶常也。羞,進也。耉,謂老成有德者,若三老五更也。羞耉,養老也。君,羣也,猶眾也。老有國老、庶老,故曰惟羣。作,爲也。稽,計也,考也。中,猶和也。尚,庶幾也。羞,進也。饋,餽也,饋祀,臣助祭于君也。介,秀也,大也。逸,佚也,猶樂也。《詩》曰「舉酬逸逸」,則逸謂旅酬時也。允,信也。王,猶言周家也。正事,政事。若,順也。元,猶大也。忘,忽也。言爾臣皆當常聽我之教,致謹于酒,爾能養老以羣,則可飲食醉飽。古者天子諸侯皆有養老之禮,《周禮・酒正》曰「凡饗耆老,孤子皆共其德,無酌數」是也。又言爾能長觀察于德,攷于射而中,庶幾進而助祭。古者諸侯將祭祀,與羣臣射以觀德,先習射于澤,而後射于射宮,數中者得與于祭,不數中者不得與于祭。《儀禮》之大射儀是也。總言若此之飲酒,乃信爲周家任政事之臣;若此之飲酒,亦天所順其大德者,而周家亦長不忘是臣矣。以上皆使康叔明于妹邦之大命也。

王曰:「封,我西土棐徂,邦君御事小子尚克用文王教,不腆于酒,故 我至于今,克受殷之命。」

此以下正告康叔也。我,我周也。棐,輔也。徂,助也,左也。腆,猶 多也。言我周西土當日凡俌佐之國君、朝臣、小民,皆能用文王之教,不厚 貪于酒,故我周至于今日,克受殷之大命也。

王曰:「封,我聞惟曰:在昔殷先哲王迪,畏天顯小民,經德秉哲。自成湯咸至于帝乙,成王畏相,惟御事,厥棐有恭,不敢自暇自逸,矧曰 其敢崇飲?

此以商君臣告康叔也。昔,昨也,猶往日也。哲,知也,賢智之王也。

迪,道也。顯,濕也,明也。經,猶常也。德,悳也。秉,猶持也。哲,悊也,敬也。咸,疑當作戊,太戊也。帝乙,按:謂祖乙,非紂父也。湯至祖乙十三王,爲世則七也。《易‧乾鑿度》云:「《易》之帝乙爲成湯,《書》之帝乙六世王。」成王,成就王德也。相,遐也,輔也。畏,相敬畏。輔,相。《詩》云:「成王不敢康」,《周語》叔向說之曰:「敬百姓也」,百姓謂百官,即畏相之誼也。御事,統言朝臣也。崇,上也。言我聞殷先哲王之道,畏天、畏民,常其德,持其敬。自成湯、太戊至帝乙,皆能成就王德。敬畏輔相維時治事之臣,其輔君亦皆恭慤,不敢寬假佚樂,況敢以飲相尚乎?

越在外服,侯、甸、男、衛、邦伯;越在內服,百僚庶尹惟亞惟服宗工,越百姓里居,罔敢湎于酒。不惟不敢,亦不暇,惟助成王德顯,越尹人祗辟。

五服不言采者,省文也。邦伯,方伯也。百僚、庶尹,即上文有正也。惟亞惟服,即上文有事也。宗工,宗人之官也。百姓里居,謂百官致仕家居者。湎,沈于酒也。飲酒齊色曰湎,面皆紅赤也。尹,正也。祗,敬。辟,法也。言外而眾服之諸侯、牧伯,內而眾臣及百官族姓之致仕家居者,皆無敢沈湎于酒。非徒不敢,且亦不暇。惟助其君成就王德,使之顯著于以正人心,敬國法,所以不暇也。

我聞亦惟曰:在今後嗣王酣身,厥命罔顯于民祇,保越怨不易。誕惟厥 縱淫泆于非彝,用燕喪威儀,民罔不衋傷心。惟荒腆于酒,不惟自息乃 逸,厥心疾狠,不克畏死。辜在商邑,越殷國滅,無罹。弗惟德馨香祀 登聞于天;誕惟民怨,庶羣自酒,腥聞在上。故天降喪于殷,罔愛于殷, 惟逸。天非虐,惟民自速辜。

此言紂所以亡國,以戒康叔也。酣,酒樂也。祗當作祗,只也,詞也。保,猶安也。易,傷也,猶更變也。燕,宴也。儀,義也,容止也。《詩》曰「既愆爾止」,即謂紂也。衋,痛甚也。荒,妄也,廢亂也。惟,思也。息,已也,猶止也。乃,仍也。逸,佚也,樂也。疾,猶急也。狠,盭也。罹,當作羅,猶憂也。或曰當作惟,思也。馨,香之遠聞者。羣,輩也。庶羣,眾臣也。腥,當作胜;腥臊,猶臭惡也。愛,悉也。民,猶人也。速,猶召也。言紂幸酒,其命令無足以顯示于民者,但安于斂怨之事而不悛改,大肆其淫蕩于非法,爲酒池肉林使男女裸而相逐其間,爲長夜之飲,以宴飲喪其

威儀,故斯時之民無不痛傷于心。而紂惟狂妄多湎于酒,不思自止,仍然佚樂其心,卞急狠戾,毒害諫臣。反曰我生不有命在天,而不知畏死,以積罪于商邑,于殷之滅亡,曾不以爲憂懼,弗思以明德馨祀登聞于天。大惟民之怨氣,羣臣之酌酒,其臭惡聞于上,故天降喪亡而不復愛之。非天之施其虐也,惟人自召其禍而取罪耳。

王曰:封,予不惟若茲多誥。古人有言曰:『人無于水監,當于民監。』 今惟殷墜厥命,我其可不大監撫于時!

監,鑑也,鏡也。墜,當作隊,從高移也。撫,猶據也。時,是也。言 我所以引湯與紂詳告汝者,古人所謂毋鏡于水而鏡于民也。今殷因酒而隕其 命,我其可不據是以爲大監乎?《湯征》曰:「人視水見形,視民知治否。」 古人之言,疑尚在其前矣。

予惟曰:汝劼毖殷獻臣,侯、甸、男、衛,矧太史友、內史友,越獻臣 百宗工,矧惟爾事服休,服采,矧惟若疇,圻父。薄違農父。若保宏父, 定辟,矧汝剛制于酒。

劼,固。毖,慎也。獻,賢也。太史、左史,記動者;內史、右史,記言者。友,如文王四友之友,在左右也。越,踰也。宗工,宗人之官。事,士也。服休,燕息之近臣。服采,朝祭之從臣。《魯語》「天子大采朝日,少采夕月。」若,順也。疇,當作曜,篡也,計度之意。圻,畿也。圻父,司馬,主籌度封畿之甲兵者。薄,俌也,猶車之有輔,弓之有弼也。或曰縛也,猶束也。違,韋也。背,盭也。農父,司徒,主教正人之邪行者。保,猶安也。宏,猶大也。宏父,司空,主土主順安萬民者。辟,聲也,治也。剛制,猶彊斷也。言殷獻臣之在諸侯國者,當戒慎于酒矣。況在君左右之臣爲汝友,位踰異姓之臣爲宗官者乎?況爾密邇之士爲燕息之近臣、朝祭之從臣乎?況司馬、司徒、司空三卿之坐而定治者乎?況汝爲一國之主,人所視傚,其可不劼毖于酒而彊以自斷乎?

厥或誥曰:『羣飲。』汝勿佚。盡執拘以歸于周,予其殺。

誥,告也,下陳上曰告。羣,猶輩也。羣聚飲酒,古有此禁,故周惟蜡 祭之時,漢有賜酺之令也。佚,失也,縱也。拘,當作抲,讀爲掎,戾其足 也。言有告羣飮者,爾毋縱之,皆執縛以歸于周,其當殺者殺之也。愚按: 此指周之眾臣中有此者,康叔不得專殺,故執以歸周也。觀下文言殷之諸臣, 言「勿辯乃司民湎于酒」可見。

又惟殷之迪諸臣百工,乃湎于酒,勿庸殺之,姑惟教之。有斯明享,乃 不用我教辭,惟我一人弗恤,弗蠲乃事,時同于殺。」

惟,皆詞也。迪,猶導也。庸,用也。姑,及也,且詞也。有,宥也, 寬也。如《梓材》「戕敗人宥」、《論衡·效力》篇亦引作「彊人有」也。斯, 此也。享,養也,讀如《禮記》「立太傅、少傅以養之。」《孟子》「中也養不 中」之養,或曰享,當作學,忠厚待人之意也。或曰享,饗也,猶受也。恤, 收也,猶救也。蠲,佳也,善也。時,是也。言殷臣之湎酒者,則皆紂之所 導,染惡既深,未能驟革,雖歸于周,弗殺,姑教。蓋寬恕此而明欲其遷善 也。若不率教而不悛,則予一人弗能救之,弗善汝事于後,則同于羣飲之周 臣,殺無赦者也。

王曰:「封,汝典聽朕毖,勿辯乃司民湎于酒。」

典,猶常也。毖,上文劼毖之言也。勿,弗訶也。辯,猶治也。乃司, 有司,即諸臣百工也。言汝當常聽我所言劼毖之道,法先貴近,若勿治臣工 之湎酒,則小民之湎酒終不可禁矣。

梓 材

《書序》見前,亦周公代成王誥康叔之語。衛于殷爲亂國,故《酒誥》之言用重典;于周爲新國,故《梓材》之言用輕典。下半以康叔爲牧伯,故推之庶邦,以康叔又爲至親,故欲其保民以保王也。《論衡·效力》篇引《梓材》曰:「彊人有王開賢,厥率化民。」

王曰:「封,以厥庶民暨厥臣達大家,以厥臣達王惟邦君。

暨, 息也, 與也。達, 通也。大家, 卿大夫有采地者之家, 如殷民七族: 陶氏、施氏、蘇氏、錡氏、樊氏、饑氏、終葵氏, 即衛之大家, 孟子所謂巨室也。上臣謂眾臣, 下臣統大家而言。言上有天子, 下有大家, 所以通上下之情而無暌隔者, 邦君也。臣民素服屬于大家, 君能撫綏民與臣以其情通于大家, 則巨室之所慕一國順之矣。臣民皆翼戴乎天子, 君不得罪于巨室, 以其情通于天子, 則邦國之若否, 天子明之矣。鄭氏以王爲二王之後, 二王之後稱公不稱王, 恐非。

汝若恆越曰:我有師師、司徒、司馬、司空、尹、旅。曰:『予罔厲殺 人。』亦厥君先敬勞,肆徂厥敬勞。肆往,姦宄、殺人、歷人,宥;肆 亦見厥君事,戕敗人,宥。

若,順也。恆,常也。越,粵也,於詞也。師,鎏也,先導也。天子 六卿,諸侯則三卿,司徒兼冢宰,司馬兼宗伯,司空兼司寇也。尹,正也, 謂大夫;旅,眾也,謂士。厲,盭也,或曰烈也。勞,讀如勞之來之之勞。 肆,豢詞也。徂,往也。肆往,前日也。歷人,罪人所過知情容畱者也。 見,猶示也。事,敬勞之事也。戕敗人,殘毀人手、足、面、目而未至于 死者也。言汝順其常道,曰我有互相師法之臣,皆言不暴虐殺人。所以然 者,亦其君先能愛民而敬勞之,故臣遂往而敬勞其民。凡向日辠人、經過 之人知情連坐者,垂寬恕之,遂亦示君所以敬勞之意,凡毀傷人不死者, 亦寬恕之。」

王啟監,厥亂為民。曰:無胥戕,無胥虐,至于敬寡,至于屬婦,合由以容。王其效邦君越御事,厥命曷以?引養引恬。自古王若茲,監罔攸辟!

啓,启也,開也。監,臨視一國,《周禮·太宰》所謂「立其監」也。亂,治也。胥,遐也,猶言相也。敬,當作矜,寫也,字亦借鰥。老而無妻曰鰥,老而無夫曰寡。屬,媰也,婦人妊身也。合,今也,猶同也。由,迪也,道也。容,寬而受也。效,教也,上所施下所效也。命,王命也。曷,詞也。以,用也。引,猶長也。恬,安也。辟,刑法也。言王開國以敷治者,爲民而已。惟曰無相殘虐百姓,至于鰥寡媰婦,皆道之以寬容王教。諸侯及治事之臣,其命何在?期于長養其民,長安其民,非特今王之命然也。自古哲王皆如此,邦君其無任用刑法可也。

惟曰:若稽田,既勤敷菑,惟其陳修,為厥疆畎。若作室家,既勤垣墉,惟其塗塈茨。若作梓材,既勤樸斷,惟其塗丹雘。

稽,計也,度其廣袤而經畫之也。敷,數也。一歲曰菑,才耕之田也。 陳,嫩也,列也。修,飾也,皆猶治也。疆,田界也。廣尺、深尺曰畎,田 間水道也。牆卑曰垣,高曰墉。塗,當作涂,猶堊也,以蜃灰飾牆也。塈, 仰塗也。茨,以茅葦蓋屋也。梓,楸也,木材之良者,故攻木之工曰梓人。 樸,木素也,未經斧削之名。斷,斫也。塗,當作嚴,讀爲朽。丹,巴越之赤 石也。**臒**,善丹也。《南山經》「鷄山多丹**臒**」是也。《山海經》又有青**臒**、白**臒**、黑**臒**。言治田既反艸將耕,必又界畫溝洫,以喻既除民之疾,又當立其綱紀也;作室既築牆,又當汙以白堊,蓋以茅茨,以喻既立國家,又當修其政令也;治器既成質,又當飾以丹**臒**,以喻國既治理,又當修明制度、典章,使桑然有成也。周公丁寧康叔,亦欲其善繼文、武之志事,故爲此三喻也。

今王惟曰:先王既勤用明德,懷為夾,庶邦享作,兄弟方來。亦既用明 德,后式典。集庶邦不享。

先王,文、武也。明德,有德之臣也。懷,念思也。夾,持也,猶餔也。享,獻也,猶《洛誥》所云「百辟享」也。作,猶使也。兄弟,諸侯同姓及婚姻甥舅之邦也。方,竝也,併也。后,繼體君也。式,用也。典,常法也。集,合也,會也。會庶邦丕享,即四方民大和會也。言文武勤用明德之臣,思以爲輔,故眾邦獻誠,使其兄弟之國並來順命,而諸邦亦能用其明德之臣,至今繼體之王敬用常法,故庶邦亦會于此,而大獻其誠也。自此以下蓋總結三篇之詞,其時侯、甸、男、邦采、衛咸在,康叔以至親而爲牧伯也。

皇天既付中國民越厥疆土于先王,肆王惟德用,和懌先後迷民,用懌先王受命。

付,與也。和,龢也,諧也。懌,當作釋,猶怡悅也。迷,惑也。言有 人斯有土,天既與民人及疆土于我周矣,故今王亦惟明德之用,以爾小子封 爲監,欲以龢悅先後迷惑之民,用以慰悅受命之先王也。先之迷民,謂化紂 之惡,酌酒酣身者也;後之迷民,謂助武庚爲亂者也。

已!若茲。監,惟曰欲至于萬年,惟王子子孫孫永保民。」

已,噫也,發聲之詞。若茲,言王之告汝者,如此也。監,即康叔也。 言王所告者,盡于此。爾監當曰:「願如此誥,期至于萬年。惟王子孫長保安 此民人也。」《康誥》代成王曰:「乃以殷民世享」,欲康叔長保其國也。此代 康叔曰:「子孫永保民」,欲王長保其天下也。

召 誥

《書敘》曰:「成王在豐,欲宅洛邑,使召公先相宅,作《召誥》。」按: 此在成王嗣位之十年也。成王年十九,周公將反政,欲擇土中建王國。先視 召公相視所居,至十二年而雒邑成,乃名曰成周,反政于王也。《呂覽·長利》 篇云:「成王曰:『惟余一人,營居于成周。惟予一人,有善易得而見也,有 不善易得而誅也。」葢雒爲天下之中,諸侯朝覲、貢賦道里適均建都者,武 王之志而周公成之,居九鼎于此焉。

惟二月既望,越六日乙未。

二月者,成王即位之十年,周公返而居攝之五年正月也。二月,當作正月,字之誤也。望,朢也,月與日相望,光滿也。是月乙亥朔,十五日,己 丑望,十六日庚寅爲既望。越六日,則二十一日乙未也。

王朝步自周,則至于豐。

步,行也。周,宗周,鎬京也。豐,文王廟所在。鎬在今陝西長安縣, 豐在今鄠縣,去鎬二十五里。將即土中易都,爲大事,故朝告于武王廟,即 至豐以告文王廟也。

惟太保先周公相宅,越若來三月,惟丙午朏。越三日戊申,太保朝至于 洛,卜宅。厥既得卜,則經營。

太保,召公也。相,視。宅,居也。越,粵也,于也。若,詞也。來,至也。三月,當作二月,字之誤也。二月,甲辰朔也。朏,月未盛之明,月之三日也。爲丙午,又數三日爲戊申,月之五日也。經營,疊韻連語,猶量度也。或曰南北曰經,東西曰營。召公以五日之朝,至洛而小所居,已得吉卜,則經營而度其址也。洛,雒水也,在今河南鞏縣東北,自豐至洛邑七百里。故自正月二十一日吉,行五十里,至二月初五日,計十四日而至于雒也。

越三日庚戌,太保乃以庶殷攻位于洛汭。越五日甲寅,位成。

庚戌,二月七日也。庶殷,眾殷頑民也。是時已遷于洛,故徵發之。攻,猶治理也。位,城郭宮廟朝市之位。汭,水相入也,謂洛水入河之處。甲寅,二月十一日也。《周書·作雒》云:「城方千七百二十丈,郛方七十里,南繫于洛水,北因于郟山,以爲天下之大湊。」又云:「乃位五宮:太廟、宗宮、考室、路寢、明堂。」按:《攷工記》:「匠人營國,方九里。」古者六尺四寸爲步,三百步爲里,則九里之長方千七百二十八丈也。成,謂規模既定,丈尺攸分,國中九經、九緯,左祖、右社,面朝、後市之位皆就理也。

若翼日乙卯,

翼,昱也,明也。乙卯,十二日也。

周公朝至于洛,則達觀于新邑營。

周公後召公七日而至洛。達,通也。通觀,猶徧觀也。新,鱻也,不久也。

越三日丁巳,用牲于郊,牛二。

丁巳,月十四日也。《周書·作雒》曰:「乃設邱兆于南,以祀上帝,配以后稷。」牛二者,帝牛一,稷牛一也。郊用特牲,貴誠也。此以事類祭天,周公代成王行禮也。

越翼日戊午,乃社于新邑,牛一、羊一、豕一。

戊午,月十五日也,望前一日。《作雒》云:「乃建太社于國中,其壝東 青土,南赤土,西白土,北驪土,中央舋以黃土。」社者,五土之總神,所 謂后土也。以共工氏之子句龍配牛、羊、豕,具爲太牢禮。禮,殺于祭天特 牲也。

越七日甲子,周公乃朝用書命庶殷侯、甸、男、邦伯。

甲子,月二十一日也。周公于是昧爽,即量事期,計徒庸,慮材用,書 之于冊,以命役于眾殷侯、甸、男服之邦伯也。

厥既命殷庶,庶殷丕作。

丕,大。作,爲也。眾殷承周公之命,皆趨事赴功也。

太保乃以庶邦冢君出取幣,乃復入錫周公。曰:「拜手稽首,旅王若公 誥告庶殷越自乃御事。」

以,與也。幣者,璋判、白弓、繡質、龜、青純之屬,後爲魯之分器,即《左傳》所云寶玉、大弓也。錫,賜也,與也。稽,當也。旅,敷也,敶也。召公見周公德隆功成,有反政之期而欲顯之,因大戒天下,故與諸侯出,取幣以與公,而言「敢拜手稽首,以陳于王,若公並以誥,普告眾殷及汝御事之臣,皆明聽之也。」按:此蓋公既定宅,使伻告卜于西都之時,召公以其言付周公達諸王也。

嗚呼!皇天上帝,改厥元子,茲大國殷之命。惟王受命,無疆惟休,亦 無疆惟恤。嗚呼!曷其奈何弗敬?

元,首也。元子,天子也。人皆天之子,天子爲之首也。疆,猶竟也。 休,喜也,慶也。恤,憂也。曷其奈何者,曷,可之詞也。言皇天無親,惟 德是輔,大位乃天所得改易之,今此大國殷之命,惟我王受之矣。固無窮之 慶,然亦無竟之憂也。因嘆息言:「惟聖哲之茂行,敬得用此下土耳。」

天既遐終大邦殷之命,茲殷多先哲王在天,越厥後王後民,茲服厥命。 厥終,智藏瘝在。夫知保抱攜持厥婦子,以哀籲天,徂厥亡,出執。嗚 呼!天亦哀于四方民,其眷命用懋。王其疾敬德!

遐,當作嘏;遐終,猶永終,長久也。越,粵也,于也。多先哲王,賢 聖之君六七作也。後王後民,謂武丁以後紂以前也。服,猶受也。厥終,謂 紂時也。智,賢臣也。藏,當作臧,隱于野也。瘝,當作鰥,悹也,病也。 在,存也。夫,丈夫也。保,緥也,小兒衣。抱,裡也,讓,提持, 握也。徂,往也。眷,顧也。德,悳也。言商祀六百,天既長此殷命者,以 哲王之多,今皆在天,故于其嗣世之中主,猶保其命。至于其末紂,暴虐無 道,賢智者退伏,病民者在位。民知保抱其子,攜持其妻以哀號呼天,往逋 逃于其所亡之處而已。乃出,則見執,又無所逃死,故天亦哀憐殷民。顧此 大命,用能勉于敬德者,以爲民主,然則王當速敬德以承天意也。

相古先民有夏,天迪從子保,面稽天若;今時既墜厥命。今相有殷,天 迪格保,面稽天若;今時既墜厥命。

相,視也。古曰在昔,昔曰先民。迪,導也。子者,禹始以天下傳子也。面,猶向也。稽,計也。若,順也。墜,當作隊,高陊也。格,挌也,擊也, 湯始以征誅得天下也。言視昔夏王,天開傳子之局而保佑命之禹,如面向計 度而順天,至桀不德而墮其命。近在殷王,天開征誅之局而又保右命之如夏, 至紂不德,而今亦墮其命。言天命靡常,不可恃也。

今沖子嗣,則無遺壽着,曰其稽我古人之德,矧曰其有能稽謀自天?

沖,僮也。沖子,成王也。壽耇,老成之人也。稽,計也,考也。有, 又也,再也。自,猶順從也。自天,猶上文天若也。言王嗣位,則無遺棄老 成之臣,當曰是能計考古人之德以輔弼我者,況曰是又能計考于天道以順天 者乎?

嗚呼!有王雖小,元子哉。其丕能諴于小民。今休:王不敢後,用顧畏 于民碞;

誠,和也。碞,險也,阻難也。不,猶勿也。用,以也。顧,還視也。 言王年雖幼,天之首子也,其在大能和于小民耳!蓋小人難保,今雖庶殷丕 作,大見休美,王勿敢以爲可後而忽之,當還視其險難而深畏之,蓋猶水之 能載舟,亦能以覆舟之喻也。

王來紹上帝,自服于土中。旦曰:『其作大邑,其自時配皇天, 毖祀于上下,其自時中乂;王厥有成命治民。』今休。

紹,繼也。自,猶始也。服,艮也,猶制治也。土中,王城于天下之土 爲中也。《周禮·大司徒》「以土圭之法測土深,正日景,以求地中。」「日至 之景,尺有五寸,謂之地中。天地之所合也,四時之所交也,風雨之所會也, 陰陽之所和也。然則百物阜安,乃建王國焉。」偁旦曰者,君前臣名也。時, 是也。配,對也,合也。毖,慎也。乂,嬖也,治也。言俟新邑既成之後, 王當來繼承天命以始治于土中。旦言作此大邑,其自是仰蒼天心,以慎祀于 上下神祇;其自是宅中圖治,王保有天之成命以治民,可于今見太平之休美 矣。蓋周公反政成王,復辟來洛,其制禮作樂,天下太平,皆在後二年洛邑 既成之時。

王先服殷御事,比介于我有周御事,節性惟日其邁。

召公既述周公之言,因自陳治民之道。服,艮也,治也。比、介,皆猶近也。節,凡也,猶制也。邁,勸也,勉力也。言今殷民與周民雜處,當先治殷治事之臣,使親近于我周治事之臣,相觀而善,以節其氣質驕淫之性,則日相勸勉殷舊臣遷于善,而殷頑民亦無梗化矣。

王敬作所,不可不敬德。

所,處也。德,悳也。言議道自己,王其以敬爲居身之處哉!所敬維何? 仁義禮知之德而已。

我不可不監于有夏,亦不可不監于有殷。我不敢知曰,有夏服天命,惟有歷年;我不敢知曰,不其延。惟不敬厥德,乃早墜厥命。我不敢知曰,

有殷受天命,惟有歷年;我不敢知曰,不其延。惟不敬厥德,乃早墜厥 命。

監,視也。服,猶佩也。歷,過也,久也。延,長也。墜,當作隊,從 高隕也。言不可不察視夏、殷以爲戒,夏、殷之歷年修短皆不敢知,惟知所 以墜其天命者,皆不敬厥德故耳。

今王嗣受厥命,我亦惟茲二國命,嗣若功。

嗣,繼也。惟,思也。茲,此也,詞也。若,順也。國功曰功。言今王 繼受天命,我亦當思此夏、殷之所以受與墜者,而繼順其敬德,以定國之功 者,如夏、殷哲王也。

王乃初服。嗚呼!若生子,罔不在厥初生,自貽哲命。今天其命哲,命 吉凶,命歷年;知今我初服,

生,猶養也。生子,謂年十五入太學時,育養之使作善也。貽,當作詒, 遺也,饋也,猶寄也。哲命,謂賢智也。言王乃佩服天命之始若生子,然其 善惡無不在于初生之時,自寄于善,乃有賢智以承天之命也。今天其命王以 賢智與否乎?命王以吉以凶乎?命王以歷年與否乎?均未可知。所以可知 者,今我初服,如子初生,在自勉于善,自絕于惡而已。

宅新邑。肆惟王其疾敬德?王其德之用,祈天永命。

肆,故今也,詞也。疾,速也。祈,求也。用,以也。永,如水之長也。 言王新居洛邑,今其速敬德哉!惟以德求天歷年之長命耳。

其惟王勿以小民淫用非彝,亦敢殄戮用乂民,若有功。

此言化民以德,勿以刑也。淫,過也。彝,常法也。敢,進取也。殄, 盡也。乂,芟艸也,猶殺也。若,順也。言王無以頑民過用非常之法,亦勇 于用刑以殄刈之,惟順而導之以德,乃有功也。

其惟王位在德元,小民乃惟刑用于天下,越王顯。

元,首也。刑,荆也,法也。越,粤也,于詞也。顯,濕也,光明之意。 言一人首出,位天下之上,則居天德之首,小民所用以爲法者也。敬德而天 下法之,斯于王之德益光明矣。

上下勤恤,其曰我受天命,丕若有夏歷年,式勿替有殷歷年。欲王以小 民受天永命。」

上下,君臣也。恤,憂也。其,期詞也。丕,大也。式,用也。替,廢也。言君臣相與勤勞憂恤,共期受命,如夏歷年之久,勿如殷歷年之久而忽廢之,欲王以小民受天長命也。蓋國治而民安,民安樂者,天說喜而增厤數矣。丕若與勿替異辭者,周受殷命不可云丕,若有殷歷年也。

拜手稽首,曰:「予小臣敢以王之讎民百君子越友民,保受王威命明德。 王末有成命,王亦顯。

予小臣,召公自偁也。以,與也。讎,雠也,猶相當、相對也。故字亦或作酬,謂殷頑民也。百君子,兼殷御事、周御事而言也。友民,同志之民,謂周民也。末,猶終也。召公既拜,與而言我小臣敢與殷之頑民暨殷周之臣,及周同志之民,皆保受王之威命明德,則王終有天之成命歷年永久,而王之德亦光明于天下也。

我非敢勤,惟恭奉幣,用供王能,祈天永命。」

非敢勤者,召公自謙之詞也。幣,即太保取以入錫周公之幣也。供,具也。言我非敢自謂能勤也,惟敬奉此幣以與周公,供待王能,祈天永命而已。

洛 誥

《序》曰:「召公既相宅,周公往營成周,使來告卜,作《洛誥》。」鄭康成曰:「居攝七年,天下太平,而此邑成,乃名曰成周也。」按:洛邑之經始,在居攝五年,而其成則在七年。序于《洛誥》言:「成者要其終,而名之告卜。」告卜于西都也。

周公拜手稽首曰:「朕復子明辟。

拜手,首至手也。稽讃者,首至地也。復,夏也,猶還返也,謂將返政于成王也。返政在成王嗣位十二年洛邑既成之後,此蓋經始已定,而先言之辟君也。子者,親之之詞;明辟者,尊之之詞,皆謂成王也。王命周公往營成周,公既得卜而復命,將自退老也。

王如弗敢及天基命定命,予乃允保。大相東土,其基作民明辟。

基,猶始也。允,繼嗣也。相,視度也。言王年幼,若弗敢乘天基命定

命之時,作民明君,曰「如弗敢」者,宛約其詞,嫌于斥王之幼也。予乃居 攝以繼嗣武王,保安周家。今大相度洛邑,王當爲天下明君之治,庶其基始 于此。洛在鎬東,故曰東土。

予惟乙卯,朝至于洛師。我卜河朔黎水,我乃卜澗水東,瀍水西,惟洛食;我又卜瀍水東,亦惟洛食。

乙卯,見《召誥》,周公居攝之五年二月十二日也。師,猶眾也。朔,北也。河朔黎水,在今河南衛輝府濬縣東北,其故城古謂之黎陽也。近于紂都,爲殷民懷土重遷,故先卜近以悅之。澗水,出今河南府澠池縣山。瀍,當作廛,廛水出今河南府洛陽縣山,二水皆入洛。澗東瀍西,即召公所卜王城也。廛水東者,略近衛輝府王城之下都,所謂成周,今洛陽縣東北二十里,其故城也。王城在今洛陽縣西北二十里,相距十八里。食,龜兆食墨也。凡卜四時,各灼龜之一體。今在二月,爲周之春,是當灼前左也。而龜陰類,不宜于火。以楚燉焌其一處則止,灼其處不能延及滿腹,故必以墨畫之,使火循墨而延爇。蓋墨者,煙煤所成,利以引火者也。引至其處,以觀兆之吉凶,著引不至所畫之處則不吉。可知言河朔黎水則占之不吉,而洛陽則廛水東西皆吉。今以澗水東廛水西爲王城,以瀍水東爲下都,遷殷頑民也。鄭氏謂使民服田相食,恐非。王城,即召公所卜,而下都,則周公所卜也。

伻來以圖及獻卜。」

伻,當作抨,猶使也。使人來于王所,以新邑之地圖及獻所卜之兆也。 必以圖者,口述不憭,指圖乃憭也。

王拜手稽首曰:

拜手稽首,施于極敬,為天非爲公也。王以公言天基命定命,故兩言敬 天之休,皆云拜手稽首也。公以叔父之尊當居攝之任,似不妨特有加禮。然 君而稽首于臣,不可以訓。故用王麟趾之說解之,猶《左傳》子犯曰天賜, 而重耳稽首。秦穆賦《六月》以佐天子者,命重耳,而重耳亦稽首也。下文 拜手稽首休享,則爲禋文武也。

「公不敢不敬天之休,來相宅,其作周匹,休!公既定宅,俘來來,視 予卜,休恒吉。我二人共貞。公其以予萬億年敬天之休。拜手稽首誨

言。」

休,喜也,猶美也。匹,猶配也。伻來來者,使二人也。先獻王城之吉 卜,後又獻下都之吉卜也。以此觀彼曰視,故使彼觀此亦曰視。恒,久也。 古文以貞爲鼎,籀文以鼎爲貞,古二字通用。此貞即鼎,借爲當也。億,意 也。古十萬爲億,漢時則萬萬爲億。誨,曉教也;誨言者,教以及天基命定 命之言也。成王言公代予及天基命定命來相度洛邑之居以作周邦,而配天之 美命,即公所謂允保大相東土基作民明辟也。公已定宅,先後兩使人示我以 卜兆之美,兩地所卜皆吉,即公所謂伻來以圖及獻卜也。我二人,王與公也。 言我與公共當其美,公其以我永遠敬天之美,敢拜稽而受所誨基命定命之言 也。上拜稽,是史臣所記,此則王自言,非有二拜也。

周公曰:「王,肇稱殷禮,祀于新邑,咸秩無文。

此以下公告王以宅洛之事也。肇,肁也,猶始也。稱,禹也,舉也。咸, 愈也,皆也。秩,猶敘也。無文,諸廢祀之殷無文籍,或今宜增祀者,皆祭 之也。或謂殷禮簡質無文,則以文爲彭章之彣。其說非是。或曰:文,紊也, 亂也。存參。成王始臨新都,遷殷頑民,故先用殷民習見之禮。雖公制禮作 樂既成,欲俟成王即政後告神受職,然後頒行周禮,頒後始用之也。

予齊百工, 伻從王于周, 予惟曰: 『庶有事。』

齊,正也。工,官也。伻,使也。周,新邑也。庶,眾也。有事,祭也。《左氏春秋傳》僖九年曰:「有事文武」,昭十五年曰:「有事于武宮」是也。言我來洛時,整齊百官,使從王于洛邑,我惟告之曰:「眾臣將有助祭之事。」

今王即命曰:記功宗,以功作元祀。惟命曰:『汝受命篤弼,

日,當作日。即命日,猶言受天命之日,謂至洛邑頒新政也。宗,尊也, 實崇也。記功宗者,凡有功之臣皆書于太常,載在盟府是也。元,首也,猶 始也。作,爲也。作元祀者,若大享于先王,爾祖從與享之是也。周時,若 號叔已歿,自宜祭于大烝。他存歿不可考,其禮可類推也。惟命者,頒天子 新命,使司勳詔之也。受命,受天子新命也。篤,簋也,享也。弼,猶輔也。 言王至洛之日,記諸功臣而尊異之。其歿者,則首列祀典。惟命曰:「爾受茲 新命者,以能厚輔王室,有大功于周也。」

丕視功載,乃汝其悉自教工。』

丕,大也。視,猶示也。功載,記功之載書也。悉,盡也。教,效也。
 工,功也。言以功載編示羣臣,使知凡載在書記者,皆能自靖以效功,故有此寵命也。

孺子其朋,孺子其朋,其往!無若火始焰焰;厥攸灼敘,勿其絕。

孺子,幼少之偁,謂成王也。朋,佣也,羣臣同志好者也。其朋其朋, 言慎所與也。往,枉也,邪曲也。焰焰,火行尚微也。灼,爇也。敘,除也, 實祛也,言其慎所與乎?若比暱邪曲之人,其害始雖甚微,而後且勢陵于君, 權隆于主,雖欲除之,而弗可絕。譬之于火,熒熒不救,炎炎奈何也。

厥若彝及撫事如予,惟以在周工往新邑。伻嚮即有僚,明作有功,惇大 成裕,汝永有辭。」

若,順也。彝,猶常法也。撫,按也,持也。嚮,當作向,仰對之意。 即,就也。有,友也。同官爲僚。明,朚也,猶勉也。裕,猶饒足也。辭, 詞也,猶聞譽也。言王其順用常法及撫治政事,皆宜如我之所爲,惟以在周 之舊臣從往新邑,使殷臣有所趨嚮,就其僚友,相與敏勉,赴功厚大,以成 饒裕,則汝亦終有譽于永世矣。

公曰:「已!汝惟沖子,惟終。

已, 詞也, 更端之語, 止而復言也。上文言治內, 以下言治外。言汝雖 沖子, 然終成王業, 惟在干汝任大青重也。

汝其敬識百辟享,亦識其有不享。享多儀,儀不及物,惟曰不享。惟不 役志于享,凡民惟曰不享,惟事其爽侮。

識,記也。辟,諸侯也。享,獻也,朝貢之禮也。儀,義也,禮意也。物,幣也。役,猶營也。爽,差忒也。侮,慢易也。言御諸侯之道,當察其誠與不誠,輕財而重禮也。幣美則沒禮,若禮意簡略,不誠猶之不享,爲其不營心于所享,恭敬事上也。下民效此,皆不以眞意相屬,則凡事皆僭忒慢易,無所不至矣。

乃惟孺子頒,朕不暇聽。朕教汝于棐民彝,汝乃是不養,乃時惟不永哉! 篤敘乃正父罔不若予,不敢廢乃命。汝往敬哉!茲予其明農哉!彼裕我

民,無遠用戾。」

頒,稅也,分也。聽,如聽朝聽政之聽。棐,輔也,俌也。蘉,朚之或體,字如《周禮》薙氏,故書萌作薨。《漢書·司馬相如傳》鯍,亦作鰽也。朚,猶黽勉也。時,是也。篤,簹也,學也。正,猶長也。父,父行,若曹叔、成叔、康叔、聃季,及召、芮、畢、毛之屬也。廢,猶棄也。明,亦朚也,勉也。明農,退老田野之意,彼往有所加也。裕,猶寬也。戾,雄也,猶至也。承上文言政事繁多,皆惟孺子分布之,我不遑聽其事矣。我所教汝者,惟輔民以常道,汝若不于是黽勉以圖,乃不能久安長治也。其要在任用賢臣,惇敘九族,汝父行皆老成人,爲臣民之長,不可不諫行言聽,如予之信任舊人,則臣下亦不敢不靖共其位,或至廢棄汝命矣。汝今往新邑,其無不敬哉,若予則將退老于田間,以修先世農業,不在其位,不謀其政也。汝于我民,加之以寬仁之政,則不獨殷民向化,雖四海之遠,亦莫不偕來同我太平矣。

王若曰:「公!明保予沖子。公稱丕顯德,以予小子揚文武烈,奉答天命,和恒四方民,居師;

此以下王答公誨言及畱公之詞也。明,朚也,勉也。保,猶安也。稱,禹也,舉也。丕顯,㬎也。德,悳也。烈,光也。答,當作荅,合也,應也。和,龢也。恒,久也。師,眾也。王欲畱公,述公輔相之功,言公黽勉保安我沖子,舉其顯德,代余續揚文武之光業,應奉天命和懌以久有四方之民,故營此洛邑以爲京師也。荅公之所言洛師也。

惇宗將禮,稱秩元祀,咸秩無文。

惇,厚也。宗,崇也。將,裝也,大也。稱,稱也,舉也。秩,猶敘也, 次第也。言公所誨,肇稱殷禮祀于新邑,敬當厚崇大典,舉敘首祀。凡無文 者,皆次第舉行也。此荅公記功宗,以功作元祀之言也。

惟公德明光于上下,勤施于四方,旁作穆穆,迓衡不迷。文武勤教,予 沖子夙夜毖祀。」

旁,溥也。作,爲也。施,故也,敷也。穆穆,美也。迓,當作訝,實 爲御使馬也;衡,輈耑橫木也。迷,惑也。凡失其所欲之路而妄行之則爲迷, 以御車喻治天下也。文武有文治武功,如《詩》云「文武吉甫,文武是憲」 也。毖,愼也。言公德光于天地,布于四方,溥爲穆穆之美,化如御車之不 迷于路。有文有武,以勤教于予,予沖子安受其成,惟早夜慎其祭祀而已。 猶曰政須由公,祭則小子也。此美公平日輔佐之功,教誨之勤,先示以所以 畱之之意也。

王曰:「公功棐迪篤,罔不若時。」

迪,導也。言公輔導我之功深厚無量,我無敢不順,是以行此。苔公罔 不若予之言也。

王曰:「公!予小子其退,即辟于周,命公後。

辟,君也。周,西周也。後,猶畱後,畱守之意。王許周公復辟之請,而言予當退,即政于鎬京,不必來洛,而命公畱後也。對洛言,故曰退。蓋居攝之時,成王幼小,周公常稱王命,專行不報。至此,王年已十九,用人行政,皆能遵周公之法,故許公返政之請。而洛邑初基,凡新政之頒,禮制之定,命周公主之,而王仍退居西都,不來新邑。俟一二年後再往也。或曰此節當在「王入太室,裸」之下,錯簡于此。存參。

四方迪亂,未定,于宗禮亦未克敉公功。

迪,導。亂,治也,實理也。宗禮,即記功宗之禮也。救,撫安也。言 四方導治,周公制作禮樂尚未全定,故雖以公之元功于宗禮,亦未能首議以 安公也。此荅公記功宗之言也。

迪將其後,監我士師工,誕保文武受民,亂為四輔。」

將,將也,扶助也。監,臨視也。士,事也。師,眾工官也。誕,猶大也。四輔,前疑、後丞、左輔、右弼也。《大戴·保傅》篇則以周公爲道,立于前,太公爲充,立于左,召公爲弼,立于右,史佚爲承,立于後也。言公當導助其後,臨視我執事之眾官,大保安前人以文德武功所受之民,圖治而爲四輔也。書凡連言文武者,皆非斥言文王武王。此荅公明農之語,謂必不可去也。

王曰:「公定,予往已。公功肅將祗歡,公無困哉!我惟無斁其康事, 公勿替刑,四方其世享。」

定,猶止也。往,往日也。已,即以字。肅、祗,皆敬也。將,猶奉也。 歡,悅也。哉,當作我。斁,懈也。康,康也,安也。替,廢也。刑,荆也, 法也。享,猶受也。言公其畱止于洛,予往。以公輔弼之功,敬奉而敬悅焉。 今欲去我,是困我也。我惟無怠其安國之事,公亦勿廢公之法,而使我無所 則效,則四方亦倚賴之,其世世受公之德矣。此諄切畱公之詞也。

周公拜手稽首曰:「王命予來,承保乃文祖受命民,越乃光烈考武王, 弘朕恭。[-]

文祖,文王也。越,粤也。乃,難詞也。烈,威也。宏,大也。恭,功也,以勞定國曰功。周人祖文王而宗武王。言王命予來洛以承安文王受命之民于烈考武王,是欲宏大我治洛之功也。此蓋周公述王畱己之意而恭受王命也。

校勘記

[一] 弘朕恭,原文作「宏朕恭」,今據他本改,注文未改。

孺子來相宅,其大惇典殷獻民,亂為四方新辟,作周恭先。曰其自時中 乂,萬邦咸休,惟王有成績。

此公既許王畱洛而仍勸王,一來鎭撫殷民以重其事也。惇,厚也,如說禮樂而惇詩書之惇。典,冊籍也。獻,賢也。亂,治理也。作周,作立周邦也。曰,欥也,詮詞也。中,土中也。乂,躄也,治理也。休,喜也。績,功也。言孺子來度居于新邑,其大厚集殷之典章及其賢民,相與圖治,以爲四方新君而作周家恭主之先,庶幾自是宅中出,治萬邦咸喜而王有成功乎。

予旦以多子越御事,篤前人成烈,答其師,作周孚先。考朕昭子刑,乃 單文祖德。

以,與也。多子,眾卿大夫也。烈,業也。答當作荅,合也,對也。師,眾也。孚,信也。考,成也。昭子,謂成王,猶言子明辟也。刑,荆也。單,殫也,盡也。德,悳也。言畱洛之事,予旦任之,與眾卿大夫及治事之臣, 舊學前人已成之功業,以對天下之眾,而作我周信臣之先,將以成成王所命 之法,而盡繼文祖之德也。成王既許即辟,則政教皆王之法,故曰昭子刑。

毖,勞也。寧,寍也,安也。秬,黑黍也,一稃二米;鬯者,釀秬爲酒 也。卣,即酉字,中尊也,承鬯之尊也。禋,絜祀也,精意以享曰禋。拜首 稽首者,爲文王武王,非爲公也。休,喜也,美也。享,祭獻也。言王不欲 自來,而使人來殷慰勞,乃命我安處于洛,以秬鬯二卣代王禋祀文武,告成 洛邑,而自拜手稽首,遙奉此美享也。蓋王欲不來,而使公攝己之祭,公述 其事如此也。

予不敢宿,則禋于文王、武王。

宿,經宿也。公以王不來洛,命己攝祭,不敢宿君命,即禋于文、武。 而所謂咸秩無文者,則仍欲俟王之來,再舉其禮也。

惠篤敘,無有遘自疾,萬年厭于乃德,殷乃引考。

此祭之祝詞也。惠,順也。篤,舊 學。敘,次第也。遘,遇也。疾,疒也,病也。厭,猒也,飽也。引,長。考,成也。祝成王順厚敘文、武之道,身其康彊,子子孫孫皆食其德,則殷之天下長成爲周之天下,而文、武在天之 靈亦慰也。

王伻殷乃承敘萬年,其永觀朕子懷德。」[-]

此復詔王來洛之詞也。言禋于文、武之命,雖已代攝,然舉祀發政之始, 必王親自來,使殷民見之,乃奉行有次第,將自是至于萬年,其長觀法我孺 子而懷其德矣。

校勘記

[一] 王伻殷乃承敘,朱原文于此著一「句」字,謂于此當斷句。然觀其說解,「萬年」 二字似當連上讀方成一完整意思。核之他本,亦爲連上讀。

戊辰,王在新邑。

此以下成王從公之請而至洛也。戊辰,成王嗣位之十年,周之十二月十 二日也。王于是日至洛。史謹記之。

烝,祭歲,文王騂牛一,武王騂牛一。王命作冊,逸祝冊,惟告周公其 後。王賓殺禋咸格,王入太室,裸。

多祭日烝。烝祭歲者,烝爲歲舉之祭,王在東都行之,不再于西都祭也。 騂,當作解,墶也,猶赤也。冊,祝文書于冊也。逸,史佚也。王賓,諸侯 助祭者。殺,殺牲也。禋,煙也。咸,愈也,皆也。格,徦也,至也。太室, 清廟中央之室也。祼者,用秬鬯之酒,又別築鬱金香草煮之,以鬱合鬯謂之 鬱鬯。祀時,專用以裸。祼有二,主人灌地降神,是未祭時也;君以圭瓚酌 鬯授尸,尸祭之地,乃啐之、奠之,是一獻之禮也。言王至于洛,行周正季 冬烝祭之禮,又別殺騂牛二,特祭文、武于文王之廟。周尚赤,故用騂。使 史逸讀祝冊,以告周公畱洛也。當殺牲,燔燒之時,助祭者皆至。蓋周人尚 臭,殺牲則取膟膋以合蕭,與黍稷燔之,其煙旁達,故曰禋。王入太室祼, 當爲祼尸之一獻也。○此節下或以「王曰:公,予小子其退,即辟于周,命 公後」十五字錯簡在前。存參。

王命周公後,作冊逸誥,在十有二月。

十二月,亥月也。此史官追書之,記戊辰之爲周十二月日也。

惟周公誕保文武受命,惟七年。

此史官總記周公居攝之年也。《召誥》《洛誥》皆在公居攝之五年,是年後,雖出政布令,皆稱成王,仍由公主之。至其後二年,返政,王始自主之。 時王年二十有一矣。史終記之,故曰七年也。

名 十

《敘》曰:「成周既成,遷殷頑民,周公以王命誥,作《多士》。」鄭曰: 「此皆士也,周謂之頑民。」按:于周爲梗化之頑民;于商爲效忠之義士。 成周者,洛之下都,所謂瀍水東也,王城在瀍水西。

惟三月,周公初于新邑洛,用告商王士。

三月,寅月也。周公畱洛之明年,攝政之六年,成王嗣位之十有一年也。 于,往也。新邑洛,指下都成周也。商王士者,貴之之詞。公始自王城往下 都,以王命撫安殷士也。

王若曰:「爾殷遺多士,弗弔旻天,大降喪于殷,我有周佑命,將天明威,致王罰,勅殷命終于帝。

弔,俶也,善也。秋爲旻天。喪,亡也,猶棄也。秋氣肅殺,方言降喪,故稱旻天。如《詩》三言「疾威」,皆曰旻天也。旻天絕句,猶《詩》言「不弔旻天」也。佑,當作右,助也。將,將也,猶奉也。勅,當作敕,正也。終,終其事也。帝,天也。言殷德不爲天所善,故大降喪亡于殷。我周佑助天命,奉天之明威,致王者之罰,以敕正殷命,爲上帝終其事也。

肆爾多士!非我小國敢弋殷命。惟天不畀允罔固亂,弼我,我其敢求位?

肆,今詞也。弋,猶取也。鄭本作翼,訓驅,謂借爲趨。非是。畀,與 也。允,胤也,習也。罔,妄也,黻也。固,怙也,恃也。亂,黻也。弼, 猶俌也。言非我小邦敢取殷之天下,惟天不與習妄怙亂之人,故輔助我,我 其敢求天位乎?

惟帝不畀,惟我下民秉為,惟天明畏。

秉,猶執也。爲,作爲也。畏,威也。言天之不與,于何見之,徵之下 民而已。天之視聽,即民之視聽,所謂天明威,自我民明威也。曰我下民者, 昔爲殷民,今爲周民也。

我聞曰:上帝引逸,有夏不適逸;則惟帝降格,嚮于時。夏弗克庸帝, 大淫泆有辭。惟時天罔念聞,厥惟廢元命,降致罰;

此以下言殷之革夏,以明周之革殷,亦猶是也。上帝引逸,周公所聞古語也。引,猶導也;逸,佚也,安樂也。有夏,爲桀之民也。適,嫧也,悅也。降,下也。格,度也,計量也。嚮,當作向,響也,聲相應也。庸,用也。淫,放濫也。泆,蕩也。有辭,有罪狀可指說也。罔,無也。念聞,猶下文聽念也。元,始也。言我聞天以使民安樂爲心,昔夏桀之民困于暴政,不能悅樂,其時天尚不忍遽棄之,下視度量而先出災害以譴告之,夏桀不能因天警誡用以自省,大肆其放蕩,而辠狀之積一一可指,惟時天乃無憐念聽聞之意,廢其始時命禹之命,而下致滅亡之罰也。

乃命爾先祖成湯革夏,俊民甸四方。

革,更也,改也。俊民,才德過人者。甸,治也。言湯代夏而有天下, 亦兼用夏之賢人以治四方也。

自成湯至于帝乙,罔不明德恤祀。

帝乙,祖乙也,湯後第六世孫。恤,閱也,猶更歷也。殷曰祀,言殷第 七世以上皆賢王也。

亦惟天丕建,保乂有殷,殷王亦罔敢失帝,罔不配天其澤。

失帝,失天安治之意也。澤,德澤也。言代有哲王,亦惟天大立殷之天下,而欲安治之。殷先王亦畏天命,無敢失去天心,無不克配上帝以承湯之

德澤者也。

在今後嗣王,誕罔顯于天,矧曰其有聽念于先王勤家?誕淫厥泆,罔顧 于天顯民祗,

後嗣王,謂紂也。顯,濕也,明也。祗,敬也。言紂大不明于天道,既不 畏天,況又能念聞于先王之勤勞國家乎?故大放蕩,無所顧于天之有顯道而 民之當敬畏也。

惟時上帝不保,降若茲大喪。

大喪,國亡身滅也。

惟天不畀不明厥德,凡四方小大邦喪,罔非有辭于罰。」

惟天不與不明其德者,匪獨殷也。凡四方小大國之喪,無非有辠狀可指 數者,天無有私罰也。

王若曰:「爾殷多士,今惟我周王丕靈承帝事,有命曰:『割殷。』告勅 于帝。

周王,謂武王也。靈,良也,善也。割,剝也。勅,當作敕,正也。言 我武王亦惟善奉天意,天命剝殷,故致伐而告正于天。《禮記》云:「牧之野, 武王之大事也。既事而退,柴于上帝。」此告正之說也。

惟我事不貳適,惟爾王家我適。

貳,益也。適,敵也,仇也。王家,謂武庚也。言我割殷之事,既封爾 王家,非有仇敵之意。惟爾王家作難,與我爲敵,故至此也。

予其曰惟爾洪無度,我不爾動,自乃邑。

洪,大也。乃,猶汝也。言爾既爲周客,乃大無法度,因三監而叛,是 我不于爾發難,由汝邑自取滅亡也。

予亦念天,即于殷大戾,肆不正。」

戾,盭也,猶乖背也。肆,故今也。正者,執而治其辠也。言我亦念王家之叛,是天意就殷而大拂戾之,非爾多士之由,故今不誅爾多士,而遷爾于此也。

王曰:「猷!告爾多士,予惟時其遷居西爾,非我一人奉德不康寧,時惟天命。無違,朕不敢有後,無我怨。

猷,發聲之詞也。時,是也。西者,殷民自紂城朝歌之地遷居成周,乃 由東北至于西南也。奉,猶持也。康,康也。寧,寍也,猶安靜也。違,韋 也,背也。後,後命也。言予不誅爾,惟是遷爾西居于此,非我一人性不安 定好擾動爾民也,亦天之所命使然耳。爾其無背我意,我不敢有後命而謂不 從將誅也,汝毋以遷故而怨我,當知我與爾更始之意也。

惟爾知,惟殷先人有冊有典,殷革夏命。今爾又曰:『夏迪簡在王庭, 有服在百僚。』

迪,導,進也。簡,柬也,擇也。庭,廷也,堂下朝君之地也。服,猶 事也。言爾所素知者,惟般先人典冊所記殷革夏命之事,故今爾又據之而言 曰:「夏之遺民,殷多進擇在朝,使有職事,列于百僚。」而今周不然也。

予一人惟聽用德,肆予敢求爾于天邑商,予惟率肆矜爾。非予罪,時惟 天命。」

聽,猶察也。敢,進取也。率,律也,均也,猶今言一律也。肆,懷也, 緩也。矜,憐也,哀也。言爾以不用殷士責謹我周,不知予一人惟審察有德之 賢而用,故予亦進求爾賢于天邑商,無如多化于惡,沈湎滅德,不可任用, 且有過罪,予惟均緩赦哀憐爾之舊染汙習也。是不迪簡爾者,非予有私異之 罪。天命有德,五服五章,不德,則否,是亦天意使然耳。

王曰:「多士,昔朕來自奄,予大降爾四國民命。我乃明致天罰,移爾 遐逖,比事臣我宗多遜。」

奄,郁也,奄國當在今山東兗州府東南境。四國,管、蔡、商、奄也。東征時,先滅武庚、管、蔡,而後踐奄。移,遂也,遷徙也。遐,當作嘏,遠也,長也。逖,亦遠也。比者,親輔之意。宗,宗周也。多,宜也,所安也。遜,悉也,順也。言昔我東征至伐奄而歸,大下于爾四國教命,今乃明致天罰,但遷爾于此,以遠爾故土之敝俗,近臣事我宗周,宜遜順以從我之令也。

王曰:「告爾殷多士,今予惟不爾殺,予惟時命有申。今朕作大邑于茲 洛,予惟四方罔攸賓,亦惟爾多士攸服奔走,臣我多遜。

申,猶約束也。賓,擯也,卻也。攸,跾也,長也。服,猶事也。言爾

民之梗命者,不忍汝殺,故爲是誡命,有以約束爾也。今我作大邑于此洛, 雖四方之人,無有擯棄,豈擯棄爾多士乎?亦思爾多士長服奔走,而臣我宜 順也。

爾乃尚有爾土,爾乃尚寧幹止,

尚,庶幾也。寧,寍也,安也。幹,當作榦,猶言身體也。止,猶居也。 言爾庶幾有爾樂土,爾庶幾安爾身軀,生養死葬于此也。

爾克敬,天惟畀矜爾;爾不克敬,爾不啻不有爾土,予亦致天之罰于爾躬!

畀,與。矜,憐也。啻,適,相敵之詞,猶言但也。言爾能恭敬遜順, 則天嘉與之憐愛之。爾不能敬遜,爾不但無所安居樂業,天將罰汝之罪,則 予亦致天之罰于爾身矣。蓋以儆懼之也。

今爾惟時宅爾邑,繼爾居;爾厥有幹有年于茲洛。爾小子乃興,從爾 遷。」

四井爲邑。居,讀如懋遷有無化居之居,猶儲蓄居業也,蓋兼士、農、工、賈言之。有幹,有安定之身體;有年,有久長之歲月。小子,謂其子孫也。與,猶盛也。從,自也。言今爾惟是士農各居爾邑,工賈各繼爾居,爾其安身長久于此洛,爾世世子孫之蕃育興盛,自爾今日之遷基之也。蓋又以 獎勵之也。

王曰:「又曰時予,乃或言爾攸居。」

「王曰」下當有脫文。或,有也。「或」下「言」上,據《唐石經》脫一 「誨」字。攸,跾也,長也。言此時予乃有誨言,不敢有後命也,爾其長居 于此乎?

無 逸

《敘》曰:「周公作《無逸》。」《史記·魯周公世家》曰:「周公恐成王 肚,治有所淫泆,乃作《毋逸》。」按:公居攝之六年,畱于洛邑,成王即辟 于周。爲王嗣位之十有一年,公恐正位後有所淫泆,乃作此篇,以誠王也。 無,毋也,禁止之詞也。逸,佚也,安樂之意。蔡邕石經作劮,則漢時俗字 也。

周公曰:「嗚呼!君子,所其無逸。

嗚呼,疊韻連語,吁嗟之詞也。有所歎美,有所傷痛,隨事有義也。君子,猶《洛誥》之子明辟,謂成王也。今已即辟,故先言君,後言子也。所,處也,止居也。周公歎息,言君子今已即辟,當以憂勤惕厲自處,無耽于安佚,惟以爲君爲樂也。鄭以君子謂在官長者,恐非。此篇起語神理。

先知稼穡之艱難,乃逸,則知小人之依。

稼,耕種也;穡,收穫也。艱,土難治也;難,亦艱之假借。艱難二字, 古時連語也。依,倚恃也。言先當知稼穡之勞苦,乃可享玉食之安樂,則知 朝饔夕飧,小民之所依賴者,首在此也。

相小人,厥父母勤勞稼穑,厥子乃不知稼穑之艱難,乃逸乃諺。既誕, 否則侮厥父母曰:『昔之人無聞知。』」

相,視也。諺,悍也,剛彊也。誕,大言也。否,不也。則,猶法也。 侮,謾罵也。昔,昨也,累日也,久遠之詞。言視彼小民,其父母勤勞稼穑 而刱其業,其子安享其成,乃不知稼穑之艱難,乃偷安乃彊悍,既乃驕誣不 法,反輕慢其父母,曰老人愚無聞知,不自安樂也。此因上文方言稼穡,即 引以喻王業之守成非易,猶《大誥》言厥父蕃,子乃弗肯播,矧肯獲也。

周公曰:「嗚呼!我聞曰:昔在殷王中宗,嚴恭寅畏,天命自度,治民 祗懼,不敢荒寧。肆中宗之享國七十有五年。

中宗,太戊也,湯之元孫,商第九世王也。有桑穀之異,懼而修德,殷道復興,故廟號爲中宗也。嚴,儼也,矜狀皃。恭,肅也。寅,居敬也。畏,恐也。度,圖謀也。祗,亦敬也。懼,亦恐也。荒,妄也。廢,亂也。寧,盜也,安也。享,猶受也。此下舉殷先哲王以爲訓,言中宗能無逸如此,故享國久長也。

其在高宗,時舊勞于外,爰暨小人。作其即位,乃或亮陰,三年不言。 其惟不言,言乃雍。不敢荒寧,嘉靖殷邦。至于小大,無時或怨。肆高 宗之享國五十有九年。

高宗,武丁也,小乙之子,湯十一世孫,商之二十二世王也。舊,久也, 長也。爰,于也,詞也。暨,息也,與也。作,起也。亮,當作倞,讀爲梁。 陰,讀爲闇,廬也。梁闇,廬有梁者,所謂柱楣,三年之喪居之也。言,發 號施令也。雍,當作雝,猶龢也。嘉,美善也。靖,安靜也。小大,謂臣民也。言高宗爲太子時,將師役于外,伐鬼方之國,至于三年,與小人習久,故知艱難也。及起而即位,居小乙之喪,政令一聽于冢宰。而三年中,時有所言,則皆合于道,羣臣無不和諧也。不敢妄作,亦不敢偷安,能善安天下,無小無大,無有怨王之時,故亦享國久長也。《史記》云:「武丁修政,行德天下,咸驩殷道,復興。」此之謂也。

其在祖甲,不義惟王,舊為小人。作其即位,爰知小人之依,能保惠于 庶民,不敢侮鰥寡。肆祖甲之享國三十有三年。

祖甲、武丁子、祖庚弟也、湯十二世孫、商之二十四世王也。義、誼也、人所宜也。保、養也。惠、愛也。言祖甲有兄祖庚、而祖甲賢、武丁欲立之。祖甲以廢長立幼爲不義、逃亡民間、故久爲小人。及祖庚崩、乃起而即位。故知小人之依、而能愛養庶民、不敭鰥寡、其享國亦三十有三年也。按:祖甲、王肅、皇甫謐俱以爲太甲。蔡邕《石經》「自時厥後」四字在「高宗之享國百年」下、計其字數、此節當在中宗之上。《國語》又云:「帝甲亂之七世而隕」、故有爲先盛德後有過之說、又有以享國多少爲先後之說。然據《竹書紀年》、太甲祗十二年、一不合也;先子孫而後祖宗、于言爲不順、二不合也;舊爲小人,與高宗之爰暨小人異解、三不合也;太甲史稱太宗、不稱祖、四不合也;《熹平石經》既闕其文、亦不足據、五不合也。觀下文自殷王中宗、及高宗、及祖甲、及我周文王、自以世代先後爲敘、故曰及。以本經證本經可矣,何必以傳記證經乎?

自時厥後立王,生則逸,生則逸,不知稼穡之艱難,不聞小人之勞,惟 耽樂之從。自時厥後,亦罔或克壽。或十年,或七八年,或五六年,或 四三年。」

祖甲之後有廩辛、庚丁、武乙、太丁、帝乙、受辛六王。據經年數,則《史記》庚丁之二十一年,帝乙之三十年,受辛之三十二年,俱不足信也。耽,媅也,樂之久也。壽,享國之壽也。

周公曰:「嗚呼!厥亦惟我周太王、王季,克自抑畏。

上文既稱商王以爲法戒,乃又述祖德以示之範也。太王當在殷廩辛、庚丁、武乙時,王季當在太丁時,文王在帝乙、受辛時。抑,猶言自貶自屈也,故稱謙抑。

文王卑服,即康功田功。

卑, 庳也, 猶下也。卑服, 如堯之鹿裘、絓履, 禹之惡衣、布服也。康功, 安民之功。田功, 養民之功。

徽柔懿恭,懷保小民,惠鮮鰥寡。自朝至于日中昃,不遑暇食,用咸和 萬民。

徽,墩也,墩即媄字,猶善也。柔,猶仁也。懿,嫥,傳久而美也。恭,肅也。懷,念思也。保,猶安也。惠,愛也。鮮,善也,猶親也。遑當作皇, 讀爲麼,寬也,閒暇也。咸,誠也,龢也。和,龢也,調也,猶睦也。言文 王有善仁美肅之德,念安小民,愛親鰥寡,自朝至于日中日晷,尙無寬閒之 候以進食,所以勤勞不自逸者,惟以龢睦萬民爲事也。

文王不敢盤于遊田,以庶邦惟正之供。文王受命惟中身,厥享國五十年。」

盤、昪也、喜樂兒。遊、當作逕、與游分爲兩字、邀也。田、畋也、獵也。正、讀爲政。供、讀爲恭。中身、中年也。文王受帝乙之命嗣王季爲君,時年四十七、以明年元年爲數、故曰享國實五十年也。言文王不敢遨遊田獵而逸樂、以岐爲眾國所取法、惟政事之敬承也。故其即位已中身、而享國仍有五十年之久也。

周公曰:「嗚呼!繼自今嗣王,則其無淫于觀、于逸、于遊、于田,以 萬民惟正之供。

淫,猶放恣也,觀臺榭之樂也。逸,當據蔡邕《石經》作酒。正,當作 政。供,當作恭。諸侯曰萬民,皆取法于君身者,故下文曰「非民攸訓」。

無皇曰:『今日耽樂。』乃非民攸訓,非天攸若,時人丕則有愆。無若 殷王受之迷亂,酗于酒德哉!」

無,毋也。皇,愿也,寬也。耽,媅也。攸,所詞也。訓,說教也。若,順也。時,是也。則,法也。愆,過也。迷,惑也。亂,嚴也。酗,當作詢,醉醫也。德,惠也。言毋自寬曰,今日暫爲媅樂,夫媅樂乃非所以教民,非所以順天,是人則傚之,皆大有過矣。其最宜戒者,愼無如紂之迷惑悖亂沈湎于酒也。

周公曰:「嗚呼!我聞曰:『古之人猶胥訓告,胥保惠,胥教誨,民無或

胥壽張為幻。』

胥,相也,實器也,彼此俌助之意。猶,尚也,有故之詞也。或,有也。 譸張,疊韻連語,誑也。或作輈張,作侜張,作侏張,作朱張,皆同。幻, 眩也,相詐惑也。言古之人,君明臣良,尚相爲訓告,善則相與安順,過則 相與箴規,故下民化之,亦無有相欺誑爲眩惑者。

此厥不聽,人乃訓之,乃變亂先王之正刑,至于小大。民否則厥心違怨, 否則厥口詛祝。」

聽,猶從也。刑,荆也,法也。違,韋也,背也。詛,詶也。祝,將命也。以言告神曰祝,請神加殃曰詛。言不從古之人聽言納諫,則奸邪之人乃訓之以非法,乃變亂先王之正法,至于小事大事皆然。故下民或則其心違怨,或且其口詛祝也。

周公曰:「嗚呼!自殷王中宗及高宗及祖甲及我周文王,茲四人迪哲。 厥或告之曰:『小人怨汝詈汝。』則皇自敬德。厥愆,曰:『朕之愆。』 允若時,不啻不敢含怒。

茲,此也,實紫也,識詞也。迪,導也。哲,智也,謂哲王也。詈,罵也。皇,慝也,寬大也。允,信。若,如。時,是也。言此四人之不自安逸,所以開導後之哲王。凡爲君者,皆當法之者也。其或告四人曰:小民怨汝詈汝,則心寬大而自敬其德,增修善政;其言我之過,則曰朕之過,信如是,則不但不敢含怒,乃正欲屢聞之,以知己政得失之源也。

此厥不聽,人乃或壽張為幻,曰小人怨汝詈汝,則信之,則若時,不永念厥辟,不寬綽厥心,亂罰無罪,殺無辜。怨有同,是叢于厥身。」

辟, 擘也, 法也。綽, 緩也。叢, 聚也。言不聽從四王之所迪, 奸邪之 人乃狂眩于我, 告我曰: 小人怨汝詈汝, 則遂信之。如是, 則不長念國之常 法, 心不寬緩, 必至輕則亂罰無罪, 重則殺戮無辜, 則凡民無不怨之叢聚其 身, 而君亦危矣。

周公曰:「嗚呼!嗣王其監于茲。」

監,讀爲鏡,鏡所以自照,《詩》「殷監不遠」,《左傳》「天奪之監」,皆「鏡」字也。

君 奭

《敘》曰:「召公爲保,周公爲師,相成王,爲左右。召公不說,周公作《君奭》。」按:《史記》云:「周公踐祚,召公疑之,故不說。」是謂此篇作于居攝之初。馬融云:「召公以周公攝政致太平,功配文武,不宜復列在臣位,爲公貪寵,故不說。」《後漢·申屠剛傳》太子賢注云:「周公還政宜自退,今復爲相,故不說。」是皆謂作于返政之後。愚以爲周公畱洛二載,王正位于西京,召公輔之。其時王之左右近臣有與召公不合者,故召公不說,而欲去位,周公畱之,作此篇也。左右,如《立政》所言王左右綴衣趣馬之屬,周公或因是而作《立政》歟?《書序》相成王(絕句),爲左右(絕句),爲,猶因也。豈成王寵臣有儉人者得罪,司寇蘇公將順王恉不置之法,召公欲斥之而不能,故不說歎?雖舊說相傳無解此者,「左右」何人,亦無可考,然情事當如是。周召賢聖何至相疑,《書》編第在《多士》、《無逸》後,必非踐祚之始矣。師保者,天子三公之官。成王時,太師周公,太保召公,太傅畢公,非《周禮》師氏、保氏、中下大夫職也。馬融以大夫之官釋師保,分陝二伯解左右,皆非是。

周公若曰:「君奭!

君,尊偁也。奭,召公名,與周同姓,蓋周之支族。劉向、王充、皇甫 諡皆以爲文王子,非也。

弗弔天降喪于殷,殷既墜厥命,我有周既受。我不敢知曰厥基永孚于休。 若天棐忱,我亦不敢知曰其終出于不祥。

墜,當作隊。休,喜也,慶也。若,順也。棐,輔也。忱,誠也。祥,福也。言天弗善于殷而喪之,我周既受之,然不敢知基業果能長信于休美而順天俌我之心乎?抑不敢知終久亦將出于非福乎?蓋天命之吉凶,皆不可知。深言王業之不易保,不可無人以輔沖子也。以下反復言之皆此意,甚言召公之不可去也。

嗚呼!君已曰時我,我亦不敢寧于上帝命,弗永遠念天威越我民;罔尤 違,惟人在。我後嗣子孫,大弗克恭上下,遏佚前人光在家,不知。

時,是也。越,粵也,于也。尤,就也,怨咎之意。違,韋也,背也。 人,賢臣也。上,天;下,民也。遏,止也。佚,失也。「時我」至「惟人在」, 皆召公平日之言也。歎息言:君曾曰輔成周業是我之責,故我不敢苟安于上帝,今日右周之命而不念將來之或致天威也。于我民之無怨咎而背叛者,惟恃賢臣在朝耳。周公乃云:君言如此,設使我後嗣子孫大弗能敬天敬民以致失絕文武之光業,君雖去位,可恝然在家而不知乎?

天命不易,天難諶,乃其墜命,弗克經歷。嗣前人,恭明德,

易, 數也, 猶輕慢也。諶, 信也。經, 徑也, 猶行也。歷, 過也。經歷, 猶言更歷知道也。言命不可慢易天意, 難信乃或出于不祥而墜命者, 以弗能 更事, 弗恭上下, 以繼文武之明德也。

在今予小子旦非克有正,迪惟前人光施于我冲子。」

施, 迪也, 在旁而及曰迪。言今我畱治于洛, 非能朝夕在君之側有所匡 正, 惟蹈行文武之光業, 以遙輔我沖子耳。君何可去也?

又曰:「天不可信,我道惟寧王德延,天不庸釋于文王受命。」

寧王,武王也。延,引長也。釋,捨也,猶棄也。又言天不可信,我惟 蹈行武王之德而引長之,則天不宜棄前文王所受之命而降之不詳也。此申言 酉洛以迪前光,不能在朝同輔之意。

公曰:「君奭!我聞在昔成湯既受命,時則有若伊尹,格于皇天。在太 甲,時則有若保衡。在太戊,時則有若伊陟、臣扈,格于上帝;巫咸乂 王家。在祖乙,時則有若巫賢。在武丁,時則有若甘盤。

格,按:當讀爲感,動也,感、格雙聲字。保衡,安平之號,即伊尹也。 伊陟,伊尹之子。臣扈,湯臣,逮事大戊者也。然湯至太戊百三四十年,疑 二人同名耳。巫咸,巫官之後以官爲氏者,咸,其名也。或曰咸當作戊,見 《白虎通》,存疑。乂,變也,治也。祖乙,湯七世孫,商之十三世王也。巫 賢,巫咸之子。甘盤,惟見《漢書·古今人表》,他無所見。武丁賢相,不當 遺傅說,疑甘氏居于傅岩。般,昪也;說,兌也;昪樂,猶悅懌;一氏一地, 一名一字歟?周公厯言六賢臣,蓋謂召公可匹休于前人,不宜引去者也。

率惟茲有陳,保乂有殷,故殷禮陟配天,多歷年所。

率,律也,均也。惟,凡思也。茲,紫也,識詞也。陳,敶也,敷列也。 陟,登也。配天,謂殷禘嚳、郊冥、祖契、宗湯也。言我均徧念此六臣而陳 列之者,以皆能安治殷家之天下,故殷禮配天之祭,升此六臣,亦從與享之, 載祀六百年不廢,而多歷年所也。

天維純佑,命則商實百姓王人。罔不秉德明恤,小臣屏侯甸,矧咸奔走。惟茲惟德稱,用乂厥辟,故一人有事于四方,若卜筮罔不是孚。」

純,奄也,大也。佑,當作右,助也。則,使也,令也。實,則朝多仁賢,國不空虛也。百姓,百官族姓也。王人,猶春秋之王人,謂王官也。恤,律也,法也。明律,猶下文之迪知天威也。小臣,陪臣也。諸侯之卿,命于天子;命于其君者,皆謂之小,對王臣而言也。奔走,猶服事也。稱,禹也,舉也。乂,躄也,猶治安也。言天惟大助商王命,使商多賢才,有六臣爲之率先,而百姓王官無不執德明法,況凡外臣屛藩于侯甸之服者,亦皆稱奔走禦侮之職。惟茲所舉者,皆有德之臣,用乂安其君。故君有事于四方,則兆民奉行之,若卜筮之無不是孚,所謂言而民莫不信也。

公曰:「君奭!天壽平格,保乂有殷,有殷嗣,天滅威。今汝永念,則 有固命,厥亂明我新造邦。」

壽,長年也。平,即保衡之衡。格,即格于皇天之格。伊尹歷事四王,故曰壽。六臣獨言伊尹者,守成之初,太甲猶成王也。有殷嗣,謂紂也。亂,治也。新造邦,謂洛邑也。言天壽伊尹,使之保安殷家,多歷年所,至紂不善,無一賢臣,天遂滅之威之。汝可不監此哉!今汝長念,則有以堅固周家之天命,而其治功亦光明于我新造之國矣。蓋言我治王國,汝輔君身,其功一矣。

公曰:「君奭!在昔上帝,割申勸寧王之德,其集大命于厥躬?

割,蓋也,發語之詞也。申,猶緟也。勸,勉也。寧王,武王也。集,猶安止也。按:此節爲倒敘之文,下文「武王惟茲四人,尚迪有祿」,即天之壽,此賢聖既勉文王之德,又重勉武王之德也。下文「後暨武王誕將天威,咸劉厥敵」,即所謂集大命于其躬也。或曰,「割申勸」句宜從《禮記‧緇衣》作「周田觀文王之德」。田,當作由,周、由疊韻連語,猶《離騷》「周流觀乎上下」也。存參。

惟文王尚克修和我有夏;亦惟有若虢叔,有若閎夭,有若散宜生,有若 泰顛,有若南宮括。」 修,猶治理也。夏,中國也。號,封國名,《地理志》之西號也,後爲晉獻公所滅,在今陝西鳳翔府寶雞縣。叔,其行第也。文王之弟有號仲、號叔,其封在今河南開封府榮澤縣者,仲之國,所謂東虢也。閎、散宜、泰、南宮,皆氏也;夭、生、顚、括,皆名也。四臣亦稱四友,《詩》所謂「疏附先後,奔走禦侮」也。不及呂望者,文王末年,舉之以遺武王者也。五臣事蹟罕見,惟文王羑里之囚,《大傳》言四友獻寶于紂,以免于難,其事最著。而《淮南》但稱生,《史記》兼稱夭、顚,《帝王世紀》兼稱括,亦傳聞異詞也。《晉語》:「文王咨于二號,度于閎夭,謀于南宮」,《墨子·尚賢》云:「文王舉閎夭、泰顚于置網之中,授之政」,則宜《周南·兔쮵》之詩所由作也。言文王修和我有夏,賴有此五臣。修和者,即崇侯虎所言「積善累德,諸侯皆向之」也。

又曰:「無能往來,茲迪彝教,文王蔑德降于國人。

往來,猶奔走先後也。迪,導也。蔑,無也。降,下也。言設使無五臣 能爲之奔走先後以導引常法,則文王雖修德于身,亦無以徧及于國人。反復 言之,以申其意也。

亦惟純佑秉德,迪知天威,乃惟時昭文王迪見,冒聞于上帝。惟時受有 殷命哉。

迪,進也。時,是也。昭,劭也,勉也。見,建也,樹立也。冒,喟也, 低目視也。聞,聽知聲也。言亦如殷之純佑命,百姓王人罔不秉德明恤,乃 惟是五臣勉文王進建功業,文王之德見聞于天,惟是之故,乃受有殷命也。

武王惟茲四人尚迪有祿。後暨武王誕將天威,咸劉厥敵。惟茲四人昭武王惟冒,丕單稱德。

四人,虢叔已死,惟夭、生、顚、括存也。有禄,長年有壽也。暨,息也,與也。將,將也,猶奉也。咸,減也,猶損也,《左傳》「克減侯宣多」。或曰党也,絕也,亦通。劉,即鎦字,殺也。敵,殷紂也。《逸周書・世俘》曰:「咸劉商王紂」是也。「昭武王惟冒」,猶上文「昭文王迪見,冒聞于上帝」,承上爲句,省文也。丕,大也。單,殫也,盡也。稱,偁也。德,悳也。《史記》云:武王克商,祭社,時散宜生、太顚、閔夭皆執劍以衛,又命南宮括散財發粟,展九鼎寶玉,命閔夭封比干墓。《說苑》云:「武王伐紂,至有戎之隧,大風折旆,散宜生曰:『此妖歟?』武王曰:『天落兵也』。」此其

事也。言武王時,天予四人以壽,後與武王大奉天威,減黜其敵,惟此四人 勉武王進建功業,見聞于天,天下盡偁武王之德焉。勖召公亦當思匹休于四 人也。

今在予小子旦,若游大川,予往暨汝奭其濟。小子同未在位,誕無我責 收,罔勖不及。耇造德不降我則,鳴鳥不聞,矧曰其有能格?」

濟,渡也。責,績也,猶言責任也。收,糾也,猶督察也。耇,老也。造,就也,成也。降,下也,降心相從之意。鳴鳥,鳳也。《周語》:「周之興也,鸞鸞鳴于岐山。」言文武時也。鸞鸞,鳳之別名。格,如上文「格于皇天」、「格于上帝」也。言當今之時若大水,我惟與汝共渡耳。成王雖即辟,與未即辟時同也。當輔助啓導之,然我已受命畱後,非朝夕于君側,則大非我之責任,雖欲督察之,無能相勉,蓋鞭長不及矣。老成之人,謂召公也。召公若自高其德,以左右之,故不肯降心相從,則周業恐不能守成。在昔鳳鳴之瑞,不能再聞于今矣。況能感動天帝如伊尹、陟、扈之時乎?勸其勿以小嫌介意而欲求去也。

公曰:「嗚呼!君肆其監于茲!我受命無疆惟休,亦大惟艱。告君,乃 猷裕我,不以後人迷。」

肆,今也。監,鏡也。疆,猶竟也,竟猶窮也。休,喜也。猷,當作猶, 讀爲儀,猶宜也。裕,猶寬也。後人,對前人而言謂成王也。迷,失道也。 歎息言君今其監于我所言乎?我周受命,雖有無窮之喜,而守成亦大惟艱。 故勸君乃宜寬大其心,不可褊急,當自謂我不忍捨去,使成王失道而迷惑也。

公曰:「前人敷乃心,乃悉命汝,作汝民極。曰:『汝明勖偶王,在亶乘 茲大命,惟文王德丕承,無疆之恤!』」

前人,謂武王也。敷,做也。悉,盡也。極,中也。明,朚也。勖,勉也。偶,當作耦,猶相匹相輔也。亶,擅也,專也。乘,讀爲丞,翼輔也。惟,思也。承,受也。恤,憂也。周、召同受武王顧命,故將述武王之命,而言前人布其心腹乃詳悉,命汝以建汝民之中,其言曰:汝當毋暇毋怠,黽勉立朝,勿以其爲君也而有所顧忌,當如耕之有耦,相輔而行,在于專一其心,以翼俌此天命。我無德也,當長思文王之德以大受此無窮之憂耳。武王付託之言如此,其諄摯而君忍言去乎?

公曰:「君!告汝,朕允保奭。其汝克敬,以予監于殷喪大否,肆念我 天威。

允,誠也。保,太保,召公官也。偁其官而名之,欲其思所任也。以, 與也。否者,閉而亂也。肆,長也。言告汝以我之誠,其惟汝能敬德以佐王, 庶幾與予俱監于殷之大亂喪亡,長念我天威,以助我周家乎?

予不允惟若茲誥,予惟曰:『襄我二人,汝有合哉?』言曰:『在時二人。』 天休滋至,惟時二人弗戡。其汝克敬德,明我俊民,在讓後人于丕時。

允,誠也。襄,遐也,治理也。合,今所用之荅字也。在時之時,是也。 滋,益也。戡,任也,實壬也,猶擔荷也。讓,攘也,推遜也。言我不誠而 惟若此相誥乎?思予曩日贊襄王業,在我與汝二人,汝不嘗荅我哉!亦言曰: 「在是二人也。」惟將來天休益至,其時我二人弗敢任,當則惟汝能敬德明 揚我賢俊舉以自代推讓後人在此大盛之時耳!而今則豈汝去位之時乎?按: 公所期天休之至,其後信然。《尚書大傳》「三苗貫桑,葉而生,同爲一根」, 又「越裳國,重九譯,來朝獻白雉」、《詩‧卷阿》「鳳凰于飛」,鄭箋:「其時 鳳凰至,因以論焉」,皆是也。

嗚呼!篤棐時二人,我式克至于今日休?我咸成文王功于不怠丕冒,海 隅出日,罔不率俾。」

篤,뙬也,學也。式,試也,用也。咸,愈也,皆也。冒,晴也,覆也。 率,述也,循也。俾,猶從也。歎息言學俌王室,曏在我二人,我周用能至于 今日之美,我與汝皆當成就文王之功于不懈,庶大覆被天下至于東海日出之 區,人民無不循我周之法度,莫不順從也。《爾雅》:「東至日所出爲太平。」 文、武並都西北,以東南爲遠,故云然。

公曰:「君!予不惠若茲多誥,予惟用閔于天越民。」

惠,慧也,才智也;不惠,猶言不敏也。閔,憂也。越,度也,猶及也。 言予不敏,如此多誥,予亦惟用憂于天命,人心之難保,不憚觀縷以畱君耳。

公曰:「嗚呼!君!惟乃知民德亦罔不能厥初,惟其終。祗若茲,往敬 用治!」

乃,猶汝也。民德,猶言凡人之德也。祗,當作祇,讀爲啻,但詞也。

歎息言:惟君固知凡民之德,往往無不能勉其始,而鮮克有終,然惟終之爲 貴也。我所言盡此,君可往就爾位,敬以圖治,愼勿不說而思去也。其後召 公既相成王,又相康王,再世未釋其政,則感動于周公之言也深矣。

成王政

《敘》曰:「成王東伐淮夷,遂踐奄,作《成王政》。」按:踐,讀爲殘, 猶滅也。奄,都也,國在淮夷之北。周公東征四國是皇,當在成王嗣位之五年。 而篇編于此者,鄭康成曰:「未聞其說也」。政,馬融本作征,是也。此篇乃 亡于秦項之火。

將蒲姑

《敘》曰:「成王既踐奄,將遷其君于蒲姑。周公告召公,作《將蒲姑》。」 蒲,一作薄。奄既滅其君,佞人故欲徙之于齊地,使服于大國。按:《大傳》 以蒲姑爲奄君名,殆非也。蒲姑,在今山東青州府博興縣東南。《左》昭二十 《傳》所稱蒲姑氏者,蓋奄君遷于此地,遂追偁爲蒲姑氏耳。此篇亡于秦項 之火。

尚書古注便讀 卷之四下

元和朱駿聲豐芑甫集訂

蔡仲之命

《敘》曰:「蔡叔既沒,王命蔡仲踐諸侯位,作《蔡仲之命》。」蔡仲, 蔡叔之子也。蔡國,故城在今河南汝寧府上蔡縣西南十里。此篇原第在《囧命》之後,《費誓》之前。自是編篇錯亂,故僞孔擬其文而移次《君奭》後。 此篇亡于秦項之火。

惟周公位冢宰,正百工,羣叔流言。乃致辟管叔于商;囚蔡叔于郭鄰,以車七乘;降霍叔于庶人,三年不齒。蔡仲克庸祗德,周公以為卿士。叔卒,乃命諸王邦之蔡。

「周公爲太宰」、《左》定四《傳》祝佗之言也。「降辟二叔,王子祿父北奔,管叔經而卒,乃囚蔡叔于郭陵。」《周書·作雒》文也。「成王殺管叔而蔡蔡叔,以車七乘,徒七十人。」亦祝佗之言也。「三年不齒」、《周禮·大司寇職》文也。「其子蔡仲改行帥德,周公舉之以爲己卿士,見諸侯而命之以蔡。」亦祝佗之言也。

王若曰:「小子胡,惟爾率德改行,克慎厥猷,肆予命爾侯于東土。往 即乃封,敬哉!爾尚蓋前人之愆,惟忠惟孝;爾乃邁迹自身,克勤無怠, 以垂憲乃後;率乃祖文王之彝訓,無若爾考之違王命。

「聰聽祖考之彝訓」、《酒誥》文也。「其命書云:『王曰:胡,無若爾考之違王命也』」、《左》定四《傳》祝佗所引古文也。「乃祖」二字見《盤庚》。然《盤庚》以偁其臣民之祖仲之祖,固即王之祖也,豈得偁乃祖?

皇天無親,惟德是輔。民心無常,惟惠之懷。為善不同,同歸于治;為 惡不同,同歸干亂。爾其戒哉!

「皇天無親,惟德是輔。」《左》僖五《傳》宮之奇引《周書》也。

慎厥初,惟厥終,終以不困;不惟厥終,終以困窮。

「慎始而敬終,終以不困。」《左》襄二十五《傳》衛太叔文子引《逸周書·常訓》篇文也。

懋乃攸績,睦乃四鄰,以蕃王室,以和兄弟,康濟小民。率自中,無作 聰明亂舊章。詳乃視聽,罔以側言改厥度。則予一人汝嘉。」王曰:「嗚呼!小子胡,汝往哉!無荒棄朕命!」

「以蕃王室」、《左》襄二十九《傳》文也。「舊章」見《詩・大雅・嘉樂》 篇。「予一人汝嘉」、見《左傳》。「無荒失朕命」、《解庚》文也。

多 方

《敘》曰:「成王歸自奄,在宗周,誥庶邦,作《多方》。」按:方,傍也,猶邊際也。《成王政》《將蒲姑》《多方》三篇,僞孔以爲成王即政後淮夷又叛,王親征之。此鑿空臆說,不可信。紬繹經文,是即征四國之事。歸奄後,或尙有反側者,故誥教之,並示以遷洛之意也。遷洛當距此時不遠,非必成周既成後始遷也。《多士》之誥,則在成周既成耳。

惟五月丁亥,王來自奄,至于宗周。

《書·大傳》云:「周公攝政一年救亂,二年克殷,三年踐奄,四年建侯衛,五年營成周,六年制禮作樂,七年致政于成王。」愚按:武王崩于乙亥年冬十二月,成王生丙寅年,十歲至戊寅年三月免喪,此二十七月內,周公爲太宰,百官綜己以聽,蓋常禮,不在攝政七年之中。管蔡流言,當是戊寅年三月後,因公之不返政而然。公因託二公攝政而自避位,居東都二載。至成王感悟郊迎,當在庚辰年之七八月。此二年中,太公、召公攝政,不得屬之周公。周公攝政,當自庚辰年起,遞數七年也。庚辰誅管叔,辛己黜武庚,壬午踐奄,癸未建候衛,甲申營洛邑。成王時年十九,即辟于鎬京,正天子位。周公畱洛。即辟者,前公居攝時,成王幼,所行政教號令,公自專,輒不報,今則凡事關白于王也。乙酉、丙戌二載,公畱洛,行天子事,仍在攝

政七年之中。至丁亥返政,乃就臣位,匑匑如畏,成王時年二十有二矣。若制禮作樂,自是七年中事,非一年可成,不得定爲何年也。此經「五月丁亥」,蓋成王嗣位之七年,周公居攝政之三年辰月日也。王來自奄者,公東征時,王亦親往。前誅管、蔡,黜武庚,亦然。惟有事則往,事畢則歸,不同公之 酉征三年耳。宗周,西都鎬京也。

周公曰:「王若曰:猷!告爾四國多方,惟爾殷侯尹民,我惟大降爾命, 爾罔不知。

猷,當作猶,發語詞也。四國,管、蔡、商、奄也。多方,庶邦也。殷 侯,指武庚也。尹,治理也。罔,毋也。降,隆也,猶尊重也。言告爾四國 多方之君,及前殷侯所治之民,我惟大隆重爾命,欲保全爾,爾毋不知也。

洪惟圖天之命,弗永寅念干祀,

洪,大也。圖,畫計也,窺竊謀度之意。寅,居敬也。言管、蔡、商、 奄皆窺竊天命,弗長敬念以保守祖宗之祭祀。自取滅亡也。

惟帝降格于夏。有夏誕厥逸,不肯感言于民,乃大淫昏,不克終日勸于帝之迪,乃爾攸聞。

此追述周之代商,猶商之代夏,皆由天命,人必不可違天也。格,感也,動人心也。逸,泆也,淫蕩也。戚,惠也。昏,惛也,迷亂也。迪,導也。 攸,所,詞也。言天降災異以譴告感動于夏,而夏桀大肆其淫蕩,不肯有憂 戚之言加于民,乃大淫亂,不能一日勉于上天開導之意,乃爾所前聞也。

厥圖帝之命,不克開于民之麗,乃大降罰,崇亂有夏。因甲于內亂,不 克靈承于旅;罔丕惟進之恭,洪舒于民。亦惟有夏之民叨懫日欽,劇割 夏邑。

麗,羅也,猶言罔民也。崇,叢也,猶集也。甲,狎也,習也。內亂,謂有施氏女妹喜也。靈,良也,善也。旅,猶眾也。罔,無也。丕,不也。進,費也,猶財貨也。恭,龔也,給也。舒,荼也,毒苦也。叨,號也,痛呼也。懫,當作靈,忿戾也。欽,廞也,興也。劓,乂也,猶翦也。言夏桀窺竊天命,不能開于民之網,乃大降暴虐,罰戮無辜,積亂于有夏,因狎習于內嬖末喜,爲鳥獸之行,不克善承于眾民,無不以貨財貢獻之供是急,以大

荼毒于民。亦惟有夏之民號呼忿戾者,日興思亂,以翦割夏邑,《湯誓》所云 「時日曷喪?予及汝偕亡」是也。

天惟時求民主,乃大降顯休命于成湯,刑殄有夏。

時,是也。主,壹也,人所崇仰者也。顯,濕也,明也。休,喜也,美也。 刑,誅,殄絕也。言天惟是之故,求可爲民主者,乃大下光顯休美之命于湯, 俾之誅絕有夏也。

惟天不畀,純乃惟以爾多方之義民不克永于多享;惟夏之恭多士,大不 克明保享于民,乃胥惟虐于民,至于百為,大不克開。

純,奄也,大也。義,誼也,人所宜也。享,猶受也。恭,龔也,給也。 爲,僞也,作也。不克開,即上文「不克開民之麗」省文也。言天不與桀者 大矣。所以然者,乃惟桀以道誼賢德之人黜退之,使不能長享祿位;惟桀所 供職之士,大不能明保享于民之道,乃相播虐于民,至于百事所作逢長桀惡, 不能開于民之網也。

乃惟成湯克以爾多方簡,代夏作民主。

簡, 柬也, 擇也。言湯能立賢無方, 故代夏爲民主也。

慎厥麗,乃勸;厥民刑,用勸;

麗,羅也,網也。言湯不虐于民,慎恤用刑,則民知感而勉于善。刑戮 有罪,則民亦知懼而勉于善,所謂怙終、賊刑、眚災、肆赦,民乃大明服也。

以至于帝乙,罔不明德慎罰,亦克用勸;要囚殄戮多罪,亦克用勸;開 釋無辜,亦克用勸。

帝乙,祖乙也。湯七世孫,商之十三世王也。要,猶中也,會也。釋, 捨也。言商之賢王至于帝乙,無不明德慎罰如湯所爲也。

今至于爾辟,弗克以爾多方享天之命。

爾辟,紂也。言紂惡如桀,故亦不能以多方受天之命也。

嗚呼!王若曰: 誥告爾多方,非天庸釋有夏,非天庸釋有殷。

釋,捨也。周公先自歎息,而稱王命以誥之。總承上文所言,曰:此非天用意捨棄夏與殷也,自取之耳。

乃惟爾辟以爾多方大淫,圖天之命層有辭。[-]

圖天之命,苟竊天命如紂,言我生不有命在天也。曆,動作切切也,言 其動作所爲之事皆有罪狀可指也。

校勘記

[一] 府,原文及他本皆作「屑」,段玉裁《說文解字注》: 刷,俗從肖。又見下文。

乃惟有夏圖厥政,不集於享,天降時喪,有邦間之。

圖,謀劃也。集,就也,造也。時,是也。喪,亡也。間,猶代也。言 夏葉圖謀政事,昏亂暴虐,不欲就享天命之永,故天亦降是喪亡之禍而使七 十里之小邦起而代之也。

乃惟爾商後王逸厥逸,圖厥政不蠲烝,天惟降時喪。

上逸,佚也;下逸,泆也。蠲,佳也,善也。烝,承也,受也。言紂以 泆蕩爲安佚,其圖謀政事亦如有夏之不善承于天,天亦降是喪亡之禍也。

惟聖罔念,作狂;惟狂克念,作聖。天惟五年須暇之子孫,誕作民主, 罔可念聽。

聖,通明也。罔,妄也,亂也。作,爲也。狂,倨慢也。克,勝也,勝 己之私之謂克。惟,思也。五年者,文王受命八年武王即位,至十三年伐紂 也。須,顏也,待也。暇,閒也,猶寬也。言聖者妄念一生,即可漸至于狂; 狂者克念一動,亦即漸至于聖。故天思欲寬待之,覬紂或改行爲善,或紂死 而有賢子孫大作民主,遲至五年而武始代殷,此實天意,無如紂惡不悛,身 又不亡,而無可念聞也。

天惟求爾多方,大動以威,開厥顧天;惟爾多方,罔堪顧之。

顧,眷視也。堪,任也,實壬也,猶當也。言天于是求四方之可爲民主, 出災異之威以大動天下之心,開其足爲天之眷顧者,而多方之諸侯無可以當 上天之顧也。

惟我周王靈承于旅,克堪用德,惟典神天。天惟式教我用休,簡畀殷命, 尹爾多方。

典, **岐**也, 主也。式, 試也, 用也。用, 以也。教, 告也。簡, 柬也, 擇也。尹, 正也, 治也。言我周王善承于眾, 深得民心, 能任此天位, 以德

足以主天之祀,天惟用告我周以休祥,擇與以殷命,乃治正爾多方也。

今我曷敢多誥?我惟大降爾四國民命。

降,讀爲隆。言我何敢繁瑣多爲誥命乎?亦惟尊重爾四國民命,欲保全 之耳。

爾曷不忱裕之于爾多方?爾曷不夾介乂我問王享天之命?今爾尚宅爾 宅,畋爾田,爾曷不惠王熙天之命?

忱,就也,信也。裕,讀爲**繇**,導也。夾,猶俌也。介,猶助也。乂, 變也,猶安也。畋,平田也。惠,猶順也。熙,光也。言爾何不信我之教, 令爾導之于爾多方乎?爾何不輔助安我周王,同享天之命乎?我誅其君,弔 其民,故爾今尚安居樂業,居爾宅,治爾田也。爾何不順王以光天之命乎?

爾乃迪屢不靜,爾心未愛。爾乃不大宅天命,爾乃脣播天命,爾乃自作不典,圖忱于正。

迪,妯也。動,擾也。屢,當作婁,數也,猶言頻頻也。靜,竫也,安也。愛,悉也,惠沒也。宅,度也,量也。屑,動作切切也。播,讀爲判,猶棄也。典,猶法也。忱,湛也,順也。正,政也,猶刑法也。言爾乃動擾,數爲不靜,是爾心未順服從,是爾乃不大度量天命矣!爾乃動作播棄天命矣!爾乃自作不法,欲沉沒于國家之刑禁矣!可乎哉?

我惟時其教告之,我惟時其戰要囚之,至于再,至于三。乃有不用我降 爾命,我乃其大罰殛之! 非我有周秉德不康寧,乃惟爾自速辜! 」

戰,憚也。忌,難也。用,誦也,猶頌禱也。殛,誅也。康,康也,猶安也。寧,寍也,安也。《洪範》言「五福」:「三曰康寧,四曰攸好德。」速,召也。言我惟是其教告汝,我惟是其憚要囚汝,不修刑而修文,故誥汝至于再三也。所以隆重汝命,不忍置之于法也。若乃不感頌我隆重汝命之意,狎而玩之,反側無常,我不得不執法以誅罰汝矣。此非我周執德不安殘虐于爾也,乃惟爾自召罪以取禍耳。

王曰:「嗚呼!猷,告爾有方多士暨殷多士。[-]今爾奔走臣我監五祀,

監,謂三監也。祀,年也,商曰祀,告殷多士,故言祀也。五年者,自 武王封武庚後,四國未叛之前,有五年也。言爾奔走臣服于我三監者,已有 五年。

校勘記

[-]告爾有方多士暨殷多士,原文倒作「告爾有多方士暨殷多士」,文意不通,今據他 本改。

越惟有胥伯小大多正,爾罔不克臬。

越,粤也,于也。胥,讀爲糈,糧也。伯,讀爲賦,斂也。正,政也。 臬,猶準也,法也。承「奔走臣我監」而言,五年中,凡糧賦及大小之政事, 爾于其時亦無不克守法度也。義見《尚書大傳》。

自作不和,爾惟和哉;爾室不睦,爾惟和哉;爾邑克明,爾惟克勤乃事。

和,龢也,諧也。睦,亦龢也。明,朚也。言前此之叛是自作不和,爾 今惟和哉!前此之叛是爾室亦不能安和,爾今惟和哉!爾在茲新邑,能黽勉 相勸,各圖其本業,斯爲能勤,爾切己之事也。蓋將遷殷頑民,而先示以遷 之之意也。

爾尚不忌于凶德,亦則以穆穆在乃位,克閱于乃邑謀介。

忌,諱惡也,古文作諅,義同。凶德,指從前之叛也。穆穆,重言形況字,和敬皃也。閱,猶更歷也,積日曰閱。介,价也,善也。言爾尚無以前此叛逆之凶德,忌諱于懷,恐我周之異視爾,爾亦自今以始,則和敬以居位,能積久相安于爾邑,斯爲圖謀之善也。上節告殷民,此節告殷臣也。猶《多十》之言「爾小子乃興」也。

爾乃自時洛邑,尚永力畋爾田,天惟畀矜爾,我有周惟其大介賚爾,迪簡在王庭。尚爾事,有服在大僚。」

洛邑,九畢之地也。《周書·作雒》,云「俘殷獻民,遷于九畢」,孔鼂注:「九畢,成周之地。」介,猶助也。資,予也。迪,導也。簡,柬也。庭,廷也。尚,上也,加也。服,艮也,猶用也。僚,官也。言爾乃自是遷于洛邑,尚長勤治爾田,爲安居恭順之民,天惟予爾憐爾,我周惟其大助爾予爾。有賢者,則進擇于朝,授之以職事。若有才德出眾者,則用之爲大官。此又總上民而勸勉之以殷士民嘗有夏迪簡在王庭有服在百僚之言也。

王曰:「嗚呼!多士,爾不克勸忱我命,爾亦則惟不克享,凡民惟曰不

享。爾乃惟逸惟頗,大遠王命,則惟爾多方探天之威,我則致天之罰, 離逖爾土。」

忱,就也,信也。逸,泆也,放蕩也。頗,猶傾邪也。探,取也。致, 送詣也。離,讀爲剺,猶絕也。歎息言:爾多士,若不能勉信我命,爾亦則 惟不能受此福,爾凡民,亦惟不能受此福,爾乃放泆,頗褒大遠棄王命,則 惟爾多方自取上天之威怒,我則行天之罰放流之,以絕爾遠爾于此土也。

王曰:「我不惟多誥,我惟祗告爾命。」

袛,敬也。命,天命也。言我不憚爲此多誥者,我惟敬告爾天命之當然 也。

又曰:「時惟爾初,不克敬于和,則無我怨。」

時,是也。初,猶始基也。言今與爾更始,若又不能敬于和,則自取誅 戮,可無我怨,勿謂我誥之不早也。

立 政

《敘》曰:「周公作《立政》。」按:《立政》篇本在《周官》之後。《史 記》云:「周之官政未次序,于是周公作《周官》,官別其宜。作《立政》,以 辨百姓,百姓說。」按:百姓,百官族姓也。

周公若曰:「拜手稽首,告嗣天子王矣。」用咸戒于王曰:「王左右常伯、常任、準人、綴衣、虎賁。」周公曰:「嗚呼!休茲知恤,鮮哉!

咸,愈也,皆也。戒,誠也。敕,教也。託以羣臣之言,戒于王也。左右, 少又也。常伯,秦漢侍中之職;常任,漢官中常侍之職;準人,疑秦漢廷尉之職。三官即夏商之三宅,周之三事也。綴衣,疑尚衣之官,侍帷幄者。虎賁,《周禮》之虎賁氏,守王宫者也。五官皆近臣,故曰左右。恤,惠也。鮮,善也,吉也。周公託羣臣之言皆滅于王,曰:王左右之五官甚重。公歎息美此羣臣之言,而言君能知憂難,得人慎用此官,豈不善哉。

古之人迪惟有夏,乃有室大競,籲俊尊上帝迪,知忱恂于九德之行。乃 敢告教厥后曰:『拜手稽首后矣!』曰:『宅乃事,宅乃牧,宅乃準,茲 惟后矣。謀面,用丕訓德,則乃宅人,茲乃三宅無義民。』

古之人,大禹也。迪,由也。有室,卿大夫之家。競,就也,彊也。《詩》

曰「無競惟人」。籲,評也。材過千人曰俊。尊,崇也,猶奉也。忱,誠也。恂,信也。九德,《皋陶謨》所云也。宅,度也,猶審察計量也,心能制義曰度。下文「文王惟克厥宅心」,蔡邕《石經》作「維厥度心」,則宅爲度無疑。事,常任也。牧,常伯也。準,準人也。謀,煤也,愛也。面,猶外貌也。丕,讀爲不。順,訓也,猶從也。義,誼也。民,人之通偁也。言夏禹蹈行此道,左右之大夫皆賢,所招評者,俊傑以亮天功,以崇事上帝,由其人知誠信于九德之行,乃敢告教其君。曰:拜手稽首以告于君,曰:量度用此三官,茲惟君之要矣。若愛取外貌之逢迎阿諛,而用不順于德者,以此度人,則三官皆無道誼之賢臣矣。

桀德,惟乃弗作往任,是惟暴德罔後。

暴,暴也,猶惡虐也。言夏桀之爲德,惟乃不爲往日先王之任用賢才, 惟暴德之人是任,故絕世無後。

亦越成湯陟,丕釐上帝之耿命,乃用三有宅;克即宅,曰三有俊,克即 俊。嚴惟丕式,克用三宅三俊,其在商邑,用協于厥邑;其在四方,用 丕式見德。

越,度也,猶及也。陟,登也。釐,理也,猶順也。耿,光也。嚴,儼也,敬也。惟,思也。式,法也。商邑,邦畿也。言及湯登天子位,亦大順天之光命,乃用量度此三官,能就所度。自謂三官皆必用俊傑,果能所就者,皆俊傑,惟其敬用相度之大法,用能三度皆俊也。故其在邦畿之內,用以叶和于其邑,其在四方,亦以此大法顯湯之聖德也。

嗚呼!其在受德,暋為羞刑暴德之人,同于厥邦;乃惟庶習逸德之人, 同于厥政。帝欽罰之,乃伻我有夏,式商受命,奄甸萬姓。

受,紂也。暋,冒也,猶蒙蔽而彊悍也。羞,狃也,猶習也。逸,泆也, 放蕩也。欽,钱也,殺也。伻,當作抨,使也。夏,中國也。式,試也,用 也。奄,覆也。甸,讀爲定,甸定雙聲。言紂之爲德,蒙蔽彊悍,惟習刑暴 德之人同于其邦,乃惟眾習泆德之人同于其政,在位者無一俊傑之賢,故天 殺罰之,乃使我有此中夏,用商湯所受之命而覆冒奠定萬姓也。

亦越文王、武王,克知三有宅心,灼見三有俊心,以敬事上帝,立民長 伯。 灼,焯也,明也。長伯,謂在民上者也。言及我文、武,亦克知灼見宅俊 之心,與之敬事上帝,立以爲民長伯。謂所用皆賢臣,如夏之籲俊尊上帝也。

立政:任人、準夫、牧,作三事。

任人,常任也。準夫,準人也。牧,常伯也,《詩》所謂三事大夫也。

虎賁、綴衣、趣馬、小尹、左右攜僕、百司庶府。

虎寶,下大夫也。趣馬,下士也。小尹,疑即趣馬之屬圉師也。左右攜僕,疑大僕射人也。《檀弓》云:「扶尹,僕人師扶右,射人師扶左」,蓋生時贊正君服位者。百司,《周禮》之官。言司者,三十有八之類也。庶府,《周禮》大府、玉府、內府、外府、泉府、天府之類也。

大都小伯、藝人、表臣、百司、太史、尹伯,庶常吉士。

此言都邑之官也。邑有先君之廟曰都。伯,長也,對君側之臣故曰小。 藝,當作軾。表,幖也,猶民望也。尹,正也。常,讀爲掌。吉,善也,藝人 卜祝巫匠之類也。表臣爲民師表,如州長、黨正、族師之類也。此百司,謂 都邑之百司也。太史,下大夫也。尹伯,大夫職官之正,爲諸職之長,若太 史爲史官之長之類也。庶常吉士,謂眾掌各職之善士,爲士職之長也。

司徒、司馬、司空、亞、旅。

此諸侯之官也。諸侯三卿,文、武時爲諸侯,與《牧誓》所敘同也。亞, 猶次也;旅,猶眾也,再命之大夫也。

夷微、盧烝。三毫阪尹。

夷,四夷也。微、盧二國見《牧誓》。烝, 扔也, 君也。尹, 正也, 監于 其國者也。三亳,鄭氏曰:「湯舊都之民服文王者, 分爲三邑, 其長居險, 故 曰阪尹。蓋東成皋, 南轘轅, 西降谷也。」按: 阪, 陂陀崎嶇之山地也, 故 曰居險。成皋在今河南開封府汜水縣, 轘轅在今河南府偃師縣, 降谷當是函 谷,聲之轉也。漢武帝徙函谷關于新安, 在今河南府新安縣。蓋商紂暴虐, 亳之民多有歸服于文王者。各有其長, 分之爲三, 周又設官以監之, 亦爲尹 也。尹者,總微、盧、三亳而言也。皇甫謐以蒙爲北亳, 穀熟爲南亳, 偃師 爲西亳。臆刱私說不可從。

文王惟克厥宅心,乃克立茲常事司牧人,以克俊有德。

宅,《熹平石經》作「度」,是也。以,用也。言常事司牧而不言準人者, 承上省文也。言文王惟能其度心之,故乃能立茲三事之人,皆用其能。俊傑, 有德者也。

文王罔攸兼于庶言; 庶獄庶慎,惟有司之牧夫是訓用違;

言,獄辭也。愼,疑獄也。牧,常伯也。夫,準夫也。訓,順也。用,當行之事也。違,韋也,當改之事也,猶今言准駁也。言文王無所兼于獄訟之聽,惟責成司其事之常伯、準夫,獄成而告,亦順其所定當用當違之法而已。疑當時成王左右之寵臣得罪,王授意于治獄之官,不使治之,故召公不說,而求去治獄之官,即司寇蘇公也。觀周公反復述文王之德,又言勿有間之,末又評蘇公,特召之,似情事當如此也。

庶獄庶慎,文王罔敢知于茲。

茲,此也,實裝也,識詞也。

亦越武王,率惟牧功,不敢替厥義德,率惟謀從容德,以並受此不丕基。」

率,述也,循也。粒,撫安也。義,誼也。容,猶寬大也。言武王率循 安民之功,不敢廢文王所行之義德,循其謀而從其寬大之德,所以並受此大 大之基業也。

嗚呼!孺子王矣!繼自今我其立政·立事、準人牧夫,我其克灼知厥若, 丕乃俾亂;相我受民,和我庶獄庶慎。時則勿有間之,

灼,焯也,明也。若,順也。亂,治理也。相,遐也,猶助也。和,龢也,諧也。間,以我侵與其間也。歎息言:孺子今已即辟爲王矣,自今以繼我其效法文武之立政,所立常任準人、常伯,我其必能明知順德者乃大用之,使其治理以助我所受之民,和平我眾獄與眾疑獄,如是,則委任既專,我慎勿侵與之而掣其肘也。

自一話一言。我則末惟成德之彥,以乂我受民。

末,猶終也。惟,思也。彥,美上也。乂,躄也,治也。成德之彥,疑 隱指召公也。

嗚呼!予旦已受人之徽言咸告孺子王矣。繼自今文子文孫,其勿誤于庶

獄庶慎,惟正是又之。

徽,媺也,善也。媺,即媄字。文,彭也。文子文孫,成王守文之主,于武王爲子,于文王爲孫也。誤,謬也。正,大正也,治獄之官也。《周書・嘗麥》云「王命大正正刑書。」义,變也,治也。言刑讞者,天下之大公,其毋謬以私意間之,惟大正是治之也。

自古商人亦越我周文王立政,立事、牧夫、準人,則克宅之,克由繹之, 茲乃俾乂,

宅,度也。由,抽也,引也。釋,猶尋緒也。總結前文,自商至文王, 皆于三事之官,始能圖度以愼其選,繼能抽繹以盡其才,此乃所以使國家治 安也。

國則罔有。立政用儉人,不訓于德,是罔顯在厥世。繼自今立政,其勿以儉人,其惟吉士,用勱相我國家。

檢人,險詖佞人也。訓,順也。顯,縣也。勸,勉力也。相,稷也,助也。 此儉人,疑即隱指君奭,《序》所稱左右之人也。

今文子文孫,孺子王矣!其勿誤於庶獄,惟有司之牧夫。

牧夫,常伯、準夫也,即上文「勿有間之」之意。

其克詰爾戎兵以陟禹之迹,方行天下,至于海表,罔有不服。以覲文王 之耿光,以揚武王之大烈。

詰, 劼也, 謹愼也。陟, 整也, 猶履蹈也。迹, 步處也。方, 旁也, 溥也。服, 艮也, 治也。覲, 見也。耿, 明也。揚, 續也。烈, 業也。此節似非《立政》篇語氣, 與上下文皆不相承接。疑《顧命》「高祖寡命」下脫簡在此, 非用兵之時而忽言此, 是導王爲秦皇、漢武必不然矣。

嗚呼!繼自今後王立政,其惟克用常人。」

常,長也,猶恒久也。常人,有常德之人,《皋陶謨》所云「彰厥有常」也。

周公若曰:「太史!司寇蘇公式敬爾由獄,以長我王國。茲式有慎,以 列用中罰。」 愚按:是時成王左右偶有險人而王寵任之,其人或以私事觸法,或以公事獲辜,斷斯獄者,司寇蘇公也。既已成獄,而王不欲置之于法,蘇公以希旨模稜,召公必欲執法黜之,而勢有所不能,故不說而求去。周公既作《君奭》留之,因作《立政》以告誡成王,而篇終特評蘇公勸勉之。蓋一篇之結穴也。此篇編次似宜接《君奭》,而《多方》應在《多士》前也。太史司寇者,由太史而新擢爲小司寇也。太史,下大夫職;小司寇,中大夫職也。蘇,國名,當在今河南淮慶府,已姓,以國爲氏。式,依也,惕也。敬,肅也。由,以也,猶用也。列,例也,比也。中,即《呂刑》「士制百姓于刑之中」,「罔非在中」之中,猶正也。言居是職,當忧惕敬而用獄以長我王國。今茲有獄,亦宜忧惕謹慎以例用中正之罰,執法從事,不可稍有遷就也。僞孔以蘇公爲忿生,蓋據《左》成十一年《傳》「昔周克商,使諸侯憮封蘇忿生,以溫爲司寇」也。以太史爲別一官,而告以蘇公治獄之敬。按:太史非刑官,不當舍準人而反獨呼之。《詩・小雅序》「蘇公刺暴,公亦忿生之後」,稱蘇公。疑此蘇公即忿生之子,以太史而陟司寇者也。

賄息愼之命

《敘》曰:「成王既伐東夷,息愼來賀,王俾榮伯作《賄息愼之命》。」按:東夷,淮夷也。息愼,即肅愼,亦作稷愼,東北夷也。其後爲女眞,在今遼東吉林甯古塔地。武王克商,肅愼氏來貢楛矢、石砮。榮伯,周同姓,畿內諸侯入爲卿大夫者。《周語》有榮夷公,其後也。賄,財也,主國贈賓之禮。此篇亡于秦項之火。

亳姑

《敘》曰:「周公在豐,將歿,欲葬成周。公薨,成王葬于畢。告周公,作《亳姑》。」按:《尚書大傳》云:「三年之後,周公老于豐,心不敢遠成王而欲事文武之廟。後周公疾,曰:『吾死,必葬于成周,示天下臣于成王。』王曰:『公生欲事宗廟,死欲聚骨于畢。』」畢者,文王之墓地,示天下不敢臣周公也。畢,即九畢,在成周之地。「亳姑」二字,未聞其說。此篇亡于秦項之火。

周官

《敘》曰:「成王既黜殷命,滅淮夷,還歸,在豐,作《周官》。」此篇

亡于秦項之火。

惟周王撫萬邦,巡侯、甸,四征弗庭,綏厥兆民。六服羣辟,罔不承德。 歸于宗周,董正治官。

「以王命討不庭」,《左》隱十《傳》文也。「成王十九年,王巡守,侯、甸、方岳、召康公從歸于宗周,遂正百官。」《逸周書》篇文也。按:《周禮》 九服今言六。又治官之屬,專指天官冢宰,非可泛言百官也。

王曰:「若昔大猷,制治于未亂,保邦于未危。」

「治之于未亂」、《老子》之言也。

曰:「唐虞稽古,建官惟百。內有百揆、四岳,外有州、牧、侯伯。庶 政惟和,萬國咸寧。夏、商官倍,亦克用乂。明王立政,不惟其官,惟 其人。

「有虞氏,官五十;夏后氏,官百;殷二百,周三百。」《禮記,明堂位》 文也。「萬國咸寧」,《周易》文也。

今予小子, 祗勤于德, 夙夜不逮。仰惟前代時若, 訓迪厥官。立太師、 太傅、太保, 茲惟三公。論道經邦, 燮理陰陽。官不必備, 惟其人。少 師、少傅、少保, 曰三孤。貳公弘化, 寅亮天地, 弼予一人。

「立太師、太傅、太保,茲惟三公」、《鄭志》十一卷趙商所引《周官》 眞古文也。「坐而論道」、《考工記》文也。「三公典調和陰陽」、《漢書·丙吉 傳》之言也。然漢三公,乃丞相、太尉、御史大夫耳。「立三少爲之副,少師、 少傅、少保,是爲孤卿,與六卿爲九焉。」「《記》曰:三公無官,言有其人, 然後充之。」皆《漢書·百官公卿表》文也。「設四輔及三公,不必備,惟其 人。」《禮·文王世子》之文也。

冢宰掌邦治,統百官,均四海。司徒掌邦教,敷五典,擾兆民。宗伯掌邦禮,治神人,和上下。司馬掌邦政,統六師,平邦國。司寇掌邦禁, 詰姦慝,刑暴亂。司空掌邦士,居四民,時地利。

五典,本《虞書》。然周司徒掌十有二教,與唐虞五教不同。「司空執度 度地,居民山川沮澤,時四時」、《禮記·王制》文也。「天官掌邦治,地官掌 邦教,春官掌邦禮,夏官掌邦政,秋官掌邦刑,冬官掌邦事」、《周禮·小宰 之職》文也。刑,改爲「禁」,用《秋官》:「使帥其屬而掌邦禁」,而不知「士師之職,掌國之五禁之法,以左右刑罰。」禁,非刑也。改「事」爲「土」,用《左》定四年《傳》:「聃季爲司空」,又曰「聃季授土」也。

六卿分職,各率其屬,以倡九牧,阜成兆民。六年,五服一朝。又六年, 王乃時巡,考制度于四岳。諸侯各朝于方岳,大明黜陟。」

「九牧」,見《逸周書·明王之制》。「使諸侯歲聘以志業,間朝以講禮, 再朝而會以示威,再會而盟以顯昭明」,《左》昭公十三《傳》叔向之言也。[-] 僞孔以六年一會爲六年一朝,十二年一盟爲十二年一巡,顯與《周禮·大行 人》不合。且《禹貢》五服,《周禮》六服,又有九服。今前曰「六服羣辟」, 後曰:「五服一朝」,可乎?「三考黜陟」,《堯典》文也。

校勘記

[一] 此數語爲《左》昭公十二年《傳》叔向之言也。

王曰:「嗚呼!凡我有官君子,欽乃攸司,慎乃出令,令出惟行,弗惟 反。以公滅私,民其允懷。

「號令如汗,汗出而不反者也。令出而反,是反汗也。」《漢書》劉向上 封事之言也。「以私害公」,《左》文六《傳》與駢之言也。

學古入官。議事以制,政乃不迷。其爾典常作之師,無以利口亂厥官。 蓄疑敗謀,怠忽荒政,不學牆面,蒞事惟煩。

「先王議事以制」、《左》昭六《傳》叔向之言也。「惡利口之覆邦家者」、 「其猶正牆面而立也歟」、皆《論語》孔子之言也。然使不讀《論語》、「牆面」 二字、何以解之?

戒爾卿士,功崇惟志,業廣惟勤,惟克果斷,乃罔後艱。

業,大版也,用爲事業之業,此六書轉注之法。「廣業」,見《周易》,自 孔子始用之,三代無其文。《左》昭十三《傳》:「有事而無業」,亦言貢賦之 版也。

位不期驕,祿不期侈。恭儉惟德,無載爾偽。作德,心逸日休;作偽,心勞日拙。居寵思危,罔不惟畏,弗畏入畏。

「貴不與富期而富至,富不與粱肉期而粱肉至,粱肉不與驕奢期而驕奢

至。」《戰國策》平原君之言也。「恭儉豈可以聲音笑貌爲哉」,《孟子》之言也。「無載爾僞」,《左》襄三十《傳》引《詩》之文也。「居安思危」,《左》 襄十一《傳》引《書》之文也。「罔不袛畏」,《金縢》文也。「出禮不畏入畏」, 《揚雄·太元禮次七》之文也。

推賢讓能,庶官乃和,不和政厖。舉能其官,惟爾之能。稱非其人,惟爾不任。」

「推賢讓能,而安隨其後」,《荀子・非十二子》篇文也。

王曰:「嗚呼!三事暨大夫,敬爾有官,亂有政,以佑乃辟。永康兆民, 萬邦惟無斁。」

「三事大夫」、《詩》專指「三公」。此增「暨」字、欲兼括孤卿也。

君 陳

《敘》曰:「周公既沒,命君陳分正東郊成周,作《君陳》。」按:君陳, 周公八子之一,伯禽弟也,謚曰平公。成周,在王城近郊五十里內。天子之 國,五十里爲近郊,百里爲遠郊。今河南河南府洛陽縣東北二十里爲成周故 城,西北二十里爲王城故城。此篇亡于秦項之火。

王若曰:「君陳,惟爾令德孝恭。惟孝友于兄弟,克施有政。命汝尹茲 東郊,敬哉!

「驩,此其孫也。而令德孝恭」、《周語》單襄公之言也。「孝乎惟孝,友于兄弟,施于有政」、《論語》引《書》文也,[-]「孝乎惟孝」四字爲句。爲《書》割去上二字,以「令德孝恭」代之作起筆,至貽誤後人,並《論語》以「《書》云:孝乎」爲句矣。

校勘記

[一] 云,當作「文」,原書誤。

昔周公師保萬民,民懷其德。往慎乃司,茲率厥常,懋昭周公之訓,惟 民其乂。

「昔伯舅、太公,股肱周室,師保萬民」,《左》襄十四《傳》王賜齊侯 命文也。「惟民其康乂」,《康誥》文也。 我聞曰:『至治馨香,感于神明。黍稷非馨,明德惟馨。』爾尚式時周 公之猷訓,惟日孜孜,無敢逸豫。

「我聞曰」,見《康誥》。「黍稷非馨,明德惟馨」,《左》僖五《傳》宮之 奇引《周書》之文也。

「凡人未見聖,若不克見;既見聖,亦不克由聖,

「未見聖,若己弗克見;既見聖,亦不克由聖。」《禮記·緇衣》引《君 陳》之真古文也。

爾其戒哉!爾惟風,下民惟草。

「君子之德風也,小人之德草也。」《論語》孔子之言也。然下文有「草上之風必偃」句,其誼乃明。今割去下句,不知何解。此與「一簣牆面」,顯露破綻。

圖厥政,莫或不艱,有廢有興,出入自爾師虞,庶言同則繹。

「圖厥政」,《多方》文也。「出入自爾師虞,庶言同」,《禮記·緇衣》所引《君陳》眞古文也。

爾有嘉謀嘉猷,則入告爾后于內,爾乃順之于外,曰:『斯謀斯猷,惟我后之德。』嗚呼!臣人咸若時,惟良顯哉!

「爾有嘉謀嘉猶,入告爾君于內,女乃順之于外,曰:此謀此猶,惟我君之德。嗚呼!是惟良顯哉。」《禮記·坊記》引《君陳》之眞古文也。「古之良大夫,其事君皆如是。」董仲舒《春秋繁露·竹林》篇引此數語而釋之者也。然此數語,必非成王之言。出之成王,是導諛也。當是篇中夾人臣之言,如《顧命》篇體也。僞書竟作王言,謬矣!又「咸若時」,見《皋謨》。

王曰:「君陳,爾惟弘周公丕訓,無依勢作威,無倚法以削,寬而有制, 從容以和。殷民在辟,予曰辟,爾惟勿辟;予曰宥,爾惟勿宥,惟厥中。 有弗若于汝政,弗化于汝訓,辟以止辟,乃辟。狃于姦宄,敗常亂俗, 三細不宥。

「公曰:宥之。有司曰:在辟。」《禮記・文王世子》文也。

爾無忿疾于頑,無求備于一夫。必有忍,其乃有濟;有容,德乃大。簡

厥修,亦簡其或不修。進厥良,以率其或不良。

「無求備于一人」,《論語》文也。「必有忍也,若能有濟。」《周語》富 辰引《書》之文也。韋注:「若,猶乃也」。

惟民生厚,因物有遷。違上所命,從厥攸好。爾克敬典在德,時乃罔不變。允升于大猷,惟予一人膺受多福,其爾之休,終有辭于永世。」

「民生厚而德正」、《左》成十六《傳》申叔時之言也。「下之事上,不從 其所令,從其所行。上好是物,下必有甚。」《禮記·緇衣》之文也。「汝亦 罔不克,敬典」、《康誥》文也。

顧命

《敘》曰:「成王將崩,命召公、畢公率諸侯相康王,作《顧命》。」按:顧,還視也。臨終遺書曰「顧命」。率,讀爲蓬,先導也。相,讀爲遐,猶補助也。

惟四月,哉生魄,王不懌。

四月者,成王即政後二十六年,即辟後二十八年,嗣位之三十七年壬子卯月也,王年四十有七。哉生魄者,四月三日也。懌,當作釋,猶怡悅也。 疑當讀爲念,喜也。與《金縢》不豫之「豫」,同爲叚借字耳。不懌者,有疾也。

甲子,王乃洮額水。相被冕服,憑玉几。

洮,讀爲澡,洒手也。馬融訓「濯髮」,非。鄭謂借爲「濯」,則所濯不憭。額,當作沫,或作湏,洒面也。相,遐也,猶助也。相者,正王服位之臣,太僕之職也。《檀弓》:「扶君,僕人師扶右,射人師扶左」,則射人亦與焉。被,猶覆也。冕,當作元。冕,視尋常聽朝之皮弁服加一等也。憑,當作馮,讀爲凭,依几也。玉几,以玉爲飾之几。王此時當在路寢也。

乃同,召太保奭、芮伯、彤伯、畢公、衛侯、毛公、師氏、虎臣、百尹 御事。

召公時已百餘歲,故特著其名,明非別一太保也。芮、彤、畢、毛,皆 畿內諸侯。芮在今陝西西安府朝邑縣,彤在今華州,畢在今長安縣,衛在今 河南衛輝府淇縣,毛在今甘肅鞏昌府泰縣。召公、芮伯,皆周同姓;彤伯, 禹裔,姒姓;畢公、毛公,皆文王庶子。畢公,名高。毛公,未知名,鄭名 聃者也。衛侯,即康叔,武王母弟。以上三公、六卿,太保召公兼冢宰,[一] 芮伯、宗伯、彤伯,司徒,太師畢公兼司馬,衛侯司寇,太傅毛公兼司空也。 師氏,中大夫。虎臣,虎賁氏,下大夫也。尹,正也。百尹,各職之長官。 御事,百尹之屬,是時有當治之事者。

校勘記

[一] 太保召公兼冢宰,原文謏作「召伯」,本節注文開頭已言「召公時已百餘歲」,故此處當以「召公」爲是,且亦無「召伯」之稱也。

王曰:「嗚呼!疾大漸,惟幾,病日臻。既彌留,恐不獲誓言嗣,茲于審訓命汝。

疾, 广也, 疴也。漸, 邁也, 進也。幾, 殆也。疾甚曰病。臻, 至也。 彌,當作瓕, 弛弓也。喻身雖畱存, 而不能起坐也。獲, 得也。誓, 以言約 束也,猶命告也。嗣, 新主也。審,猶詳也。歎息言:疾今大進,惟危, 加 甚之勢日至, 若當身廢淹畱之際, 恐不得告命以示後嗣, 故及此時詳訓命汝 也。

昔君文王、武王宣重光,奠麗陳教,則肄肄不違,用克達殷集大命。

宣,濕也,明也。重,緟也,增益也。重光者,太平之世日裏,重光,謂日儷其精,重光以見吉祥也。馬融以日月合璧,五星聯珠爲重光。此千百年僅有之一時,亦厤數之適然。文、武時斷不能疊見,即見,亦非文、武之德所致也。奠,定也,猶成也。麗,虀也,猶華也。所謂日月光華,旦復旦也。陳,敶也,敷也。肄,習也。連言肄者,氣喘而語重也。違,韋也,背也。達,撻也,擊也,《詩》曰「撻彼殷武。」或曰達,行不相遇也,讀如《吳語》「達王于甬東」之達;或曰達讀爲大,《詩》曰「燮伐大商」,克勝也。二說存參。言文武聖德日顯其瑞,重光而成華,民服其教,敷陳而不背,天人相應,用是能撻伐殷商,而集大命于我周邦也。

在後之個, 敬讶天威, 嗣守文、武大訓, 無敢昏渝。

侗,僮也,猶言沖人,孺子也。古文作「夏后之詞」,詞亦僮也。蓋夏讀 爲余,后讀爲後,猶《康王之誥》云「在我後之人」也。迓,當作訝,迎也。 昏,惛也,猶迷亂也。逾,越也。言予敬迎可畏之天命,故繼守文、武大訓, 不敢昏亂踰越也。

今天降疾,殆弗興弗悟。爾尚明時朕言,用敬保元子釗弘濟于艱難,

始,似也,類也。興,起也。悟,語也。時,是也。釗,康王名。濟, 渡也。難,亦「艱」之借字,如戲謔乞匄,皆古人習用之連語也。言天降疾, 似將棄世,弗能起,弗能語矣。爾庶幾宣是我今所言者,以敬保長子釗,大 濟渡于艱難之際也。

柔遠能邇,安勸小大庶邦,

「柔遠能邇」,見《堯典》。

思夫人自亂于威儀,爾無以釗冒貢于非幾。」

夫人,猶言凡人也。亂,治理也。儀,義也。有威可畏謂之威,有義可 象謂之義。冒,冢而前也。貢,當作贛,讀爲陷,自高而入于下也。非,韋 背也。幾,危殆也。言思凡人當自治于威儀,爾無以釗進冒于背理之事,退 陷于危殆之地也。

茲既受命,還出綴衣于庭。越翼日乙丑,王崩。

還,返也,王返于寢所也。綴,聯也。綴衣,帷幄之屬。帷幄必以綬聯,故曰綴衣。將發顧命,即路寢而張之,王起坐綴衣中,事畢勶去,出之于庭中也。庭,廷也,路寢之廷也。翼,本作翌,昱之誤字也。昱,明日也。

太保命仲桓、南宮毛俾爰齊侯呂伋,以二干戈、虎賁百人,逆子釗于南門之外。延入翼室,恤宅宗。

仲、南宮,皆氏,桓、毛皆名,即虎賁氏、下大夫二人也。爰,引也。 齊,國,侯爵;呂,氏;伋,名,太公子丁公也。二干戈,桓、毛一執干, 一執戈也。百人,虎士也。《周禮》「虎氏八百人。」今取用百人,所以衛元 子也。逆,迎也。南門,廟門也。古者天子崩,世子當告崩于廟,然後入爲 喪主。延,亦引也。翼室,路寢左右之室。在旁曰翼也。此當居東翼室。恤, 憂也。宅,居也。宗,猶主也。言憂居爲喪主也。

丁卯,命作冊度。

冊,所以書成王命詞者也。度,猶法制也。受冊時法制,猶今言儀注單也。

越七日癸酉,伯相命士須材。

伯相,二伯相王室者,蓋召公、畢公也。士,山虞匠人之屬。須,當作 頒,讀爲攽,分也。材以作椁,與明器者分之,以度其所宜也。

狄設黼扆、綴衣。

以下亦皆伯相命之也。狄,讀爲翟,樂吏之賤者,秉翟以舞者,下士也。 牖戶之間謂之扆,白與黑謂之黼。蓋路寢中間,牖之東戶之西設扆,如今屛 風,畫斧文于其上,刃白,近銎處黑其質,絳帛。天子朝諸侯依倚之處也。 綴衣者,聯綴帷幄,張于其所。

牖間南嚮,敷重篾席,黼純,華玉,仍几。

牖間,兩意之間也。嚮,當作向,猶對也。下同。戶旁夾兩窻,窻即牖也。敷席于牖間,當扆前也。敷,故也。重者,天子之席三重,今再重,但用莞席。篾,當作莧,讀爲末。言小蒲莞也,即今之席艸。兩重不異,不用生時。繅席,次席也。純,緣也,謂緣邊也,白黑相間。華玉,五色玉,所以飾几。仍,因也。几,坐所以凭者,古人坐地,几制卑,如今炕几也。仍几者,同生時所用之几,不如席之有異也。凡吉事變几,凶事仍几,此生時見羣臣、覲諸侯之坐也。

西序東嚮,敷重底席,綴純,文貝,仍几。

序,牆也。底,讀爲底,猶平也。以青蒲爲席,柔滑而平也。蒲大莞小, 莞如細葱,莖圓而中空。蒲較闊大,所謂蒻也。綴,績也。畫文,備五色, 以青白相次,赤黑相次,元黃相次者,績之于繪,以純席也。文,並也。文 貝,貝之有文者。其類有十,亦以飾几。此天子旦夕聽事之坐。

東序西嚮,敷重豐席,畫純,雕玉,仍几。

豐,猶華滿茂美也。蒲席之編以五采,即《周禮》司几筵之繅席也。畫, 但畫雲氣以爲文也。雕,彫也,刻鏤也。此養國老饗羣臣之坐也。

西夾南嚮,敷重筍席,玄紛純,漆,仍几。

西夾,路寢之西偏夾室也。不設東夾坐者,康王方恤宅于其中也。筍, 讀爲笢,竹外青皮,即箁箬也。馬融、王肅皆以上三席爲蒲席,此一席爲竹 席。鄭康成則謂四席皆竹,恐非。黑而有赤色者爲元。紛,讀爲份,彭彰皃, 蓋以元組爲緣也。漆,讀爲泰,木汁可以髹物。此几以泰髹也。此親屬平時私宴之坐也。天子朝覲、聽政、養老、私燕,各有定處,平居各因事而設,今並設以隨神之所憑也。按:文王遷豐,僅作靈臺、辟雍,其餘猶諸侯制度。武王遷鎬,因之。周公制禮,建國土中,乃立明堂于洛邑。《洛誥》所以言「入太室裸」也。若鎬京宮室未嘗改作,成王崩于鎬京,故喪禮陳設之處在路寢者。下文有東西房,如諸侯之制,不爲明堂制也。

越玉五重,陳寶,赤刀、大訓、宏璧、琬琰,在西序。大玉、夷玉、天球、河圖,在東序。胤之舞衣、大貝、鼖鼓,在西房;兌之戈、和之弓、垂之竹矢,在東房。

越,猶及也。玉與寶,即下文所言也。陳,敶也,列也。寶,讀爲宗,藏也,藏珍寶之所也。《周禮・天府》:「凡國之玉鎭大寶器藏焉。若有大祭大喪,則出而陳之。」蓋所以華國也。赤刀,武王佩刀。周尚赤,以爲飾也。《大訓》,五帝夏商之書也。宏,猶大也。璧,瑞玉環也。其名曰琬、曰琰,度皆尺二寸。琬者,宛宛而圓也。琰者,璧上起美色也。皆美玉,所謂玉二重也,陳于西序,坐北。大玉,小華之山有㻬罕之玉也。夷玉,東北醫旡閭之珣玗琪也。天球,《禹貢》雍州所產,中磐,材質玄如天色者。皆未琢治之寶玉,所謂玉三重也。河圖,出河水,帝王聖者所受。伏羲、軒轅、堯、舜、禹、湯以至文王,皆受之也,皆陳于東序,坐北。允,疑夏臣。允所爲舞者之衣,皆中法。大貝,出江淮之浦,大如車輪,即文王拘羑里時,散宜生取以獻紂者也。鼖鼓,大鼓也,長八尺,亦前代之物,《考工記》所云,蓋即仿此制而爲之者。房,在堂後室傍夾室之後,皆有墉以間之。所陳之物,必當房屋之直北,堂上皆得見之也。兌、和、垂,皆古人造此物者之名。疑垂,舜、共工官也。東房,堂東室傍之房也。

大輅在賓階面,綴輅在阼階面,先輅在左塾之前,次輅在右塾之前。

輅,讀爲路,猶車也。大輅,玉輅,所以祀者。賓階,西階也。面,猶 前也。綴輅,玉路之貳車,十二乘,茲陳其一,聯綴于玉路後者也。阼階, 東階也。先路,象路所以朝者。左右,讀爲分又。塾,當作埻,門側北向之 堂也。左埻,西堂也。次路,象路之貳車也。右塾,東堂也。先路與玉路相 對,次路與綴路相對。王之五路,不陳金革木者,此時但有朝祭,無迎賓, 即戎田獵之事,于禮無當也。凡所陳以西爲上者,成王殯在西序也。 二人雀弁,執惠,立于畢門之內。四人綦弁,執戈上刃,夾兩階戺。一 人冕,執劉,立于東堂。一人冕,執鉞,立于西堂。一人冕,執戣,立 于東垂。一人冕,執瞿,立于西垂。一人冕,執銳,立于側階。

弁者,士服也。雀弁,赤而微黑,如雀頭色者。弁制如冕,惟前後平不俛仰,又無藻鎏也。惠,狀斜刃,宜芟刈者。鄭蓋以「錗、鍶」二字之音擬之,僞傳以爲三隅矛。畢門,即路門也。綦,騏也,如馬之青黑色也。戈,平頭戟也。其刃橫出,可句可擊。上刃者,刃外向也。一在西階之西,一在東階之東,相向而立,所謂夾兩階也。戺,堂廉直下厓也。一在東南堂隅之東,一在西南隅之西,當前廉之兩旁厓下,皆南向,所謂夾兩階戺也。冕,大夫服也。劉,如漢時之鑱斧。鉞,讀爲戊,大斧也。堂者,堂上近序處也。戣與瞿,如漢時之三鋒矛。垂者,堂上之遠邊,謂東夾之東邊牆外餘地、西夾之西邊牆外餘地也。銳當作鈧,矛屬。側階,東下階也。立東垂者,在堂上;立側階者,在堂下。康王翼室在東,故東階獨多設一人。王出受顧命,必由東階降至庭中,再由西階躋而至殯前也。

王麻冕黼裳,由賓階躋。卿士邦君麻冕蟻裳,入即位。

麻冕,細布以冒冕綖之版也,亦十五升麻之布爲之,與朝服同。升八十 縷,則其經已一千二百縷矣。舊解三十升,則古布廣二尺二寸,當今一尺三 寸七分半,斷不能容二千四百縷也。黼裳,毳冕之裳,刺黼黻二章者。躋, 升也。自西階者,未受顧命,不敢遽當主位,且殯固在西也。蟻裳者,元裳 如蛾色也。服色參酌吉凶之間,示禮之變也。入者,入路門也。即位,卿即 中庭之東,西面,諸侯即中庭之南,北面也。

太保、太史、太宗皆麻冕彤裳。太保承介圭,上宗奉同瑁,由阼階躋。太史秉書,由賓階躋,御王冊命。

太保,召公;太史,史佚;太宗,大宗伯彤伯也。彤裳,纁裳也。承,即奉也。介,玠也。玠圭,天子鎭圭,大尺二寸。上宗,大宗伯一人,小宗伯一人也。同,讀爲鍾,酒桮也。此當是圭瓚以挹鬯裸祭者。瑁,亦玉爲之,上下方,如耜,刃四寸。諸侯執命圭朝天子,天子以瑁冒之,所以齊瑞信者,奉同一人,奉瑁一人也。自東階升者,天子世守之重器故也。秉,執也。書,所書顧命之冊也。御,讀爲訝,猶迎向也。冊命者,王此時立賓階上,少東,太史東面,于殯西南隅讀冊書以命王嗣位之事也。

曰:「皇后憑玉几,道揚末命,命汝嗣訓,臨君周邦,率循大卞,**燰**和 天下,用答揚文、武之光訓。」

皇后,大君也。憑,當作道,導也,猶言也。揚,舉也。嗣訓繼,守其 訓也。率,述也,猶遵也。循,順行也。卞,當作弁,讀爲憲,猶法也。山 井鼎《攷文》作「帥修大辨」,疑「卞」本作「平」,辨別也。燮,亦和也。 和,讀爲龢,諧也。答,當作荅,讀爲合,對也。揚,昜也,猶明也。光, 廣也,大也。史佚言:「大君道揚臨終之命,命汝繼守茲訓,君臨周邦,述行 爲君之大法,以和天下,以應揚文武之大訓。」

王再拜,興,荅曰:「眇眇予末小子,其能而亂四方以敬忌天威。」

乃受同瑁,王三宿,三祭,三吒。上宗曰:「饗!」

右手受同,左手受瑁也。宿,讀爲肅,猶進前也。祭,裸祭也。朿茅,立之祭前,用圭瓚盛秬鬯酒沃茅上。酒滲下,若神飲之也。咤,當作吒,讀爲行,卻行復位也。饗者,謂神享之也。按:「咤」《說文》作「詫」,訓奠爵酒,引此文。然下文「太保受同」,爵既奠,則不得言受。又「宿」,江氏聲欲讀如「莤」。然「莤」與祭是一事,不得分言,故知鄭誼不可易也。

太保受同,降,盥,以異同秉璋以酢。授宗人同,拜。王荅拜。

王既三祭,則以同授太保。太保受之,以降置于篚也。盥,澡手也。以 異同秉璋者,半圭曰「璋」。此同以璋爲柄,所謂璋瓚也。酢,醋也,報也, 酌酒報主人曰酢。蓋太保以璋瓚代神酢王,王雖不嚌而飮福之意已成,故即 授宗人同,而拜宗人、小宗伯也。王荅拜者,《禮記·燕義》云:「禮無不荅, 明君上之禮也。」

太保受同,祭,嚌,宅,授宗人同,拜。王答拜。

太保又受宗人之同,代王酬已祭之地而嚌之以飲福。嚌,嘗也。酒至口 曰嚌,至齒曰啐,皆似飲而實不飲也。宅,度也。謂嚌而不啐,有節度也。 于是受宗人同,而受命嗣位之禮成矣。此皆吉凶之際變禮也。

太保降,收。諸侯出廟門俟。

太保降,而王與諸卿大夫皆降,可知收者,鄭諸陳設及冊書同瑁等也。 廟門,亦即路門也。俟,竢也,待也,待朝也。言邦君,則卿士可知。

康王之誥

《敘》曰:「成王崩,康王既尸天子,遂誥諸侯,作《康王之誥》。」尸, 猶主也,明受顧命之時即誥,非踰年即位而後誥也。按:鄭本以「王若曰: 庶邦、侯、甸、男、衛」下分篇爲《康王之誥》。伏生、歐陽、大小夏侯,則 合于《顧命》,是別有《康王之誥》,爲逸篇也。今僞孔以「王出,在應門之 內」起分篇,尤非。

王出,在應門之內,太保率西方諸侯入應門左,畢公率東方諸侯入應門右,皆布乘黃朱。賓稱奉圭兼幣,曰:「一二臣衛,敢執壤奠。」皆再 拜稽首。王義嗣德,荅拜。

出者,出路門也。應門之內,治朝也,王日視朝于此,在中庭,當宁而立者也。天子五門:路門之外,應門、雉門、庫門、皋門是也。有三朝:皋門內爲外朝,庫門、雉門內皆無朝,應門內爲治朝,路門內爲燕朝是也。畢公,代周公分陝爲東伯,召公爲西伯,故各率其所治之諸侯也。率,蓬也,先導也。布,敷也,猶敶列也。乘,四馬也。黃朱,黃馬朱巤也。賓,諸侯也。稱,禹也,舉也。圭,命圭也。幣,所以享者。朝享同時同地並行,此亦吉凶之際變禮也。諸侯皆爲王藩衛者,故曰臣衛。壤,土地也,凡國土所出之物。奠,定也,定安于地也。義,誼也,宜也。康王宜嗣周德,今已爲諸侯主,雖未踰年即位,亦無所嫌矣,故荅拜也。若新喪受朝以定王位,老臣安國之計而所行之禮,亦皆變禮也。

太保暨芮伯咸進,相揖。皆再拜稽首曰:「敢敬告天子,皇天改大邦殷 之命,惟周文武誕受羑若,克恤西土。

暨、泉也、與也。咸、愈也、皆也。揖、以手通指,如今拱手也。相揖,揖卿士。邦君皆使前也。皆再拜稽首,通卿士、邦君言也。言者太保一人, 見卿士邦君,亦如是言也。羑,進善也。若,順也。恤,侐也,安靖之意。 言天革殷命,惟允文允武大受而進順之,能安靖西土之諸侯民人,故天下歸 心也。 惟新陟王畢協賞罰, 戡定厥功, 用敷遺後人休。今王敬之哉! 張皇六師, 無壞我高祖寡命。」

陟,登遐也,猶後世偁大行也。畢,戰也,盡也。協,龢也。賞,謂封建。 罰,謂討叛。戡,钱也,克也。敷,做也。遺,饋也,猶與也。休,喜也,猶 美也。張,猶開也。皇,大也。張皇,疊韻連語,猶《詩》云「整我六師」也。 六師,即六軍也。高祖,謂文王也。凡曾祖以上,皆可稱高祖也。寡,少有之 詞,猶言寡妻、寡兄也。按:嘉謀、嘉猷當告于天子者,多矣。而特言張皇六 師者,對眾之詞。召公有鑒于成王嗣位多難不靖,故獨言此以攝服諸侯之心, 有深意存焉。○此以上皆《顧命》一篇之文,僞孔以作《康王之誥》,非也。且 讀其文勢,疑本是《顧命》全篇有此報誥,爲一時之詞,而別有《康王之誥》, 已亡。伏生、歐陽、大小夏侯之今文是也,馬、鄭強分耳。

王若曰:「庶邦、侯、甸、男、衛,惟予一人釗報誥。 報,讀爲復,實爲白,猶明也。

昔君文武丕平,富不務咎,底至齊信用,昭明于天下。則亦有熊羆之士,不二心之臣,保乂王家,用端命于上帝。皇天用訓厥道,付畀四方。

文武,文德武功也,非斥言文王、武王。丕,大也。務,冒也,猶犯也。 咎,災也。底,致也,送詣也。齊,猶同也。乂,變也,治理也。端,猶正 也。訓,順也。言昔君有文德武功之大天下,以平萬民以富,不犯于災,故 其功德所及之處,人無不信之。以能昭明于天下而民心歸向,則亦有勇猛之 士、忠一之臣安治王家,變伐大商以正命于上帝,天于是嘉順文武之道,付 與之以四方也。

乃命建侯樹屏,在我後之人。今予一二伯父尚胥暨顧,綏爾先公之臣服 于先王。雖爾身在外,乃心罔不在王室,用奉恤厥若,無遺鞠子羞!」

建、樹、皆立也。屛、猶蔽衛也。在、存顧也。天子偁同姓諸侯曰伯父。 胥、謖也,猶助也。暨、臮也,與也。綏、當作緌,猶繼也。服,猶事也。恤, 值也,猶安也。若,順也。遺,饋也,猶予也。鞠,育也,猶釋也。羞,醜 也,猶媿恥也。言文武封建諸侯,立爲屛蔽,以存顧後嗣子孫。今我一二伯 父庶幾相與顧念,繼續爾先公之臣事于先王,雖爾身爲藩服于外,爾心無不 存在王家,以奉安其順道,無貽我沖子之恥也。」

羣公既皆聽命,相揖,趨出。王釋冕,反喪服。

相揖,太保、芮伯揖之使出也。趨,疾行也。出,出應門也。釋,解也。反,返也,復也。觀此收束文法,自是連《顧命》爲一篇,而《康王之誥》實亡逸也。

畢 命

《敘》曰:「康王命作冊畢,分居里,成周郊,作《畢命》。」按:「冊畢」下當有「公」字。《傳》曰:「分別民之居里,異善惡,成定東周郊境,使有保護。」鄭康成曰:「今其逸篇,有冊命霍侯之事,不同,不與此序相應。」按:《漢書·律麻志》引《畢命》《豐刑》曰:「惟十有二年六月庚午朏,康王命作策《豐刑》。」所稱畢公,似即此篇。而未審「豐刑」者,何謂也?豈《畢命》《豐刑》爲一篇耶?抑二篇同時所作耶?要之,鄭所見《畢命》乃命霍侯之事,則非此《畢命》也。此篇亡于秦項之火。

惟十有二年,六月庚午,朏。越三日壬申,王朝步至宗周,至于豐。以 成周之眾,命畢公保釐東郊。

「惟十有二年六月庚午」、《漢志》采劉歆《三統厤》引《畢命》《豐刑》 文也。康王「十二年夏六月壬申、王如豐、錫畢公命。」汲郡古文亦有之。「越 六日乙末、王朝步自周、則至于豐」、《召誥》文也。「赫赫宗周」、《詩・小雅・ 正月》文也。按:唐僧一行《大衍歷》以康王十二年爲乙酉歲。

王若曰:「嗚呼!父師,惟文王、武王敷大德于天下,用克受殷命。

畢公代周公爲太師。「父師」二字,《微子》文也。「用克達殷,集大命」, 《顧命》文也。「惟時受有殷命哉。」《君奭》文也。

惟周公左右先王,綏定厥家,毖殷頑民,遷于洛邑,密邇王室,式化厥訓。既歷三紀,世變風移,四方無虞,予一人以寧,道有升降,政由俗革,不臧厥臧,民罔攸勸。惟公懋德,克勤小物,弼亮四世,正色率下, 罔不祇師言。嘉績多于先王,予小子垂拱仰成。」

「實維阿衡,實左右商王。」《商頌·長發》之篇也。「克定厥家」,《詩·周頌·桓》之篇也。「遷殷頑民」,見《多士·書敘》。「君若苟無四方之虞」,《左》昭四《傳》文也。「則予一人以懌」,《康誥》文也。「其以宋升降乎?」《左》襄二十九《傳》叔向之言也。「夫君子能勤小物,故無大患。」《晉語》

智伯國之言也。「孔父正色而立于朝」、《公羊傳》文也。「德嘉績于朕邦」、《商書・盤庚》文也。「臣盡智力以善其事,而君無與焉,仰成而已。」《愼子》之文也。「馮翊垂拱蒙成」、《漢書・薛宣傳》文也。「武王之佐:周公、召公、太公、畢公、毛公,武王垂拱而受成功。」《淮南·道應訓》高誘注也。

王曰:「嗚呼! 父師,今予祗命公以周公之事,往哉! 旌別淑慝,表厥宅里,彰善癉惡,樹之風聲。弗率訓典,殊厥井疆,俾克畏慕。申畫郊圻,慎固封守,以康四海。

「旌別淑慝,表其門閭」,太公《六韜》之文也。「有國家者,彰義亹惡。」 《禮記·緇衣》文也。「君子並建聖哲,樹之風聲。」又云:「告之訓典」,《左》 文六《傳》文也。

政貴有恆,辭尚體要,不惟好異。商俗靡靡,利口惟賢,餘風未殄,公 其念哉!我聞曰:『世祿之家,鮮克由禮』。以蕩陵德,實悖天道。敝化 奢麗,萬世同流。茲殷庶士,席寵惟舊,怙侈滅義,服美于人。驕淫矜 侉,將由惡終。雖收放心,閑之惟艱。資富能訓,惟以永年。惟德惟義, 時乃大訓。不由古訓,于何其訓。」

「紂使師延作靡靡之樂。」《韓非子》文也。「利口」,見《論語》。「帝其 念哉」,《皋謨》文也。「世祿」,見《左傳》。「服美不稱,必以惡終。」《左》 襄二十七《傳》叔孫之言也。「求其放心而已矣!」《孟子》文也。

王曰:「嗚呼!父師,邦之安危,惟茲殷士。不剛不柔,厥德允修。惟 周公克慎厥始,惟君陳克和厥中,惟公克成厥終。三后協心,同底于道, 道洽政治,澤潤生民,四夷左衽,罔不咸賴,予小子永膺多福。公其惟 時成周,建無窮之基,亦有無窮之聞。子孫訓其成式,惟乂。嗚呼!罔 曰弗克,惟既厥心;罔曰民寡,惟慎厥事。欽若先王成烈,以休於前政。」

「不剛不柔」、《詩·商頌》文也。「乃命三后」、《呂刑》文也。「澤被生民」、《荀子·君道》篇文也。「吾其被髮左衽矣」、《論語》文也。「欽若」,見《堯典》。「成烈」,見《洛誥》。

君 牙

《敘》曰:「穆王命君牙爲周大司徒,作《君牙》。」穆王,康王之孫, 昭王之子也,名滿。大司徒,地官也。牙,《禮記,緇衣》作「雅」。此篇亡 于秦項之火。

王若曰:「嗚呼!君牙,惟乃祖乃父,世篤忠貞,服勞王家,厥有成績, 紀于太常。惟予小子嗣守文、武、成、康遺緒,亦惟先正之臣,[-]克左 右亂四方。心之憂危,若蹈虎尾,涉于春冰。

「惟乃祖乃父」、《盤庚》文也。「加之以忠貞」、《左》僖九《傳》晉荀息之言也。「服勞」、字見《論語》。「昔公勤勞王家」、《金縢》文也。「惟王有成績」、《洛誥》文也。「紀于太常」、《周書・嘗麥》篇文也。今本作「大帝」、誤字。「惟予小子」、《詩・周頌・訪落》之篇也。「嗣守文武」,見《顧命》。「亦惟先正克左右」、《文侯之命》文也。《漢書・谷永傳》引之,顏師古注以爲《君牙》文,非也。「其能而亂四方」、《顧命》文也。「履虎尾」、《易・履卦》文也。「如履薄冰」、《詩・小宛》之文也。

校勘記

[一] 亦惟先王之臣,他本皆作「先正」,今據以改之。

今命爾予翼,作股肱心膂,纘乃舊服。無忝祖考,弘敷五典,式和民則。爾身克正,罔敢弗正,民心罔中,惟爾之中。夏暑雨,小民惟曰怨咨; 冬祁寒,小民亦惟曰怨咨。厥惟艱哉!思其艱以圖其易,民乃寧。

「汝翼」、《皋陶謨》文也。「股肱心膂」、《周語》太子晉之言也。「纂乃祖考,無忝乃舊」、《左》襄十四《傳》賜齊侯命文也。「敬敷五教」、「勅我五典」、皆《虞書》文也,然虞制非周制也。「和民」,則見《左傳》。「子帥以正,孰敢不正」、《論語》文也。「夏日暑雨,小民惟曰『怨』,資冬祁寒,小民亦惟曰『怨』」、《禮記・緇衣》所引《君牙》眞古文也。「資」,讀爲「至」,而僞書又刪一「曰」字,增下一「咨」字,改其句讀也。「圖艱于其易」、《老子》言也。

嗚呼!丕顯哉,文王謨!丕承哉,武王烈!啟佑我後人,咸以正罔缺。爾惟敬明乃訓,用奉若于先王,對揚文、武之光命,追配于前人。」王若曰:「君牙,乃惟由先正舊典時式,民之治亂在茲。率乃祖考之攸行,昭乃辟之有乂。」

「丕顯」六句,《孟子》引《書》文也。「用荅揚文武之光訓」,《顧命》 文也。「追孝于前文人」,《文侯之命》文也。「乃辟」,見《文侯之命》。

四 命

《敘》曰:「穆王命伯冏爲周太僕正,作《冏命》。」按:「囧」,《史記》、 《漢書》、《古今人表》及《說文》皆引作「霁」。正,長也。《周禮》太僕, 下大夫,二人,夏官之屬,掌正王之服位。此篇亡于秦項之火。

王若曰:「伯冏,惟予弗克于德,嗣前人宅丕后,忧惕惟厲,中夜以興, 思免厥愆。昔在文、武,聰明齊聖,小大之臣,咸懷忠良。其侍御僕從, 罔非正人,以旦夕承弼厥辟,出入起居,罔有不欽;發號施令,罔有不 臧。下民祗若,萬邦咸休。

「夕惕若厲」、《易·乾》爻詞也。「必有忧惕之心」、《禮·祭義》文也。「人之齊聖」、《詩·小宛》文也。「罔有不欽」、《盤庚》文也。「發號出令」、《禮記經解》文也,亦見《戰國策》。「萬邦咸休」、《洛誥》文也。

惟予一人無良,實賴左右前後有位之士,匡其不及,繩愆糾繆,格其非心,俾克紹先烈。今予命汝作大正,正于羣僕侍御之臣,懋乃后德,交修不逮。慎簡乃僚,無以巧言令色,便辟側媚,其惟吉士。僕臣正,厥后克正;僕臣諛,厥后自聖。后德惟臣,不德惟臣。爾無昵于儉人,充耳目之官,迪上以非先王之典。」

「惟予小子無良」、《禮·坊記》引《太誓》文也。「左右前後,皆薛居州也。」《孟子》文也。「惟大人爲能格君心之非」、《孟子》言也。「必交修予,無予棄。」《楚語》文也。「選端士衛翼,前後左右皆正人。」又云「太傅匡其不及」、皆賈子《新書》語也。「巧言令色孔壬」、《皋陶謨》文也。「友便辟」、《論語》文也。「其勿以儉人,其惟吉士。」《立政》文也。「耳目」,見《皋陶謨》。

非人其吉,惟貨其吉,若時,療厥官,惟爾大弗克祗厥辟,惟予汝辜。」 王曰:「嗚呼,欽哉!永弼乃后于彝憲。」

「瘵厥君」、《康誥》文也。

呂刑

《敘》曰:「呂命穆王訓夏贖刑,作《呂刑》。」《傳》謂「呂侯受命于穆 王,爲司寇,訓說夏后氏贖刑之法,更從輕,以布告天下。」按:穆王車轍 馬跡周行天下,其時絀于財用,故申《虞書》「金作贖刑」之法,名爲「施仁」, 實亦足用也。夏,中夏也。刑讀爲荆,篇中皆同。

惟呂命,王享國百年,耄,荒度作刑,以詰四方。

呂侯,即甫侯,四岳之后也。呂、甫同音,通字也。故呂城在今河南南陽府南陽縣之西。呂侯受王命,入爲三公也。享國百年者,穆王五十即位,又五十五年而崩,今享國之五十年也。耄當作臺,老也。荒,妄也,亂也。度,猶謀也。咨禮爲度,謂訪度于呂侯,使作贖刑也。詰,猶治也。方,傍也。東南西北,四傍也。

王曰:「若古有訓,蚩尤惟始作亂,延及于平民,罔不寇賊,鴟義,姦 宄,奪攘,矯虔。

蚩尤,神農時諸侯強暴者。以盧山之金作五兵,嘗逐帝于涿鹿之野。帝 乃徵師于少典國,軒轅黃帝與戰于涿鹿而禽之。平民,猶齊民也。攻劫爲寇, 殺人爲賊。鴟,梟鳥也。義,狀貌也。奪,斂也,強取也。攘,孃也,擾也。 矯,撓也,亂也。虔,稅也,殺也。虔、稅一聲之轉。言古俗敦龐,蚩尤氏 始暴虐爲亂,引及于眾民,無不習于寇賊,狀如鴟梟之凶惡,內奸外宄,惟 以強取亂殺爲事也。

苗民弗用靈,制以刑,惟作五虐之刑曰法。殺戮無辜,爰始淫為劓、刵、椓、黥。越茲麗刑並制,罔差有辭。

苗民,謂九黎之君也。三苗爲九黎子孫,故即稱爲苗民。少昊氏衰,九黎上效蚩尤,又作重刑,其後顓頊誅之者也。靈,良也,善也。淫,甚也,猶大也。則當作刖,跀也。劓、刖,截鼻斷足也。椓,斀也,去陰之刑也。黥,刻其面而以墨涅之也。越,粤也,于也。茲,此也。麗,羅也,猶言文網也。罔,無也。差,猶等級也,不齊之意。辭,曲直之讞辭也。言九黎弗用善制,作殘刻之刑,視占人之五刑爲虐,而以爲法,殺戮無辜之人,于是始大爲劓鼻、刖足、椓陰、黥面諸法,于此羅致于五刑,並制其命,無所差別于曲直之辭也。

民興胥漸,泯泯棼棼,罔中于信,以覆詛盟。虐威庶戮,方告無辜于上。 上帝監民,罔有馨香德,刑發聞惟腥。

漸,纖也,漬染之意。泯,當作閥,讀爲惛。棼,讀爲紊。泯泯棼棼, 重言形況字,言瞀亂也。覆,猶敗也。方,旁也,溥也。監,視也。德,登 也。腥,讀爲胜,或爲鮏,言薉臭也。言此時之民起,而相與漸染昏亂之極, 信不由衷,詛盟于神,亦反覆無常。民愈詐而政愈虐,威行于眾之受戮者, 普告無罪于上天。天視民無馨香之登,聞所發聞者,惟刑虐薉臭之氣爾。

皇帝哀矜庶戮之不辜,報虐以威,遏絕苗民,無世在下。

皇帝,顓頊也。矜當作矜,讀爲憐,亦哀也。報,當辠人也。遏,讀爲 渴,盡也,絕斷也。言軒轅次子顓頊,哀憐眾刑之及無辜,苗民暴虐,天亦 報之以威,盡絕之,誅其身,流其子孫,使無有繼世在于下土也。

乃命重、黎,絕地天通,罔有降格。羣后之逮在下,明明棐常,鰥寡無 蓄。

重,少昊之子;黎,顓頊之子,即堯時羲、和之先也。格,徦也,猶登也。《楚語》觀射父對昭王曰:「少昊之衰也,九黎亂德,民神雜糅,不可方物。夫人作享,家爲巫史,無有要質,民匱于祀而不知其福,烝享無度,民神同位。民濟齊盟,無有嚴威,神狎民則不蠲其爲,嘉生不降,無物以享,禍災薦臻,莫盡其氣。顓頊受之,乃命南正重司天以屬神,命火正黎司地以屬民,使復舊常,無相侵濟,是謂絕地天通也。」降,下。格,升也。羣后,眾諸侯也。逮,及也。在下,臣民也。明,朚也。明明,猶勉勉也。棐,輔也。常,長也。蓋,害也,傷也。言絕地天通,則無有惑于天神之降地、民之升者,故是時庶邦、諸侯以及在下之臣民,皆能勉勉以輔行常道而刑罰清明,雖鳏寡之窮民,亦無有傷害也。

皇帝清問下民鰥寡有辭于苗。德威惟畏,德明惟明。

此皇帝,謂堯也。帝嚳之季年,九黎子孫三苗,復九黎之德,故堯命重之後羲、黎之後和,欽若昊天,以授人時。而又審問下民,凡鰥寡皆有辭說,上陳爲有苗之罪狀。堯乃以德威之而無不畏,以德勉之而無不勉也。《禮記·表記》引「德威」二語而曰:「非虞帝其孰能如此乎?」蓋堯舜合道同德,命官行政,皆堯作之而舜述之,故曰「無爲而治」。凡偁堯者,即可以偁舜,而偁舜者,亦可以偁堯也。

乃命三后,恤功于民。伯夷降典,折民惟刑;禹平水土,主名山川;稷 降播種,農殖嘉穀。三后成功,惟殷于民。

后,君也。恤,憂也。降典之降,讀爲隆,猶崇也。折,斷也。主名者, 立山川之主,名山川之名也。殖,植也,猶樹也。殷,櫽也,猶正也。《墨子。 尚賢中》篇引作「假」,則讀爲「假」,至也。言命三后盡憂民之功,伯夷崇其典祀,以禮斷刑而民心正,禹平水土奠定山川而民居安,稷下播種農樹嘉穀而民生厚,所謂正民而不爲邪妄也。按:《虞書》「伯夷無折民,惟刑事」,知堯時刑法蓋伯夷兼之,至舜有天下乃選于眾,舉皋陶而專重其任也。下文上乃司刑之官,不止一人,亦不爲重職,非皋陶也。《後漢·梁統傳》引作「爰制百姓于刑之衷。」《楊震傳》:「三后成功,惟殷于民,皋陶不與焉!」

士制百姓于刑之中,以教祗德。

堯時士,官如今刑部司員,不爲重職,伯夷統之也。僞傳以士爲皋陶, 非是。百姓,大家族姓,法先行于貴近也。不輕不重之謂「中」。祗,敬也。 言制百姓于刑罰之中正,非虐威之也。敺而納之于善,所以教之敬德也。

穆穆在上,明明在下,灼于四方,罔不惟德之勤,故乃明于刑之中,率 乂于民棐彝。

穆穆,和敬也。明, 扇也。明明, 猶勉勉也。灼, 焯也,明也。率, 蓬也, 先導也。乂, 躄也,治理也。棐, 輔也。彝, 猶常也。言堯和敬于上, 三后勉勉于下, 其道昭明于四方, 無不惟德之勤, 故乃能明于用刑之中正, 導治于民以輔其常教也。

典獄非訖于威,惟訖于富。敬忌,罔有擇言在身。惟克天德,自作元命, 配享在下。」

典, 數也, 主也。訖, 吃也, 言蹇也。忌, 認也, 誠也。擇, 釋也, 敗也。克, 肩任也。元, 猶大也。配, 妃也, 猶匹也。享, 猶受也。言凡主獄之官, 往往囁嚅難出不能盡言。以審究者, 非爲威屈, 即爲利疚耳。是當敬而戒之, 使無有敗言在于我身也。惟肩任乎天德, 則大命自我爲之, 可配副于天, 而受永終之祿于下矣。

王曰:「嗟!四方司政典獄,非爾惟作天牧?今爾何監?非時伯夷播刑之迪?其今爾何懲?惟時苗民匪察于獄之麗,罔擇吉人,觀于五刑之中;惟時庶威奪貨,斷制五刑,以亂無辜,上帝不蠲,降咎于苗,苗民無辭于罰,乃絕厥世。」

播,譒也,敷也。迪,道也。歷,非也。麗,丽也,猶相附也。庶,遮也,揭也。奪,斂也,取也。庶威,猶訖威。奪貨,猶訖富也。亂,治也。

蠲,佳也,善也。辭,詞也。歎息言:四方凡司政主獄之人,非爾爲天養民者乎?今爾何所視法,豈非是伯夷用州之道。其今爾何所懲戒?惟是苗民不審察于獄之附麗,不擇善人使觀于荆之中正,惟是法遏于威,或利奪于貨,斷治五刑以妄治無辜之民,上帝弗善之,下禍災于苗。苗民亦無詞以解于天罰,乃遂絕其世,此則所當懲者也。苗民之虐,顓頊流之,堯誅之,舜又竄之,禹又征之。絕厥世者,無世守之君長也。

王曰:「嗚呼!念之哉。伯父、伯兄、仲叔、季弟、幼子、童孫,皆聽 朕言,庶有格命。今爾罔不由慰日勤,爾罔或戒不勤。天齊于民,俾我 一日,非終惟終,在人。爾尚敬逆天命,以奉我一人!雖畏勿畏,雖休 勿休。惟敬五刑,以成三德。一人有慶,兆民賴之,其寧惟永。」

意,僮也,未冠之偁。聽,猶從也。有,能也。格,恪也,敬也。慰, 恚怒也。日,當作曰。或,有也。戒,誠也。齊,猶平也。俾,使也。非終, 即《康誥》之眚災;惟終,即《康誥》之自作不典。逆,迎也。雖畏勿畏, 不訖于威也。休,喜也;雖休勿休,不訖于富也。三德,正直、剛克、柔克 也。歎息言:我同姓諸臣,皆從我言庶幾能恪恭天命。今爾無不以武怒嚴酷 而自謂勤能,故爾無有自誠于不勤者。豈知以刻爲事,非天意也。天公平而 愛民,不過使我一日爲民之上,代天治之耳。有不可殺者,有不可不殺者, 在人自犯,無容我私意參之也。爾庶幾恪敬以近天命,以承我一人,勿因勢 可畏而懼,勿因富可喜而貪。惟敬五荆以成正直剛柔之德,無偏無黨,則天 子慶其功,兆民賴其福,天下安康,久而弗替矣!

王曰:「吁!來,有邦有土,告爾祥刑。在今爾安百姓,何擇,非人?何敬,非刑?何度,非及?

此告庶邦諸侯也。祥,猶善也。度,猶謀也,心能制義曰度。及,讀爲 疊。古理官決罪三日,得其宜乃行之也。故《史記》引作「何居?非其宜」, 蓋史公所見本「度」作「宅」,故以「居」字代之。王歎息言:凡爾有邦國土 地者,告爾以善吉之刑,在今爾欲撫安百姓,當何所選擇?非司刑之人乎? 當何所敬愼?非用刑之地乎?當何所審度?非儀刑之時乎?

兩造具備,師聽五辭。五辭簡孚,正于五刑。五刑不簡,正于五罰。五 罰不服,正于五過。[--] 造,至也。獄之兩曹在廷東,赴訊者至此也。具,俱也。備,葡也。師, 士師也。辭,訟也,猶今言口供也。簡,見也,有左證眞見其情實也。孚, 信也。正,定也。罰,贖也。服,艮也,猶受治也。言訟者俱至,方質士師, 聽其相訟之辭。其辭信實,則定其當入于何刑,就其辭以定其罪當矣。而其 所以致罪之由,非出于故。或勢所不能已,爲意所不及料者,則辭雖情實而 固非情實。所謂眚災適爾也,則使出金贖罪。若贖罪尚不足以服其心,則定 于五過之條,竟從赦免也。

校勘記

[一] 正于五過,原文作「無過」,然下文言「五過之疵」,知「無過」爲「五過」之誤, 核之他本,亦爲「五過」,今改之。

五過之疵:惟官,惟反,惟內,惟貨,惟來。其罪惟均,其審克之!

疵,病也,言害法也。官,挾勢也。反,返也,報復恩怨也。內,女謁也。貨,謂賕也。來,當作求,以情干請也。均,由同也。審,知諦也。克, 勃也,尤勮也。言五過之定于赦宥者,其間不能無弊病,當詳審精覈也。或 因勢威之奪,或報恩怨之私,或徇女謁之請,或受賄賂之行,或憐哀求之情。 以此出此人之罪,即必入彼人之罪,則治聽訟者之罪,與犯法者等,亦即以 所罰罰之也。凡此當審察者,尤宜勤勞勿忽也。

五刑之疑有赦,五罰之疑有赦,其審克之!

刑赦從罰,罰赦從過,亦宜如五過之詳審精覈也。蓋上文言五過之疵有 此數端,其實五刑、五罰皆同。先言五過者,相承順文也。

簡孚有眾,惟貌有稽。無簡不聽,具嚴天威。

此申言兩造具備,師聽五辭也。稽,計也,猶考也。具,俱也。嚴,儼也,敬也。言五辭之聽,既有眾證,又當察兩造之貌而參考之,《周禮》所謂 色聽也。若不簡孚,則不理其獄刑者。代天用威之事,當恪敬行事,毋輕議 刑也。

墨辟疑赦,其罰百鍰,閱實其罪。劓辟疑赦,其罰惟倍,閱實其罪。剕辟疑赦,其罰倍差,閱實其罪。宮辟疑赦,其罰六百鍰,閱實其罪。大辟疑赦,其罰千鍰,閱實其罪。墨罰之屬千。劓罰之屬千,剕罰之屬五百,宮罰之屬三百,大辟之罰其屬二百。五刑之屬三千。上下比罪,無

僭亂辭,勿用不行,惟察惟法,其審克之!

墨,即黥也。辟,擘也,法也。罰者,以銅爲罰也。鍰皆作鋝,鋝重六 兩又十六銖也,百錢四十一斤也。閱實,猶簡孚也。倍,陪也,猶重也。劇 罰惟倍,八十三斤也。剕,跀足也。差,猶二也,倍之外又加三分。所倍之 二,則爲銅百三十八斤有奇也。宮者,男子割勢,女子閉于宮中也。六百鉻, 爲銅二百五十斤也。大辟,死罪也。千舒,四百一十六斤有奇也。屬,猶類 也。《尚書大傳》云:「非事而事之,出入不以道義而誦不祥之詞者,其荆墨。 觸易君命,革輿服制度。姦宄盜攘傷人者,其荆劓。決關梁踰城郭而略盜者, 其川ध。男女不以義交者,其川宮。降畔寂賊劫略奪攘橋虔者,其川死。 | 此其類也。《周禮》五刑,屬各五百,此則墨劓,倍手其初。宮與大辟,皆從 减焉。上重也,下輕也,比附于例也。僭,假也。亂,亂也。辭,兩造之詞 也。不行者,已革除之法也。察,覆審也。言上比下,比期當其辠,無假亂 其辭,或飾辭以指示之,如今之教供。或鍛煉而周內之,如今之改供也。凡 科條之已捐除者,勿再比用。若復用之,則刑罰不信,民無所措手足也。凡 此皆纖維,當察專用,今法其精詳而勞勉之也。按:大辟可贖,則殺人者皆 不死,豈可以爲訓哉?唐虞之世,贖刑承鞭扑而言,不在五刑之列。穆王假 託而一切用之,所謂耋荒也。

上刑適輕,下服;下刑適重,上服。輕重諸罰有權。刑罰世輕世重,惟 齊非齊,有倫有要。

適,之也。服,艮也,治也。權,縣也,縣以稱物輕重者也。世,當其時也。齊,猶一也。倫,猶理也。要,猶中也。言本在上刑之條而情之于輕,則減等治之;本在下刑之條而情之于重,則加等治之。輕重諸罰,令皆如衡有縣,惟其平耳,不可執一也。世輕世重,按:有兩說,《周禮》「新國用輕典,平國用中典,亂國用重典。」此一義也。《荀子·正論》「治則刑重,亂則刑輕。」楊注云:「治世家給人足犯法者少,有犯,則眾惡之辠,固當重。亂世人迫于飢寒,犯法者多,不可盡用重典,當輕。」此又一義也。推穆王之意,用夏刑大辟二百,宮辟三百,臏辟五百之數,則于周制五刑各五百爲從輕,疑當如荀卿之說也。惟在齊其參差不一者,而使之平,則凡刑罰無不理而順中而正矣。

罰懲非死,人極于病。非佞折獄,惟良折獄,罔非在中。察辭于差,非從惟從。哀敬折獄,明啟刑書胥占,咸庶中正。其刑其罰,其審克之。

獄成而孚,輸而孚。其刑上備,有並兩刑。」

佞,巧讇高材也。良,善也。差,不齊一也。啓,启也,開也。胥,相也,實閱也。占,帖也。書,署也。輸,猶寫也,謂讞獄于王也。備,葡也, 具也。言罰以懲戒于人,人即非死,已極于病苦,是故折獄不可不愼也。口 才辯給之人,能使囚窮于辭,則容有辭屈無以自解而枉入于刑者。故非佞人 可以折獄,惟良善之人,公正不偏,無不合乎中也。供辭或有參差,于其參 差精察之,以求得其精,非從其辭,惟從其情耳。死者不可復生,絕者不可 復續,當哀矜敬愼明開刑書,相與隱度而書署之,庶幾皆切于中正。或刑或 罰,其詳審而勤勉之,不宜苟且從事也。至獄成而信,輸寫其本末以告于王, 亦無不信其刑之麗,當備具于上也。或有一罪而疑輕疑重介于兩刑之間者, 則並兩刑而上之,以待決于朝也。

王曰:「嗚呼!敬之哉!官伯族姓,朕言多懼。朕敬于刑,有德惟刑。 今天相民,作配在下。明清于單辭,民之亂,罔不中聽獄之兩辭,無或 私家于獄之兩辭!獄貨非寶,惟府辜功,報以庶尤。永畏惟罰,非天不 中,惟人在命。天罰不極庶民,罔有令政在于天下。」

官伯,刑官之長。族姓,同姓諸臣也。德,悳也,猶惠也。相,遐也,猶助也。配,妃也,猶對也。單辭,一人之言,《論語》所謂片言也。兩辭,兩造之言。私,厶也,背于公也。私家,猶偏向也。寶,保也,猶守也。府,猶聚也。功,訌也,潰也,或曰恐也,懼也。庶,猶眾也。尤,試也,辜也。極,猶中也。令,讀爲良,善也。歎息言:爾官伯族姓,無不當敬刑也。我言之猶尚多懼,我敬于刑以刑罰者,正所以惠民,非所以威民。今天助民作之君,以配于下土,使代天用刑,在先明清于一人之辭,即知其情僞。蓋民之所以治者,無不在中聽獄之兩辭,無或偏向于獄之兩辭。凡折獄有偏向,黷貨爲多,不知以獄得貨,貨非可守,但聚其罪而可畏可懼,天將報之以眾罪也。故所當長畏者,惟刑罰之用耳。天道至公,非稍有不中之處,惟人自取之。故天命之罰也,天非獨罰民也。用刑罰者,不建中以敷錫庶民而無善政在于天下,則天亦將罰之也。《五行傳》云:「王之不極,是謂不建,厥罰恆陰。」

王曰:「嗚呼!嗣孫,今往何監,非德?于民之中,尚明聽之哉!」

嗣孫,嗣世子孫也。監,視也。德,惠也,猶惠也。歎息言:嗣孫自今 以往,何監?豈非施惠于刑民而得其中正,庶幾明聽我言而行之哉! 哲人惟刑,無疆之辭,屬于五極,咸中有慶。受王嘉師,監于茲祥刑。

哲人,謂王也。惟,思也,猶圖度也。疆,竟也,猶窮也。辭,詞也,猶聞譽也。屬,猶續也。五極,《洪範》之五皇極也。嘉、祥,皆善也。師,眾也。按:「尚明聽之哉」以上王言已畢,「哲人惟刑」以下乃呂侯之言,道揚王命也。言:明智之人,立此新法。敬慎用刑,將有無窮之聞于後世。蓋其道接續于《洪範》之五皇極,皆協于中而有福慶,所謂錫福庶民,會極歸極也。有典獄之責者,庶幾受王之良民而治之,視此吉善之刑罰也。言嘉師者,民本無不善,其麗于刑罰者,非迫于飢寒,則陷于習染耳!

文侯之命

《敘》曰:「平王錫晉文侯秬鬯、圭瓚,作《文侯之命》。」平王,幽王之子,穆王八世孫也。幽王取申國之女爲后,生太子宜曰。又得褒姒,生伯服,而黜申后,廢宜曰。宜臼奔申,申侯與犬戎攻宗周,弑幽王于戲。晉文侯與鄭武公迎宜臼而立之,遷于東都,是爲平王。《國語》曰:「晉文侯于是乎定天子」,此之謂也。平王嘉文侯之功,賜之秬鬯、圭瓚。秬鬯,釀黑黍爲酒也。圭瓚,勺之以圭爲柄者,所以酌鬯酒祼祭者也。宗廟之盛禮,諸侯非賜不得用,九命乃錫之。馬本「王」上無「平」字。劉向《新序》、馬遷《史記》,皆以此篇爲襄王命文公重耳,恐非。

王若曰:「父義和!丕顯文武,克慎明德,昭升于上,敷聞在下;惟時 上帝,集厥命于文王。亦惟先正克左右昭事厥辟,越小大謀猷罔不率從, 肆先祖,懷在位。

天子于同姓諸侯偁伯父。義和,文侯字也。晉穆侯以條之役生太子,故名曰「仇」。仇,讎也。古人名字相應或相反以爲應,故字義和。義,誼也。和,龢也,猶言宜龢也。義、和亦疊韻連語。鄭康成讀「義」爲「儀」,從《爾雅》訓「匹」,不知儀、仇訓「匹」者,借義爲儷,借仇爲讎耳,恐非也。呼字不名者,尊寵之也。馬融訓:能以義和我諸侯,則以文侯爲文公重耳,亦非。顯,暴也。明,朚也,猶黽勉也。德,悳也。昭,明也。升,登也,猶上也。先正,謂晉侯祖父也。昭,劭也,勉也。越,粤也,于也。猷,當作猶,讀爲儀,圖度也。率,述也,循也。肆,故詞也。先祖,謂成康以後也。懷,褒也,猶安也。言周之先允文允武,能愼勉其德格于上下,故受天命爲天子。亦惟爾先世之祖,能輔助勉事其君于小大謀猷,無不述循順文武之訓,故我

歷世先祖皆安于天位也。

嗚呼!閔予小子嗣,造天丕愆。殄資澤于下民,侵戎我國家純。即我御事,罔或耆壽俊在厥服,予則罔克。曰:惟祖惟父,其伊恤朕躬!嗚呼! 有績予一人永綏在位。

閔,猶病也。造,遭也,遇也。資,積也,猶積也。戎,犬戎也。純,屯也,難也。御事,謂王朝治事之臣。俊,當作咎。服,當作躬,見漢武帝詔,今從之。克,肩任也。祖、父,祖行、父行也。伊,詞也。恤,侐也。績,功也。綏,妥也,安也。歎息言:傷予小子繼遭天降大愆,絕先祖之積澤于下民,爲犬戎侵犯,我國家受其屯難,即我朝治事之臣,多有死傷,則皆予無能肩任之咎,曰:惟爾庶邦祖行父行之侯,其憂恤予身乎!又歎息言:能以勞定國,有功于予一人,予庶幾長安在位也!

父義和!汝克紹乃顯祖,汝肇刑文武,用會紹乃辟,追孝于前文人。汝 多修,扞我于艱,若汝,予嘉。」

昭,光明也。顯祖,當謂唐叔虞也。肇,劭也,敏勉也。刑,型也,猶 法也。會,衛也,猶護也。紹,繼也。前文人,先文德之人,謂其祖父也。 戰功曰多。修,飾也,猶掃除也。扞,斁也,止也。言汝能光乃顯祖,汝敏 勉以效法文武之道,用護衛嗣續乃君,追孝于爾先人。汝功甚多,于我艱難 之時,除患定亂,如汝者,我所嘉也!

王曰:「父義和!其歸視爾師,寧爾邦。用賚爾秬鬯一卣,彤弓一,彤 矢百,盧弓一,盧矢百,馬四匹。父往哉!柔遠能邇,惠康小民,無荒 寧。簡恤爾都,用成爾顯德。」

師,眾民也。寧,寍也,安也。秬鬯,以裸祭者也。卣,即酉字,中尊也。彤,赤色。盧,驢也,黑色。馬四匹,車一乘也。《禮緯·含文嘉》云:「九錫:一車馬,二衣服,三樂則,四朱戶,五納陛,六虎賁,七斧戉,八弓矢,九秬鬯。」經文不備者,《禮緯》亦後世之書,未必周制如此也。荒,忘也,忽也。簡,柬也,猶閱也。恤,侐也,猶安也。蓋遣令歸國,而言其歸視爾民,安爾國,用賜爾秬鬯、弓矢、車馬,以奉祭祀,以專征伐,以節勞勩。父往哉,其柔懷遠人而順恕其近者,以仁安小民爲事,庶幾無忘忽,無安佚,簡閱爾眾,安靖爾民于爾國都,以成爾光明之德也!

費誓

《敘》曰:「魯侯伯禽宅曲阜,徐夷並興,東都不開。作《費誓》。」按:費,讀爲粊,魯東郊地名,當在今山東兗州府曲阜縣,已無考。若費國于春秋桓莊之世并于魯,爲季氏邑,則在今兗州府費縣西北二十里,去曲阜且三百里,非作《誓》之地也。粊,《史記》作「肸」,伏生《大傳》作「鮮」,一作「彌」,未詳。曲阜,其山委曲長七八里,故名。徐夷,徐戎淮夷也。時伯禽有三年之喪,徐戎作難,喪卒哭而征之,急王事也。此與三監及淮夷叛,作《大誥》,乃兩時兩事,《史記》誤合爲一也。是篇古文在《呂刑》前,魏晉間人移于《秦誓》之上,使諸侯之書從其類,以比《魯頌》之居《詩》末也。

公曰:「嗟!人無譁,聽命。徂茲淮夷、徐戎並興。

公,魯侯伯禽也。五等諸侯,在本國臣民皆偁公。嗟,當作壽,嗞也,發聲也。人,謂軍士及費地之民。譁,謹囂也。徂,往也。淮夷,淮北之夷。徐戎,戎之在徐州者。興,起也。言往征此淮夷、徐戎並起爲寇者也。

善穀乃甲胄, 敵乃干, 無敢不弔! 備乃弓矢, 鍛乃戈矛, 礪乃鋒刃, 無敢不善!

穀,擇也,鄭謂穿徹之也。乃,猶汝也。甲,在身; 冑,在首。敵,擊 連也,鄭謂繫也。干,戰也,盾也。弔,讀爲俶,善也。備,葡也,具也。鍛, 小治也。以金入火焠而椎之,愈段愈堅也。礪,當作厲,旱石可摩以利刃也。 鋒,當作縫,兵耑也。刃,刀堅也。

今惟淫舍牿牛馬,杜乃檴,敜乃穽,無敢傷牿。牿之傷,汝則有常刑!

淫,甚也,大也。舍,捨也,釋也。牿,讀爲梏,手械也。牛馬,以前 足爲手,施木其上,使不得疾走奔逸也。杜,數也,閉也。擭,柞鄂也。柞鄂 者,竹之筰木之格,連絡交互穿地,淺者設于其中,以爪持獸足,使不得躍 出也。敜,塞也。穽,陷也,穿地爲塹,以陷獸者也。常,長也。刑,荆也, 法也。

馬牛其風,臣妾逋逃,勿敢越逐,祗復之,我商資汝。乃越逐不復,汝 則有常刑!

牝牡相誘曰風,風則狂走而逸。臣妾,廝役扈養之屬。古者兵車一乘, 甲士三人,步卒七十二人,其外有餘子二十五人,任刈艸、汲水、炊烹、養 馬者是也。古軍中亦有丁女,不可爲法。逋、逃,皆亡也。越,越也,踰也。 逐,追也。越逐則失部武行列,故禁之。祗,敬也。復,還返也。失主雖不 得逐,而人得之者,當敬還其主也。商,賞也,賜也。費,賜也。越逐者, 失律;不復者,攘竊,故皆常刑也。

無敢寇攘,逾垣牆,竊馬牛,誘臣妾,汝則有常刑!

寇,強取也。攘,纏也,猶言徒手奪之也。誘,相誠評也,猶引也。言 無敢如此,敢則有常刑也。

甲戌,我惟征徐戎。峙乃糗糧,無敢不逮;汝則有大刑!魯人三郊三遂, 峙乃楨榦。甲戌,我惟築,無敢不供;汝則有無餘刑,非殺。魯人三郊 三遂,峙乃芻茭,無敢不多;汝則有大刑!」

獨言徐戎者,攻擊有先後也。峙,當作峙,讀爲庤,儲置屋下也。糗,熬米麥也,路食爲糧。逮,及也。大刑,大辟也。國外四面曰郊,鄉在郊內。郊外四面曰牧,遂在牧內。此言三郊、三遂者,東郊之人畱守,不從征也。凡築牆,木植于兩耑者曰楨,版設于兩邊者曰榦。築者,築攻敵之壘、距、堙之屬也。供,龔也,給也。無餘刑,非殺者,謂盡奴其妻子,不遺種類,在軍使給廝役,反則男子入于罪隸,女子入于舂藁,不殺之也。芻,刈艸也。茭,牛蘄也,亦名馬蘄。葉細銳似芹,牛馬喜食之,故茭亦訓乾芻也。糗糧、芻茭,供人馬之食,軍中一日不可乏者,故有誤則皆服大刑。

秦誓

《敘》曰:「秦穆公伐鄭,晉襄公帥師敗諸崤,還歸,作《秦誓》。」按:秦,今甘肅秦州清水縣也。鄭,在今河南開封府新鄭縣。晉,在今山西平陽府翼城縣。帥,達也,猶領也。崤,當作般,晉地,在今河南河南府永寧縣北五十里。山有東西二陵,道出其間。《春秋傳》魯僖公三十年,秦穆公與晉文公圍鄭,鄭使燭之武夜見秦伯,穆公與之盟而還,使杞子逢孫、楊孫戍之。三十二年,杞子自鄭使告秦曰:「鄭人使我掌其北門之管,若潛師以來,國可得也。」穆公訪諸蹇叔,蹇叔以爲不可。公不聽,召孟明、西乞、白乙使出師。三十三年,晉文公薨,未葬,子襄公墨線以從戎,要秦師于殽而擊之,俘其三帥以歸。襄公之母文贏,秦穆公女也。請于襄公而釋三帥。三帥還歸,穆公素服郊次哭而迎之,是其事也。還歸作《秦誓》,當謂三帥歸,而公作此

公曰:「嗟!我士,聽無譁!予誓告汝羣言之首。

士,通臣民之偁也。予,余也。首,猶言最上也。羣言之首,眾言中之 第一誼也。

古人有言曰:『民訖自若,是多盤。』責人斯無難,惟受責俾如流,是 惟觀哉!

訖, 汔也, 猶盡也。若, 順也。盤, 昪也, 樂也。責, 諫也, 數其失也。 斯, 詞也。難, 即艱也。俾, 猶從也。如流, 如水之流順而相從也。言古人 謂人盡自順其性, 喜于惟其言而莫違, 是以多樂。豈知忠言逆耳利于行, 以 我責人則易,惟受人之責從之如流水,此爲難也。穆公悔不聽蹇叔之言,故 深有味于古語而首舉之也。按: 般、難、艱, 叶韻。

我心之憂,日月逾邁,若弗云來。

憂, 夏也, 愁也。逾, 越進也。邁, 遠行也。云, 囩也, 回也。言我心之所愁者, 前日之事既往, 今追悔而無及, 若日月之邁, 往而弗能轉來也。

惟古之謀人,則曰未就予忌;惟今之謀人,姑將以為親。雖則云然,尚 猷詢茲黃髮,則罔所愆。」

古之謀人,謂蹇叔、百里奚也。《公》、《穀》、《史記》皆以蹇叔、百里奚同諫,孟明視爲百里奚子,西乞術、白乙丙爲蹇叔子,同送其子而哭之,不可執左氏而沒其實也。未,當作來,形近而誤。就,猶成也。予,余也。忌,基也,毒也。今之謀人,謂杞子也。姑,及也,聊且之詞也。將,將也,扶也。雖,假設之詞也。則,之爲言曾也。云,曰也。然,嘫也。猷,當作猶,讀爲儀,猶謀也。詢,當作訊,問也。茲,此也。黃髮,老人髮白復黃也。愆,過也。言于老成之人則曰來,成余毒;于少年新進且相扶以爲親。雖曾謂,然自今思之,庶幾謀問此老成人,則無所過失耳。按:然、愆,叶韻。

番番良士, 旅力既愆, 我尚有之; 仡仡勇夫, 射御不違, 我尚不欲。惟 截截善諞言, 俾君子易辭, 我皇多有之!

番,皤也,老人頭白貌也。旅,膂也,腄骨也,腄強則力壯。愆,緣也,

偏緩也。仡,勇壯也。違,韋也,猶失也。截截,重言形況字,簡括明晰之意。諞,便,巧言也。俾,使也。易,傷也。辭,詞也。皇,愿也,猶暇也。言老成善士雖膂力已衰,我庶幾其有之;新進勇夫,雖嫻于射御,我庶幾不欲用之;若巧言便佞之人,能變易君子之詞,使聽者以美爲惡,則萬不可近。我豈暇多有之以自娛乎?

昧昧我思之,如有一介臣,斷斷猗無他技,其心休休焉,其如有容。人 之有技,若己有之。人之彥聖,其心好之,不啻如自其口出。是能容之, 以保我子孫,黎民亦職有利哉!

昧昧,猶默默也。介者,孤特之意。斷斷,誠一之貌。猗,兮,詞也。 他,迆也,猶褒也。技,巧藝也。休休,寬容貌。容,猶受也。美士爲彥。睿 通爲聖。容,猶受也。黎,齊也,猶眾也。職,猶主也。利,讀爲賴,猶恃 也。言靜言思之,如有一耿介端慤之臣,誠一不僞,無他謬巧,其心寬大能 容物,人之有才藝者,如己有之。人之賢聖,則其心好之,不但如口中之贊 美,如是之臣,能容眾善以助國,以故能保安我子孫也,則眾民亦主有倚恃 者哉!

人之有技,冒疾以惡之;人之彥聖而違之,俾不達是不能容,以不能保 我子孫,黎民亦曰殆哉!

冒,冢也,猶蔽也。疾,嫉也,妒也。亞,證也,相毀也;或曰亞也,猶憎也。[一]違,離也,猶遠也。俾,使也。達,通也。殆,危也。言人有技則蒙蔽妒害以詆毀之,忌其能之勝己也。若彥聖者,則必遠之,使不能通于君,畏其德之不能感悟人也。如是之臣,不能容人善以誤國,以故不能保安我子孫也,則眾民亦危矣哉!

校勘記

[一] 亞,原文中無此字,當是「惡」字之誤,訓誣也,相毀也,憎也。下二亞字同。

邦之杌隉,曰由一人;邦之榮懷,亦尚一人之慶。」

杌,當作阢,阢隉,疊韻連語,猶槷點不安也。由,繇也,猶從也。榮, 瑩也,猶光明也。懷,襄也,猶安也。尚,庶幾也。慶,猶賜也,或曰善也。 言國之傾危,由于所用之一人,國之光榮而安,亦庶幾所用一人之賜,用人 可不詳慎乎哉?按:悔過者,修身之要;用人者,治國之本。穆公此篇,駸 駸乎合于王道,故夫子錄之以附于《尚書》也。

附:《清史稿·儒林二》朱駿聲傳

朱駿聲,字豐芭,吳縣人。年十三,受許氏《說文》,一讀即通曉。從錢 大昕游,錢一見奇之,曰:「衣鉢之傳,將在子矣!」嘉慶二十三年舉人,官 黟縣訓導。咸豐元年,以截取知縣入都,進呈所著《說文通訓定聲》及《古 今韻準》、《柬韻》、《說雅》,共四十卷。文宗披覽,嘉其洽,賞國子監博士銜。 旋遷揚州府學教授,引疾,未之官。八年,卒,年七十一。

駿聲著述甚博,不求知於世,兼長推步,明通象數。嘗論《爾雅》太歲在寅,推大昕說,謂其時自以實測之歲星在亥,定太歲在寅,命之曰攝提格以紀年,歲星所合之辰,即爲太歲。然歲星閱百四十四年而超一辰,至秦、漢而甲寅之年歲星在丑,太歲應在子。漢詔書以太初元年爲攝提格者,因六十紀年之名,歷年以次排敘,不能頓超一辰,故仍命以攝提格也。於是後人以寅、卯等爲太歲,強以攝提格等爲歲陰。其實《爾雅》所云歲陽、歲陰,非如後人說也。他著有《左傳旁通》十卷,《左傳識小錄》三卷,《夏小正補傳》一卷,《離騷補注》一卷。

(《清史稿》卷四百八十一,列傳二百六十八,儒林(二),第13236頁,中華書局1977年版。)